

**SIXTH LEGISLATIVE ASSEMBLY OF MIZORAM  
( EIGHTH SESSION )**

**LIST OF BUSINESS**

**FOR FIFTEENTH SITTING ON WEDNESDAY, THE 27<sup>th</sup> JULY, 2011  
( Time 10:30 AM to 1:00 PM and 2:00 PM to 4:00 PM )**

**QUESTIONS**

1. *Questions* entered in separate list to be asked and oral answers given.

**FINANCIAL BUSINESS**

2. **DISCUSSION AND VOTING ON DEMANDS.**
  - (i) **Pu H. LIANSILOVA**, Minister to submit to the vote of the House various Demands under his charge.
  - (ii) **Pu LAL THANHAWLA**, Chief Minister to submit to the vote of the House various Demands under his charge.

**LEGISLATIVE BUSINESS**

**Bills for introduction, consideration and passing.**

3. **Pu H. LIANSILOVA**, to beg leave of the House to introduce "The Mizoram Appropriation (No. 3) Bill, 2011".

ALSO

to introduce the Bill  
to move that the Bill be taken into consideration  
to move that the Bill be passed.

VANLALNGHENGA  
Additional Secretary

**DEPUTY SPEAKER** : Sual hawisanin thil tha ti rawh se; Remna zawngin um zel rawh se. (I Petera 3:11)

Zawhna leh Chhanna hun a ni a. Zawhna Starred Question, 211-na kan la ang a, a zawt turin kan Member zahawmtak Pu K. Liantlinga ilo sawm ang.

**Pu K. LIANTLINGA** : Pu Deputy Speaker, ka lawm e. Hon'ble Minister zahawmtak, Social Welfare Department changtu, ka zawhna Starred Question 211 na chu hei hi a ni –

- a) ICDS hi Directorate puitling-a dah turin Central Sorkar hian State Government hnenah hian vawi engzatnge a rawn hriattir tawh?
- b) ICDS Directorate hrana dah tur hian State Sorkarin hma a la em? Engchen nge a kalpui tawh min hrih thei em? tih a ni e.

**DEPUTY SPEAKER** : A chhang turin a changtu Minister zahawmtak Pu P.C. Lalthanliana ilo sawm ang.

**Pu P.C. LALTHANLIANA, MINISTER** : Pu Deputy Speaker, kan Member zahawmtak Pu K. Liantlinga zawhna –

a) ICDS hi Directorate puitling-a dah turin Central Sorkar hian State Government hnenah hian vawi engzatnge a rawn hriattir tawh ? tih chhanna chu ICDS (Integrated Child Development Scheme) bik mai nilovin Women & Child Development hi Department hrana dah tura tihna lehkha Govt. of India atangin vawinga(5) a hmu tawh tih a ni. Chung lehkha No. & Date a hnuaiah hian tarlan a ni.

b) ICDS Directorate hrana dah tur hian State Sorkarin hma a la em? Engchen nge a kalpui tawh min hrih thei em? tih chu Women & Child Development Department hi Social Welfare Department atanga Directorate hrana dah tur hian Department lamin ruahmanna a kalpui mek a, a exercises mek a ni tih kha ka chhan theihna a ni e.

**DEPUTY SPEAKER** : Zawhbelhna Pu K. Liantlinga, chumi zawhah Pu Duhoma.

**Pu K. LIANTLINGA** : Pu Deputy Speaker, ka lawm e. Tuna a rawn sawi kha ICDS tiin ka rawn dah mai a. Women & Child Welfare Department-ah hi chuan juvenile, ICDS, ICPS, Protection of Women from Domestic Violence tihte, heng hrang hrangte hi a awm a, amaherawhchu pakhat ka'n sawi a, min lo hriatthiam ka'n duh a. Ni e, draft-te pawh awm ni khan ka hria a, Directorate hranpa-a din tur hian. Amaherawhchu vawiin thlenga ala ding lo hi kan inzawt zeuh zeuh tawh niin ka hria a, hei hian Mizoramah harsatna hrang hrang kan tawh thei a, a chhan chu hmeichhiate hi voters 50% an ni hial mai a. Hmeichhiate chungchang thu ngaihtuah tur bikte, tin naupang

lo la thanglian turte, khang ang kha hlamchhiah a nasa te pawhin a lang a. Tin, Centrally Sponsored Scheme 100% te tin, 90% te, tam tak kan enjoy theih loh phah a, a rang lamin hengah hian hma i la thei angem? Mipuite mamawh, heng ang chi phurhruk tur hian kan sorkar chak tak hianin a rang thei angin in tihsak theih angem? tih kha ka zawhbelhna a ni e. Pu Deputy Speaker, ka lawm e.

**DEPUTY SPEAKER** : Pu Lalduhoma.

**Pu LALDUHOMA** : Pu Deputy Speaker, Social Welfare Department hi Department hmingtha tak a ni reng thin a. Amaherawhchu, tunhnaiah hian Anganwadi-a sem tur Medicine Kit tender a ni a. Chu chu kit khat hi Central sorkar instruction angin ₹ 600 aia to a lei awih loh a ni a. Pathumin an chhang a, pahnih chuan ₹ 600 aia hniam ve vein an chhang a. Mahse, Central thupek aia sang ₹ 880 a chhangtu hi pek an tum niin kan hria a. hei hi a dik em? a la siamthat theih em? tih ka zawt a ni.

**DEPUTY SPEAKER** : Chhang turin a changtu Minister Pu P.C. Lalthanliana ilo sawm ang.

**Pu P.C. LALTHANLIANA, MINISTER** : Pu Deputy Speaker, zawhna neitu Pu K. Liantlinga, member zahawmtak khan kan zawt thin a, vawiin thlengin la ruahman leh exer mek a ni tiin kan inchhang rei ta hle tih a ni a. Boxing-a champion-te pawh hi an khelh chhung aiin an exer lak chhung hi a rei a, chuvangin exer tha taka lak hian an champion chauh a ni a. Chuvangin tha taka kan neih theihna tur hi chuan a ruahmanna tih chhung hi chutimaia tih theih a ni lova. Tin, ICDS Department hi Directorate hrana kan neih loh avang hian Central Scheme kan enjoy theih loh pakhatmah a awm lova. Tin, a State anga kan kalpuinaah harsatna a awm lo a ni tih hi ka'n sawi duh a. Keini pawhin Pu Deputy Speaker, Directorate hrana neih theiha a department-a Officer-te kum tam tak promotion, stagnation nasa lutukte hi siamrem theih hi kan duh dan a ni. Tin, chumai bakah kan Party Manifesto-ah Women & Child Development hi ngaih pawimawh a, Directorate hrana dahte pawh hi kan dah a ni. Amaherawhchu, vawinah thil hi a tih zung zung theih lova, kan State sorkar sum dinhmun neihte en a ngai a, chuvangin kan exer mek a, kan ngaihtuah mek a ni tih avanga tih tut theih chu a ni lo a ni tih kan member zahawmtak ten min hriatthiampui ka duh a ni.

Tin, helaia kan member zahawmtak Pu Lalduhoma zawhna, hemi Anganwadi-a Medical Kit supply turah a rate Central-in Norms a neih aia sanga pek tumna a awm em ni? tih kha. A ngaihtuatu Committee-ah ka va thu ve chiah lova, State Level Purchasing Board kut a ni a. Hetah hian Pu Deputy Speaker, a rate hniam anga Kit-te kha hemi Medical Kit-ah hian item 12 awm tur a ni. Amaherawhchu, a rate hniamte hi Medical Kit a tling pha lo deuh niawm a ni a. Item 5 te 6 te a awm mai niawm tak a ni. Chuvang chuan Medical Kit hi tihhram kan duh chuan a Medical Kit dik tak item 12 awm thei kha Department chuan a ngai pawimawh tur a ni mai a, a rate bituk awm mahse a rate bituka

Medical Kit tlinglo, item 12 awm silo kan lak kha a fuh ber lo mai thei a, engpawh nise chutiang chu ka chhan theih dan ni mai teh se, ka lawm e.

**DEPUTY SPEAKER** : Starred Question No. 212-na zawt turin kan Member zahawmtak Pu T. T. Zothansanga ilo sawm ang.

**Pu T. T. ZOTHANSANGA** : Pu Deputy Speaker, ka lawm e. Hon'ble Minister for Transport min chhan atan ka zawhna chu hei hi a ni – Champhai Maxi Cab Counter hi khawiah nge a awm? tih a ni.

**DEPUTY SPEAKER** : A chhang turin a changtu Minister zahawmtak Pu P. C. Zoram Sangliana ilo sawm ang.

**Pu P.C. ZORAM SANGLIANA, MINISTER** : Pu Deputy Speaker, Member zahawmtak Pu T. T. Zothansanga zawhna chhanna chu – Champhai, Khawzawl, Zokhawthar leh hmundangah te hian an awm hlawm a ni. Tin, Aizawl leh Champhai inkar service tan pawh abikin Aizawl leh Champhai inkar service tan Agent Licence pek a ni a, chu chu Electric vengah 2 a awm.

**DEPUTY SPEAKER** : Zawhbelhna Pu T.T. Zothansanga.

**Pu T.T. ZOTHANSANGA** : Pu Deputy Speaker, ka lawm e. Electric Vengah sawn Counter kan nei thin a, tunhma atang khan Electric veng Welfare te leh Maxi Cab lam hotuten sawlai saw hnawk an ti a. Champhai lam hian Maxi Cab kan ngah khawp mai a, nikum December ni 18 khan ka haw chho a, chutah chuan Maxi Cab service ringawt hi 68 ka tawk chho a ni. Electric Vengah sawn kan hnawk angreng khawp mai a, thenkhat min chawitir thin a, khatianga Counter kawt a nih rau rau kha chuan chawitir loh kha nise kan duh a.

Tin, tunhnaiah order a chhuak a, chutah chuan Bawngkawnah Petrol Pump piahah min sawn sak a. Tin, chutih rualin a then an phei duh lova, rualkhai lo takin tunah hian kan awm a, Electric vengah hian a thenin an la pe reng a, zingkarah. A then sawlamah an hnawt phei laklawh tawh si a. Chuvangin, rualkhai deuha tih kha a thain kan ring a, zingkar dar 7 thleng hianin Electric Vengah a theih a ni an ti a, dar 7 an han tih khan tlemin an inhnawh tawt a, a then Zarkawt-ah an lo biru a, a then Sakawrpului-ah, mumal lo takin passenger-te kha min pan darh tir thin a ni. Electric Venga la tite khan advantage an nei a, S.P order-in sawlamah min pe tawh bawk si a, kha kha kan Minister hian a hrelo em ni aw ka ti a. Chuvang chuan, mumal deuh takin min han tihsak sela kan duh a. Tin, kan duthusam takah chuan, Bawngkawh-ah sawn min siamsak law law se kan duh a ni.

Electric Veng pheia a awm sawn dar 10 a kan chhuah hian khawpui chhungah darkar 2 vel kan tang thin a ni, traffic jam-ah. Chuvangin, kan Minister-

in min hriatpui tura ka'n duh chu Electric vengah min tihsak thei a nih chuan Police-te hnen atanga in harass-na kha pakhatmah awmlo sela, pakhatna-ah chuan ka duh a.

A pahnihna-ah chuan mumal takin mi zawng zawng kha phal mai sela, kan pekte ho kha. Sawlamah a then kan inhnuk pheii si a, a then helamah kan awm laklawk si a, dar 7 hma helaia kan han ti anih pawhin rualkhai takin ti se, hetah kawngdung vela passenger han inchan tir a tam lutuk hi a buaithlak a. Chuvang chuan, helaiah hian decision mumal tak min siamsak thei em? tih kha ka'n zawt duh a. Electric Vengah emaw, Bawngkawn-ah emaw, hemi license nei hi chu sawtah an awm chuan sawtah, hetah an awm chuan hetah ni vek law law tur khan ruahmanna min siamsak thei em? tih kha ka zawt duh a. A mipuiin kan duhna takah chuan Bawngkawn-ah ni law law se kan duh a ni, tih kha ka'n sawi a ni.

**DEPUTY SPEAKER** : Zawhbelhna dang a la awm em? A awmlon chuan a changtu Minister Pu P.C.Zoram Sangliana i lo sawm ang.

**Pu P.C. ZORAM SANGLIANA, MINISTER** : Pu Deputy Speaker, Mizoram Motor Vehicle Rule, 1995 tlawhchhan hian, passenger phur chi Bus te, Maxicab-te Ticket Booking counter hi Agent Licence pek a ni thin a. Chutah chuan Maxi Cab tan chauh ni lovin midang tan pawh heng atan hian hman theih a ni tihna a ni. Maxi Cab tan bik liau liau hian Counter kha a bik a ni lova, midang tan, Bus tante pawh tawm theih tho tihna anih chu, chutiang anihna karah chuan Champhai District han ti mai ilangin, khilam pang Champhai khua chauh pawh nilo tan hian hmun hrang hrangah ticket counter agent licence hi pek a ni a, nichina ka sawi ang khan Electric Vengah hian mi pahnih pek an ni a, hmun dang ami pawh pek an ni a, heng agent licence-te hi kum khat atan a nung a, kumkhatah khan a fee ₹ 10,000 an chawi a, tiang chu pek dan a ni a. Tin hemi an dinna stand leh counter tih vel hi kan department purview a ni vak lova, Home Department SP (Traffic) tena an rawn buatsaih a ni a, chutiang chuan kan lo ti thin a. Tuna MLA zahawmtakin Champhai khua leh khilam harsatna a sawite pawh kha traffic management committee-ah te kan lo thlir dawn nia.

**DEPUTY SPEAKER** : Starred Question 213-na zawt turin member zahawmtak Lt. Col. Z.S. Zuala i lo sawm ang.

**Lt. Col. Z.S. ZUALA** : Pu Deputy Speaker, Minister zahawmtak Animal Husbandry & Veterinary Department changtuin khawngaih taka min chhansak turin –

- 1) Assam/Meghalaya atanga Bawng talhtur lakluh hi a kal tluang em?
- 2) Engzatnge kan State-ah hian kan lakluh tlangpui? Ka lawm e.

**DEPUTY SPEAKER** : A chhang turin a changtu Minister Pu Nihar Kanti i lo sawm ang.

**Pu NIHAR KANTI, MINISTER** : Pu Deputy Speaker, Member zahawmtak Lt. Col. Z.S. Zuala zawhna chhanna chu –

- a) Assam/Meghalaya atanga Bawng talhtur lakluh hi a kal tluang e.
- b) Assam/Meghalaya atanga lakluh Vairengte Checkgate kaltlang record atangin thla khatah hrut rual (average) in Bawng 33 lut ang a ni.

**DEPUTY SPEAKER** : Zawhbelhna Lt. Col. Z.S. Zuala.

**Lt. Col. Z.S. ZUALA** : Pu Deputy Speaker, Assam Meghalaya-a BSF duty-te khuan Truck-a hetiang Bawng rawn tawlh ho hi rei tak tak an delay thin a, chuvangin truck-a phurtute khan an duh lova, engemaw chen chu bawng pawh an rawn phur duh lova, khatah khan harsatna bawng talhtu ten an nei a, kha kha BSF a thu neitute nen hian hmalakna an lo nei tawh a, problem an neih loh chuan a lawmawm a. Chuti anih loh chuan BSF hotute nen hian engemaw tia inbiak a awlsam zawk a, khuti lai rawn kaltlang theihna tur khuan hmalakna an nei em? tih kha ka zawhbelhna chu a ni e.

**DEPUTY SPEAKER** : Pu Nihar Kanti, Minister chhang turin i lo sawm ang.

**Pu NIHAR KANTI, MINISTER** : Pu Deputy Speaker, Member zahawmtak sawi kha a dikna lai chu a awm ve tho a. Amaherawhchu, BSF hi Central force an ni a, keimahni purview chiah a ni lova. Engpawh ni se, kan Department kaltlangin pawn lam atanga kan State-a bawng lakluh erawh chu ka lo en zui dawn a ni. Ka lawm e.

**DEPUTY SPEAKER** : Starred Question 214-na zawt turin kan Member zahawmtak Pu C. Ramhluna i lo sawm ang.

**Pu C. RAMHLUNA** : Pu Deputy Speaker, ka lawm e. Health Department Demand kan sawi zo tawh a, pass pawh kan pass tawh naa Question a lo chhuak leh si a. Health and Family Welfare Department changtu Minister zahawmtak chhan atan ka Question 214-na –

- (a) Mizoram Health Care Sheme hi tihtawp tumna a awm em?
- (b) Awm ta lo se, mipuiin an hman tangkaipui zual theih nan awlsam zawka siam theih a ni ang em?
- (c) 2010-2011 leh 2011-2012 chhung hian sum engzat nge sen a nih tawh?’ tih kha ka zawt e.

**DEPUTY SPEAKER** : A chhang turin a changtu Minister zahawmtak Pu Lalrinliana Sailo i lo sawm ang.

**Pu LALRINLIANA SAILO, MINISTER** : Pu Deputy Speaker,  
Member zahawmtak Pu C. Ramhluna zawhna –

(a) Mizoram Health Care Sheme hi tih tawp tumna a awm em? tih chhanna chu ‘Mizoram Health Care Sheme hi tih tawp tumna a awm love.’ tih a ni a.

(b) Awm ta lo se, mipuiin an hman tangkaipui zual theih nan awlsam zawka siam theih a ni ang em? tih hi ‘A theih ang’ tih a ni a. Tin, Insurance Company hmanga Scheme hi kalpui a nih hi kan hre tlang theuh a. Duh angin a kal tluang thei lova hei hi. Engemaw computer emaw, Internet tiang anga inzawm reng kan ni a. Khawl chhiat leh ilo te a awm thin a. 2011-2012 atang hi chuan Insurance Company kaltlang lovin Self Financing System-a tih sorkarin min phalsak a, a awlsam zawka kal theih kan inbeisei a ni.

(c) 2010-2011 leh 2011-2012 chhung hian sum engzat nge sen a nih tawh?’ tih zawhna chu kan chhanna ‘2010-2011 leh 2011-2012 chhung hian, hei hi kum khat chhung a ni a Pu Deputy Speaker, Insurance Company hnenah premium cheng vaibelchhe 6 kan pe tawh a ni’, chu chu ka chhanna a ni e.

**DEPUTY SPEAKER** : Zawhbelhna Pu C. Ramhluna, chumi dawtah Pu R. Lalrinawma, chumi dawtah Pu T.T. Zothansanga.

**Pu C. RAMHLUNA** : Ka lawm e Pu Deputy Speaker, chhanna tha tak kan hmu a. Ka’n sawi duh chu awlsam zawk ka’n tih lai tak hi BPL family leh APL family kan nei tih kan hre theuh a. BPL ho hi a bik takin thingtlang a mi ho hi register a lo ngai a, rin aiin awareness hi an nei tha lo riau mai a, a bik takin keini thingtlang bialtu, hla deuh ho tan pheii chuan kha kha kan face tam em em mai a. Chuvang chuan, an bialtute hian awareness hi tha deuh hleka an lo pek a, registration hi chak deuh hlek leh chianguang deuh hleka an tih dan hi ngaihtuahpui se a tha khawpin ka hria a. An lo kal a Health Care Scheme-ah in in register em? kan ti a kan hre hleinem tih hi a tam khawp mai a, khami kha khawngaih takin lo enpui sela thain ka hria a.

Tin, chu bakah chuan harsa em em chu sum pek ngai hi, sum an pek a ngai si a, an inenkawlinaah khan, chumi tak chu an buaina a ni a, hei hi tunhma ti mai ila, MNF hun laia sum pe lova Sorkar-in anmahni enkawlina tur sum kha an lo pe zawk a, tichuan, a Sorkar bawk khan Insurance Company emaw atanga bill let leh mai theih dan kha a awm thei em? Self Financing kan tih dawn chuan a awlsam leh zualin ka ring a, khami kawng kha min lo ngaihtuahpui sela a thain ka hria a, keini tan chuan kha kha thil lawmawm tak a nih ka ring a.

Tin, thil pakhat leh chu Pu Deputy Speaker, helaia Manifesto-a a landan ang hian damdawiin-a admit kher ni lo, pawn lama damdawia enkawlte pawhin MR an bill theih dan tur ruahman a ni ang tih hi hospitalized case ni lo, pawn lampang-a damlo inenkawlte tan pawh hian Health Care Scheme hi engtikah nge kan hman tan theih ang, kan lo hmang tawh reng nge ni kan la hmang dawn chauh tih kha, hmang dawn ni ta ilang engtik hunah nge ni ang? tih kha kan zawt duh a.

Tin, chubakah chuan ram pawna inenkawl ngai ho hi a buaithlak leh zual deuh hlek a, a chhan chu pawisa nei lo tan chuan inenkawl theih loh kha a ni deuh mai a, a chhan chu an zuk kalna Hospital atang khan credit system kha harsatna kan tawh tawh niin a lang bawh si a, khalaithe kha engtinngan kan Minister zahawmtak hian chinfel a tum tih kha ka zawt duh a. Tin, a dang lehah chuan Sorkar hmasa lama Bank-ah leh Bajaj Allianz lama 10 crores ve ve pawisa an dah kha engzahnge pung ni ta? tih kha Pu Deputy Speaker, ka'n zawt duh bawh a ni e.

**Pu R. LALRINAWMA** : Pu Deputy Speaker, Minister zahawmtakin min chhan theih tho ka ring deuh a. Sorkar hmasain Health Care Scheme a lo kalpui tawhah Reliance Company-in damlo hnenah cheng engzahnge an pek tawh tih leh cheng engzatnge an kutah la awm? tih kha ka'n zawh belh e.

**Pu LALRINLIANA SAILO, MINISTER** : Pu Deputy Speaker, Member zahawmtak Pu C. Ramhluna, zawhna neitu zawhna kha a tha hlawm khawp mai a, lawmawm ka ti a. Hmanni-a discussion kan neih pawh khan kan thahnemngaihna lai tak kha a ni a, nikum lamah kan vannei a kan sawi tawh a, RSBY nen kan tangkawp a, RSBY hi Labour & Employment Central pawisa a ni kan tih tawh kha. Keimahni State pawisa seng lova damlote a bikin BPL ten an dawn theih tur ang chi kha a ni a ₹ 30000 thleng kha, tichuan, nikum khan duhthu a sam lo deuh hlek a, District cover loh pawh kan nei a ni. Central-in an rawn tih ang thlap khan Insurance Company kha kan hmang lo thei lova, chutiang chuan National Insurance Company kan hmang kha a ni a, hunte a thawl lo nen District thenkhat kha kan cover hman ta lo a ni a, tunah hi chuan cover vek kan tum tawh a, tuna member zahawmtakin a sawi ang khan kan tang khawp mai a, training-te kan pe a, nimin pawh khan Mamitah an zo a, hei Champhai lamah te a then chu an chho leh a, tiang khan hei hi kan tang tlanna tur a ni. Central Sorkarin sum a awm a ni an ti a, a awm bawh awm pawh cheng 30000 kha smart card kan han siam sak ve ang a, chu chuan an hmu ang a, khami bak a daih lo a nih chuan State Sorkarin cheng 70000 in APL te tana special-a kan buatsaih kha chu sawi tawh thin a ni. A premium cheng 500 pein, khang te kha cheng 1,00,000/- thleng an ti ve ang a, cheng 750 pein cheng 2,00,000/- thleng an claim ve thei ang a, tin cheng 1000 pein cheng 300000 tiang khan kan siamfel thlap a ni a.

Tin, tunah hian a registration kha engtinngan kan tih ang aw kan ti a, keimah ni Health Department tawp lo pawh hian DC te, Health-ah DC tin hi chairman an ni bawh a, hengte nen leh RD te nen pawh thawh tlan dan a awm angem kan ti a, tiang chuan tan kan la khawp mai a, tuna member zahawmtak rawn sawi kha a dik khawp mai. Tin, sum pek hi ni e, a sawi leh kha, hei hi kan hnunga harsatna kha a ni a, a hma phei kha chuan kan sawi tawh thin a, ba hi vaibelchhe 10 chuang ala awm a ni chutiang chu a ni a, theihtawpin tan kan la a ni.

Tin, damdawi in chung tih kha chu kan la thleng pha rih lo a, a damdawi in chung ami mah hi la chinfel duh angin ala awlsam loh avangin



damdawi ina la in-admit lote kha chu kan la thleng pha lo a ni. Tin, ram pawn, Mizoram pawnah hian kan in refer chhuak nasa hle mai a, a chang chuan kan entitlement lo deuh hlek ang chite pawh hi room nei loah te pawh hianrawn bill telte a ni a, ti khan a complicate riau mai a, heng harsatna engemaw hrang hrangte hi chu a awm ve a, chu chu ka'n sawi duh a ni.

Tin, Pu Deputy Speaker, Cabinet-in a pass tawh a tunah hian RSBY hi nakum atang chuan BPL chauh ni lovin NREGS kan han tih mai job card holder-te zawng zawng hi a pek theih dawn a ni. Chu chu a lawmawm pawh kan ti a, APL pawh a cover dawn a nih chu nakum atang chuan, chu chu a awm thlap mai a, tan kan la hle a ni tih ka'n sawi duh a.

Tin, member zahawmtak Pu Rinawma zawhna kha, a hma khan Reliance Company-ah khan cheng vaibelchhe 27 leh nuai 49 leh 10182 kha lo pek tawh kha a ni a. Kan sawi tawh thin a kan han thut ve khan vaibelchhe 10 pawh kha an lo la pe lo a, vaibelchhe 8 leh nuai 16 kha an lo inpe a, an lo inthen tawh der mai a, tichuan January 5, 2009 khan mi 17 lai mai kha medi assistant an ti a, 3<sup>rd</sup> party Administrator, staff kha Kolkata-ah an sawn thla nghe nghe a, tiang chuan kan bei tang tang a vaibelchhe 17 a tling lo hret a, 16 leh nuai 93 vel kha kan pe a, tichuan an kutah hian vaibelchhe sawm leh nuai sawmnga paruk leh sang riat zariat sawm ruk ala awm a ni tih kha ka chhan theih nise. Tin, member zahawmtak zawhna neitu zawhna, sorkar hmasain an lo dah kha a ni a, Bajaj Allianz kha chu kan sawi thei lova Company an nih avangin, engzatnge pung ka sawi thei lova, keimahni purview chiah a nih loh avangin.

Tin, hei hi kan sawi tawh thin a market recession a awm chuan a rate hi a sawi theih loh. World Market recession hi a nasa em em, market rate kha a that chuan alo pung hluai thei a, a that loh vaih chuan, hei kumin January ni 23 hian a mature dawn a ni a, khatih lai vela market rate a chhiat chuan vaibelchhe sawmah khan ropui lo takin a in chhuah theih ang a, anih lem loh chuan vaibelchhe li/nga, a chuangte pawh hi a pung ve thei a ni.

**Pu B. LALTHLENGLIANA** : Pu Deputy Speaker, market rate kha chhe ta thut sela a interest awmsa as on today kha a zu nghawng hman ve duai thei em?

**Pu LALRINLIANA SAILO, MINISTER** : Interest a hranpain a awm lova, ka hriatsual loh chuan kha mi market rate ang ang kan lak chhuah laia market rate ang chiah kha an count tur niin min hrilh a.

**Pu B. LALTHLENGLIANA** : Pu Deputy Speaker, hmana kan zawh khan a pung kha cheng vaibelchhe thum leh nuai sawmli vel khan min chhang daih tawh a, kha pawh kha kumkhat leh tih chhunga pung anih chuan tunah kum khat leh a chanve a kal leh tawh a, a pung chu a letin a kal ang a, market rate a that leh a chhiat kan hre chuang si lova, market rate alo that lohva vawiin anga a interest chhut tur ang chauh a sawi kha chu a dik thei dawn emaw ni le?

**Pu LALRINLIANA SAILO, MINISTER** : Pu Deputy Speaker, helaia ka thut chinah chutiang chu ka sawi ka hre lova, a chhan chu ka dinna hi ka chiang khawp mai, a market rate dinhmun a ni tih kha ka chiang khawp mai a, amaherawhchu, RTI Act hmangin kan MNF partyten an lo zu lachhuak a chu pawh chu Bajaj Allianz an va zawh chawp ni awm tak a ni a, keimahni purview ni lo kha an lo chhang zawk a ni, kei hi chuan ka la sawi ngai lo. Kha kha chu hriatsual palh a ni ang, ka dinnaah hian ka chiang khawp mai. Tichuan a lehlam ami vaibelchhe sawm dang kha a pung a awm ve a, kha kha chu vaibelchhe khat vel zet niin ka hre tawh a, ka chiang chiah tawh lova, kha kha chu kan hmang heu ve reng a, chutiang chu a dinhmun a ni. Chu chu ka chhan theih tawk ni sela, ka lawm e.

**DEPUTY SPEAKER** : Tunah Starred Question 215-na zawt turin kan member zahawmtak Pu Joseph Lalhimpuia i lo sawm ang.

**Pu JOSEPH LALHIMPUA** : Pu Deputy Speaker, ka lawm e. Environment & Forest Department Minister zahawmtak chhan atan Starred Question 215-na chu Lunglei District ah hian Wild Life Division siam tumna a awm em? tih a ni e.

**DEPUTY SPEAKER** : A chhang turin a changtu Minister zahawmtak Pu H. Rohluna ilo sawm ang.

**Pu H. ROHLUNA, MINISTER** : Pu Deputy Speaker, member zahawmtak Pu Joseph Lalhimpuia zawhna chhanna chu 'Awm e' tih a ni.

**DEPUTY SPEAKER** : Zawhbelhna, Pu Joseph Lalhimpuia i lo sawm ang.

**Pu JOSEPH LALHIMPUA** : Pu Deputy Speaker, Thorang Wildlife Sanctuary, Thenhlum khaw bulah leh Khawnglung Wildlife Sanctuary, Pangzawh khaw bulah a awm a, hei hi Aizawl Wildlife Division hian a enkawl a, a enkawl na hi a hlat tham deuh hlek avangin enkawl that tur ang hian enkawl a ni lo ang tih ka'n hlau deuh hlek a. Kan Minister zahawmtakin khatianga positive taka khatianga chhanna min han pe kha lawmthu ka sawi a.

Tin, Pu Deputy Speaker, hmanni deuh lawk khan kan Chief Minister zahawmtak ruahmannain Lungleiah Chief Secretary leh Secretary rual hovin meeting pawimawh deuh mai kan nei a. Chumi kan meeting chuan chhim lamah sawn tourist, abik takin foreign tourist tam zawk kan hip theihna turin kan biodiversity hot spot kan neih Sairep leh Ralvawng ami te, Tourism centre-te pawh lian tham deuh hlekin buatsaih ila kan ti a. Chumi chu Village Council hrang hrangah hetiang atan hian ram ngaw tha kan siam dawn a. Tin, buh tin 200/300 hmun ang velte a thlawna min pe thei in awm em kan ti a. Kan V/C engemaw zatin ziak pawhin an pek theih thu min rawn hrilh a. Tunah hian ka'n zawh duh chu, khatiangte kha mikhual tam zawk kan hmuh

theihna turin siam dawn ta ila, hei kan Minister zahawmtak hnen phei chu ala thleng lo maithei a. Theihtawp chhuahin hma min lakpui thei angem? tih kha ka zawhbelhna a ni e.

**\*Speech not corrected**

**DEPUTY SPEAKER** : Zawhbelhna dang a awm em? Pu H. Zothangliana i lo ko ang.

**Pu H. ZOTHANGLIANA** : Pu Deputy Speaker, ka lawm e. Ka zawhna chu Phawngpui tlang leh a chheh vel khi National park a ni a. Chutih rual chuan mi tamtak hian Tourism Department-te leh department dang dangte pawh hian eng eng emaw hmalakna neia kut thlak ve tura an beisei thute hi an sawi thin a. Ka han hriat ve thuk danin National Park anih avangin a duh duhin kut lo thlak ve mai emaw kha thil remchang lo tak ni awm tak a ni a. Chulai karah chuan kan Minister zahawmtak hian engeni thil awmzia dik tak kha chiang deuh hlekin a theih phei chuan han expand deuh nghe nghe sela tih ka duh a, keimahni mai bakah mipuite pawhin thil awmzia an hriat chian theih nan a pawimawhin ka hria a, chu chu ka'n zawhbelh ve a ni e. Ka lawm e.

**DEPUTY SPEAKER** : A chhang turin a changtu Minister Pu H.Rohluna i lo sawm ang.

**Pu H. ROHLUNA, MINISTER** : Pu Deputy Speaker, a zawhna neitu Pu Joseph Lalhimpuaia zawhna a pawimawh khawp a. Wildlife Division hi Lunglei district huamchhungah dah turin nikum hmasa a State Wildlife Board October ni 13, 2009 a thukhawm khan rem an lo ti tawh a. Amaherawhchu Khawzawl Division Ministry hmasa lamin Wildlife Division tho dah tura an lo ruahmante han tihpuitlin alo ngai a. Kan sorkar hnuah sum harsatna avangin vawiin thlengin Lunglei district-ah erawh hi chuan kan la ti thei ta chiah lova, heng hi a tul dan azirin leh sum dinhmunte en chungin sorkarin a la ngaihtuah zui turah ngai ila.

Tin, Bio-diversity hot spot chungchangte, Eco-tourism Centre-te hi kan sorkar hian a ngaipawimawh a, kan Chief Minister zahawmtakin a ngaihpawimawh thu a sawi thin a. Tin, Eco-tourism Centre-te hi chu department pakhat maiin hma han lak theih pawh a ni chiah lova, Tourism department nen te pawh hian khawi lai centre nge tha anga tih te, co-ordination committee-a state level-ah emaw te pawh hian siam tlan a, hma han lak tlante pawh ngaiin ka ring a. A department concerned ten kan theih ang anga tangruala hma kan lakte pawh la tul turah ka'n ngai a.

Tin, Bio-diveristy hot spot tihah hian Sairep hi a pawimawh khawp a, tunhmaa state flower-a kan lo hman thin state pangpar kan tih mai 'Aiting' hi hmun dangah a awm lova, a pawimawh khawp mai a. Hei hi State Flower-a kan lo neih thin a ni a, amaherawhchu, a vang lutuk a mipuiin an hre lutuk lova, tin nikum hmasaah khan Red Vanda khan kan thlak ta a. A hma zawng kha chuan State Flower-a lo puan tawh kha a ni a, hemi par hi Baptist

Missionary Wenger-an a lo hmuhchhuah a ni a. A botanical name-ah pawh hian Montessa Wengery tih a ni. Chu chu hmun dangah a awm ve loh avangin a pawimawh a, humhalh pawh a ngai a. Tin, Lalruanga dawibur, Sairep-ah hian a awm tlat bawk a, hei hi thingze mawi tak, han zai pawha ze nalh tak mai a ni a. Tin, chu lovah chuan Lady's Clipper Orchid ang chi, Zawnga Tuikhur tih hei hi a awm bawk a, chuvang chuan a department ang pawhin kan ngaipawimawh a, bio-diveristy hot spot-a Mizoram-in kan ngaih pawimawh berte zinga mi a ni a, Sairepah humhalh that zel kan duh a, amaherawhchu, sum lamah harsatna kan neih avangin kan duh ang chuan kan che chak hleithei lo a ni. Chu chu a zawhna neitu zawhbelhna kan chhan theih dan ni mai sela.

Tichuan, Phawngpui National Park-a midangin kutthlak rem lo han tih hi reserve area a ni a, ramsate a tlangpui thuin humhalh a lo ni a. Tin, a chhungah pawh hian permit nei lo chuan a chhung luh pawh hi phal a ni lo a ni. Chief Wildlife Warden-in phalna a pekten research atan te leh a hmuna ramsa awmte, tin, bio-diversity chi hrang hrang awm te, en tura an kal dawn anih pawhin phalna neia luh ngai tur zawk mah a ni a. Chuvangin, hei hi department dang tana a area chhungah hma va lak mai hi remlo tak a ni tih ka'n sawi duh a, chuvangin, department dang tan pawh a chhunga hma va lak mai hi National Park-ah a ni emaw, Wildlife Sanctuary a ni emaw, Dampa Tiger Reserve chhungah pawh khan khatianga ramsate tiralti thei tur zawngin emaw an habitat va tichhe thei tur zawng hi chuan hma lak a rem lo a ni tih kha ka chhan theih dan ni mai teh se. Ka lawm e.

**DEPUTY SPEAKER** : Zawhbelhna a awm tawh lo maw? Tunah Starred Question 216-na, zawt turin kan member zahawmtak, Pu K. Liantlinga i lo sawm ang.

**Pu K. LIANTLINGA** : Pu Deputy Speaker, ka lawm e. District Council Affairs Minister zahawmtak ka zawhna Starred Question No. 216-na chu hei hi a ni -

(a) Sinlung Hills Development Council inenkawl nan hian kum 2009, 2010, 2011 chhung hian kan Sorkar hian sum engzat nge a hman thin yearwise-in min hrilh thei em?

(b) Sinlung Hills Development Council hi tun aia changtlung zawka siam tumna a awm em?

**Pu R. LALZIRLIANA, MINISTER** : Pu Deputy Speaker, hei hi kan chan chiah pawh niin ka hre lova. GAD lampang chan a ni maithei a. Mahse ka hriat dan ang angin kan chhang ang e. Pu K.Liantlinga, member zahawmtakin a rawn zawhna chhanna chu -

(a) Kum 2008-09 ah nuai 200 pek an ni a, 2009-10 ah nuai 250, 2010-11 ah nuai 250, 2011-12 ah hian nuai 250 bawk pek tura ruahman a ni a.

(b) chhanna chu, 'Awm e', tih a ni.

**Pu K. LIANTLINGA** : Pu Deputy Speaker, ka lawm e. Ni e, tuna a chhanna kha, awm e, tih a ni mai a. Hei, Sinlung Hills Development Council hi kum 1994 July Ni 27 a Accord kha siam a ni a. Kha kha vawiin thleng hian hei kum 17 vel chhung chu Interim period angin a kal tawh a. Agreement-te kan siam a, hma kan la a, thil kan ti a nih chuan kan sorkar hian hma a lak that a pawimawh hlein ka hria a. Helaiiah hian ka'n sawi lawk duh chu, Pu Deputy Speaker, kan Speaker pawh lo ni tawh, Minister pawh lo ni tawh Pu Vaivenga khan a sawi ka la hrereng a. "Thil kan ti tawh a nih chuan kan ti tlang tur a ni a. Keini hi kan awm loh hnuah thangthar ten ro in la rawn rel ve dawn ang a, chutah chuan rinawm lo nih kan hlawh palh ang e", tiin a sawi a ni. Mi convince viau mai a. Chuvang chuan tunah pawh hian hmalak tumna hi tih tak takin tih ni sela a tha in ka hria a. Tin, sum leh pai an pe a, power an pe a nih pawhin a tlem emaw a tam emaw, tha taka tih kha thain ka hria a. Sorkar hmasa kum 10 khan a ngaihsak tha tawh lova. Chuvang chuan kum 17 chhung a ni tawh a. Tunah hian ka'n zawh duh chu –

- (1) Sinlung Hills Development Council member-te hi an bang vek a, tunah hian. Hei hi pawm a ni em? tih kha ka zawt duh a.
- (2) Tin, Chairman-in HPCD in min nawr vang a ni tih hei Vanglaini April 9, 2011 a chhuah hi a dik em? tih kha ka zawt duh bawk a.
- (3) Tin, he Accord siam hi Assembly-ah hian Act-a siam nge a nih a, executive order-in? tih kha Pu Deputy Speaker ka zawt duh a ni e, ka lawm e.

**DEPUTY SPEAKER** : Pu B. Lalthlengliana, a dawtah Pu Nirupam Chakma.

**Pu B. LALTHLENGLIANA** : Pu Deputy Speaker, Sinlung Hills Development Council hi a dinna a rei viau tawh a, nichinah kan Minister zahawmtak khan kumtina sum pek dan te a rawn sawilang a, kumtina Nuai 250 te a ni a, MNF term kum 10 ah kan lo bawhzui thalo anih pawhin leh a hmaa sorkarte pawhin an lo pe tha lo a nih pawhin tun sorkar hi chuan enthat tum se a tha ka va ti em. Development council anga Hmar unaute an lo dintir tak rau rauah chuan Act-a awmin ka hria a, Act-ah khan Sinlung Hills Development Council alo din a insiamrem hma interim period kha kum 2 nise tikhka niin ka hria a, kumhnih a ral hnu khan inthlannate pawh an nei ve tur a ni. Amaherawhchu inthlang lovin kum 20 dawn an awm ta a, inthlantir ve reng reng Council member neih ang ang hi a tha lo maw, an budget-te pawh hi anmahniin Sakawrdai Headquarters-ah han hmang ve sela, chutichuan, Mizoram Sorkar-in min ngaihsak tawklo tia an au an au te pawh hi a ziaawm deuh lawng maw, inthlanna hi engtikah nge kan buatsaih sak theih ang tih hi kan zawt duh a ni e.

**DEPUTY SPEAKER** : Pu Nirupam Chakma.

**Pu NIRUPAM CHAKMA** : Pu Deputy Speaker supplementary question - Sinlung Hills Development Council hi Congress sorkar-in a siam a ni a. An vanduaia, hei kum 10 kalta chhungah MNF sorkar lai khan an enkawl tha lova, sorkar zel ilang chuan tun dinhmunah hi chuan a ding lovang. Ka sawi duh chu Pu Deputy

Speaker, tuna Sinlung Hills Development Council tana pawisa ruahman hi a tlem a, hei hi pek tam theih deuh dan a awm lawm ni? tih leh Development Council hi India sorkarah an hre vaklo niin ka hre tlat mai a. Sixth Schedule anih loh avangin hei hi State Sorkar siam anih a vangin. Development Scheme chu NLCPR ah emaw DoNER ah emaw an thehltut lo niin ka hre tlat mai a, chuvangin an tan Development scheme chu NLCPR ah emaw dilsak theih dan a awm a ni. Tin, Backward Region Grant Fund-te pawh Lawngtlai District leh Saiha District-a pek theih ang chi-te pawh an tan dilsak theih dan a awm ang. Khawngaihtakin kan sorkar hian BRGF Scheme leh NLCPR hnuaiah engemaw Development project an siamsak thei angem?

**\*Speech not corrected**

**DEPUTY SPEAKER** : A chhang turin Minister i lo sawm ang. Zawhbelhna kha pathum a awm tawh a nia. A bak chu a lak theih tawh lovang.

**Pu R. LALZIRLIANA, MINISTER** : Pu Deputy Speaker, tuna zawhnate kha ka'n chhang rual dawn mai ang a. Hei hi 1994-ah accord kha siam a ni tih kan hria a, interim period-ah pawh kum 2 emaw nise tih a ni a, amaherawhchu chumi chhung chuan inthlanna turin peih theih a ni lo a, a boundary-te siam a ngai a, constituency-te siam a ngai a, khatiang ang khanin member kha an dinna tur te te te siam ve vek a ngai a, chutiang tur chuan ram chhungah khan a tlangpuiin Hmar an lo bit bik chuang silo a, khang lai-te kha han chhiar leh an ni pawn claim an neia, hetah Vairengte lamah te khawi khawiah emaw sorkar-te nena sawihona-a rem thei tur chu a ni anga, amaherawh chu khang kha la tihfel loh a nih avangin inthlan hi neih theih mai a ni lo tih kha ka'n sawi duh a.

Tin, an budget hi Sakawrdaiah han hmang ve se, tih kha, khi lamah hlir an bial chhungah hlir an budget hi chu an hmanga, amaherawhchu khilaiah khian engemaw hel deuh reuh tih ve ang chite kha an la awm avangin he lamah MNF sorkar tho khan alo sawn thla leh a, chuvangin he lamah hian an la ti ta a ni Pu Thleng. Chuan member hi an bang vek tih kha, ni e an bang veka, a council chairman berin helte thupek avanga banga a insawi chuan a ni ngei turah kan ngaia, khatiang a nih avang khan an ni pawhin 'min ruat leh rawh u' an rawn ti a, an rawn dila, kan rem ti tawh lo a, an banna kha kan pawm hmiah a ni. Chuvangin khang hel ho thuhnuaia awm tur kha hel lo ramah chuan an thain kan hrelo a, khatiang thuhnuaia awmlotur kha ruat a ni leh pawhin kan ruat ang tih kha ka sawi duh a.

Tin, Accord hi a Act lampang chuan an siamin ka ringlo a, hei hi khalaia inremna mai kha a ni a, executive order-a accord kha siam a nih kan ring ve ngawt a, hei kan Chief Minister a awm a, a tir atanga hretu a ni a, tin, a department hi an department hnuaia mi ni awm tak a ni a, helai hi khawngaihin kan Deputy Speaker-in min han sawisak ve selangin a thain ka ringa.

Tin, helama Autonomous Development Council anga han cheibawl hleihtheih kha a ni chiah lo a, atir tum danah pawh politics lama ram hrang leh bung hrangte pek lam tumna a awm lo a, a tum ber zawk chu hmarthimpui ni thin, development lama hma an sawn ve theih nan Council hi a hranpa hian siam ve ni selangin tih kha niin a lang a. Tunah pawh hian kan sorkar hi chuan livelihood project, hemi World Bank-te nena tang tlanga kan tih tur hi, a tirah chuan Aizawl

District tih kha khulamah pawh an phal lo a, amaherawhchu Aizawl District-ah hian hmar lam te hi la changkang lo tak an ni a, chuvangin he livelihood project-te hi kan hman theihna tur a nih anga district-ah a awm si a, tiin henge pawh hi kan lo ti a, henge pawh hi R.D lam atangin kan tan thei tep tawh a ni tih kha ka chhanna a ni a. Tin, Chairman eng emaw khatiang anga honorarium tih ang chite pawh kha tihputlin zel kan tum e, Pu K.Liantlinga zawhna chhanna angah khan a bet thei turah ka ring a. Chairman hi ₹ 5000 hlawh thin a ni a, honorarium-ah khan chu chu ₹ 15000/- pek a ni anga, Vice Chairman hi ₹ 3000 la thin khan ₹ 12000 a tihpun tum a ni a. Tin, member ₹ 2000 hlawh thin kha ₹ 8000 a tihpun tum mek a ni, chu chu tunah hian la peih loh deuhhlekk a ni. Tin, a la tur chiah pawh tunah chuan an awm tawh rih lova, mi thar an ruat leh chuan khangte khan an la hman ange maw ka hre lova, hei hi sorkarah process mek a ni tih kha ka chhanna a ni e.

**Pu LALDUHOMA** : Pahnih chauh ania la ding, pathum nise kan tia chu pawh chu a tlangpuiin kan tia ni mai a, min phalsak ve teh a. (DEPUTY SPEAKER : Anih leh zawhbelhna zawhbelh lehnaah i ngai mai ang).

Ka'n zawh duh chu Village Council kan neih dawn chuan Village Council Act a awm a ngai a, District Council kan neih dawn pawhin Sixth Schedule a awm a ngai a, Municipal Council kan neih dawn pawhin a Act hetah hian kan passed a ni. Kum sawmhnih dawn hnuah Sinlung Hills Development Council hian Act ala nei lo reng reng a, Act hi awm ve sela, mumal takin function sela, khang backward region-a financial assistances hrang hrangte pawh kha dawng ve sela tih hi an duh ber a ni. Chu chu ka'n zawh tum chu, sorkar hmasa hunlai khan Act awm silovin Rules an siamsak a, chu Rules chu he House-ah hian an Lay ve ringawt mai a ni, an Lay rual rualin Speaker kha ka zawt nghal a, "Act a awm silova, Act awm lova Rules siam ringawt mai hi, a department-in an siam anih leh lo kawl ve mai mai sela, engahnge House-ah hian an rawn Lay kher, a tul em ni?" ka tia. Speaker khan, "Khapna chiah a awm lova, min rawn khilai veah ngai mai rawh", a ti a. Mizo tawng chuan Act pawh Rules pawh Dan a ni vek mai si a, "Sinlung Hills Development Council-in Dan a nei ta e", an ti a, ran lu kim an talh a, an lawm luh luh mai a ni, sorkar hmasa khan a bum nasa a ni. Act a nilo kha kha, chuvang chuan ka thinrim pui viau va, wawiin thleng hian kha kha ala awm loh avangin, a rei tawh bawka, tuna remna siampuitute ngei sorkarna a lo nih leh takah bawka hi chuan Act-te pawh hi an neih ve a tha tawh lawm ni, a ngaihtuah sak theih lawm ni tih ka zawt a ni.

**DEPUTY SPEAKER** : Minute 4 vel a la awm a, kan House Leader zahawmtak hi a chiang berin ka ring a, ani hian sawifiah tulte han sawifiah sela, hun i pe mai ang u. I lo sawm ang.

**Pu LAL THANHAWLA, CHIEF MINISTER** : Pu Deputy Speaker, ka chiang ber hranpa chuang lova. Amah hrim hrim hi chiang ber turin ka duh lova sawi dawt ila a tha mai. Hmanni khan Elvis Chowkey-te hi kan Home

Minister hian a chhawr an ti a, kan Home Minister hi mi mawl tak a ni lova hnam rilru pu mi a ni a, a chhawr atang khan tum a nei a ni. Amaherawhchu, he House-a kan sawi chuan mahni fate zilhnaah thenawm fate an fing ang tih kan hlau si a, chutiang zawk chu a ni hei hi chu, inphawrh sak loh a thain ka hria. Tum hi kan neih a ngai, Sinlung Development Council hi Development Council a ni a, Political Council a ni lova, Act a ngai ang tihte hi ka hlau khawp mai a kei chuan. Sorkar-in lo hre mahse a pawl tawh lova. Sorkarin a duh duha a tih hi a tawh lek tih pawm ila a thain ka hria. Chutiang zawnga kal chu a tul a ni. Chuvangin, tuna enkawl dan hi a tha a. Amaherawhchu, an sumte hi chu Development Council an nih anga dik taka an hman hi a tha mai a, Pu Deputy Speaker.

Tin, tuna Pu Duhoma'n a rawn sawi thahnemngaihna kha khatiing taka sawi a awm kha Mizoram tan, ram leilung fate tan a that zawk ka ring tlat. Chutiang zawk chu a ni a.

Mizote hi hei kan harsa kan harsa, kan rethei ti chung si hian a lawm lampang hi chu kan uar khawp a, kan lawm luai luai zel a, a thatna te pawh a awm ang a. Tin, kan ram leilung fa ni silo, kan ram tana tangkaina nei silo, mahse, Mizoram leilung fa anga chawimawi vak vak te hi kan ching a. Hei hi a tha ber em aw tihte ka ngaihtuah a ni. Mizo pawh in ti duh lote, ram leilung fa ni silo, Mizo anga chawimawite hi a dik ber em aw tihte hi ka ngaihtuah a. Chuvangin, chu lampang zawngte pawh chuan kan ngaihtuah tel a ngai a ni. Amaherawhchu, Development Council an nihna ang erawh hi chuan tha taka function kan duh a. Tuna Chairman leh a hote bang te te kha an banna lehkha kha Helhovin an ziah sak ang ang kha thaikawi chhunhan pakhatmah tidanglam lovin an sign a, an rawn thehlu a ni a, pawm loh rual a ni lo, kan pawm nghal hmak a ni. An rawn dil leh a, anmahni bawh kha restore turin, kan ti dawn lo, kan ram hi rilru nei taka enkawl a ngai a ni. Chutilo chuan kan te tial tial ang tihte pawh a hlauhawm. Chumi hriatna nung nen chuan kan kal fo hi a tha a. Amaherawhchu, ram leilung fa an ni a, sawlaih sawn Hmar chauh lo pawh Ralte, Paihte leh hnamdang tam tak pawh an awm ve a Lusei te. Chuvangin, hmarthimpui tih thin kha an lo en deuh theihna turin kan hotuten Silai leka min bei kha an awm khanglang bawh si a. Duh ila chu kan tudawl thei a, kan hnungkhirh vek thei ang. Amaherawhchu, ram leilung fa leh ram leilung fa khatia inbeih inbeih kha a tha lova tiin remna kan siampui a, chumi ang chuan kan kal mai hleithei ta lova. Home Minister zahawmtakin a sawi tawh a, chu chu tuna an dinhmun hi a ni mai a. Tunah tak phei hi chuan Manipur-ah Zohnahtlak bawh Kuki unau ten Silai chekin an hel a. Pawl li/pawl nga an awm a, India sorkar nena inbiak a, Manipur-ah right neih ve an duh a. Chu chu kei tehlu an hel pawl hrang hrang chuan min rawn dawr a. Central sorkar nen inbiak an duh thu leh in unite an duh thu an sawi a. Pawl thar te in unite loh chuan tu ber nge an biak ang che u hi an hre lovang a, a harsa khawp ang ka tih avangin an in unite ta a, pawlkhatin an awm ta a. Tichuan, Manipur Chief Minister-in a duh vak lo chung Central-in an duh si avangin, inbiak kha, kan bia ang an tih hnu kum 2 velah khan an inbe tan ta a. Tichuan, tunah hian suspension of operation a awm a. Tichuan, chumi dan angah chuan designated camp-ah an lut ang a, an silai an surrender ang a, inbiakna a tawp hma chuan anti social activities an nei tur a nilo, mipui harsatna an siam tur a ni lo an ti a. Kuki unaute chuan an pawm thap a, an zawm that avangin tunah hian inbiakna a kal mek zel a ni. An duh angin a chak lo a ni mai thei.



Chutiang chiah chuan UPF, August 13, 2007 niin ka hria, ka hresual mai thei. Chief Minister bungalow a din kha, khatah khan HPC'D' te hi an tel ve a ni, hel pawl te reuh te te zingah ZRA te pawh an tel a. Chumite chuan KNO te ang chiah khan Central nena inbiak an duh ve a. Tichuan Central chuan an be ta a. Suspension of operation a awm a, designated camp a awm tur an ni a, anti social activities engmah an ti tur a nilo a ni. Mahse HPC'D' te hian tunah hian an zawm lova, chhiahte an khawn a NREGS atangte in, engemaw zat percent lak ve an tum a ni. Chu chu an tih tur anih loh avangin Delhi-ah kan hrih a. Tin, kan duhsak em avangin kan hotuten an lo bia a. Engemaw ti a an ralthuamte dahin inremna a awm thei dah law maw tiin. Amaherawhchu, chu chu kan tih tur alo ni lo a. Central-te nen direct-a an inbiak lain keinin kan be tur a nilo a. Chuvangin kan titawp ta a ni. Inbiak kan duh lo a nilo a, a betu tur kan nilo a. Suspension of operation an siampui leh an biak turte chu UPF ang khan Central sorkar a ni a. Tichuan tunah hian designated camp-a lut lo a chutianga kawhmawh bawl chu an awm a ni. Chu chu Home Ministry-ah kan hrih lo thei lova. Tin, anni chuan hemi suspension of operation-in a huamchhung Manipur chauh a ni a, Assam leh mizoram hi a huam tello an ti a, mahse Central chuan a huam an ti a. Chuvangin hetiang suspension of operation kan neih tawh a, inremna, designated camp-ah an awm ang a, an arm an surrender tur a ni kan tih tawh pawh a an la chet hi chuan dacoits anga en tur. Tin, main insurgent body atanga a peng an awm chuan dacoits anga en tur an ti a. Khawthlang lamah Tuikuk hel ten min tibuai reng bawk a, chungte pawh chu Home Minister-in Assam Chief Secretary, Mizoram Chief Secretary leh DGP ve ve te hnenah a tul anga joint operation ti a, combine operation te ti a mipui thlavang hauh turin order a pe a. Tripura a hmaih palh avangin Tripura pawh rawn telh ula kan ti a, an rawn telh leh tawh a. Chutiang chu tuna kan dinhmun a ni a. Chuvangin sawlai area-ah sawn HPCD unauten buaina an siam chuan Central-in action an la tur a ni ang a, keini pawhin kan remti tur a ni lovang. Sinlung Council Development hrim hrim hi chu a bang tate term kha a la tawp lova, a tawp ni-ah hian a tha ber tur anga kan ngaihnanin hotuten inthlan a awm hma chuan interim period atan an la ruat leh ang.

**DEPUTY SPEAKER** : Awle business dangah kan kal ang a. Vawiinah hian private members' business kan nei. (Pu Lalduhoma : Niminah khan Sakawrdai-a sorkar Buhfai rate to a hralh chhuah thu ka sawi a, chutiang a awm lo tia chhan ka ni a, sorkar rate aia leitute hming list he House property atan ka thehluh duh a ni) Engpawhnisela a tul anih chuan action lak tur a ni ang. Vawiinah hian Private members' business kan nei a, Pu R.Lalrinawma'n personal explanation a rawn dil a, hei kan dan 314-in a phal angin kan pawm sak a, hei hi sawiho tur pawh a ni lova, tunah Pu R.Lalrinawma i lo sawm ang.

**Pu R. LALRINAWMA** : Pu Deputy Speaker, he House zahawmtak leh kan ram rorelna sang berah hian, mipui aiawha thlan chhuah MLA ten ram leh mipui tana tul leh pawimawh nia kan hriatte ngaihtuah tura resolution putluh theihna kan danin min phalsak a. Tun Budget Session kan neih mekah vanneih thlak takin ka resolution "Power lama kan intodelh theih nan-a Pu Lal Thanhawla hruai sorkar hmalakna hi lawmawm kan ti" tih chu a chhuak ve hlauh mai a. Ni 15.7.2011 khan he House-ah hian membarten thahnem ngai taka kan sawiho hnuin passed a ni nghe nghe a ni.

He House-a i veilam ami ten an sawi sel bakah, ka resolution passed takah hian MNF party-ten thuchhuah, Press release siamin resolution zahpuiawm, Chief Minister-a mimal tlaklum tumna, ti tein mimalin min bei ta a, hei hian he House zahawmtaka member ka nihna anga ka zalenna an bawchhiain mipuite laka min tihminghliaw an tumna leh he House tihbawrhanna a ni bawk. Resolution kha a nihna ang taka sawilang duh lo luiin power lamah kan la intodelh lo na chung a intodelh avanga resolution anga tarlangin, mipuiten awm lo an tih nan leh kei, a puluttu hi min dem theihna zawnga House pawnah thuchhuah an lo siam hi a dik lo hle a ni. Kha resolution-ah khan powerah kan intodelh ta a, lawmthu i sawi ang u, tih a ni lova, vawiin thlenga power-a kan intodelh lo, kan intodelh theih nan-a Pu Lal Thanhawla hruai sorkarin hma a lak mekna leh hmachhawpte, a lawmawm em em a, lawmthu sawina Resolution a ni a. Power lama kan intodelh theih nan-a Pu Lal Thanhawla hmalaknate kha MNF kum sawm lal chung khan sawp chhe vek lo phei selang chuan, vawiin-a kan harsatna tam tak hi kan ziaawm deuh tur a ni.

Pu Lal Thanhawla hruai Sorkar term hmasa lamah state sorkarin a thuneihna leh a thil tihtheih chin Small Hydel Project Mizoram 18 kan neih zinga 14 te chu Congress huna siam anih thu te, P.C sorkarin 2 leh MNF in kum sawm chuang sorkar tawhin 2 chauh an siam thu te, Hydel Project lian deuh Tuirial 60 Mw pechhuak thei tur bul an lo tan, MNF sorkarah Lal chungkua ten compensation uchuak taka an phut leh an dawn avanga lo thuanawp ta, tun sorkar tharah chhunzawm an ni leh ta te, Tuivai 210 Mw pechhuak thei tur hmachhawp tawh, tun sorkarah central-in pilot project atan a pawm takte, Kolodyne Phase-II 460 Mw te, Tlawva 5 Mw, Lungreng 815 Mw, Chhimtuipui 640 Mw, Mat 76 Mw, Tuivawl 42 Mw, Tuirini 38 Mw leh Tuichang 110 Mw te MoU sign leh Letter of Intent pek an ni te hi a lawmawm tih loh rual a ni lo a ni. Bairabi 80 Mw pechhuak thei tur P.C hunah mumal lo taka kalpui kha Pu Lal Thanhawla sorkar khan tha taka bawhzuiin Detail Project Report-te peih fel vek a ni a. MNF sorkarin an hmalak ve chhun Serlui 'B' te compensation inpek chungchanga a buai zia te, hna a that loh avanga vawiin thlenga hawn theih loh, thenkhat phei chuan a tuikhuah khu sah vek a, a bul atanga tharthawh leh ngai hial khawpa an hriatte, a zahpui awmin a vanduai thlak hle a ni.

Power lama harsatna leh Congress hmehbel zel anga an sawi te, mipuiten Congress sorkarah beiseina an neih san avang leh MNF lakah chuan beiseina an nei lo law law a ni tihte kan sawi tawh a, Mawmbati sorkar han tihte pawh, MNF te hian hma an lak ve loh avang leh hmalak sa an sawp chhiat avangte a Mawmbati chhit ngai kan ni. MNF te hian hmalakna an neih loh avangin Mawmbatite semin, power aiah Mawmbati min chhit tir tumtute an ni zawk a ni tih hi Zoram mipuiten kan hria a ni.

Pu Deputy Speaker, heng hmalak tawhna leh lak mekna kan sawite hi Zoram mipuite mit hmuh leh beng hriata thil thleng leh department-a record awm vek a ni a. He House zahawmtaka sawilan tlak leh lawmthu sawina tlak a ni. Lawmte lawmpui te, fak tlak fak a, chawimawi tlak chawimawi nachang hriatte hi kan tih tur a ni. Chona leh phurna min pe zeltu a ni zawk a ni. Resolution sawiseltute hi darkar 24 flag kan zar chuan kan independent thei tih

inzirtirna sikul chhuak an ni a, an sorkar laia an Resolution khawchhak lama ram ri hung tura central sorkara nawrna turte kha a lungchhiat thlak hle a ni. Mizo hnahtlakte then darha awm, insuih khawm leh hun a la thleng ngei ang ti a beisei leh Mizoram chin ram khata kan awm theih nana Greater Mizoramte inremna thuthlungah an rawn hawn dawn emaw kan tih lai a, hawn chu sawi loh a then darh zawnga resolution pass a ni te, kan Chief Minister zahawmtakin nimin maiah keini chuan khawchhak lamah ramri hung kan duh loh thu a sawi te, vawiin chanchinbuah MZP leh ZORO ten lawmthu sawina te alo lang a. Tun tum session-ah Aizawl Municipal Council thuneihna pek thuai thuai an phut hle laia an sum hman dan tura inrawlhna resolution an pulutte a zahpuiawm hle zawk a ni.

Tin, hei bakah hian an term hmasa sorkar laia Mualkhang hmuna Gas Bottling Plant tihpuitlin hawn alo ni ta hi Mizoram tan hmasawna ropui tak anih avangin he House zahawmtak hian lawmawm a ti, tih resolution-te kha an lo pass a. Khung Bottling Plant-te pawh Congress sorkar hmasaka bul tan, an huna an hawn, vawiina gas kan indaihloh em em si a...hengah te hian lawmthu ...ka sawifiah alawm. Pu Deputy Speaker, PMGSY hmanga, Pu Deputy Speaker, kan dan in min phal a, dan zawng chuan min rawn cho lo se, PMGSY hmanga khua 250 awmna chin, truckable road laih mek hi Mizoram hmasawna ropui tak a ni kan ti a. He House hian lawmthu a sawi a ni, han tihte kha Central Scheme, PMGSY Scheme-ah te khan lawmthu an rawn sawi a ni.

Tin, a dang tamtak a awm a, kan Chief Minister zahawmtak, remna leh muanna atana a hmalakna ropui tak chhonzawm leh tura Prime Minister zahawmtakin alo sawm leh hi lawmawm kan ti, te an ti a. Remna leh Muanna-a hma la turte, ram venhimna kawngah te chuan Prime Minister-te pawn, mi zawng zawng, khua leh tui min sawm vek a ni. Hetianga danin zalenna min pek anga House zahawmtak chhunga kan thil tihte, House pawn lama thudik zikluak lo hmanga mimala insawibawrhban hi an sim loh chuan Privilege an la hmachhawn lovang tih hi a sawi theih loh a ni, tih kha ka'n sawi duh a ni. Pu Deputy Speaker, ka lawm e.

**Pu B. LALTHLEGLIANA** : Pu Deputy Speaker, tawi te in, khatiang kha, nimpiniah lawkah Salem Vengah Internal Link Road-a culvert awm lo chungchangah Salem Local Council ten an rawn ti ve tho tawh a. Amaherawhchu, a dawh theitu i ni phawt ang kan ti a, number tam zawk avanga khatianga an rawn ti leh kha an tih tur emaw ni dawn le.

**DEPUTY SPEAKER** : A tawk tawh e, sawiho tur a ni lova, sawi hun a ni tawh lo, i duh tawk ang aw, aw le, duhtawk rawh le. Sawiho tur a ni lo. Business dangah kan kal ang. (interrupted) Duhtawk tawh rawh le. Thu rawh u, thu rawh u, a tawk e, a za tlang deuh a ni ang e. Engpawh nise, kha kha i duhtawk ang u..... a tawk tawh, a tawk tawh. A cho zawng kha chuan in cho lovang. LPS Pro-fight lamah in in cho dawn nia, duhtawk ang. Le, tunah chuan Business dangah i kal ang u. A lawmawm lamah hei Constitution bu thar kan sem dawn a ni. Hei hi BAC lamah khan kan memberte khan Constitution

bu thar ber hi kan Speaker-te hian min pe se an ti a, chu chu tunah hian kan sem dawn a. Kan naute khan han sem rawh u, kan Constitution bu thar kha.

**Dr R. LALTHANGLIANA** : Pu Deputy Speaker lei tur kan zawng kan zawng a hetiang hi, min han sem hi lawmthu ka'n sawi a ni.

**DEPUTY SPEAKER** : Ka lawm e. Le, in chang kim tawh maw, an sem zawh chuan tunah Demand lamah kan kal ang a. Vawinah hian Minister pahnih Demand kan sawi dawn a. Chuvangin hun kan heh loh zawkna atan Minister-te pahnih Demand hi a rualin lak leh nghal mai kan remti em? Anih chuan tunah kan Minister zahawmtak Pu H.Liansailova'n a Demand No. 9, 13, 14, 31 leh 32 te hi House-ah rawn submit rawh se.

**Pu H. LIANSILOVA, MINISTER** : Mr Deputy Speaker sir, on the recommendation of the Governor of Mizoram and with your permission sir, I move the Demand No. 9, 13, 14, 31 and 32 for ₹ 660,83,81,000.00 only for meeting expenses during 2011-2012 in respect of the followings Departments. Demand No. 9 Finance – ₹ 363,42,32,000 Demand No. 13 Personnel & Administrative Reforms - ₹ 2,07,90,000 Demand No. 14 Planning & Programme Implementgation ₹ 80,43,41,000 Demand No. 31 Agriculture ₹ 180,44,54,000 and Demand No. 32 Horticulture – ₹ 34,45,64,000 Total : ₹ 660,83,81,000 Thank you.

**DEPUTY SPEAKER** : Le, tunah kan Chief Minister zahawm takin a Demand No. 1, 2, 3, 5, 11, 15, 33, 35, 39, 45 and 47 te hi House-ah rawn submit ve rawh se.

**Pu LAL THANHAWLA, CHIEF MINISTER** : Pu Deputy Speaker, Governor phalna leh i remtih nain heng Demand No. 1, 2, 3, 5, 11, 15, 33, 35, 39, 45 and 47 avaiin ₹ 824,14,30,000 te hi kum 2011-2012...

**Pu B. LALTHLENGLIANA** : Pu Deputy Speaker, Demand No. 33-na hi i rawn sawilang lo, Soil and Water kha.

**Pu LAL THANHAWLA, CHIEF MINISTER** : Aw, 33-na. Heta lehkha min pekah hian a tello anih hi, Office lam Secretary tena min pekah hian. Engpawhnise, tahhian ka nei tel a. ,2,3,5,11,15,33,35,39,45 leh 47-na kum 2011-2012 ah a tul anga heng Department-te hian an hman turin he House zahawmtakah hian ka rawn thehlut a, min pass pui a, min pawmsak turin ka ngen nghal bawk a. (1) Legislative Assembly – ₹ 11,61,35,000, (2) Governor – ₹ 10,60,000, (3) Council of Ministers – ₹ 2,02,50,000, (5) Vigilance – ₹ 4,12,55,000, (11) Secretariat Administration – ₹ 49,87,42,000, (15) General Administration Department – ₹ 64,33,75,000, (33) Soil & Water Conservation – ₹ 40,30,69,000, (35) Fisheries –

₹ 20,01,66,000, (39) Power – ₹ 249,92,41,000,(45) Public Works – ₹ 299,79,64,000, (47) Minor Irrigation – ₹ 82,01,73,000, a vaiin ₹ 824,14,30,000 te hi he House zahawmtakah hian Member zahawmtak ten min ngaihtuah sak a, min pawmsak turin karawn pulut e, ka lawm e.

**DEPUTY SPEAKER** : Awle, kha kan Minister 2 te Demand anrawn submit tawh a, kan sawiho ang a, kan tihdan thin pangngai angin minute 10 den den kha inpe leh ang aw. Tichuan, Opposition Group Leader-te kha minute 15 kan pe ang a, sawi hmasa turin Pu Thlenga kha i phar a mi? Awle, Pu B. Lalthlengliana i lo sawm ang.

**Pu B. LALTHLENGLIANA** : Pu Deputy Speaker, tukin kan boruak kha a nuam khawp mai, ngam leh ngam kan incho a. I dinglama thu kha an tam viau a, helaia thu hi kan tlem viau na-a, zawl lam nei lo ho kha awm mahsela, kan hlau bik lemlo tih kha Member-te khan hre rawh se. Cho chikimin kan cho kan ti anih chu.

Pu Deputy Speaker, vawiina kan Demand sawitur hi a tam hle mai a, a hmasa bera ka sawi duh chu kan House Leader zahawmtak Department PWD-ah hian – Hei, tukinah report ka dawng a, Pu Deputy Speaker, ITI atanga World Bank kawngpui pan thlakna kawng khu tun Sorkar hian thatakin an siam a, black top-in, Culvert te pawh siamin. A chung chiahah hian ITI damdawi kawng a awm a, helai lungrem hi sang deuh maia rem a nia, ft 15 a sangte a ni a, Para-pet dah tura estimate a ni a. Amaherawhchu, Para-pet dah lovin, veng chhung a mawi zawk nan tiin hand railing mawi taka dah tum a ni a, a ban khur tur pawh hei an dah phei thluah thluah a. Amaherawhchu, hand railing siam lovin bill zawng zawng an la fai vek mai a, tikhuan kawngthlang leh kawngchhak inkar khu a mam pur mai a, zanah naupangte an tla a, Motorte pawh accident a tam a, hei hi kan House Leader zahawmtak hian a chan a ni bawka, a rang thei ang berin en nisela a thain ka hria a, chu chu ka han ngen a ni.

**Lt. Col. Z.S. ZUALA** : Pu Deputy Speaker, point of clarification mi engzatnge tla tawh tih kha a sawi thei em aw?

**Pu B. LALTHLENGLIANA** : A tla tawh lam kha chu a pawimawh berlova, a tla lam kha chu anrawn report si se love.

Pu Deputy Speaker kha kha pakhatna nisela, a dawt lehah chuan ka bial kawng session lamah ka zawt tawh a, tlem chuan hma a sawn a, tuna kawng phah leh black top kal mekte, a lawmawm ka ti a, amaherawhchu fur alo nih avangin chhunzawm hleihtheih loh lai a awm a, hei hi thal alo nih vel leh rang taka min chhunzawmsak leh turin kan PWD Minister zahawmtak ka'n ngen duh a. A bik takin Champhai atanga Zawlsei hi 1995 vela black top tawh kha a ni a, a rei tawh bawka, kawng a chhe em em mai a, chu chu kan House Leader, PWD Minister ni bawka hian min hriatsak thei sela. Tin, Dungthlang atanga Farkawn kawng black top a ni a, khi pawh khi a chhe ve leh tan a, hei hi pawisa maintenance-te hmuh anih chuan

min hriat reng sak thei sela tih ka'n ngen duh baw k a, chuan ka bial kan sawi duh bik a ni a. Mizoram hmun hrang hrang kawng a chhia a, a hrehawm tlang a ni tih kan hria a, MLA tin ten mahni bial theuh sawi tur kan nei vek ang.

Deputy Speaker ka sawi duh chu nimina kan han inhnial laih laihna Ministry of Road Transport and Highway-in pawisa min pek nuai sangnga leh tih chuang atanga a chuang cheng nuai 1699, kan Finance Minister zahawmtakin hemi Ministry hian revised allocation-ah dah a ni, surrender a nilo a tih kha ka ring taw k a, khatiang anih chuan kum lo kal leh turah hian revalidate a, kawngchhia repair-na atana tangkai taka hman ni thei se tih kha ka'n sawi lang duh a. Tin, a dawt lehah chuan Darlawn Sub-Divisiona periodical renewal atana cheng vaibelchhe 25 chuang dah, Sunshine Overseas Company hnena cheng vaibelchhe 25 chuang advance a pek, hnathawh lawi awm silo hi report min petute hi an han kal vek a, chutiang hnathawh mumal an hmulo a ni a. Chutiangte anih chuan hei hi enfel ran ava tha em? Engatinge phai lam Company advance-a heti zozai pawisa kan pek thin, a pawi thei khawp mai. He Congress Sorkar hmasa-ah khan Thir supply-ah khan Baid Group kha cheng vaibelchhe engemaw zat advance-a pek a ni a, an thir supply tur pawh supply kim lovin an awm a, khatiang chiah kha thil a awm ang tih a hlauhawm a, chuang chuan hei hi kan House Leader zahawmtak, PWD Minister ni baw k hian lo enfel rang thei sela, a lawmawm khawp ang.

Tin, Pu Deputy Speaker, Demand No. 39 Power-ah hian ka Unstarred Question No. 33-na, 2009-2011 chhunga Power Department-a material supply engzat nge? tih ka zawhna kha min rawn chhannaah khan chiang takin a lo lang a. Hemi zingah hian Mizo ni lo M/s B.R. Engineers Pvt. Ltd., Kolkata-ah hian a vaiin supply order pek zawng zawng hi cheng vaibelchhe 77,905,264.05 a ni a. Heti zat em em kum hnih khat chhunga he company pakhat material supply pek hi a va tha love. A material supply ang chi kha ka'n en a, Mizote pawhin an tih ve theih vek a ni si a. Mizo zinga hmu sang ber Lalnunpuia hian cheng vaibelchhe 4 leh tih vel a hmu a. Midang duhsak zawng Mizo zingah hian an awm lo'm ni, an item supply ang kha Mizoten an supply ve thei vek si a. Engati nge he hnamdang company hi heti taka duhsak a nih? A phenah hian thil a awm a ni mai lo maw? tih kha ka'n sawi lang duh a.

Tin, Fisheries-ah General Discussion-ah ka sawi tawh a. Budget a rawn pung chhova a lawmawm ka ti khawp mai. Sanghaa eizawngtute, sangha dil neitute tan chuan malsawmna ruah a sur dawn niin ka hria a. Tunah hian kan Chief Minister zahawmtakin a kutken baw k leh nghal a. Hei hi sanghaa eizawngtute tan tangkai taka hman ni thei se la. Grant-in-aid, General Head-a ₹ 1107 lo lang han hmuh pheih kha chuan beiseina a sang zualin ka hria a. Amaherawhchu, Fisheries hi kan Chief Minister pawhin a hria a, tanpuina emaw engemaw han sem dawn hian Officer-ten an verify vek tawh ni si ram nei si lo, dil pawh nei si lo pek an tam thei lutuk. Sateek bial hi, kum 15 ka bial tawh a. Mi 101-in tanpuina an han hmu ringawt te kha, he bialah hian khati zat sangha khawi an awm lo. Fisheries atang hian ram leh hnam tana thil tha tak tak tihpuitlin tumna rilru kan pu lo a ni tih hi a lang chiangin ka hria a. Chuang chuan, kan House Leader-in a chang baw k a, he pawisa hmang hian kuthnawhktute, sanghaa eizawngtute, puitling ngei turin he term chhung hian, a zavaia thawh chu a har ang, amaherawhchu, a bul tan sak theih nisela a thain ka hria a. Western Belt-ah Agriculture hnuaiah phai lo nei tam tak an awm. Mahse, vai an thawhtir vek avangin kum khatah cheng singhnih pawh a neituin an hmu lo. Sangha

dila convert chuan kum khatah nuai thum an hmu thei. Chu chu a nih avangin he pawisa hi tangkai taka hman ni thei sela a thain ka hria a.

Tin, Pu Deputy Speaker, SAD, Demand-ah hian Secretariat Complex chhunga ram awl zau deuh mai la awm saw SAD atang hian allotment pek zel niin ka hria a. Heng pek a nih dawn hian Revenue Department-te nen in co-ordinate thei se la. Department an pek tur apiang demarcate fel tak neiin ramria lung phun zel ni se la, chu chu Land Record-ah dah zel ni se la. Chuti a nih loh chuan Government Complex, Luangmual ami ang khuan a karah, kum rei loteah civil mi i ti mai ang, midang LSC nghet nei an lo inzep leh teuh ang a. Mi'n LSC an neiha, ownership an lo neih tawh kha chuan tih a har si thin a. Chuvang chuan, ven theiha a awm lai hian ven ni se la a thain ka ring a. Kan hunlaiin zep nak emaw, Revenue changtu ka ni a, kan in co-ordinate chiah loh lai a awm a, Revenue lam pawh kan vui em em a. Khatiang ang kha he sorkarah hi chuan awm ve lo sela a thain ka hria a. Saw saw kan ram tana asset pawimawh kan neih a ni a, chuvangin venhim tlat anih theihna turin khalai kha ka sawi lang duh a.

Tin, Vigilance-ah hian general discussion-ah leh zawhnaah te pawh kan sawi tawh, miin promotion a hmuh dawnin Vigilance atangin liability clearance a nei tur a ni emaw, thil dang advance remark-te pawh a nei mai thei, mahse tam tak an promotion a bar chuang lova, Vigilance clearance hi kan whole sale ta mai mai em ni, mi tam takin promotion an hmuh a dal chuang si lo hi fimkhur atan a va tha em. Hei hian Sorkar hnathawkte a discourage ve theih avangin helai hi fimkhur a va tha em tih kha ka'n sawi zawk duh a ni.

Chuan Pu Deputy Speaker, Demand No. 14-ah hian Planning hi ka'n sawi leh lawk ang a. Planning-ah khan cheng nuai sangkhat a lo lang a MLA fund atan, kan lo beisei danah chuan nuai nga diat diat talin a pung turah kan ngai a. He MLA fund hi MNF term chhunga bul tan a ni a. Kum 8 dawn lai a lo liam chho dawn tawh a, kum 8 a lo liam hian cost escalation avangte leh thil dang avang hian a hnathawh theih a tlem sawt em em a, chuvang chuan Pu Deputy Speaker, kan Finance Minister chan a ni tho bawk a, Revised Estimate stage-ah nuai 5 diat diat tal chuanrawn tihpun theih ni sela a lawmawm khawp ang. A tira cheng nuai 40/50 a tihpun kha chu pawisa dinhmun kan hriatpui ve chin a awm a, a harsa a ni mai thei. Kan neighbouring state-te nen kan intekhin ngawt theih lohna lai a awm a, amaherawhchu, ₹ 5 lakhs tal chuanrawn tihpun ni thei sela a va tha dawn em, bialah kan hmang tangkai hlawm si a, tih kha tawi tein kan sawi leh duh a.

A dawt lehah chuan Horticulture hi Pu Deputy Speaker, ka sawi lawk duh a. Nimpiniah lawk khan kan Minister zahawmtak khan thlai phun hi July, August, September thla thleng hian a nung thei a ni a tih kha tunlai technology-ah anih chuan ka sawi ve thei lova. Amaherawhchu, Mizopain kan tih fo danah chuan April, May vel nipui a lo thaw a thing hnah a tla kawlh a, a lo chawr hluam hluam chho lai vel hi thing phun nun duh hun lai a ni. A chhan chu khatiang huna kan phun khan ruahtui a lo tla a, lei chhung ril thuk takah zung a kai hman a, a kum leh thal a lo thlenin a thi thei tawh lova, chu chu Mizopa hlawhtlinna a ni. Tunlaia kan lekhathiam zir tharte hian September thla thleng an han pawm hi ka hrethiam ve lova, an zir ang ka zir ve lova. Amaherawhchu, a practical-a ka hriat ve chu June, July thla-a ka phun

hi chu a thi zel. Mizoram lei hi engtingge a awm ka hre lova, kumpui linglet ruah a sur buan buan a, amaherawhchu, January, February thlaah hi chuan lei chunglang a lo ro va, March thlaah hi chuan lei han lai ila feet 1 chin chunglam hi chu a ro vek mai a ni, khami hnuai lama zung a thlak hman loh chuan thlai kha a thi ngei ngei tur a ni, tui te kan pe reng anih loh chuan, kan mithiamte thil zir pawh hi a fuh ber lem loh chang hi a awm ve bawk a ni tih hi kan Minister zahawmtak hian hre ve se thain ka hria.

Pu Deputy Speaker, Agriculture-ah hian tawi tein. Agriculture hi Mizoram-a Department Senior ber ti ila kan sawi سوالين ka ring lo a, chutiang khawp a upa a ni. He Department hnuai atang hian Forest te, Soil te, Fisheries te, Department engemaw zat a piang chhuak tawh a. Amaherawh chu a upat ang hu leh Budget-a pawisa kan dah tam ang hu a intodelh zai kan rel thei lo hi a mangan thlakin ka hria a. Tunah phei chuan kan ramah mihring kan lo pung zel a, thlawhhma duh angin kan la zau thei lo a, tin ram alo bua a chuvang chuan lo neih tur avang tawlh tawlh a, kham tharna khawp kan nei lo a ni.

Chutih lai chuan Pu Deputy Speaker, ram zawl kan neih hi Department-in heti zo zai pawisa kan neih atang hian reclaim ta sela, chumi hnuah a neitute hnenah hlan chauh nisela, chutiang chuan ka bial Phunchawngzawlah ram zau deuh mai khawih loh kan la nei a, khingte khi kan Minister zahawmtak hian min hriat sak sela. Chutiang bawk chuan Mizoram hmun hrang hrang ami hi hma la ta ila, buh thar kum kan puan te pawh hi a dik thei deuh ang a, chuti ni lova buh thar tam kum han puan ngawt mai hi chu kei chuan ka ring lo. A bul atanga systematic taka hma kan la lo a, a ngai bawk a kan kal chuan engmah kan ni chuang lovang. Chuvangin bul i tan tha ang u, tih hi Pu Deputy Speaker, ka'n sawi a nih chu. Ka lawm e.

**DEPUTY SPEAKER** : Tunge sawi leh ang le? Chawhnu lamah khan in inchuh leh si ang e. Lt. Col. Z.S. Zuala.

**Lt. Col. Z.S. ZUALA** : Pu Deputy Speaker, ka lawm e. A hmasa berin Finance Demand No. 9 hi han sawi ka duh a. Hetah hian Sainik School hi han sawi ka duh a, hei ka veilam ami hi a bial chhunga awm a ni bawk a. DoNER Ministry-in 2010 khan vaibelchhe 82.89 anrawn pe a, tin 13<sup>th</sup> Finance khan vaibelchhe 50, hemi hi tun thlang hian kan la hmang thei lo a.

Tin, kan lo hriat danin Consultancy Firm hi ruat fel a ni tawh a, tin, chumi bakah vaibelchhe 25 atan contractor pawh tihfel a ni tawh a. Tin, contractor hian vaibelchhe 25 a 25% hi min release sak theih chuan kan in mobilize thei ang an ti a, State Planning Board Vice Chairman-in min hrih dan chuan tunkum atan vaibelchhe 12 ear-mark a ni a ti a. Tin, kan hriat angin tunhma khan Home Department khan hma an la a, tunah Education Department-ah he hna hi pek a ni a, tunah hian a hna hi a ngawi vung vung mai a, ngaih pawh hi a tha lo lek lek a, chuvangin hetah hian engnge hmabak la awm. Tunah hian a trigger-te hi a hmeh per theih tawh mai lawm ni tih kha Finance Department khan min lo chhui sak se, hma deuh hleka hna tan dante



a awm em? tih kha ka'n sawi duh a, chuti anih loh chuan kan delay anga, tun termah te hian hna te ka thawk hman lo mai ang tihte ka'n hlau deuh rum rum a, chu chu kan Finance Minister zahawmtak hian min lo hriatpui thei se.

Tin, a dawt lehah chuan agriculture hi kan Minister zahawmtak hian, tun kum hi buh thar tam kum an puang hi a huaisenin a lawmawm ka ti a, mahni tana challenge insiam ngam Minister kan nei kha tha ka ti a, kan thar ngei pawh ka ring a, kan member zahawmtak Pu Thlenga khan a ring vak lova, kei chuan ka ring khawp mai. MI project hi ka bial Tlangnuamah khian pahnih kan nei a, Gossain leh Pharbawk, tunhma sorkar hmasain an lo ruahman kha a ni a, keinin a rah kan seng ta a, kan lawm khawp mai. Tin, hemiah hian kan mite pawhin hna an thawk a, a Minister leh Parliamentary Secretary-ten min duhsak a, hnate kan lo hmuh phaha, an hna pawh a tha thawkhatin kan hria a, tah hian lawmthu ka'n sawi a. Tin, Tlangnuam atanga Pharbawk hi kilometre nga a tling lo mai thei a, agriculture Link Road tha deuh mai an lo siam a sorkar hmasa khan, chu chu Tlangnuam field atang khian tha deuhin a kal a, chu chu an huan lo ram kalna tha deuh mai a ni a, kan han sorkar khan nuai sawm a payment pawh kan tlak a. Amaherawhchu ruahsur leh thil dang avangin khilai kawng khi a tlang thei lova, a tlangna tur khian pawisa tlem a zawng han pek belh chuan a tlang mai dawn a, chutichuan kan lo neitute tan a tangkai dawn khawpin a lang a, khi khi min han tihtlang sak thei se chuan a tha khawpin ka hria a.

Tin, a dawt lehah chuan PWD hi han sawi kai thain ka hria a. Mission vengah sawn kan sorkar tirh khan black topping an ti nual hlawm, abik takin Mission vengthlang panna kawng atanga SR Valla Road an tih saw tha deuh maiin, kan sorkar tirh khan black topping min han tih sak a, amaherawhchu, a quality kha alo tha em em lova, ruahsur hnua hna thawh te anih avang khan duhthu a sam lova, saw saw a chhe leh tawh khawp mai a, sawngte saw min lo hriatsak se, min han siamsak thei se a lawmawm khawpin ka ring a.

Tin, chu lo lehah chuan Mission veng, Lungli kawng saw Republic te, ITI te, Salem hote lo kal chhohna a ni a, sawmi atanga Mission veng Bazar-a lo kal a, main road rawn pawh tawite yard zathum vel black top mai a kawng tuana tha mai tur hi a awm a, hmanni khan min rawn tihsak a, thui lo te, amaherawhchu an ni khan pawisa a awm tawh lo an ti a, min tin san leh ta mai a, kan request chiam thin a, mahse tun thleng chuan min tinsanah kan ngai tawh a. Saw saw tawite a ni a, min han complete sak mai se chuan sawti lai veng chhuahlampang ho zawng zawngin chhim lampang an panna Bazar kawng a ni a, a pawimawh khawp mai a, min hriat sak thei se a lawmawm khawpin ka ring. Tin, ITI khumi Mualpui 3<sup>rd</sup> Bn MAP kal kawng khu kan sorkar tirha an han tih kha a ni a, khu khu a titute kha kan PWD nilovin Tantia company ni khan ka hria a. Amaherawhchu an ni khan kan PWD an tluk lo deuh emaw ni, a chhe leh tawh riau mai a. Khu khu min tihsak leh thei se a lawmawm khawp ang. Tin, Kan member zahawmtak, Pu Thlenga rawn sawi ITI atanga World Bank kawng kal thlakna kawng khu tha deuh maiin min han tihtlang sak a, khumi kawng khu an hmang tangkai khawp mai a. Khawchhak lampang kal nan te leh Aizawl chhim lampang ho reng rengin Zemabawk leh Durtlang thlenga an kalna atan shortcut leh traffic awm lova kawng tha deuh mai kaltlang a ni a.

Khami kawng an han zauh takah khan retaining wall sang tak mai siam a ngai ta a, tin, ITI a hming thanna, thing mawi tak tak maite pawh kha kih alo tul a, khangte kha an kit a, tin, parapet siam tur tih kha a Engineer-te leh a vengchhunga

hotute inbia khan parapet tih ai chuan railing nalh deuha siam nise tih thu an titlu a, an la siam hman lova, tla te pawh an lo awm atih kha a dik a, tla te pawh chu an lo awm nuala. Amaherawhchu fatal injury neite phei chu an awm chiah lemlo aniang. Khu khu kan ti mai dawn e, an ti a, an hnaah pawh khanin alo tel a. Kha kha han clarify a thain ka hria a.

Tin, Salem vengah khan kai chho ila, Salem village road, khu black topping min tihsak theih chuan vengchhung inkalpawhna tha deuh mai mipui tamtakin an hlawkna tur a ni a. Khu khu min han hriat sak se ka duh a. Tin, Tlangnuam hemi Kulikawn atanga CP road kal phei a, Hridaikawn kan tih atanga kal thla Mauhak kalkawng vel khi a chhe khawp mai a. Khitilai khi khaw chung kawng a ni a. Tunhma-a motor 407 kal thinte pawh kha tunah chuan a kal ngam tawh lova, khilai khi immediate requirement a ni a, min han ngaih pawimawh hmasak se a lawmawm khawpin ka ring.

Tin, hei kan bial chungah Rajiv Gandhi Sports Stadium a awm a, hetah hian hna an thawk nasa khawp mai a. An hnathawh azarah khuan veng chung mipui abik takin Salem veng te khuan eizawna tha deuh mai an lung lak atangte khuan an lo hmu a, PWD hotute pawh an thilphal a, an lung lak chhuahte pawh khu rawra-ah te an lo chhut sak a, tin, lungremah te pawh an lo siam ve a, a lawmawm a, tin, a hna pawh khu a kaltluang hle niin ka hria a. Tin, tuna a progress pawh khu kan in atangte pawh khian alang reng a, lawmthu sawi pahin information pek ka duh ve mai mai a.

Tin, Power Supply, 39-na hi, Power Supply hi a tha khawp mai a, tunhma ai kha chuan, a hmata kha chuan Mombati-te pawh kha an han sem zar zar a, mahse tunah hi chuan a la duh an awm tawh lo a ni mai thei e. An sem ta lem lo a kan thiante ho hian. ITI chuanhnuai lampang, ITI te, Salem veng te hi veng thanglai kan ni a, Power Supply han tih dawn hian ban phunte a ngai dawn a, khatiang vel atan khan a chuanhnuai lampang khu ban phun tur tam tak a awm a, tin, connection-te pawh thui tak tak atanga pawh a ni a, khulai khu kan mithiamten minrawn en sakin estimate-te minrawn siam sak thei se a lawmawm khawp ang.

Tin, Tlangnuamah khian transmitter, khi a tawh lo khawp mai a, khitilai khi engemaw ti a power supply tihchak zawkna tur transmission han improve-na tur kawngte minrawn sak theih chuan a lawmawm hle-in ka ring. Tin, hei Power leh P.W.D-te kan hmu a, vengchungah black topped tha tak takin a tlan tlang a, a generally-in tun sorkarah hian kan bial chungah hi chuan improvement hi a lang a.

Tin, motor-a han tlan velte pawh a nuam a, entirnan, ITI to World Bank Road kan hawng theite khu khumi khuan mi tam tak economic hi a improve a ni. Heti laia hel kual ngai lova, tawi te-a khutianga an tlan tlangte khu a lawmawm a, hei hian nasa takin general public leh economic leh social life nasa takin a improve tih kha ka sawi duh a ni. Ka lawm e.

**DEPUTY SPEAKER**

: Pu John Siamkunga

**Pu JOHN SIAMKUNGA** : Pu Deputy Speaker, ka lawm e. Wawiinah hian Demand 16 lai sawi tur a awm a, minute 10 chhung chuan kan sawi vek seng lovanga, ngaih pawimawh lai lai kan sawi ve a nge.

A hmasa berah chuan Demand No. 13-na, Personnel & Administrative Reforms chungchang hi, hei hi Congress-in sorkarna kan chan hlim khan kan Minister zahawmtak hnenah hian ka zuk leng a, engtiang angin nge State Civil Service exam conduct a tum ang aw tih te ka zuk zawt a ni. Chumiah chuan tum dan tha deuh a lo nei a, tunah hian kan mamawhna a sang em em a, State Civil Service hi 30 chuang kan mamawh a, amaherawhchu, vawikhat-a kan lak nghek hian gap thui tak takte a awm thin a, tin, zirlai tam tak MCS officer lo nih tumte tan khan chance a awm thei thin lova, an kum-te a over thin a ni. Chuvangin, kum tin 10 vel emaw lek lekin la ta ila, pension an lo awm ve zel anga, demand kha a lo sang ve zel anga, hetiang hian kumtin kan tichho thei anga tih khan ngaih dan a lo nei a, a lawmawm hle-in ka hria. Wawiina a kal chhoh dan pawh hi chutiang chuan puitling takin he sorkar hnuaiah hian a kal chho a ni. Hetiang tih nachang hria sorkar kan nei hi a lawmawm takzetin ka hria. All India Civil Service khu Rajya Sabha-in kuminah chuan pension te leh khatiang demand sang zel nen hna hi 800/900 vel chu a ruak e, a ti thin a. A kum lehah khan exam an han bei a. IAS te, IFS te, IPS te khatiang khan hnuak awm sa khan zirlai thiam te an inel thin a ni. Chutiang bawh chuan MCS ah hian zirlai tam tak, officer lian nih tum hian an han inel chho dawn ang a. Chu chuan zirna quality hi thui tak a siam thain ka ring. Hei hi sawi loh theih loh niin ka hria a. Hetiang bawh hian State Police Service-te pawh hi tih chhoh ni thei se chuan officer lian nih tuma kan zirlai, college student emaw University-a zirlai han inel chho hian quality nasa takin a siam ang a. Beiseina eng nen kan zirlaite an kal dawn niin a lang a, a lawmawm hlein ka hria.

A pahnihaah chuan Demand No. 45-na, Public Works Department-ah hian tlem han sawi duh ka neih chu tunah hian Cherhlun Thingsai inkar kawng khi a chhe viau mai a. Khi khi PWD hma chiah chu la ni lo mah sela, nikum lampang khan ruahtuite a tha a. Englai pawh khan ruah a sur a ni ber mai a. Kha kawng chhe tak karah khan harsatna tam tak kan tawh a ni. A khawtlang ang ten an hnatlang a, kawng an siam a. Tin, PWD lampang pawh an tha khawp mai, an theih ang angin min pui a, a nuai tel an rawn seng a ni. Tin, MLA Fund lam atang pawhin nasa takin ka pui bawh a. Chutiang chuan nikum khan chaw nghei lovin an awm thei a. Kuminah pawh hian harsatna tam tak an tawh a. A kawng zawl phei lai, tui tam laiah phei chuan motor hi a kal hlei thei lo a ni. Chu chu kan hotuten min lo hriat sak sela. Engtikah nge black topping hi kan tih ang tih hi Sorkar hmasaah khan a laihna rei tawh mahse, black top tur atana rawtna hi a lo lut lo nge maw ni, a hnu fe, 2010-ah khan tihnun chauh a nih tak avangin tum angin thil a kal lova. Amaherawhchu, hei hi chu a special deuha min han tihsak pawh ka ngen deuh a.

Tin, South Chawngtui leh North Vanlaiphai inkar khi RD kawng thin a ni a, khilai kawng pawh khi a chhe khawp mai a. PWD hian min lak sak se chuan khilai kawng khian awmzia a nei ve deuhin ka ring a. Fund atangtein ka pui bawh a. Chawnghei lo hi chuan kan la insiam ve tawh tawh zel a ni. Tin, khilai kawng khi a pawimawh a. North Vanlaiphai atanga Khawhriah, Hnahthial atanga Lunglei kal thei tur a ni a. Champhai atanga Lunglei direct-a kalna atan phei chuan nakinah chuan kawng tha tak tur niin ka ring. Tin, chutih rualin South Vanlaiphai leh Muallianpui

inkar kawng chhe takte khi black top hun kan nghakhlel a. Khingte khi kan hotuten min lo chhinchhiah sak sela.

A pathumnaah chuan Power chungchang. Power chung changah hian, Congress hian nasa takin hma tunah a la chho mek a, kan sorkar hian. Chutih karah chuan hei inhnial neuh neuhna te a awm a, a pawl khawpin ka hria. A vang chu hun kal tawh kan chhut chuan tui atanga Hydro Electric Power hmanga kan siam chhuah eng hi engzat nge kan neih tih hi sorkar kal tawh atang khan a chhut theih vek a ni. Chutianga kan chhut chuan tuna kan record neih sa atang hi chuan PC Sokar laini 2 megawatt an siam chhuak a, Serlui 'A' leh Khawiva atangin an siamchhuak a ni. Congress hianin a hun chhhung tunhma a term hmasa lamah khan Mega Watt 12 vel lai alo siamchhuak a, MNF hian Megawatt 3 an sorkar lai khan an siamchhuak a ni, Lamsial leh Maicham Phase-II ah te. A dang zawng kha chu Congress a ni. Engvanginngge Congress hian a lian lamah hma a lak loh tih hi inhnialna leh zawhna a awm thin a. Kan hriat tawh angin kan House Leader pawhin a sawi tam tawh mai a, Megawatt thum chiah kha Central Sorkarin State hnenah siam phalna a pe a ni. Megawatt thum aia tam kha project a siam theih reng reng loh khatih lai khan. Chuti chu anih avang khan Megawatt 3 chinah khan sorkar kha a in concentrate a, chumi anih avang chuan tamtak siamchhuah theihna kawng a kaw lo a ni. Chuti chung chuan Megawatt thum chin kha siamin Megawatt 12 lai kha a lo siam chhuak hman a ni. Fak tlak niin ka hria a, infak hi kan har mai pawh a. Infak phur atanga thil tihte a nawm theih tehlu nen, infak hi chu a harsa kan ti thin a, kan Mizo miziaah hi chuan. Tunah pawh hmalak lehna tur tamtak a awm a, a hmalak lehna tur pawh kan hria a. Tuna kan han hriat chinah pheih chuan Tuirialah khuan hma a la tan leh tawh a, Megawatt 60 pechhuak thei, tin, Kolodyne Phase-II ah khuan Megawatt 460 pechhuak thei turah hma kan la tan leh mek bawh a, tin, Tlawva lamah te pawh tin, Lungrengah hian Megawatt 815 lai pe chhuak thei turah te pawh hian hmalak chhoh a ni a. Chhimtuipuih hian Megawatt 635 pechhuak thei Burma nena kan inrina, a hmar luanna chhoah khian lak a tum bawh a. Tin, Mat-ah hian Megawatt 76, Tuivawlah hian Megawatt 42, Tuiriniah Megawatt 38 Bairabi, kan sawi lar em em-ah pawh hian Megawatt 80 ah hian hma kan la dawn mek a ni. Khatiang khan hma nasa takin a la a, hmanni kan resolution-ah pawh khan, he sorkar hmalakna hi a tha a ni, a faktlak a ni kan ti a, he Sorkar Pu Lal Thanhawla kaihhrui hi faktlak a ni tiin resolution pawh kan pass anih kha. Chuvangin kan rawn sawi tak atang khan Power lamah hi chuan dem chi a ni lo, theihtawpa hma lo la tu leh siamchhuak tam ber a ni zawk e, tih kha kan sawi duh a.

Tin, Soil Department hian nasa taka hma lo la in hei a hrang hrang chu ka tarlang thei lo anga. 2004 khan Hnahthial Soil Division saw thiatin hmun dangah min dahchhuah saka, amaherawhchu kan Chief Minister zahawmtak hmalaknain, tunah hian Soil Department a chang bawh a, Soil Division hi Hnahthialah min dahluh sak leh tawh a ni. Chuvangin kan lawm a, lawmthu ka'n sawi a ni. Tin, hei NLUP lam hawi vek a ni a, NLUP hi mirethei chhanchhuahna programme lianpui mai sorkarin a kalpui a ni. Thenawmkhawveng emaw kan u leh naute hmun hrana in hran changtawhte emaw bul tanna tur ₹ 200/100 min puk tir rawh aw kan tih pawh a kan theih loh laia first installment a cheng sing hnih lai maia sorkarin an pui hi chu a ropui a ni. Kut hnathawktute ngaihsak mi, kuthnathawktute hma khawngai mi, nakina Mizoram kal chhoh zelna tur atana Zoram economy siam tum a, he Project lianpui din chhuaktu, he sorkar hi fak tlak niin ka hria. Chuvangin Agriculture hnuaiah te, Soil-ah te, Fisheries leh a dang dangah hian, nasa takin hma kan la a, kumin chhungah pawh

hian vaibelchhe 234 lai dah a ni leh hian Zoram mipuite, he sorkarin a hmangaih zia a tilang niin ka hria a, a ropui takzetin ka hria a.

Tin, MI hnuaiah hian Mat leh Ngawizawl Project-te min han tih sak dawn a, a lawmawm takzetin ka hria a. MI hnuaiah hian tunah tin 34,205 lai hi thlai chin theiha siam a ni, buh chin theiha siam a ni, chuta tanga thar chhuah theih chu quintal 60,000 vel lai thar theih turin a ni. Chuvangin MI hian hna a thawk tha, a detail-in kan sawi hman lo a, a vai hian detail deuha han sawi chakawm mahse kan sawi hman lo a, kan pet lawra duh ang kan thlen theilo erawh chu pawl ka ti e. Pu Deputy Speaker, ka lawm e.

**DEPUTY SPEAKER** : Tunge sawi leh tur le? Minister ko mai ang aw. Pu P.P Thawla.

**Pu P.P. THAWLA** : Pu Deputy Speaker, ka lawm e, Demand No. 13-na DP & AR ah khan han sawilan ka duh chu, sorkar hnathawk post ngaia kum 12 awm promotion-na tur awmlo ten ACP an lak thin kha tihtawp sak an ni a, tun sorkar hian pek chhonzawm a tum em aw? Tih ka ngaihtuah a, tum ta se, engtik atangin nge a pek chhonzawm theih ang, tih te , tin, tumlo ta se eng nge a chhan nita ang? tih han sawichhuah ka duh a. A dawt lehah chuan DP & AR atanga posting & transfer an siam order hi MLA te hian kan hmulo fo a, hei letter box kan nei tliar tliar a, kan letter box-a han dahsak thliah thliah mai hi a harsa in ka ringlo a, kan Secretary liante an lo inthlak zing si a, Portfolio-te, an department enkawlte alo inthlak zing si a, an bangbo thei hle mai a, hei hi copy pek ve theuh ni sela tha hlein ka hria a, chu chu Pu Deputy Speaker ka'n sawi duh a ni.

Demand No. 31-na, Agriculture lamah vaibelchhe 180 kan neihna hi lehlamah chuan a lawmawm a, a taka hman dan tur si se ka hre lemlo nain, hetah hian kan Minister zahawmtakin a hun reilote chhung hian ka bial Palak Constituency tlawhin a bik takin Phura zawl te, Palak Dilte a tlawh chhuak veka, hei hi lawmawm ka ti a, a thlamuan thlak ka ti a, a bula kan duhzawngte kan han sawipui dawn ni khuaah pawh mithla leh rilruah a cham ve nghal zel mai, han dawr thin hi chu a nuam ka ti a, a lawmawm ka ti hle a ni. Saiha District chhunga ram tha, Phurra zawl kan nei hi Mizoram pumpuia hmun tangkai leh a rahte pawh kan lo hlawkpui theih ngeina tur hian nasa taka enkawl uluk a, tihhlawhtlin hram hram hi tum ni sela, a lawmawm hlein ka hria a. Sorkar hmasa khan mahni tha leh neih senga leilet tizawl theilote a nawr mam sak nual a. Tin, hmanni a Agriculture Minister lo zinte pawh khan heng Phura zawl hi a ngaihpawimawh te zinga pakhat kha a ni a, a hlawhtlinna turin kan Minister zahawmtakin a hunchhung hian chak taka hma min lak chhonzawm sak ka duh em em a ni. Phura zawl bulah khuan an tui lakna ber Vathlo Lui an tih hi a duh duhin a kal kual mai mai a, mi leilet ramte a tihchhiat sak nasa a, hengte hi control a, awmze nei taka kaltir a, mi leilet zawlte tichhe tawh lova a kanna leilawnte pawh mumal zawka heng laia leilet siam tuten awmze nei a an hman tangkai theihna turin hma min lak sak thei hram se tih ka duh thu ka han tarlang duh bawk a ni.

Hei, Finance lamah Demand No. 9-naah hian han tarlan ka duh chu, kan Starred Question No. 39-na ka han en a, chutah chuan Home

Department-ah TA/DA kan sipaite hovin an lak loh bill pending chu nuai 6,79,92,000 a ni tih a lo lang a. Hei hi Finance Minister zahawmtak hian kan sipaite duty kal/zin hah em em tena TA/DA hi a tlem emaw a tam emaw la hleithei lova heti zat pending a awm ta mai hi a vai vai ka ti lo, tun sorkar kalchhoah hian 50% tal clear thei tur hian pawisa hi pekbelh nisela RE ah emaw tal pekbelh nisela, a theih chin chin tihfelpui nisela a va tha dawn em tih kha ka han tarlang duh a ni.

Pu Deputy Speaker, Demand No. 15-naah hian ka zawhna pakhat House-a zawh hman chiah loh sorkar hmasain District thar pathum a lo puante kha he sorkar hian a taka function a tum em tih chhanna mumal tak House min hrih hre thei sela lawmawm ka ti hle ang.

Demand No. 33-naah sawi ka duh chu, Soil & Water Conservation Department hi ka sawi thin a, mahni hunlaia kan thahnemngaihna anih ve avang khan tunah tak chuan kan House Leader zahawmtak hian he department hi a lo enkawl tawh bawk a, a quarter-te, a office te pawh sak zawh nual tawh a niin ka hria a, chuvang chuan a hunchhung hian Soil & Water Conservation Division, Saiha hi a taka function thei ngei tura hma min lak sak turin ka duh a, chu chu ka han tarlang leh duh a ni.

Hei Demand No. 2-naah Governor tih hi a lo lang a, thuthang kan hriat danin kan Governor hi tun ni 25 July khan a term a tawp tawh tih kan hria a, a thar tunge kan neih ang tih chu kan hre miah lova a lo lan takah chuan, Governor hian sorkar pahnih min uap hman a, dan tlangpuiin sorkar pahnih min uapna danah hian a thlamuanthlakin a lawmawm hlein ka hria a, a thar nei leh ang i maw.

Demand No. 45-na P.W.D. vaibelchhe 299,79,64,000 kan neihah hian Saiha District-ah hian Saiha atanga Chakhang lampang khawchhak tlangdung PMGSY kalkawng hi a formation cutting line chu zawh a ni tawh a. Niawhtlang thlengin permanent work pawh (metal road pawh) siam a ni tawh a, a piah lamah hian leilung a tha angreng si a, a diak thei em em mai a, hei hi permanent work atan tender-te hi a hnai tawh em le, tun sorkar hun chhung hian Chakhang thleng rawk hian metal road min han siam sak thei sela a va han lawmawm dawn em tih ka han tarlang duh a.

Tin, a dawt lehah chuan National Highway hi tunah Kolodyne lui piah lam Tuipang lampangah an hnu hma hmuh tur a lo awm tawh a. Ka zin veivaka ka han hriat ve chinah hian a viltute hi an khua a har deuh thinin ka hria a. Hei hi kan Officer liante hian han ngaipawimawhin han chenchilhin han tlawh zing ve deuh sela, a hlawhtling tha hle dawnin ka hria a. Ngaihsak loh hi chuan hmalakna hi a zuzi leh thin a, a mawi mam tawh thin lova. Kan department hotu lian ten an han ngaipawimawh viau a, an han vil a, an han riahchilh zak zak hi chuan hmalakna hi a puitling ropui zual thinin ka hria. Chutiang avang chuan heng laia hmalakna pawh hi National Highway nihna ang taka a puitlin theihna turin PWD hotute pawhin an ngaihtuah hle nachung pawhin tun aia nasa zawka min ngaihpawimawh sak a tha hlein ka hria a, chu chu ka han tarlang leh duh bawk a ni.

Hei Lawntlai atangin kan va kal a Tuipui Kawlchaw kan tih mai, Kawlchaw luiin a rawn finna lai a ni a. Sawmi Kawlchaw leilawn saw a awm tawh tlat lo mai a. Hei hi tender tar anih leh nih loh ka hre lova. Tin, hmalakna ka la hmu chiah lo baw a, hemi lui leilawn awm lo hi chu khawtlang bial tam takin kan tuar tak meuh meuh a. Chuvangin, Kawlchaw lei hi a hma thei ang bera kan neih theih ngeina turin kan Chief Minister zahawm takin he a department enkawl hmalaknaah hian hma min lak sak kan mamawh hle a ni. Kawlchaw kai atanga New Latawh thleng hian PMGSY hmalakna a ni a. Hei hi MPWD in zo tawh mahse maintenance anih tawh loh avangin bial mipui ten kan tuar hle a, mahni in hai chawpte a ngai thin a. Hei hi BRTF-in an lak loh rau rau chuan chhunzawm hram hram a tha lawm ni tih ka sawi duh a. Chubakah, a piah lamah pawh hian kawng tha tak tak kan neih theihna turin kan Chief Minister zahawm takin hma min lak sak ka duh em em a ni.

Pu Deputy Speaker, Demand No. 39-naah hian ka zawh duh chu hei nimin lama ka zawhna chhuak hman lo, Seling bula Quarry chim a nau pahni a delh hlum takte kha zangnadawmna nuai khat ve ve pek a ni. State Disaster Management atanga pek a ni tih a lo lang a. Hemi chungchang thua March ni 25 a New Serkawr bula electric current-in Bus a man tak avanga mi 9 lai, nupa tuak te, pafa te an thih takna chungchangah sorkarin singkhat lek lek ralna a pe kha, helai hi ram mipuiin kan rilru a na hle mai a, kan nun leh kan thisen hi a va in hlut hleih ve ka'n ti deuh a ni. Khiti lampang atanga rawn thu ve, i dinglama thu Minister zahawmtak tante pawh , i vei lama thu ve tan pawh hian kan mipuite hmaah hian kan zak chum chum thin a ni. Helai hi heti mai hian em ni a tawp ang tihte ngaihtuahnaah a awm a. Tin, Power Department-te hi department hausa a ni a. Hetiang thingtlang mipuite rilru damna tawk tur ang sum leh pai chu a ngaihtuah chawp thei mai lawm ni? A awm sa chiah loh pawhin hengte hi chu thil phalna rilru atangin a siam chawp theih mai loh maw? Hei Tamil Nadu-ah Bus a accident a, an Chief Minister chuan nuai khat te, singnga te a pe tih te. Tin, Tripura-ah camp a kang a, chutah pawh chuan zangnadawmna an pe tawk tawk a ni tihte kan hria a. Thingtlangin Radio thupuan atang te, TV atanga an lo hriat phak dan atangin, hetiang Mizoram a thil thleng mang zen zen lo, Mara ramchhungah pawh thleng ngai mang lo Bus tlan lai, Electric Department ho inthlahdah vang leh an enkawl uluk loh avanga kal kawnga lo hnawksak a, bus a man a, passenger 9 lai a hmuna an thi ringawt mai hi, an arte thih mai hi chu rilru a na a ni. Chuvang chuan he ram leh he sorkarah hian mipuite kan lawm theihna turin heng natna leh vanduaina raphlak tak tuar hote chung thua hian kan sorkar inphalna kan mamawh a ni. Disaster Management atangin emaw Electric Department atangin emaw a ex-gratia pek hi, kan mipuite rilru natna ber anih avangin ka han sawinawn leh duh kher a ni e. Pu Deputy Speaker, ka lawm e.

**Pu HMINGDAILOVA KHIANGTE** : Pu Deputy Speaker, ka lawm e. Kan House Leader, Chief Minister ni baw leh kan Finance Minister Demand-te wawinah he House zahawm tak hmaah hian kan han sawi dawn a. kei hian avaiin ka sawi seng lovang a. Amaherawhchu, pawimawh ka tih deuh deuh te hman ang tawkin kan sawi ve dawn a ni.

A hmasa berin demand No. 31 – Agriculture. Nimin lama kan hriat ang khan Mizoramah hian kan kum khat ei chu sawi loh thla 3 ei kan lo thar thei tawk mai alo ni kha lungngaihthlak zawngte pawhin a thlir theih a. Chutihrealin buhfai leina tur cash crop lam kha kan tharchhuak tam thei baw si lova, a mangan thlak zawng chuan

a inngaihtuah theih fe awm e. Amaherawhchu, hetihlai tak hian kan hotu duhtak kan House Leader-in alo ngaihtuah lawk chiah mai NLUP chu tunah hian a hun tak maiah sem theihin alo awm ta a, kan sem ta mek a ni. Chung harsatna kan tawh zawng zawngte sukiang thei tur chuan NLUP trade chi hrang hrang kan han sem tan a. NLUP trade chi hrang hrang dawngtute hian ei leh bara kan intodelhna tur a ni tih hria a, theihtawpa tihtak meuha kan hnate hi kan thawh a ngai a. Ni 100 chhung inhlawhfaknaa kan hlawhte hi kan inngahna mai ni lovin, Loneituten Buh tam zawk an thar theihna turin incentive-te pawh hi Argiculture Minister pawh hian an ngaihtuah ve tho ka ring a ni. Kan ram thenawm khawchhak lamah chuan incentive chu sawi loh Buh thar tam hnenah chuan subsidy-in an lei a, India ram sorkar kalphung nen chuan a inang lo hle mai. Man to zawka lei theih turin kan farmer te hi incentive pe thei ila a lawmawm hle ang.

Demand No. 32-na, Horticulture-a Thlai leh thei te hi eizawna tlak vek an ni, a bik takin Israel Serthlum hi kan tuipui tlanga NLUP atana an buatsaih hma pawh hian hmun thum laiah sem a lo ni tawh a, Rulpuihliah khan 2008 khan an lo phun tawh a, 2010-ah Sakei Lui, Saitual leh Kawnpuih an lo phun tawh a ni. Tunah hian NLUP-ah tam tawh sem a ni tawh bawh a, Israel Serthlum te hi phun theih tur buatsaihna Central pawisa hlir a niin ka hria a. Demand a sang si a kan sorkar hian State pawisa hian a tanpui thei lawm ni tih hi ka'n sawi duh a ni.

Kan MNF ministry khan kan ram hi organic state-ah a lo puang tlat mai a, kha vang kha emni aw fertilizer subsidy kan hmuh kha a tawp ta si a, chuvangin farmer-ten harsatna namen lo an tawh a, tin, tunlai tak hian Lei tha an lei hi a lo thur lehngala an buai viau mai, approved farm atanga lei an nih phei chuan kan Minister zahawmtak hian min ngaihtuah sak sela a lawmawm hlein ka ring a ni.

Kan House Leader chan Minor Irrigation hi a lar viau lo mai thei a, bial tin hian kan thatpui hle a ni, kumtin hian district pakhat project panga atanga sawm hi an buatsaih a, a khaw miten an hlawkpui em em a ni tih hi he House hi ka hrilh duh a ni. Chutih lai chuan Kolasib district-ah EE pakhat, SDO pakhat, JE pahnih chiah an awm a, hna a tam si a, kan House Leader hian a staff tihpun zaite a rel thei em tih Pu Deputy Speaker, kan zawt a ni. Tin, MI Project an la buatsaih loh na hmun khaw tam tak a la awm a, chungah chuan a rang thei anga kan buatsaih leh chuan mipuiten kan thatpui dawn a ni tih ka'n sawi lang duh bawh a.

A dawt lehah chuan PWD lampang han discuss leh dawn ila, kan hriat angin BRTF in kum hnih khat kal chauhah khan kan state PWD hnenah kan state Highway 6 ngawt mai leh kawng engemaw zat an enkawl atan an hand over ta a. Transitional period-ah kan awm avangin Mizoram hian kawng lamah hatsatna tam tak kan tawh a ni tih kan hriat tawh kha. Chuvang chuan kan PWD a officer-te leh an staff-te hi engemaw chinah an khwngaih thlakawm te pawh a tih theih awm e, chutih lain theih tawpin hna an thawh tih kan hria. Ka'n sawi duh chu kum 2009 a kan lo au pui lauh lauh tawh Serkhan – Bagha road hi up gradation-in vawinah hian siam tura buatsaih mek anih avang hian kan House Leader, Minister changtu ni bawh chungah hian lawmthu ka'n sawi duh bawh a. Tin, diversion-te hi kan sawi namek mek



bawka ka'n sawi tel ve duh a, kum 2006-2009 inkara Serkhan – Bagha road-ah khan diversion hi ₹ 190 lakh vel awm a hriat a ni a, amaherawhchu Finance Department erawh chuan an hre lo, chu lam chu sawi vak lo mai ila, ka'n sawi duh ber chu Kawnpui – Hortoki hi 12 Km vel a ni a. Kan hriat ve fo thin Monsoon Damage chhuanlam neiin helai kawngte hi a siamthat dan a awm lawm ni, khawi emaw lai lai atangin diversion turte hi a awm thei lawm ni tihte hi ka'n zawt e, Pu Deputy Speaker.

Tin, pakhat lehah chuan NH-47 Sairang thlen hmaa peng chho Mualkhang khua hi kawng atang khan 7 Km chauh a ni a. PMGSY a laihna a rei fu tawh a, tunah hian metal road ala ni lova. Nikum fur te phei kha chuan ka zuk tlawh a, culvert-a tlak a hlauhawm a, ka motor-te ka hovin kan nam laih laih a ni. Chuvangin ka mangan pui a, MLA Fund ₹ 8,00,00/- ka pe a, a lo daih lo deuh hlek a, V/C ten theihtawp an han chhuah a, hnatlang nen nuai khat leh singhnihin culvert pakhat kan siam thei a, vawiin thleng hian a la tha a, a la that zel pawh ka ring a. Hengte hi theih tawh kan han chhuah vena chu a ni a. Kan House Leader, PWD Minsiter ni bawh hian hengte hi min hriatsak thei se ka duh a, he kawng tawi te hi a tihthat dan turte pawh min ngaihtuah sak turin ka'n ngen nghal bawh a ni.

Pu Deputy Speaker, a dawt lehah chuan Power a ni, kan ngaithla tawh a, kan Member zahawmtak, Pu R.Lalrinawma khan thui tak chiang takin Mizorama Power chungchanga kan House Leader-in hma a lak tawhnate leh Minor Hydel Project – 18 a 14 chu Congress sorkar chhunga siam vek a lo nihte kan hre bawh a.

Vawiina ka'n sawi tur erawh chu RGGVY Project Mizoram-a alo awm hi lawmawm ka ti a. Pawisa lah chu Vaibelchhe 2700 a tling thelh a. Tin, vanneihthlak takin kan hotuten Subject-I Committee Member-ah min dah ve a. He RGGVY hi namenlovin kan tui a, kan ngaihtuah ve a. Mizoram hmun hrang hrang, kilkhawr deuhthe kan tlawh a, chungah chuan an supplier-ten hna an thawk tha em tiin. Chhim lamah theihtawp kan va chhuah ve a, Pu Nirupam Chakma bial thleng thleng sawn kan va kal ve a, chungah pawh chuan a tira work order an neih ang nilo khan hmun tam takah hna an thawk tih kan va hmu a, chu chu kan va hriat duh reng a ni. Tin, chutih lai chuan, Pu Deputy Speaker, work order an buatsaih lai kha alo rei tawh deuh a, khatih laia mamawh kha vawiinah chuan alo pung daih tawh mai a. A bik takin BPL connection la neilo te kha work order anga pek hnuah pawh khan alo danglama, a lo pung si a, tam tak pek lovin an awm hrih a ni. Tichuan khaw vanduai deuh te an awm a, entirman, Bualpui North khu, khatih laia work order an siam lai khan a engamah tel lovin Bualpui North khu an lo hmaih hrim hrim a. Amaherawhchu department hotute ka hrih a, a tawp lamah a tihfel dan chu a awm thei mai ang tiin min chhang a, ka lung chu a'n awi phawt a.

Tin chutih lai chuan khaw eng lo zawng zawng tihen tur a ni a, BPL Connection neilo zawng zawng pek tur a ni bawh a. Chubakah intensification kan ti anga, thingtlang lama kan unauhte chuan extension ti hian an hrethiam deuh ber a, chungte chu buaipui mek anih laiin Hortoki atanga Bawh khaw pakhat Dilzau khu a tlawh pawh an la tlawh lova, mi 40 vel an awm a. Tunah hian Rieng refugee mi engemawzat an rawn lut dawn bawh a.

Chuvang chuan khu khu min ngaihtuah sak thei tho vang tih ringin ka'n sawi chhuak a ni. Chutih rual chuan Pu Deputy Speaker, heng RGGVY Project tha tak mai, Mizoram-a.....

**DEPUTY SPEAKER** : Minute 2 ila nei, minute 2 ka khilai che.

**Pu HMINGDAILOVA KHIANGTE** : Project tha tak mai Mizorama ₹ 2060 Lakh zet mai senna turah hian heti zat hi hmang tangkai lovin kan supplier te pahnih chhim lam leh hmar lam atana an thlante hian min hawsan mai ang a, a ram mite hian mamawh tam tak ngah siin min kalsan mai ang tih ka hlau hle a. Chu chu kan Minister, neitu hi a hre chiang sa tho bawk a, kan remind duh ve a ni. Vawiina kan demand, kan House Leader zahawm tak, kan Chief Minister ni bawk demand leh kan Finance Minister zahawm tak demand-te hi pass tlak an ni a, pass pui turin he House zahawm tak hi ka'n sawm a ni e. Ka lawm e.

**DEPUTY SPEAKER** : Aw le, khi dar khat a la ri lo na a, midang han in kohna hun a ni tawh lo a, kan chawl ang a, dar hnihah kan thu khawm leh dawn nia.

**2:00 P.M.**

**DEPUTY SPEAKER** : Le, kan Demand sawihona kan tan leh nghal ang a, vawiin chu sawi kan la tlem hle mai a. Chawhma lam khan member 5 chauhin an sawi a, tunah Pu K.S. Thanga ilo ko ang.

**Pu K.S. THANGA** : Pu Deputy Speaker, ka lawm e. Department 17 kan sawi dawn a, minute 10 chhung chuan, minute 1 pawhin a daih dawn loh avangin kan cover thei dawn lova. Chuvang chuan, a pawimawh zawng zawng pawh nilo, a pawimawh zual ngaih pawimawh te ka sawi mai ang a. Chumi hma chuan Pu Deputy Speaker, nichinah khan Fisheries chungchang Parliamentary Secretary anga ka awmna, kan enkawl lai chungchang kha Tuipui East bialtu Pu Thlenga khan a rawn sawi a, Member zahawmtak khan. Ka'n sawi duh chu Sateek bial tuna Aizawl South III ni ta saw, khaw 26 an ni a, ani kha Fisheries Minister-te a ni chung khan sawlam ai khan a puzawnte lamah thil kha a kal nasa zawk a, sawlam mipui saw an khawro a ni. Chuvang chu anih ka ring a, a tawpah pheh chuan mipui an han harh deuh tanah hi chuan tlanchhiat sana a pute tan a kam awhna velte pawh hi a ni awm mang e tih ka ngaihtuah deuh rum rum a.

Khaw 26-ah pawh khan in 4 theuh pawh khan an daihlo a, chutiang khawp chuan engmah dawng ve ngailo kha mipui tam tak mai sing rual kha an awm ve a. Chu chu hun hmasa khan an han dawng ve a, an lawm khawp mai a, khawtinah sawn Sangha tharlamte an nei ve ta a ni tih kha ka'n sawi duh a.

Pu Deputy Speaker, heng mi malsawmna dawnte hi a hunlaia tihsak theitu annih laia tihsak lova, vawiin-a hmasawmnate an lo dawng ve a, an tlanchhiat san tawh hnu pawha va la itsik anga a han sawi a han sawi lai hi chu

mipuite rilru hi a tina ang tih ka hlau a, pawl ka ti a, kha kha mipuite aiawhin helaiah hian thil awmzia kha han sawifiah ve kha tulin ka hria a.

Tin, hetih lai hian Pu Deputy Speaker, sawi tlang law law tula hriatna thildang pakhat ka la nei leh a. Hmanni khan MNF Aizawl South-III Block-in sawti laiah sawn ram cheng nuai 30 a leiin, Health Minister zahawmtak pawh hi chutiang khatiang chuan building an sa tih kha kan pahnih khan minrawn bei vak mai a. Pathian khawngaihna zarah thil ka tih hi vantlang hriata langtlang lo tura thup ngai a awm lova.

Hei, kan hriat angin ka nupuiin min boral san a, Sorkar hnathawkte a ni a, a service a lo rei ve tawh a, chuan a pension hi kan la dawn a, engemawzat, kan rin aia tam kan hmu dawn a. Chung chu kan fate nen kan chhungkuain kan committee a, sawti lai kan bial chhungah ngei sawn kan Block hotuten in leh lo te rawn din ve la, ramte rawn nei ve la an tih kha chu kan han thlir ho a, kan ngaihtuah mek a, vawiinah hian kan la lei lova. Tin, cheng nuai 30 kha a nilo hrim hrim a, khami chanve aia tlawm mah kha a ni, a rate hi. Chutiang chung chuan ram lei hian min chhuah der tawh mai a. Ka'n sawi duh tak chu Pu Deputy Speaker, heng ho Party hi House-a vawiina an thut tlem tak em em-na chhante pawh hi an thusawi hi he ram mipui hian an ring lova, vawiinah hian an hnawl a ni tih hi a tichiang hian ka hre thin a. Pathian khawngaihna zarah lei thei a, chung sumte kan tifel anih chuan, kan lei thei anih chuan Chief Minister phalnain, tin kan sum leh pai leina leh kan tih zawng zawng hi Chief Minister ah kan report ang a, dan angin tin, Ethic Committee-ah pawh kan hriattir ang. Chuvangin tlanchee chung a thil ti chi kha kan ni ve lova, kha kha hmannah khan Court-a han kalpui mai te pawh kan duh deuh rum rum a, mahsela an mahni hi mi hnawl tawh party an nih avang hian a tawk china kan khin ve deuh loh chuan tih avangin kan ti leh ta lo a ni a. Aii Puk ang mai mai kha a ni ve dawn lova Pu Deputy Speaker, chuvang chuan vawiinah he House-ah ka tihrik kherna chhan chu ka sedai hi rawn thiah zauh hi an han ti a, chuvangin thil hi kan ti ve duh deuh law law a ni. Mittui tla chung a chhungkua-a kan awm laia khatianga dawt chiang lutuk-a inpuhna ang kha chu politic-a kan right, zalenna kan neih tih vanga dawtsawi zalenna hi chu Sorkar a har phah duh khawp mai tih hi ka'n sawi ve mai mai duh a ni.

Pu Deputy Speaker, ka sawi ang khan sawi tur a tam a, pahnih khat te kan sawizawh hman chuan a tha mai ang a. Agriculture hi ka sawi duhna chhan chu tun sorkarah hian hmalakna kan Chief Minister zahawm tak kaihhruai nain Agriculture lam hi kan Senior Minister kutah a dah a, tiang hian vawiinah hian nasa takin hmalakna a kal chho a, ram mipuite pawh hian an hre viau a ni. Aizawl khawpuiah hian a hrelote hi chu awmve bawk mahsela Zokhua mipuiah hian hmasawna hi a nasa em em mai a ni. Tunah hian kum 30 chhunga Sorkar awm tawh zawng zawng hian Farm Mechanization atana khawl a pekchhuah ai tam mah hi he Sorkar kum 2 leh a chanve chhung hian khawl a pechhuak hman tawh a ni. Chu chu India ram State hausate Punjab, Haryana kan tihte buhfai tui Arham kan lakna hmun, Andra Pradesh-te ngei pawh hian an tih theihloh za a 75 subsidy kan pek theih vang a ni a. Chu chu kan Chief Minister-in remruatna fel taka kan Agriculture Minister hoa an ruahmanna atanga heng hi lo thleng a ni a. Chu khawl tha kan siam chhuah chu vawiinah hian mihring tha anga chhut chuan, mihring tha 80,000 chuang tun Ministry-ah hian tha thar kut hnathawktute kan neih sa bakah hian tha thar a siam chhuak a ni. Chu chuan vawiinah hian Agriculture-ah hian hmasawna a thlen ngei ngei dawn a ni.

tih a tichiang em em a ni. Sorkar hnathawk vawiina awm zawng zawng hnathawk tlakloh Office-ah pawh hna an pek loh, kan vai hian MR te nen vek pawh hian bang ta sela, kut hnathawktu-ah inlet ta sela, chumite tha aia tam chu he Sorkar hian tha thar a siam hman a ni. Hei hi Pu Deputy Speaker, vawiin ah hian chu chu a ni hmasawna kal kawng awmze nei chu. Kum 3 chhungin buh ei leh barah kan intodelh ang a, kum 5-ah India rama State ka siam ang a, kum 10 ah Switzerland of the East tia Agriculture han lak vel a, kum 1 hnu a thei dawn lova in hriat vanga bansan leh ang hi a ni lova, He Sorkar hotute hian sawi sawi lo mahsela, he Agriculture-ah hian hma an la a, vawiin ah hian an bei a ni.

Kuminah pawh hian buh thar tam kumah Chief Minister hoin puan a ni a, Agriculture Minister zahawm tak hmalaknain chutiang chuan hmalak a ni. Hei nichinah pawh khan SMS ka dawng a, Samlukhai-ah Minor Irrigation te, Agriculture te tangkawpin an hmalaknaah leilet, MNF hunlaia beiseina pawh an neih tawh loh, kawngte a lo tlang tak avanga khatiang anga sorkar hmasaa mipui beidawn tawhna, an tinsan tawh ram kha kawngte a lo tlang leh avangin chhungkaw 18-in kuminah pawh hian leilet an siam thar a, “Kan khua chu buhah nikuma kan buh thar aiin nasa takin zuvain zah a ngaih chuan kan thar hnem hle dawn a ni” tihte message ka dawng a ni. Chu lo pawh chu hmun hrang hrang atangin hmasawna a kal mek a. Minor Irrigation leh Agriculture Ministry-ten, Department-ten hemi thawhonaah hian ruahmanna fel tak siamin ‘convergence’ kan tih te kha an kalpui tha em em a. Pu Deputy Speaker, chutiang a nih avang chuan vawiinah hian NLUP kan tih avang bakah hian kan sorkarin ruahmanna leh rem hre taka a kalpuina hi vawiinah hian he ram hian hun rei loteah a rah kan seng ang tih kan ring a ni.

Tin, a lawmawm lehzual chu, NLUP Agriculture-a kan zuk dah avanga, Head-a kan zuk dah avang khan vawikhatmah kan la hmuh ve ngai loh pawisa vaibelchhe tam tak hi kan hmu thin a ni. Nikum lamah pawh kan hmu tawh a, nikum lam khan kan hmu tam lo deuh a, kuminah pheih hi chuan vaibelchhe 34 nuai 29 kuminah hian kan hmuh belh leh dawn a. A pawisa pawh Central-in a tifel tawh a, tun kan Plan-ah pawh hian kan khung a. Amaherawhchu, 50% dang hi a hnua lo kal leh tur a ni a. Chutiang chuan, Agriculture lama hmasawna hi Central lampangin a ngaih pawimawh anga chumi chu a lo kalpui avangin vawiinah hian nasa takin nidanga kan la hmuh ngai reng reng loh, state dangten an insem thin vaibelchhe sang tam tak kha vawiinah chuan kan hnenah hian a lo thleng ve ta a ni. Pu Deputy Speaker, heng hi lawm loh rual a ni lo a ni tih hi ka’n sawi duh a ni.

Hun a tawp mai dawn a. Power-ah te he sorkar hian hma a la a. Tih leh hunah hian he sorkar hi mipuite leh thalaite hian an tum a, chumi term a hman zawh chuan pa nem deuh pawh hi sorkar sela power hi chu an tichhe leh zo tawh lo’ng tih tur hian he sorkar hian term hnih chhung hian thil a ti dawn a ni tih hi vawiinah hian a lang mek tawh a ni. Chuvang chuan, Pu Deputy Speaker, khalai kha ka’n sawi duh a.

Chumi bakah chuan lawmthu ka’n sawi duh ve chu World Bank Project-a Sateek tlangdung hi a ni. Kan sorkar hmasa tawp lamah khan, 1998-ah khan, Pu Deputy Speaker, tlem te tak tak a ni tawh ang a, tuna kan Chief Minister, kan House Leader sorkarnaah khan World Bank Project saw survey tan a ni. A hnua khan sorkar dang a lo piang ta a. An hotupa kha thusawi a thiam khawp mai a, Mosia tiang ang khan a intekhkhin a, “Mosia tiang kha engmah a ni lova, rulah te pawh Pathianin a hman chuan a chang a. Tuipui Sen vuak kang nante pawh a hman a.

Keipawh engmah ka nei lo, mahse, hei World Bank hi hnathawh nana hman theih a ni tih, kawng laih nan te, a hriat miah loh, ka kutah a lo tla tawp mai a ni” te kha an ti mai mai a. Amaherawhchu, a hmaah khan khatiang project lian kha sorkarin lo buatsaih lo khan a kutah a lo tla tawp thei a ni tih ringtu Chief Minister te kha kan lo nei ve renrawn tawh a ni engemaw lai khan, mahse tunah chuan a lo hlawhtling ta a. A dinchhuaktu tak takin an han hawng a, sawlai bial mipuite vawiiinah chuan an thaw a veng a, an zalen ta a, an hlim hle a, hmasawna awmze neiin an kalpui ve a ni, sanghate pawh chu khaw tinah khan an han khawi ve ta a ni tih kha Pu Deputy Speaker, ka sawi duh a. Thil dang tam tak sawi tur a awm a mahse hunin min daih lova, hun min pek avangin ka lawm e.

**Pu S. LALDINGLIANA** : Pu Deputy Speaker, a hmasaa ka'n sawi duh chu Member zahawm tak Pu Tlinga khan min cho hle mai a, helam pawh hian kan cho ve a ni tih kha ka'n sawi duh a. Demand No. 45-na, Public Works chungchangah hian sawi duh tlem ka nei ve a, Multi Modal Transport Project chungchangah hian Sorkar hun hmasa, kan Chief Minister zahawmtak Pu Lal Thanhawla kaihhruaia bul a lo tan tawh, a hun lai ngei maia hna tan a ni thei ta hi lawmawm ka ti khawp mai a. Kan Minister zahawmtak hnung zuiin tlem lai deuh khan kan va kal a, an hna tannaah te pawh hian kan va tel ve a, kan hriat angin kum 4 chhungin he project hi zawh chhoh tur a ni a. Project-in a tum ber hi Kolkata Sea Port leh North East State Mizo leh Myanmar insumdawntawna a ni dawn a, tin, he project hi a lo puitlin hunah Kolkata Sea Port khu km 700 zetin a hnai dawn a, helaiah hian nasa takin insumdawna a kal chho thei dawn a. Myanmar te leh khawchhak lam South East Asian ramte nen insumdawnnate pawh a awm thei dawn a ni. Tin, World Bank sum hmanga Aizawl-Thenzawl-Lunglei Road laih vawiiina a taka kan hmang thei ta hi Pu Deputy Speaker, a lawmawm ka ti tak tak a. Kan hriat angin tunhma te kha chuan Lunglei atanga Aizawl kal tur hian ni tla van vuaiin darkar 8 chuangte hah tak khan kan kal thin a ni a, vawiiinah erawhchuan kan lehleng thei ta a, Lunglei atangin Office kan dawr thei ta a, hei hi hmasawna ropui tak a ni. Hemi chungchang thua ka tarlan tel duh chu, Sorkar hun hmasaah khan he hna hi a muang em em mai a, engemaw hnung thak in hiah tawna kha a awm thin nge kan hre chiah lova, tunah erawh chuan he Sorkar a lo pian tak hnua erawh chuan hna chak tak takin kalpui a ni a, hmanni lawkah kan House Leader, kan Chief Minister zahawm takin min han hawn sak ta a. Vawiiinah hian he kawng hawn a lo ni ta hi Mizoram pumpui, a bik takin Chhim lam amite chuanin kan chhawr takzet a, kan lawm takzet a ni tih kha ka sawi duh a.

Tin, hemi piah lamah hian project dangte pawh Sairang Rail Station leh Multi Modal Project kawng tawi zawka thlun zawm thei turin Rawpuichhip – Buarpu – Thenhlum – Chawngte - Diltlang kaltlangin Bungtlung ‘S’ ah Multi Modal Project pawh turin tunah hian project siam fel, submit fel a ni leh tawh a. Heng kawngte hi bungraw phurhna tur atana hman a nih dawn bakah Western Belt tan phei chuan hmasawna nasa taka rawn chhuak chho tur anih avang hian a lawmawm hrim hrim a ni. National Highway 54 chungchang thua hian Pu Deputy Speaker, kan hriat angin April 2010 atang khan Mizoram PWD kutah hian he kawng hi hlan anih tak avangin tunah hian

a transition period-a kan awm avangin a maintain chungchang thuahte harsatna kan tawk deuh hlek a, Zoram mipuite pawh kan phun tam viau va. He House zahawm tak kaltlang hian Zoram mipuite hnena ka sawi duh chu, tun dinhmunah hian a transition period-a kan awm avangin he kawng hi duh angin enkawl theih a ni lova mahse hun reiloteah hian a maintain chungchang thuahte, resurfacing te bakah hian Silchar atanga Tuipang thlengin double lane-a siam chhoh turin tunah hian Sorkarin chak takin hma a la a ni tih kha ka sawi duh a ni.

Tin, Demand No. 39 - Power chungchang thuahte hian Congress Sorkar, Pu Lal Thanhawla kaihhruai hi hnuhma ngah ber an ni tih hi vawiin hian he House-ah hian ka sawi duh a ni. Hei kan hria a hun hmasa lamah te khan mega watt 3 aia tam, aia lian siam theih loh a nih lai pawh khan Pu Lal Thanhawla kaihhruai Sorkar hian nasa takin project hrang hrang a lo siam tawh a, chung project-te chu chhiar chhuak vek dawn ila a tam hle ang a, a tlangpui chauh ka sawi deuh pawr pawr ang a. Serlui A, Khawiva, Tuirivang, Tuipui, Maicham, Teirei, Kautlabung, Tuipang lui, Lamsial lui, Serlui B tih te a ni a. Tunah hian thawh chhoh leh turin Tuirial te pawh mega watt 60 pechhuak thei tunah hian buaipui chhoh mek niin NEEPCO an lut leh tawh tih kan hria. Hemi chungchanga tlem ka tarlan chak em em chu Pu Deputy Speaker, i veilama thute hian min puh thin a, Mombati Sorkarte min ti thin a, hei hi a diklo a ni tih vawiinah hian ka sawi duh a ni.

Ka sawi tawh ang khan Congress Sorkar, Pu Lal Thanhawla kaihhruai Sorkar hian power siam chhuah chungchang thuahte chuan Mizoramah hian hnuhma a ngah ber a ni tih hi vawiinah hian ka sawi nawn duh a. Tin, chubakah chuan tuna ka'n sawi tak ang khan tuna project tenau te te a hunlaia siam theih ang chin 14 zet lo siam tawh bakah khan hei Tuirial te, Kolodyne Phase II te, Tlawvalui te, Lungreng te, Chhimituipui, Mat lui, Vawl a tam mai heng zawng zawng siam tura tuna ruahmanna an awm chho ut ut mai te hi a lawmawm tak takin ka hria. A bik takin Tuirial chungchang thuahte hian han sawi ta ila, Lal lal hunlai atanga compensation hmu tura an lo tih mi 48 bakah khan Sorkar hun hmasaah khan khati zat compensation pek tura tih a nih tak avanga he project hluihlawn an ni tate hi a pawl tak tak a, Zoram mipuite hian hria se ka duh chu, vawiin thlenga Mizorama power supply kan indaih loh nachhan hi thil dang vang ni lovin hun hmasaa MNF sorkarin kha project, Congress Sorkarin bul alo tan tawh, a lung a phum tawh, hna pawh thawh tan tawh an hlui hlawn avang khan vawiin thleng hian harsatna kan tawk a ni tih kha ka'n sawi duh a ni. Hmanniah khan kan member zahawm takin resolution a pulut a, power chungchang thuahte hian, khang kan pass-te kha a lawmawm ka ti a, a chhan chu kha resolution kan pass-ah khan a wording kha uluk taka kan zir chuan Pu Deputy Speaker, a chiangin ka hria a ni. Thil tih tawh a ni lo, tih lai mek a ni. Project lian chi reng reng hi chu ni 2/1, kum 2/1 ah puitlin mai theih a ni lo a, chuvangin tuna inchiah mekte pawh hi tun atanga kum 4 kum 5 kum 10 ah te pawh a ni ang, a rawn puitling chho dawn a ni. Chutih hunah chuan Mizoram mipuite hian tute nge, hemi chungchang thu-ah hian tu Sorkar hi nge hma la thintu dik tak hi chu an la rawn hre mai dawn a ni.

Demand No. 47, Minor Irrigation chungchang thua hian he Department kaltlanga Zoram hmun hrang hranga hmalakna tam tak awmah hian lawmthu sawi tur a tam hlein ka hria. Pu Deputy Speaker, ka bial chhungah ka'n lut ang a, Sethlun khuaah sawn Mualzen Project kan nei a, chhungkua 29 in tunah hian eizawna nghet he Department avang hian an nei tawh a. Mualzen Project-ah sawn chhungkua 29 lutin Israel serthlum kan tih ang chite pawh kha tunah hian a rah hial tawh a ni. Hmanni lawkah khan a hmunah ka zuk kal a, a lawmawm em em-in ka hria. Chutiang chuan chhungkaw tam takin he Department kaltlang hian eizawna nghet an lo nei tawh a. Sethlun khua hian kum 1 ah, nikum kalta maite pawh khan cheng nuai 7/8 zet mai serthlum atang pawn an lei thei tawh a ni. Tunah hian Mualzen Project II siam chhoh leh mek a ni a, tiang chuan he Department hnathawhna avang hian Zoram hmun hrang hrang ka bial chhungah chauh pawh ni lovin, chhungkaw tam takin eizawna nghet an nei tawh a ni tih kha ka'n tarlang duh a ni. Demand No. 31-na Agriculture-ah hian kan hriat angin Pu Deputy Speaker, kuthnathawktu za zel a 70 zet in hnaa an inngahna Department Agriculture hi a pawimawh a ni. Kan rinpui ber Buh Zoram kumkhata kan mamawh hi metric ton nuai khat leh singriat anih laiin kan thar chhuah chu metric ton singli sangli zariat leh sawmthum chauh a ni a, chu chu za zela kan mamawh 25% ang vel hi kan thar chhuak tihna a ni. Tlangram lo neih kan hria a hlawk loh zia, a scientific loh ziate sik leh sa, ecological balance thlenga min tihchhiat saktu a nih avangin hei hi bansan anih theihna turin tunah hian kan sorkar hian nasa takin hma ala chho mek a, tunah hian Tlangram Lo nei hi a latest ah chuan 36.45% in a tlahniam chho tawh a ni. Hetiang anga a tlakhniam chhoh theihna buhthar tam theihna tur atan hian nasa takin he Department hian hma a la chho mek a. NLUP-ah kan hriat angin project-te siamin subsidy-te a tipung chhova, tunhma-a tractor subsidy nuai khat kan pekna thinah khan tunah hian Department hian nuai hnih an pe a, tin, chumai bakah heng power tiller-te pawh singruk subsidy-a pek thin kha tunah hian tisang chhovin singkua an ti ta a, tun Ministry reiloteah ringawt pawh hian Lonei mi, kut hnathawktu mi 55 hnenah power tiller pek a ni tawh a, tin, Tractor hi mi 513 hnenah pek an ni tawh a, tin, mini power tiller hi 46 hnenah pek an ni tawh a ni. Heng zawng zawng hi a horse power-a han chhut chhuah hian horse power 8274 a ni a, chu chu mihring thaa chhut chhuahin tha 82740 zet Pu Deputy Speaker, a tling tawh a ni. Chutiang chuan he Department hian nasa takin loneitute chawikang turin leh kan rama buh bal thar chhuaha kan intodelhna turin hma ala chho a ni tih kha tawitein ka'n tarlang a ni. Ka lawm e.

**Pu R.L. PIANMAWIA** : Pu Deputy Speaker, a hmasa berin Tuivawl bial lo enkawl tawhtu Pu Duhoma chungah khan lawmthu ka sawi duh a, Sakawrdaia mipuite harsatna thil thleng chungchang min la rawn buaipui kha a lawmawm ka ti a. Khi lai khi a buai thlak khawp mai, tunhma zawng zawng khan kudam-a buhfai an pek chhuah khi a tlem emaw a tam emaw kg 51 vek anga pek alo ni rei khawp mai a, hei keini hunah khatiang ringawt kha a ni thei love kan ti a, siamthat ngai tur siamthatna rilru pu-a min lo sawi chhuahsak avang khan lawmthu ka sawi duh a.

Hei Pu Thlenga khan a rawn sawi bawka, kan bial min buaipuitu an thahnem chho viau zel a, a lawmawmin ka hria a. PWD in kawng siamna tur advance an lo pek chungchangte kha a rawn sawi chhuak a, lehlamah chuan advance-a an lo pea thawk thalo emaw an tih lai khan Mizoram kawngah hian khi kawng khi a thaber

anih loh pawhin pahnihna chu a hauh ka ring a, chutiang dinhmuna ding chu a nih avang chuan a thil sawi kha lo tel lo ta pawh nise tun dinhmunah khi kawng khi a tha a ni tih ka sawi duh a. Tin, PWD te hian mipui tan an thawk a ni tih hriain theihtawp an chhuah a, ruahsur pawhin, chawlhni anih pawhin zan anih pawhin harsatna awm thei tur lakah tlan chhe miah lovin an buaipui zel a, chuvangin Furpui harsatna kan tawh thin angah pawh kan tawh lova, chuvangin lawmthu sawi tur tam tak he bial hian a nei a ni tih kha ka'n sawilang tel duh a.

Tin, advance-a pek hi an lo tih than tawh deuh avangin kan lo ti ve mai ang tih erawh chu ka hlau deuh a, a chhan chu an hunlai khan Saitual atanga Darlawn 132 line siamna tur 35 lakhs kha contractor-ah advance-in an lo pe a, an awm bo vang vang mai a, hna a kal thei lova, khavang khan tun thleng khian kan sub-station pawh khi kan la hawng thei lo a ni. Tunah erawh chuan sorkar tharah thahnemngai taka buaipui a ni a. Contractor kut atanga lak a ni a. Departmental work-in thawh a ni a, reiloteah hei hi hawn kan beisei tawh a ni. Kum 2000 kuma contractor kuta an pek kha an hun chhung zawng khan hmasawna tak tak a awm thei lova. Tun sorkar tharah hian hmasawna duhawm tak a awm a. Reiloteah sub-station pawh khi kan hawng ve thei dawn tawh niin kan hria a, kan lawm hle a ni.

Tin, hetiang ang thil diklo tihna kawngah hian kan hotute an tlan ve lo hi a lawmawm ka ti a, he sorkar hi entirna pakhat ka'n sawi duh chu, sorkar hmasaah khan Supply Minister chu Darlawnah alo kal a, kudam sakna tur BAFFACOS sum atangin nuai 3 kan nei a, chu chu amah ngei pawh sak that a tul dan leh thil awmdante lo sawipui turin Darlawn-a V/C Vice President ka nih angin ka lo va hmu ve a, an party hruaitute nen kan lo dawngsawng a. Darlawn kudam sakna tura a hmun pawh V/C ten kan pek vek tawhah ti tura kan beisei thu leh a pawimawh dante ka lo sawi a. Amaherawhchu a nin i sawi tur a awm love a ti a. Kan kudam hmanlai chhe tak mai khi rangva phek 12 vel lei ula, thingzai 4/5 lei ula, party hruaituin hei hi chu lo insem ula, lo thawk mai rawh u, a ti a, chutichuan ₹ 3 lakhs chu min chinral sak a ni.

Khatiang ang thil thalo an lo tih avang khan kudam pawh khi kan neih that loh phah a, tunthleng hian. A pawh tak zet zet a, khatiang thil thalo leh thil fello te duh lohna chang an rawn hre ve ta kha kan unau MNF te chungah pawh khan lawmthu ka sawi duh a ni. Tichuan vawiina kan demand neihah khan 31-na atangin han tan ka duh a. Agriculture-ah hian, Agriculture hi mipuite eizawna leh inngahna bul pawimawh tak anih avangin hna thawktute pawhin tha taka thawh turin NLUP hmangte pawhin tamtak buatsaihna te pawh kan nei chho mek zel a.

Hetih lai hian a enkawltu turte chenna lampang hi kan neih that loh avang khian tunhma congress sorkar hmasa lama Pu Saikapthianga huna kan sak tawh kha a ni a. Luah tlak a ni tawh lova, thawktute an awm theihna turin SDO office leh quarter khi siamthat ni thei sela chuan mipui dawrtute tan pawh manhla zawkin dawr tur an awm ang tih ka ring a.

Tin, Sub Circle Zohmunah tal pawh min dah sak ve teh u, kan tih thinte pawh min dah sak theih chuan khitalai bial tan chuan hmasawna leh kut hnathawktute tan pawh thil tha tak a ni ang tih a rinawm a. Tin, ka bial bikah khian Kepran khi a bik takin an chhuanawm thin a, buh thar chungchangah hian. Sorkar hmasaah khan MIP an tih avang khan an eizawna, lo neih lama an tuina thin kha pawisa tlem tlem an han sem thin khan thil a lo tikhawlo a, an tlahniam hle a, tan



an han la thar leh a, tunah hian leithate kan sorkarin a ngaihtuah sak a, amaherawhchu leitha lei zo lo, lei harsa ti tam tak an awm a, chuvangin man tlawm zawk a buatsaih dan awm thei se a tha hlein ka ring a.

Tin, Demand No. 32-na Horticulture department-ah a hmasa berin lawmthu ka sawi duh a, Darlawnah CHO Office tha tak mai sakna tur min tihsak dawn a, lawmthu ka sawi duh a. Hemi bakah hian khi lai miten an mamawh ve Aieng that duhna si, Aieng thatna bial a lo ni ve a. Chuvang chuan, expansion scheme an tihah hian theite te pawh min telh sak turin ka duh a, tin, aieng pawh permanent terrace an siamna tur Serkhan an ruahman rual hian min tihsak ve thei se tih ka sawi duh a.

Tin, Demand No. 33-na Soil & Water Conservation. Soil & Water Conservation- hi Session hmasa lamah te ka sawi tawh ang khan an kumkhat hnathawh ve tur Coffee Kg 5 pek thin an ni a, R.O. pakhat leh an thawhpui pakhatin an buaipui ve thin kha a ni a. Tun hunah chuan hmasawna tur tam tak demand bu-ah khan a lo lang a, a lawmawm hlein ka hria a. Khatianga hmasawna tur tam tak an tih chhoh lai khan a thawktute awmna bawh khi a rawp chhe hneh tawh lutuk a, chuvangin, khi khi min tuaihnum sak leh a, min sakthat sak leh turin ka rawt duh a.

Demand no. 38-naah hian Fisheries-ah theihtawpin Fisheries department hmangin sorkarin min tanpui a, bial tawp bera Ting Dil kan tih atan te pawh sangha chi 20,000 lai min pe tawh a ni. Chuvang chuan a mimal neuh neuh khaw hrang hranga mi te tan pawh min pek sak thin a, an chungah kan lawm hle a. Amaherawhchu, tanpuina dawngtu tur thlan chungchangah hian a dil nei tha tak tak si tlem te-a tanpuia, dil nei tha mang lo tam deuha tanpui an lo awm palh leh thin a, hei erawh hi chu tanpui tlak tanpui a nih theihna tur hian ruahmanna thar duan chhuah theih se, a lawmawm hlein ka ring a.

Tin, Demand No. 39-na Power chungchangah hian kan sawi ang khan Sub-Station hmun tur kan sorkar hmasa, Pu C.L. Ruala Power Minister a nih laia kan ngenna ngaipawimawh a, Cabinet Committee-in min pek, min pass sak kha tun thlengin kan la hawng lo erawh chu rilru chu a na a, amaherawhchu, hawn theih tura a buaipuitu, a neitu, a lo din chhuaktu sorkar an lo nghak leh thei hi chu a lehlam zawng tak chuan a lawmawmna lai tak pawh a awm a, chhe taka kal tur kha tha takin a chhuak thei dawn ta a, hemi chungchangah hian a lawmawm hle a ni. Tin, khilai bial atan khian Meter Reader pakhatmah kan nei lo mai a, Darlawn Sub-Division-ah khian, tunhma khan a awm thin a, a boral ta hlauh va, meter reader awm lo hian kan kal chho a. Bill chungchangah pawh sawiselna a tam ta em em mai a, thenkhatte pheichuan an va sawisel thin a, tunhnaia bill tamah te pawh khan a lo dawngsawngtute khan a then chu an lo ngaidam hniam thei viau mai a, a then erawh chuan an bill ngai deuhthaw an pe a. A then erawh chuan an tlakhniampui em em a. Hemi thil avang hian Regulation Commision lamah pawh khilai bial atan khian bill chungchangah min hrilhfiah a, lo kal turin khawtinah emaw a theih chuan min rawn buaipui teh u, tiin lehkha ka thehlut a. Hei departmentah pawh hma la tur hian lehkha an pe tawh a, a copy pawh min rawn pe tawh a. Vawiin thleng erawh chuan min la rawn tih sak lova. Hemi chungchang hi a bik tak pawha hma min rawn lak sak turin bill sang chungchang hi ka'n ngen duh a.

Tin, RGGVY ah hma thar a awm hlei thei lo viau a. Amaherawhchu, ka'n ngaihtuah ka'n ngaihtuah a, ram pum bial angah chuan an tih thatna ber bial kan ni mai awm mang e aw tiin ka ngaihtuah a. Khawpuar leh Zokhawthiang leh Tinghmunah a bik takin min tiam rawh u ka ti a, a thawktu contractor-te kha. Mi an tiam a, amaherawhchu, hei a la sawt vak lova. Khawpuar-te pawh khi zo thawkhat angin a lang a, amaherawhchu zawh loh tlem an la nei a. Han zo thei se chuan hawn te pawh a chakawm ve khawp mai, kan nghakhlel hle a ni. Chuvang chuan khaw dang pawh khi bawhzui zel turin a department-te nen pawh theih tawp kan chhuah a, kan han ti thin a. A contractor-te hi kan ngam mang lova. Helaia aiawh an dah lah hi a biak tlak baw si lova. Delhi lama an hotute kan phone kual thin a. Aizawlah kan lo kal ang a, kan rawn hmu ang che, an tih pawhin an rawn pha reng mai a. An rawn kal leh thei lova, chumi hunah chuan kan rawn kal dawn an ti leh thin a. Chuvang chuan he thil hi bawhzui chak dan kawng hi a vang khawp mai a. Chuvang chuan hemi lai thilah hian chuan thapui min thawhsak turin kan Sorkar ka ngen duh a. RGGVY hmanga electric la chhit en lohna khua ten eng an nghahhlel em em tawh avang hian thapui min thawh sak a, tan min lakpui leh turin kan bial tan ka ngen duh a ni.

Tin, Demand No. 45-naah, PWD. Hei, ka bial khi sorkarin hma min laksak nasa a, PMGSY kawngah te. Amaherawhchu, kan hmasawna tur anga a kal chak theih lohna chhan erawh chu Forest Clearance vang a ni a. Kan House Leader zahawm tak pawhin nasa takin min buaipui a, duh angin a la kal hlei thei lova, a pawh hle a. Chumi laiah chuan theihtawp min chhuah zui sak turin ka ngen duh baw a. Khilai bial tan khian Muthi atanga East Phaileng kawng laihna tur NH 150 min ruahman sak chhoh mekah hian a lawmawm kan ti a. Km 30 laia tawi tur a ni a, haw lam kal lam phei chu km 60 in a tawi dawn a ni. Chuvang chuan kan tan malsawmna tak tak thlenna tur kawng a nih avang hian a lawmawm ka ti a. Tin, Session hmasa lamah te pawh ka sawi fo tawh thin, khilai tlangdung kawng khi a ping em em a. Silchar panna kawng khi laih pawh theih mai niin a lang baw si a. Zohmun-Mauchar-Bagha paltlang tur ang chi kha NLCPR ah emaw tun atanga min lo ruahman sak turin ka'n ngen duh a. Khilai kawng a tlang chuan hmasawna tam tak bialin kan hmuh phah dawn a, ram tan pawh thil man hla tak a ni ang tih ka ring a. Tin, tuna East Phaileng atanga Manipur kawng tur, Zawngin ram lama kal kai tura tih khi harsatna tam tak awm ni pawhin ka lo hria a. Chu ai chuan Ratu atanga kawng awm sa, Vanbawng kawng zawh chho a Senvawn tlawh turin kawng tawitein a awm a. Khi lai khi Manipur tlawh tura kawng kan siam dawn anih rau rau chuan khi khi min ngaihtuhsaka rem min ruatsak turin ka han dil duh a.

Tin, a tawp berah Demand No.47-naah hian Minor Irrigation-ah Lobelthleng leh Tuiphu ka bialah hma min laksak a, lawmthu ka sawia, amaherawhchu, Kani Phai te Ruangbawphai Darlawn ram a mite Tuivawl phai te tlangdungin kan chhawr theih tur hi hma min laksak turin ka ngen duh a. Kan Minister-te demand hi pass ngei turin ka thlawp a ni, ka lawm e.

**DEPUTY SPEAKER** : Pu Nirupam Chakma.

**Pu NIRUPAM CHAKMA** : Pu Deputy Speaker, ka lawm e. A hmasa berah Legislative chungchang hi sawi ka duh a. Hei tuntum Assembly Session kalzelah khan kan information pakhat chu engemaw information diklo Department

lam atangin a awm a, kan buai thin a. Pu Deputy Speaker, hmannah Ration Card chungchangah pawh figure diklo chhutchhuah kha a awm a ni. Tin, vawihnih ka sawi chhuak tawh, Power & Electricity Department Revenue Collection District detailed waged-in Mizoram 2008-09, 2009-2010, 2010-2011 ka zawt a, a vaiin engzat nge tiin ka zawt a, 2008-09-ah ₹ 190 crore an ti a, hei Unstarred Question 11, hei tukin zingah kan officer thenkhat ten min hrilh a, hei figure hi a diklo an ti a. Chuti anih chuan, tunthlengin hei tihdikna a awm silova, chuvang chuan hetiang thil hi pawisa chungchang a ni, a serious a, member-te an react thin a ni a. Chuvang chuan Session lelah chuan awmlo sela ka ti, chu chu ka'n sawi a ni, vawihnih ka sawi chhuak tawh. Mipui pawh mislead ang tih kha ka hlau a ni.

Tin, kan Bill-te mistake tenau te a awm ang tih chu ka hria, mahse Session lelah chuan hei chu tlema improve dan ngaihtuah ila, Minister zahawmtak takte pawh an department hrang hrangah chhannate an mahni approve lo chuan a kal thei lo a ni. Chuvang chuan fimkhur tawh sela ka duh a ni. Tin, Legislative-a thawktute hi keini aiin an hre zawk a nia. Tin, hei Annexe tharte kan nei a, keini thutna thlengin room-te buatsaihsakin kan awm a, lawmthu ka sawi duh a. Governor house-te pawh mahse Governor House sawi a tul lova, He house hi sak thar anih avangin engemaw development kha a awm a, hei pawh hi lawmawm tak a ni.

Tin, Vigilance chungchangah pawh thil pakhat ka sawi duh chu, kan Chief Minister zahawmtakin hmannah a sawi kha, khati zawnga sawi loin, 'siam kan tum lo' ti sela, tunah a tul lo, ngaituahna thar India ramah a awm tawh Lok Pal Bill pawh pass an tum a, Lok Pal Bill-in a ken tel tur chu .....a ni. State-ah....., hei T.V-ah nitin an chhuah a, tunlai chuan ..... pa kha, Karnataka Chief Minister..... report a nih avangin corruption thilah a buai viau a niang, chuvangin Lok Pal-in a ken tel tur chu ..... a ni, Ombudsmen a ni, State level-ah Ombudsmen. Lok Pal te pawh Ombudsmen a nia, hei Village Council atan Ombudsmen kan siamsak tawh a, keimahniah te pawh ombudsmen siam a ngai dawn a, chuvang chuan India ramah pawh Vigilance Commission a awm a, CBI te pawh an awm a, Lok Pal hnuai a awm tur a ni an ti. Chuvangchuan he thil hi kan manifesto-a tel pawh nise, tuna India ram pumpuia ngaihtuahna awm a nih avangin, miin engang pawhin sawi mah se, khatiang ang Commission pawisa sem chhuahna turin a tullo a ni. Chuvangin 'siam kan tumlo' ti phawt sela, thil dang dang sawiloin, chu chu ka personal ngaihdan a ni Pu Deputy Speaker. Midangte pawh beisei lo sela, an siam dawn lo.

Tin, Pu Deputy Speaker hei Fisheries chungchangah kan Chief Minister zahawmtakin he department hi a kutah dah a ni tih ka hriat veleh, a va tha em, ka ti a, Chief Minister-in he department a chan hi a khat a ni. Pu Zoramthanga, Chief Minister a nih lai pawn chakai farm-te a ngaihtuah thin a, mahse he department hi a kutah a dah ngailo a, amaherawhchu kan Chief Minister zahawmtakin chakai farm em em chu ngaihtuah lo se ka duh a, sangha erawh chu intodelhna, pawisa pawh tam tawh dahin, within a very short time, kan self-sufficient thei turin hma la sela. State Minister emaw, Minister dang tan chuan tlemin a harsa anga, Chief Minister na na na chu pawisa-ah pawh a harsa lo ang tih ka ringa, department kha ka lawmpui a ni tih ka sawi duh a.

Power leh Public Works Department chungchangah sawi tur tam tak ka nei a. Survey and Investigation completed and DPR available tihah khan Tuivai te,

Tuivawl te, Tuirini te, Bairabi Dam Project te, Kolodyne – II tih te, Project under Investigation – Tuipui, Tuichang, mega watt chu sawilo ang, tam tak awm mahse project identified and proposed for investigation Ngengpui te, Sekulh te, Lungrang te, Mat te, Tlawng, Chhimtuipui Hydro Electric Project chubakah Tuirial Hydel Project, Tuivai Hydel Project tih te 16<sup>th</sup> Aug., 2001 ah tender hawn theih beisei a ni a ti a. Estimated cost chu 1750 crore a ni a, hei hi North East-ah PPP Model-ah project hmalak tur hmasa ber a ni tihte kan hria a.

Tin, Tuirial Hydel Project 16 mega watt hi kan sorkar lai khan kan tan tawh a ni a, amaherawhchu kum sawm chhungin saptawngin flop an ti a ni, MNF sorkar lai atangin hei hi a flopped tawh a, hna pawh stop tawh a ni a, kha kha revised a ni tihte kan hre tawh a.

Tin, kalkawng chungchangah Pu Deputy Speaker, sawi tur tam tak a awm a, World Bank kalkawng te, tuna Aizawl - Thenzawl – Bairabi, Lunglei kalkawng te, satellite kalkawng engemawzatte Mizoram State Road Project hnuaiyah Congress sorkar hmasain a tan tawh a ni a, hmalak tawh a ni a. MNF sorkar kha an vannei a, kan tlachiah a, pawisa kha chhunzawmna kha an nei tawh a ni, mahse kum sawm chhungin a zo thei lova, kan sorkar a ngai a, kan zo thei chu a ni.

Tin, lawmawm tak chu a bik takin keini bial angah te tan World Bank Funded Project pakhat dang kan Chief Minister zahawm tak hmalakna azarah Sairang Rel station leh Multi – Modal Project kawng tawi zawka thlunzawm turin Rawpuichhip atangin Buarpui, Thenhlum, Chawngte leh Diltlang kaltlangin S. Sabung Tlang Multi-Modal Project kawng pawh turin proposal submit a ni tawh a, Ministry of Road Transport-in a clear tawh a, Finance Ministry atangin World Bank-a thawn tura buatsaih mek a ni tih kha. A bik takin western bial atan, sawtah chhimlam ami tan hei aia thil tha chu a awm thei lo, lawmawm tak a ni a. Amaherawhchu, request pakhat ka siam duh chu Pu Deputy Speaker, he project hi nakumah nge, kum lehah nge, kan tan theih ang min hrilh thei sela. Let our Chief Minister inform all of us. Keimahni hnate pawh.....tur zingah khan awm thei se chu kan duh a ni. Tin, chubakah minute engzahnge ka neih aw (DEPUTY SPEAKER : A zo tawh mawle!) a zo tawh maw? Minute hnih khat chu min pekbelh thei ang a. Hei National Highway double lane, National Highway 54, Sairang, Mamit tihte, Bilkhawthlir, Bairabi tihte, Seling, Darlawn, Manipur tihte, Silchar, Aizawl, Lunglei, Serchhip, Tuipang tihte, PMGY talin kawng hrang hranga hmalak mek a ni a. Kan Chief Minister zahawm tak chungah pawh ka bial aiawhin lawmthu ka sawi, representative pawh ka sawi duh a.

Ka hma lama Borapansuri leh Chhawtrapansuri thleng kalkawng min siam sak tawh a, tunah kan zo tep a ni. Chuvang chuan lawmthu ka sawi duh a.

Power chungchangah pakhat ka sawi duh chu Chawngte (L) kha eng reng si, kan en theih lohna chhan hi, Chawngte (L) a thlen theih chuan Kalamanager pawh thleng thei tur a ni a, kan mumal lo lutuk. Hei hi Department lam hian distribution lamah harsatna a siam em ni tih kha min ngaihtuah sak thei em? Niminah pawh kan phone a, kan mumal thei lo. Mahse, lehlamah chuan Chawngte (L) chu a

eng reng thei si an ti a. Hei hi engatinge, 11 KV Station kan nei thin a ni a. Tunah RGGVY 33 KV a zo tawh a. Hei hi a rang thei ang berin min commission sak thei sela. Pu S. Dinga kei aiin a chak a niang, ..... ah dah turin kan ti a, mahse, Chawngte (L)-ah an dah a ni. Keimahni sub-division ta tur a ni a. Chawngte (L)-ah an bun daih a, Dispensary pawh khatiang tho kha a ni.

Tin, RGGVY hnuaiah ruahman a ni a, kan bialah te pawh, mahse hmalak a chak lo lutuk. Department lam pawhin lo ngaihtuah a ngai hei hi. Contractor lah hian sub-contractor-te an pe a, pawisate pawh mumal takin an pe duh si lova.

A tawp berah chuan pakhat chiah Pu Deputy Speaker ka'n sawi leh duh a. Agriculture-ah lawmthu tam tak sawi tur ka nei a, Irrigation-ah pawh, project-te min siam sak tawh a. Sawina hun a awm lova pawi ka ti khawp mai. Figure pakhat ka sawi duh a, chhiar chhuah min phal sak la, he project hrang hrang hi kalkawng te, power project-te, kan NLUP te leh thil dang Congress Sorkarin a buatsaih hi kan term chung hian engemaw zat chu zawh theih lovin a awm dawn a. Ka ngaihtuah ber chu 2013-ah kan inthlang dawn a, Congress-in Sorkarna a siam a ngai. Chuti anih loh chuan ZNP khan experience an nei si lova, PC hi a awm darh tawh a. MNF kum sawm Sorkarin engmah a ti thei si lova, keimahni lo chu Mizoram tan beisei a awm lo a ni. Chuvangin, kan chhonzawm thei lo anih chuan Mizoram tan a pawi ang.

**\*Speech not corrected**

**Pu C. RAMHLUNA** : Pu Deputy Speaker, ka lawm e. Vawiina kan demand sawi tur hi a tam si a, thil tam tak chungchang ni mahse kan hotute pahnih anih avangin duhthu han sam deuh ila, mahni bial lampangte han thlir hmasa ila a thain ka hria a.

A hmasa berah chuan Demand No. 35 – Fisheries hi tawite han sawi ka duh a. Sangha chi hi an supply thin a, sangha chi supply-ah hian a seedlings leh fingerlings a awm a. Fingerlings ni tur si hi seedlings anga supply hi a awm tlata hriatna ka nei a, khawngaih takin kan Minister zahawmtak hian min lo ensak sela a thain ka hria a. Sawlam panga miten khatiang khan an tuar a. Chubakah chuan mortality rate hi a sang em em mai a sangha supply-ah hian, hengte pawh hi engtingge an tih ang tih kha min lo ensak sela.

Tin, demand No. 39 – Power-a ka rilrua awm chu RGGVY hi keini chu kan inngahna a ni mai a. Hei hi rin aiin an thawk chak lo khawp mai a. Hmanni-a khawchhak lam leh khawthlang lampang kan fannaah, kan bial chung leh Lawngtlai East lampangah an hna hi a tha vak lova. Han sawi tawp mai ila, an ban phunte hi a nghet tawk lova, line an han pawt a, ban hi a awn a ni nghal zel mai a. Chuvang chuan hengte pawh hi min lo ensak atan a thain ka hria a. Keini ho chu BPL family kan tam a, an nghakhlel ve em em si a. Hei hi theihpatawp chhuaha hma min laksak turin ka duh a. A tul anih chuan contractor-te pawh hi han koh a, hna thawkchak deuh tur leh quality-te pawh improve deuh hlek tura ngen te pawh hi a thain ka ring a, chungte chu ka sawi hmasa duh a.

Demand No. 45 – PWD ah hian PMGSY Road Chawngte atanga Vaseikai 40 kms tih vela thui, an lai tan tawh a, engemaw chen chu an lai tawh a.

Mahse tunah hian an tawp tawp mai a, chhonzawm loh khan a awm ta a. Hei hi engnge a chhan tih kha kan hre ve si lova. Hmanni kha Engineer-in-Chief pawh ka contact a, ani pawhin ka lo en ang e, a ti a. Mahse tunlai fur lai a ni a, an chhonzawm theilo pawh a ni mai thei a. Hengte hi hma chak deuh hleka min laksak tura min ngensak turtein ka duh a. Tilai kawng a tlang chuan kan bial inkalpawhnate pawh a remchang dawn hlein ka hria a. Tin, Saibawh atanga Vathuampui kawng hi 30 kms vela thui a ni a. Kum 5 kalta vela an laih zawh daih tawh a ni a. Vawiin thleng hian la black-top loh a ni a. Lui pahnih a awm a, Saibawh lui leh Chikhur lui a awm a. Khami lui pahnih kha Lei dawh loh anih thin avang khan Home Minister zahawmtak hi R.D. Minister anihna atangin vawikhat kan request a. Theihpatawp min chhuah sak a, Lei kha an dawhkai hram a engtin tin emaw chuan. Nimahse a kawng hi la black-top loh anih avang khan kal a harsa em em mai a. Hei hi kan lifeline tak tak a ni a, a hma lama min black-top sak turin ka ngen baw a ni.

Tin, chubakah chuan Lunglei to Lawngtlai kawng hi a chhe em em tawh mai a. Hmanniah pawh khan ka sawi tawh nghe nghe a. Ka hriat dan chuan contractor hian Lunglei atanga 2 kms vel hi an black-top a. A lost in a inhriat avangin amah pawh kan hmu thei tawh love an ti a, chawhnu a PWD officer hote kan contact khan, hengte pawh hi hma min laksak atan a thain ka hria, Lawngtlai to Lunglei kawng tunhmaa kawng tha ber ni a kan ngaih thin kha tunah chuan a chhe ber a ni dawn tawh tlatin ka hria a, min hriatpui atan ka'n sawi hmasa duh a ni e.

Vawiina Demand No. 31-ah hian red oil palm-a mithiamin a sawi dan han sawi chhuah ka duh chu fimkhur a ngai mai awm mange aw ka ti, a chhan chu tui requirement hi a sang em em mai a, irrigated facility-te a awm loh phei chuan kan success rate hi a sang vak lo ang tih kha ka ngaihtuah hlek a, nikhatah oil palm kum 3-a upa hian tui 150 litres a mamawh a ni, nitinin. Mamit District-ah te chuan December leh January thlate hian rainfall awm lo ang kha a ni a, Kolasibah te pawh a nil hi a ni mai a. Hmaniah khan oil processing plan-te kan ngaithla a, a lawmawm rual rualin nakinah hian kan fimkhur loh chuan Chhingchhipa khawl awm saw a ro char mai ang tih a hlauhawm a, chuvangin oil palm hi kan ti dawn tak tak anih chuan irrigated facility kan provide theih hi a va tha awm e tih kha vawiin hian ka sawi duh a ni e.

Tin, ka Starred Question 101-na min chhannaah khan nikum 2010-2011 ah khan NLUP hnuaiyah Department hrang hrang hman tur motor chi hrang hrang engzatnge lei anih tih chhannaah khan 17 lei a ni tawh e tih a ni a, chumi atan chuan ₹ 89,97,726.00 kha pawisa hman a ni tih kha min chhanna a ni a, sanction order ka nei ve a, ka'n en a motor hi NLUP atan hian 53 sanctioned a ni tawh tlat a ni. Sanction ni pawh 29.3.2011 leh 30.3.2011 kha a ni a, ni 29.3.2011 a sanction phei chu en ngun a ngai viau a, hemi atan Mahindra an lei a, a rate chu ₹ 529,279 a ni a, tichuan 36 atan sanction an hmu a, chumi atan chuan Nuai sawmli paruk leh singli leh sang ruk zahnih leh sawmkua paruk kha a ni a, helai hi a rate leh a number hi a inmil thei tlatin ka hre lova ka han chhut hian Pu Deputy Speaker, hei hi enchian a ngai riauin ka hria a, cheng vaibelchhe hnih leh nuai sawmpathum leh singli leh sangruk leh zahnih sawmkua paruk hi an sanction anih si chuan Pakhat rate hi nuainga leh singhnih leh sangkua zahnih sawmsarih pakua ni

lovin nuanga leh singkua leh sanghnih zakua sawmnga leh pahnih a ni tlat a ni. Chuti anih chuan a amount kha vaibelchhe khat leh nuai sawmkua leh singnga leh sangli leh sawmli leh pali ni tur a ni a, hetah hian nuai sawmhnih leh pahnih leh singkua leh sanghnih zahnih leh sawmnga pahnih pawisa hi hemi sanction ni-ah hian a kim thei tlat lo. Chulai chu Pu Deputy Speaker, enchian a ngai hlein ka hria a, a pawisa hi draw tawh anih phei chuan kha thil kha engtia lo awm ta nge anih tih kha enchian a ngai viau niin ka hria a.

Tin, 30.3.2011 ah khan Bolero 17 leina a tan sanction kha a ni leh bawk si a, khamite pahnih belhkhawm kha motor 53 kha a ni a, hemi hi kan la lei hman lo ve an lo ti a ni maithei a, March thlaa sanction a nih avang khan, wawinah hian chuti anih chuan motor 17 kha an lo lei tawh nena han belhkhawm khan 53 leh 17 belhkhawm kha chu motor 70 vel lei ang kha a ni ta a. A tam angreng riau mai a ka han chhut khan, engtizia nge ni aw ka ti a, kei pawhin ka'n en ka'n en a, mahsela a chhanna kha ka hrethiam vak lova, kei chuan ka zawng chhuak thiam lova. Khalai tak kha Pu Deputy Speaker, he chhanna hi a dik tawh lo deuh nge ni a, 29 leh 30.3.2011 a an sanction kha an la lei lo emaw ni aw tih kha ka rilruah khan a awm a, chu chu ka'n sawi chhuak duh a.

Tin, Pu Deputy Speaker, NLUP sanction hi a hmuh nawm viauin ka hria a, a tam tham viau mai a, helaia ka rilru min kaptu chu 12.1.2011 a an sanction-na hi ka'n en a, salary requirement including increment of pay enhancement of DA etc atih khan vaibelchhe khat leh nuai sawmthum pakhat leh singkua leh sangkua leh zanga leh sawmhnih an dah a. Niminah khan engzatnge NLUP atan khan hna-a lak tawh an nih tihah khan mi 27 kha lak tawh an ni a, hei an hna ho kha min hriattir ta a. Hei hi ka'n chhut chhin a, an hlawh hi a sang riau mai a, kum khat chhung atan ni awmah ka'n ngai deuhva, kumnga atan anih chuan ka hre lova le, kumkhat chhung atan ang chu nisela mi pakhat hian cheng singli vel la pha deuh thaw tur khan ka ngai a, chuti anih chuan a van tam tham awm e tihte kha ka ngaihtuah deuhva.

Tin, chu lova ka rilrua awm chu, Village Level Committee including honorarium and sundry items tih a, cheng vaibelchhe hnih leh nuai sawm leh pali leh sangriat an han dah a. Village level committee tin khanin cheng singhnih leh sangruk leh zahnih sawmsarih paruk vel kha an hmang dawn tihna a ni ta a, khaw 801 atan khan. Tin, medical expenses atang khan NIB official 62 hi tute nge ka hre tlat lo a ni, hei hi min hriattir theih chuan ka lawm khawp ang a. Chung mite tan chuan an medical expenses atan khan nuai sawmhnih kha dah an ni leh tawp angte kha, chubakah chuan line department DC staff-te enumeration atana nuai sawmhnih pali singkua leh sangruk han dah ang tawp te, a tam riauvin ka hria a, tin, chubakah chuan Development of Website tihte, Capacity building hi village level-ah 801 villages-ah hian ₹ 2,40,00,000 tih te. Hei computers pawh khaw tinah hian pek tum ni awm takin kan lang niin ka hria a, khaw 801 tan computers hi kan lei dawn niin a lang a, chumi atan chuan cheng vaibelchhe 3 leh nuai 50 te kan han dah ta a. Computer hi la lei loh niin a lang a, chuti anih chuan kan zawhnaah khan NLUP hnuaiah hian village level-ah computer sem a ni em? tih kha sem ala ni love tih a ni ta a. Pawisa hi kan nei tawh si a, March thla a sanction a

ni vek si a, khang pawisate kha khawng a awm tak reng le? Engtikah nge lei theih a nih ang tihte ka han zawt duh a ni.

Tin, chubakah chuan Village level-ah computer lo lei tehreng pawh ni ila, an hmang tangkai thei angem? a thlawn lutuk lovang maw? village level-ah te hian. Thenkhatah chuan an hmang thei maithei a, enge a tulna viau awm pawh kha village level-ah chuan ka hriatpui lutuk tehchiam lova, chulai chu Pu Deputy Speaker, ka'n sawi duh a.

Tin, NLUP atan hian nikumah khan vaibelchhia 123 tih vel kha kan hmang niin tukin zing starred question chhannaah khan kan hmu a. Nikumah khan ka hriatsual loh chuan vaibelchhia 234.84 (crores) kha kan passed a ni si a, vaibelchhe 123 leh point something chauh kha nikuma kan hmang anih chuan a balance kha khawiah nge a awm tak? Kan passed si kha, khawiah nge sem ral anih tak, tih lai tak kha, Pu Deputy Speaker, han hriat leh a chakawm a. A figure leh helaia keima figure ka lo work out-ah hi chuan a inthlau deuh lehngal a, nuai 3 velin a inthlau a, khalai kha ka'n sawi duh bawk a ni.

Tin, Pu Deputy Speaker, ka'n sawi leh duh chu helai thilah hian tih tur a tam viau a. Thil pahnih khat lek ka'n sawi duh chu, nimirah khan Alu chi supply kha ka zawt a, kha kha a dik lo ve riau a. Kha Alu chi supply kha hemi atanga pawisa pek tho a ni a, Planning department atangin, ₹ 200 lakhs pek a ni a, a rate kha ₹ 60/- per kg. a ni a. Khami supply kha Planning department atanga engemaw deuh ten an supply tir ni a hriatna ka nei a, chu chu nimirah khan ka sawi chhuak lova, vawinah sawi chhuah tulin ka hria a. Helai atanga pawisa pek tho a ni a, chuvang chuan sorkar hi chuan thil dik lo deuh a awm a ni lo maw ti a kan sawi chhuah hi chuan, kan lo en ang e, tih ve mai awm takah khan ka ngai deuh hlek a. Mahsela anmahni tih ania ti zawnga thil han tih kha sorkar pawisa vek tho a ni a, thil diklo a awm anih te chuan enchian deuh a tha lawm ni? tih zawh tulin ka hria a. Sawi tur a tam si a, hun a tlem si a. Engpawhnise, Pu Deputy Speaker hun tha tak min pek avangin ka lawm e.

**Pu H. ZOTHANGLIANA** : Pu Deputy Speaker, ka lawm e. Demand No. 47-na Minor Irrigation-ah tun sorkar thar a pian hnu hian Project 215 tihpuitlinte thawh mek a ni a, thil lawmawm tak a ni. Hei hi kut hnathawktute he sorkar hian a vei em em a ni tih tilangtu chiang tak a ni. Sorkar hmasa hunah khan Project 60 vel chu an lo hma ve bawk a, chu pawh chu thil lawmawm a ni. August ni 18, 2010 ah khan Lawngtlaiah Minor Irrigation Sub-Division hawn a ni a, kan lawm khawp mai. Tin, hemi niah chiah hian M.I. a Head of Department ni thin Additional C.E. kha C.E. puitlingah hlankai a ni a. Lawngtlai Sub-Division leh tuna kan C.E. piancham hi a inang chiah chiah mai a. Chuvang chuan kan C.E. pawh hian Lawngtlai Sub-Divison pawh a bik taka min vei pui pawh ka han beisei nghe nghe a ni. He Sub-Division hi post 12 nei tura tih a ni a, hnawhkhah a la ni lo deuhin ka hria a, kan nghakhlel khawp mai.

Demand No. 35 Fisheries-ah District Office thar 3 sorkar thar hian a hawng a, Serchhip, Champai leh Lawngtlaiah te a ni a. Tin, Farmers training



hi mi 2300 tan buatsaih sak tawh te an ni a. Sorkar hmasa huna thil awm ngai lo, State pawn lama 'exposure' nei tura inzira in tathriam tura farmers mi 30 lai mai tirhchhuah an ni ta te pawh hi thil lawmawm tak a ni. Chu mai bakah chuan National Scheme of Welfare of Fishermen tih hnuaiiah Farmers 5000 lai mai tan Insurance tih sak an ni a. Hei hi thil hlu leh ropui tak a ni bawkin ka hria.

Demand No. 15 G.A.D-ah hian thildang deuhhleik han sawi duh ka nei a, chu chu Protocol chungchang a ni. Kan Autonomous District Council pathumte, kan C.E.M. te, Chairman te, E.M. te leh M.D.C. dangte hi tun dinhmunah chuan Protocol hian Joint Secretary to Government rank puiah a dah a, hei hi kawng thenkhata ngaihtuah chuan thil awm tak pawh a ni mai thei a. Amaherawhchu, ngaihtuahna pakhatat chuan elected representatives of the people an nihna avang hian hetiang ngawta dah hi chu a fel lo deuh lawm ni ka ti a. Anmahni pawh hian an vei khawp a, inkokhawmin hemi chungchang hi vawi tam tak an relin sorkarah pawh ngennate pawh an thlen tawh nghe nghe niin ka hria a. Chumai bakah chuan C.E.M leh Chairman te, E.M. te leh MDC zawng zawng Group khata an han dahkhawm ruih ringawt mai pawh hi a fello deuh hrim hrimin a lang a, hei hi enchian deuh theih niselangin a tha hlein ka hria a. Nichina kan han sawi ang khan mipui thlan lal an nih ve miau avangin, tuna an dinhmun ngawt aia sang deuh zawka hlan kai hi an phu khawpin ka hria a, chu chu ka'n sawitel duh a ni.

Demand No. 45, PWD chhungah hian kan Member pui zahawmtak Pu S. Laldingliana bial chhunga Thingfal, Mamte leh ka bial chhung Lungtian inkal pawhna tur kawngpui PMGSY Scheme hnuaiiah laih a ni a, a tha khawp mai a. Amaherawhchu, he kawngpui hian Chhimituipui lui hi a kan a, a su tlang a, chutah chuan chu lui kanna tur Marboat provision hi tun dinhmunah hian a la awmlo niin ka hria a. Kawngpui tha eltiang mai, cheng tamtak sengin buatsaih nimahsela, a luipui kaina tur ber hi dah anih siloh chuan a pamhmai dawn hlein ka hria a. Chuvangin, Marboat hi dah thuai theih dan a awm chuan a lawmawm lehzuai hle ang tih ka han sawi duh a ni.

Multi Modal Transport Project hnuaiia double lane kawngpui laih anih avangin kan sawifo tawh thin a, sawi nawn leh hrim hrim ka duh, kan lawm tak meuh meuh a ni. Keini chauh kan lawm a nilova, Zoram pumpui tan thil tha a ni a, Zoram chauh pawh nilovin, India ram tan hian thil tha, insumdawn tawwna kawngah nasa taka min tihmasawntu a nih ka ring a ni.

Polytechnic, Mamit leh Champhai, Thingdawl, Kolasib leh Lawngtlai-ah te sak tur/dah tur a ni a. Hei hi mipuiin an nghakhlel a, kan nghakhlel khawp mai a. Tunah hian PWD in an buaipui mek niin ka hria a, chak lehzuai tih theih dan awm thuai thuai se kan ti em em a ni.

Demand No. 39, Power - Sangau kan bial chhung veah, 132 KV Sub-station dah sak kan ni dawn a, kan buatsaih ve a, kan lawm tak meuh meuh a ni. Chutih rual chuan State sorkar thuneihna hnuai ni chiahlo mahsela kan hotuten min enpui atan kan Member pui zahawmtak Pu C. Ramhluna'n a sawi tawh kha ka'n tuihnih duh a. A bik takin Sangau-a RGGVY building an sak saw a chhe em em ringawt mai a, naupang pawhin an cement work saw kutin tihian an duh lai lai an piai thla thei a ni. Chutiang chu anih avangin hei hi ennawn a ngai khawp a, kan

hotuten a contractor-te leh helama mawhphurtute min hrilh hriat sak a, hma min laksak theih chuan a lawmawm ngawt ang tih ka sawi duh bawka ni.

Demand No. 31, Agriculture-ah hian kan thianten an sawi teuh tawh a, khawh, Tractor power tiller leh Mini Tractor tiller 614 Sorkarin subsidized-in a sem a ni tih kan hria a, chumai bakah chuan 2011-2012 chhung hian sem leh mai turin Tractor 200 leh Mini power tiller 50 ruahman mek a nite hi thil lawmawm tak a ni a. Kut hnathawktute kan VIP an nih tak tak zia tilang chiangtu a ni. Hengte leh NLUP hnuai Agriculture-ah ngawt pawh family 6004 ngawtin tanpuina an dawng a, an la dawng belh leh zel turte hi thil lawmawm a ni a. Hengte leh Ministry hmasa huna Mizoram Intodelh Project (MIP) a hmalaknate kha chu a inkhanlo hle, a intu lo hle a ni. MIP hnuaiyah te kha chuan kan bialchhung veah te kha chuan a dawng tam ber pawlin ₹ 5000/- vel an dawng a, a tawp hmak a, chu pawh khawkhat emawni chiahin kan bial chhung pumpuiah khian an dawng niin ka hria, chutiang ang velte chu an ni a, Sorkar tharah hi chuan 'change' hi a tak takin a thleng a ni tih hi a lang mawlh mawlh a ni tih hi ka sawi nawn leh duh a ni.

Tin, kan hotuten remhre tak a thil an kalpui avangin leh kan NLUP a zar pawh a ni zel a, Centre atanga RFKVY (National Agriculture Development Programme) tunhma a pawisa an hmuh ve theih loh thinte kha tunah chuan nikum kum 2010-2011 atang khan kan lo hmu tan ta a. Cheng nuai 655 nikum lama sanction kan ni a, kuminah hian nuai 2961 min pe tura beisei a han ni thei ta hial mai te pawh hi a lawmawm tak meuh meuh kan ti a ni. Buh thar tam kumah puan a ni a, hei hi thenkhatin engemawti zawng deuhin a elsen zawng deuhin an han sawi tak nangin buh thar tam kum puan kan han tih hian kan hotuten an 'mean' tak chu nikum 2010 a kan thar ai chuan kuminah chuan 10% talin kan thar tam tur a ni ti a tan lakna a ni, tih hi kan hriatchian nawn a thain ka hria a, thil lawmawm tak a ni.

Hei ka tawngkam hriat ngailoh Agriculture Department hian an chher thar nge ni ka lo la hre ve ngai lova. Tuklawrlo pawh ti ila a dik thoin ka hria, engpawh nise tlang lo neih hi kum 2007 leh kum 2010 a kan dinhmun te khaihkhin chuan a area a tlathla nasa hle a, he kum chhung hian 16385 hectare, thingtlang lo neih area hi a tlahniam a, thil lawmawm tak a ni, hei hi a lawmawmna chhan chu WRC lamah te, Oil palm lamah te kan hotute tan lakna leh remhriatna azarah nasa takin kan thang a, chumi avanga hetiang thil hi lo thleng a ni a. Kum 2007 leh kum 2010 inkar ah khan WRC area punna hi hectare 2684 lai a ni a. Chutiang chuan Oil Palm lamah pawh Zoram nasa takin hma a sawn chho mek a, a bikin han sawi leh thin ta ila, keini District-ah te pawh Oil Palm that duhna tur a ni mithiamin an tih avangin mipui kan phur em em a, kei ngei pawh hian ka phak tawkin Oil Palm hi thil tha a ni ngei ang, MLA atanga kan tlak hunah pawh thil tha a ni ang, inngahna tlak a ni ang ka ti a, ka phun tan ve nghe nghe a ni. Keini lam saw Ruchi Soya Company-in min bial a; Lunglei leh Lawngtlai District hi annin min enkawl dawn a, heng thilte hi a hralhna market lamah buai ve hauh lo tur leh a hralhna man zat tur Member zahawmtak Pu Duhoma ngaih pawimawh em em lai a market rate chiang sa kha a ni a. Company-te hian an la sawr dawn loh pawhin sawr tham a la awm loh lai atang pawhin a rah hrim hrim kha mathei lovin, sawi sual awm hauh lovin an lei char char bawka. Chutiang chuan kan kalpui zel dawn bawka a....(CHAIRMAN : Ti khan minute 4 kan pek belh che) Min pek belh tawh maw? (CHAIRMAN : Pek belh tawh, a zo leh tawh.) E, a ni maw, a nih tak chu. Pu Chairman, ka lawm e. Ka duhtawka e.

**CHAIRMAN** : Tunah Pu K. Lalrinthanga, MLA zahawm tak i lo ko ang.

**Pu K. LALRINTHANGA** : Pu Chairman, ka lawm e. Demand No. 47 atang hian rawn tan ka duh a, Minor Irrigation. Kumin chhung hian Major Works atan cheng nuai 7,215 zet mai a awm hian kan leilet neitute tan tangkaina nasa tak a awm dawnin ka hria a. Tin, Work Programme-te ka'n thlir a, District-wise allocation pawh a rual viauin ka hria a. I dinglama thute leh i veilama thute hi han vui tur chuang an awm dawn lovin ka hria a, lawmawm ka ti a ni.

Tin, Demand No. 45-na atang hian han sawi ve ka duh a. Vairengte leh Phainuam inkar khu PMGSY kalkawngin laih tawh a ni a. Amaherawhchu, la metal loh a ni a. Tunah hian metal a nih theih nan sanction Central sorkar atangin dil mek a ni tih ka hria a, lawmawm ka ti a. Sorkar chak tak hian nalh mam tha deuh leh tlo deuh turin min metal sak ka ring a. Chutih rual chuan a hmabak, Phainuam atanga Saiphai inkar laih leh turin nakum NLCPR priority number one-ah a awm tih ka hre bawh a. Chuti a nih chuan he sorkar term chhung hian khulai khuate harsatna, SDO (Civil) tan te pawh a ni ang chu administration-ah, Vairengte atanga khawchhak tlangdung kal tura Bagha kal thlen kher kher ngai thinte kha a reh dawn niawmin ka hria a, lawmawm ka ti a. Tin, mipui tan pawh intlawhpawhna tur kawng tha a rawn piang chho zel dawnin ka hria a.

Chutih rual chuan, Serkhan atanga Bagha thleng kalkawng tha taka a inpawh theih nan Saiphai thleng Serkhan atanga laih turin, Mizoram sorkarin Tender a chhuah a, mite pawhin an chhang hlawm a. An lai mai dawn a ni tih te kan lo hria a. Sorkar hmalaknaah hian lawmawm ka ti a, ka'n tarlang ve hrim hrim duh a ni. Chutih rual chuan, Vairengte-ah khuan khawchhung tlak lampang kalkawng khu UT hunlai atanga kalkawng awm tawh mipuiin tangkai taka an hman thin a awm a. Kumin furah te, nikum furah te khan a chhe nasa hle a, tunah chuan a veng mipui tam tak motor-in a tlawh pawh theih lovin a awm ta a. Culvert-te a chhia a, nikum lamahte, nikum hmasa lamahte Sub-Division lamin proposal leh estimate-te an siam a, amaherawhchu, PWD sum-in a daih thin lo aniang tun thlengin siam a la ni lova. Nikumah pawh proposal an siam a, kuminah pawh proposal an siam leh a, tichuan, kumin hi chuan min siam sak ve tawh hram turin ka ngen a ni. Tin, tun hunah hian kal kawng (hmanni pawh khan ka sawi tawh a) Saipum thleng khuan bus a kal thin a, bus kal hi kalkawng a that mumal loh avangin tiin an tawp thin a Hlimen thleng chauh te an kal thin a, khulai kalkawng khu a that loh avangin intlawhpawhna hi a buaithlak em em a, bial fan-te pawh a buaithlak a. Motor tha deuh hlek nen lo chuanin furah hi chuan a fan hleitheit loh thin a. Chutiangte anih avang khuan khulai khu min en sak turin ka ngen duh a ni.

Demand No. 39-na tlemte han sawi ve ka duh a, Power Department chungchangah khan, thil tam tak kan project neihte kan Sorkarin hma a laknaah te lawmthu kan sawi tawh a, khang zawng zawng kha chu sawi zel pawh ngaiin ka hre lova. Ka sawi hmasak duh ber chu RGGVY hnathawh hi a ni, a muang em em mai hi a ni a. Sorkar thar pian hma atanga lo intan tawh kha a ni a. Hrui an thlun tawh leh ban an phun tawhte bakah electric wiring an tih tawhte pawh hi kum chanve dawn hial niin ka hria, keini bial angahte chuan

tunah hian an la eng lo a ni. Department lampang hian, engtingge a nawr dante hi a awm em? nge contractor-te hi Mizoram Sorkar-in a appoint nilo awm tak ten kan lo hria a. Hengte hi a thlak theih dan a awm em tihte hi hriat a chakawm riauin ka hria a. Hmun hrang hrangte kan han zawt a anni pawhin an muan zia min hrilh a. Chutiang chuan Zoram pumah hian he contractor hnen atang hian mipuite hian harsatna kan tawkin ka hria a. Hei hi enchian nawn leh chu a tul viauin ka hria a ni.

Tuirial Hydel Project compensation chungchang hi tlem han sawi veleh lawk a thain ka hria a. Ka bial chhung a ni a. Saipum khua amite kha bandh siam tute an ni a. Ka han zawt hlawm a, tunah hian inah khuan bandh siamtute zing ami mihring list kha ka kawl a ni. Chuta an sawi chu, a huaihawttu chu kan Chief Minister kal liam ta nau kha a ni a. An bandh nei chhan kha chu hmanlai Kumpinu Sorkar awm lai atang khan ram nei tawhte an awm a, mi 48 in ram an nei a ni, Bigha 10 te, bigha 15 te an nei a. Compensation khang ho zinga dawng awmchhunte kha chuan nuai khat leh tihte an dawng a ni, tin, chutih lai chuan tunhnaia zuk nei thar, bigha 15 neite kha chuan compensation kha nuai 15 te, nuai 12 te, a let 10 ten an dawng a, chuvang chuan an lungawi lo a ni. Chutiangte avang chuan, tianga bandh an han huai hawt khan an lo tawiam ve a ni tih kha min hrilh a. Chuvang chuan bandh huaihawttute kha kan hrechiang bawk a, kan Sorkar hian action la se a tha khawpin ka hria. Hei tunlaiin electric chungchangah harsatna kan tawk a, Sorkar an dem a. Tuirial Hydel Project khu bandh avang khan tihthuanawpin awm lo ta se kum 2006 khan khuah zawh tawh a ni ang a, commission a ni tawh ang a, Mizoram hian kan harsatna zualpui hi kan sukiang ang a, harsatna namen lo tuna kan tawh hi a awm dawn lo a ni tih ka'n sawi duh a ni.

Demand No. 25-naah hian ka sawi duh chu, Fisheries Department-ah hian hei Grant-in-Aid General Non-Salary-ah hian cheng nuai 1262 zet a awm a ni. Hemi atang hian sangha chite pawh kan mipuite tan Sorkarin a sem leh thei dawn niin ka hria a, lawmawm ka ti a. Chutih ruala ka'n sawi duh chu, Sorkar hlimah khan, "sangha chi kan dawn hi a tling lo a, kan lungawi lo", te an ti a. Chuti a nih chuan, "an sem laiin ka rawn en sak ve thin ang che u", ka ti a. Tichuan an sem laiin ka zuk en sak a, an teh chungchangahte hian enchian a ngai em em a, a len leh len loh te hi enchian a ngai em em a ni. Society an awm a, chungte chu an lungrual thlawt loh chuan sem loh tur kan ti a. Tichuan an teh dan hi fianin an suak a, puanin tui ami an zuk suak hmasa a, an tehkhawngin an han suak leh ta a, an khai san deuh hlek loh chuan tui an suak tel teuh teuh mai a ni. Tui kha an suah tel teuh teuh chuan sangha chi kha a tlem a ni. A no tehkhawng atang khan an chhiar si a. Chutiang atang chuan kan beneficiary ten an dawn tur ang zat an dawng lo thei a ni tih a hriat a, Department lam pawhin uluk taka an sem lai hian an ensak a tul a ni tih ka'n sawi duh a ni.

Tin, Soil & Water Conservation, Demand No. 33-naah hian ka'n sawi duh chu, nikum khan Phaisen khaah khuan Golden Jubilee an lawm a. Chutah chuan kan Chief Minister zahawmtak hian a zuk hmanpui a. An thlir vel a, Dumkhalluiin (khaw dungah khuan a luang a) leilet nasa tak mai tuihawkin a len hek a, chu chu kan Chief Minister hian a zuk hmu a, a ngaipawimawh em em mai a. Chutah chuan anin ruahmanna a siam tak chu,

“Soil & Water Conservation Department hian Project lian tham deuh takrawn siam sela, Central-ah kan lo buaipui ang e”, a ti a. Tichuan lehkha ka ziaak a. Amaherawhchu hei Demand kan han en hian tuna kan han hmuh maiah chuan Object Head 27-naah, work programme-ah hian nuai 3 chauh a awm a ni. Tin, Demand for Grant-ah hian nuai 81.1 a awm leh si a. Hei hi a eng zawk hi nge dik ang aw? tiin ka ngaihtuah a. 81.1 pawh hi lo ni ta se kan Chief Minister zahawmtakin a liantham deuh tak lo siam sela a tih kha a tling lo deuhin ka hria a. Hei aia lian deuh hleka ruahmanna siam hi a thain ka hria a, ka’n sawilang ve reng reng duh a, chu chu ni ta sela. Pu Chairman, rei lo te pakhat han sawi leh ka duh chu Agriculture-ah hian tawi te han sawi ka duh a. Power Tiller leh Tractor hi sorkarin a sem a. Tin, kumin chhungah pawh Power Tiller leh Tractor avaiin 250 zet mai sem leh a tum a. Hei hian a kawh chu buh thar tam tur hian sorkar hian hma alo la lawk hle a ni maw tih ka ngaihtuah a. Chu chu inpuahchahna a tling a ni lawm ni ka ti a ni. Ka lawm e.

**CHAIRMAN** : Tunah Pu K. Liantlinga i lo ko ang.

**Pu K. LIANTLINGA** : Pu Chairman, ka lawm e. Vawiinah hian sawitur demand a tam hle mai a, sawi sen pawh a ni lova, amaherawhchu, hmun thum hmun li velah chauh han sawi ka duh a.

Hei Demand No. 9-na hi, amaherawhchu a chhung ril tak chu zu luh chilh ka tum lem lova, Finance Minister thar tha tak mai kan nei a, general discussion a wound-up naah ka sawi, performance budget chungchang kha performance report ni awm tak a ni kha a ti a. Performance budget-ah khan report-te kan han beisei a ni a, work programme te. Vawiinah hian kan Minister hi a changtu ber a ni a, Planning, Finance, amaherawhchu a department panga chanah hian pakhat chauhin performance budget hi a theh lut a, pali hian an theh lut lova, plan fund neite an ni a, a then phei chu ngai lo department pawh an awm thova, tunai a tha zawk deuha tih theih te pawh kha a chakawmin a nghahhlelh awm hlein ka hria a. Finance kalphung hi a harsa a, keini kumhnih emaw lek MLA in kan awm ve a, han inzir thiam pawh a harsa a, inzir thiamna hman pawh ala awm lova, kan ngaihpawimawh zawngte leh eng emawte kan han sawi a, delegation of financial power chungchangte pawh kha Budget Speech-ah te khan a rawn tilang a, point 21-naah khan a lawmawm hlein ka hria a, ti hian a ziaak a, “however utmost effort have been undertaken to ensure timely and quality utilization of public fund by way of simplifying the procedure of obtaining administrative approval and expenditure sanction” an ti a, hei hi dawhkan sawm li sawmnga kaltlang a, harsa taka kalin sanctioned an hmu a, kan development department-te pawhin hna an thawk hlei thei thin lova, House-ah Minister-in demand an dil a, passed anih tawh hnuah harsatna tamtak a la awm a ni. Ka’n zawh chian duh chu engtiang in nge kha kha a simplify dan tur kha min hrilhfiah se ka duh deuh va. Tin, sum leh pai tam tak hi RGGVY leh thil dang dangah hian grant kan hmu a, heng ang chite pawh hi Finance kaltlang lemlo, Treasury kal tlang lem lova sum hman te tamtak a awm a, heng te pawh hi hman dan tha zawk leh Planning-in an approve pui em? tihte kha ka’n zawt chiang duh bawka a.

Tin, demand 32-na Horticulture-ah hian hmanni-a ka zawhna min chhannaah khan kan Minister khan starred question no 154-na zawhna ka pekna leh ka zawh nawnaah khan tum bik neite pawh kan va ang deuh ve mawle, min han ti a.

Hengah farm tanpuina chungchangah sorkar hnathawk lam ten an chhungte duhsak zawngte khan an kal nasa deuh a, helai chungchangah te pawh hian han hriatchian ka duh a ni.

Tin, vawiinah hian han sawi loh theih loh, sawi ka hreh viau a awm a, mimal angte pawhin an ngai ang tih ka hlau a, amaherawhchu mimal ang nilovin kan ram thatna tur leh hmasawna zawk turte, sum leh pai hman dik dan leh a changtu tur ten an chanvo dik tak, VIP kan mipui, mirethei tena an chanvo dik tak an chan theihna turte anih avangin, sawi loh theih loh niin ka hria a. Demand No. 32-na Technology mission chungchanga 98.50 crore kha eng atan nge hman anih tiin ka zawt a, min chhannaah chuan grape chinna atan te, sapthei te, serthlum te, anthurium te, iskut leh pineapple te, Champhai area ah te, tin, Zote, Ngur khawchhak lampangah te, Rulpuihlum, Kawnpui, Thingsul tlangnuam, Seling, Sethlun, Sekhum, Lungdar, N. Vanlaiphai tih te, tin, anthurium hi Aizawl, Lunglei, Serchhip, Kolasib tih te a ni hlawm a. Chumi ka zawhna kal zelah chuan nimin khan kan member zawng zawng te chuan, a copy ka unstarred question no. 31-ah khan in hmu vekin ka ringa.

Chutah chuan SFAC (Small Farm Agriculture Consortium) hian engangin nge sum in hman dan, tih ka zawhnaah khan account no leh sum awmzat leh Bank balance-te la awm kha ka zawt a. Member zawng zawngten nimin khan unstarred question no 31-naah khan in hmu vekin a hriat a. Bank Account-ah chuan Vijaya Bank-ah 1, State Bank-ah 2 leh Axis Bank-ah 2 a ni a. Helaia report hi kan Minister zahawmtakin min chhanna ni si, ka'n enchianga nizan ka inen lawknaah diklo deuh mai leh fello deuh mai kha ka hmu a.

Chu chu vawiinah hian sawichian a thain ka hria a, kan Minister pawh hian min chhang chiang ngei thei se a thain ka hria a. Han en thuak chuan en liam mai theih chu a ni, amaherawhchu Bank statement min pekah khan Bank balance leh a statement-a an zia kha a inang lo nasa em em mai a. A dang hi chu ka han sawi vek lo anga, Bank statement pakhat chauh hi sawi ta ila a thain ka hria a, ₹ 14,20,753/- (cheng nuai 14 leh singhnih leh za sarih leh sawmnga leh pathum) a awm a ni. Bank Statement-ah chuan ni 30.6.2011 thlenga Bank statement kha Pu Deputy Speaker, ka dil a, tahchuan Interest hi ₹ 4,34,558/- (cheng nuaili leh singthum leh sangli leh zanga sawmnga pariat) interest kha pek a ni a, 30<sup>th</sup> June, 2011 thleng pek a ni a. Amaherawhchu clear balance hi tam takin an en chiang lo mai thei a, clear balance-ah hian ₹ 20,14,19,503/- (cheng nuai sanghnih leh sawm pali, singkhat leh sangkua leh zanga pathum) a awm a. Hei hi duh duh a hman chhuaha cheque-a draw nghal theih a ni a, hei Bank-ah te chuan a tihdan tlangpuiah chuan saving account-ah chuan 4% vel a pung a, tah hian multi option deposit hi dah a ni a, sum hman sen lem loh mamawh loh hi dah theihna kha a awm a, a interest chu fixed deposit ngai lovin 9% vel te a ni a, hei hi MOD an ti a, ₹ 20,14,19,503 (cheng nuai sanghnih leh sawm pali leh singkhat leh sangkua leh zanga leh pathum) a awm bawka ni. A interest hi Bank balance dik tak ni sela, ₹ 4,34,558/- (cheng nuai li leh singthum leh sangli leh zanga leh sawmnga leh pariat) a awm pha lo reng reng a ni.

Chuvang chuan heta tanga chhut pawh hian half yearly interest ang vel a ni a, chulai chu ngaihtuah ngun a ngai em em-in ka hria a. Tin, a statement pumpui hi min pe lo a, hei hi thil dik lo a ni, cheng nuai sanghnih vel hi tunah hian a bo a ni, a kim lo a ni. Kan hriat chhuah a ngaiin ka hria a, sum leh pai hmanna

tur chungchangah kan Minister min chhanna a nih miau avangin, tihchian a thain ka hria.

Tunhma khan dik lo enge maw pawh lo awm sela, tun Sorkar hi chu dik tawh turah te pawh ka ngai a, thil tha tih tum leh theih tawp chhuah an ni a. Zawnha chhanna copy pawh kan nei vek a, khatah khan, Bank balance min pek hi ₹ 42,04,288/- (cheng nuai sawmli leh pahnih leh sangli leh za hnih leh sawmriat leh pariat) chauh a ni a, chuti chuan cheng nuai sanghnih leh sawmli leh pahnih tih vel hi a kim lo a ni. Hengte hi mi harsa zawk leh rethei zawkte tana public sector leh private sector atana hman tura tihte a ni a. Uluk taka hman a thain ka hria a, hreh viau mah ila, khang kha sawilan a ngaiin ka hria a ni.

Tin, nichina ka sawi ang khan, kan Minister hian heng CSS leh direct funding cheque-a lo kal leh thildangte pawh hi uluk taka hman dan hi ngaihtuah a tha awm mange ka ti a.

Tin, ka kal leh duhna chu Demand No. 45-na PWD-ah hian a ni a, anni pawh hi work programme-te a awm lem lo a, hriat a har khawp mai a, an hnathawh tur hi han en pawh hian. Ka bial chungah khuan kawng, by pass road panna, nuai 400 man kan siam a, hmannah khan kan House Leader zahawmtak khan a hawng tawh a, a lawmawm khawp mai a. Hetih lai hian Aizawl khawpui cheina atan hian nikumah kha chuan Nuai 1107 vel kha a awm a, kuminah hi chuan tihtam theih dan awm sela, kan khawpui ber a ni a, a tha lo'm maw ni aw? tih ka'n ngaihtuah a. Tin, ka bial chiah chu a ni lo na a, han sawipui deuh a ngai a. Republic atanga Mission veng chhuahna saw, kawng a kual em em mai a. Lungli atanga South II MLA zahawmtakte kawmthlang hnuai kawng phei, Mission veng lun lai taka chhuahna tur kawng saw a thui lova. Hengte hi chu min tihsak thei hram lo'm ni, kuminah hian tihte ka'n sawi ve duh pah a. Tin, Power House bul chhak saw, kan House leader-te kawmthlang, hei thingtlang lam atang leh phai lam atang hian chawhmeh phur lo thleng zawng zawng mai thlen khawmna a ni a. Sawlai saw han kal hian a diakin a rimchhe em em mai a. Pu Patea, kan Parliamentary Secretary, PWD etc. bial chungah a ni lehngalin ka hria. Khanglaite pawh kha siam that dan a awm lo'm ni? Sawng saw thil harsa a nih a rinawm lem loh va.

Tin, ka'n sawi leh duh chu, Pu Deputy Speaker, Power, Demand 39-naah hian ITI veng a Police 3<sup>rd</sup> Battalion ho electric lak khu, Transformer atangin direct-in an feed a, Metre box nei lovin. Khu khu tunhma atanga tihthat tuma beih thin tawh a ni a. Amaherawhchu department lamte pawh ka'n zawt a, 'kan Governor pawhin a sawi tawh asin mawle' an ti a. Amaherawhchu, danah a theih loh alawm an ti a. A chhan chu Police family lane-te khuan electric bulb pahnih khat lek chhiin thla khatah ₹ 400/500 te an chawi a ni. Thawh khawmin transformer bill an pe thin a. 3<sup>rd</sup> Battalion area chhunga street light bill zawng zawngte pawh khu an chawi vek emaw tih tur a ni a. Heti lai hi danah chuan a awm lo a ni. Amaherawhchu, kan Chief Minister, kan House leader zahawm tak portfolio a nih avang hian dan pawh hi siam that a, direct connection khu nei sela, ₹ 200/100 te an chawina turah khan ₹ 400/500 te an chawi vek mai a ni. Police hote tan khuan harsatna a tam em em mai a. Tunah chuan ka bial chungah chu a ni chiah tawh lo na a, hei kan member zahawm tak Lt. Col. Z.S. Zuala bial a ni a, mahse ka rilruin a ngai pawimawh a. Mipui harsatna, Police harsatna khu chhanchhuah theihin ka hria a. A changtu Minister zahawmtak kha ka'n ngen tak meuh meuh a ni e.

Tin, point pakhat chiah ka sawi leh ang, Pu Deputy Speaker, khawngaih takin aw. Demand No. 13-na, ATI chungchang hi lawmthu sawi ka duh a. A then kha chu kan han insawisel bawrh bawrh na a, amaherawhchu a thenah chuan lawmthu sawite hi a ngai a, thil tha duhna avangah ngai vek ila. ATI Training-a Assembly matter, heta House-a kan sawi chhuah tawh, kan Minister zahawmtakin a lo training tir kha a lawmawm ka ti a. Hemi chungchangah hian, Joint Secretary chunglam tan an ti niin ka hria a, Directorate level-ah te, District level-ah te hian training neih ni sela, Executive leh Legislators-te thawhho thatna tur a ni a, Democracy lungphumah chuan Executive, Legislature, Judiciary anih avangin thawhho thatna tur atan Administrative Training Institute-ah hian training kan pek that rinawm a ni. Lungrual taka kan thawhho theih chuan sorkar tha kan siam thei dawn a ni. Chuvang chuan kan Minister ruahmannaah hian lawmthu ka sawi duh a.

Tin, hei Statistical Handbook hi kan dawng a, a portfolio tho a ni a, thil pakhat han sawisel lawk duh ka nei a, Pu Deputy Speaker, Head of the State of Mizoram an ti a, Mizoram, Governor of Mizoram an ti a, chutah Administrative of Department an ti a, Chief Secretary atangin Secretary ho zawng an dah a. Tin, list of Head of Department an ti a, Director list-ah hian Assembly Secretary hi No. 58-naah a dah a ni. Hetah hian Council of Minister leh Administrative Head-te a hrangin dah sela, heti laiah hian Speaker leh Legislative Assembly-a hnathawkho kha a hrangin dah bawh selangin, tin, High Court kan la nei chiah lo nachungin, Mizoram Bench kan neihah hian, Judge te, Registrar te kha a hnuaiah khan dah sela, statistical handbook hi a that rual rualin mi tam takin hrehawm an lo ti ve theiin ka hria a. Economics & Statistics Department hi kan ram Economic siamtha tura hma la tu leh Date collect-tu nia kan hriat laiin, mi tamtak chuan an Directorate office pawh hi kan hre mang lo a ni a. He Department hi chak leh lian tak ni tur a ni a. Mahse kan hlamchhiah a ni, an hnathawh dante pawh hi, uluk taka ngaihuaha tih thin nisela a tha hle ang, khangte kha Pu Deputy Speaker, ka sawi duh chu a ni a, hun min pe a ka lawm em em a ni.

**Pu JOSEPH LALHIMPUA** : Pu Deputy Speaker, ka lawm e, Demand No. ....chu vaibelchhe zariat sawmnga leh pariat point sawm leh pathum a ni a, chutah chuan kan actual expenditure chu vaibelchhe zasarih sawmriat point 86 a ni a, za zela 90 kan hmang tlinga. Tin, 2008 – 2009 ah khan vaibelchhe 1047. 75 a ni a revised outlay, tichuan kan hman chu vaibelchhe 800, 38. 14 a ni, za zela 79, chuan keimahnin sorkar kan han chelh ve hun, kum hmasa kum pum 2009-2010 ah khan kan budget revised outlay chu vaibelchhe sangkhat zahnih leh sawm leh pali point sawmnga leh pathum a ni a, chutah chuan kan actual expenditure chu vaibelchhe sangkhat za sawmnga leh pahnih leh point sawmsarih leh pakua a ni a, za zela point 91.20 in kan hmanga, heng te hian helaia kan Chief Minister zahawmtakin kan senior Minister hnenah Finance kan puala an hlanah hian hlawhchhamna leh harsatna a awm lohzia a figure hian a tichiingin ka hria a. Tin, Pu Deputy Speaker, Planning chungchangah leh kan budget chungchangah hian tawite a thil han sawi ka duh chu kan State budget piah lamah hian hei Central-ah kan hriat angin kum 2008-2009 ah khan ministry 51 atangin North East Region, Sikim telin chumi atana kan hman tur bik an budget atana 10 % allocation min pek chu vaibelchhe singkhat sangli zariat sawmli leh paruk point sawmkua leh pakhat a ni a, chutah chuan vaibelchhe singkhat sanghnih zasarih sawmthum pathum point sawmriat leh pali kan hmang rala. Tichuan kum 2009-2010 ah khan 10 % atanga North Eastern-a min dah hran sak, allocation



min pek chu ministry 52 atang hian vaibelchhe singkhat sang sarih zahnih sawmthum panga point sawmparuk a ni a, kan hman zat kha chu ka sawi tawh lo anga. Tichuan 2010 – 2011 ah hian vaibelchhe singhnih leh zathum sawmkua leh pali point sawmkua leh pahnih, ministry 52 hnuaiyah Central ministry khuan North East hmasawna turin allocation min pe a ni. Pu Deputy Speaker, ka han tarlan duh chu, kan budget kan hria resource kan neih tlem avangin, kan hotute tang hle mahsela Danin a phut leh phal ang piah lamah kan tih theih bik loh avangin budget neih tam ringawt kha keimahni leiba insiam tamna a nih avangin kan hotuten an sawi tawh a, chuti a nih mek lai chuan Ministry hrang hrangah hei tunah pawh 52 ah vaibelchhe singhnih chuang North East tan hian a hranpain a awm a, hei hi Planning leh Finance, Finance atang hi chuan a hriat theih deuhin ka ring a, chu pawh chu nichina member zahawmtakin a sawi ang khan direct-a department-a kal a nih avangin tam tak hi a hriat theih loh a, chuti chung chuan hemi kan lakchhuahna kawngah hian kan tan lehual deuh chu avan ngai awm mang e aw, ka ti a.

Hei UD & PA Minister zahawmtak hmalaknain an ministry atangin engemaw zat hmasawna tam tak lak chhuah a ni a, department dang dang atang hian kan alliance, ministry atang khuan engzat nge kan lakchhuah ang aw, tih hi ngaihtuah tham niin ka hria a, hemi kawngah hian tanlak ngai khawpin ka hria a. Hei hi kan officer-te pawh hi kan alert deuh a pawimawhin ka hria a, khawngaihtakin kan Planning Minister zahawmtakin hemi kawngah hian chak zawkin hma min laksak se ka duh a. Eg, pakhat ka'n sawi anga, Pu Deputy Speaker, i phalna in, 9<sup>th</sup> Feb, 2011 ah khan Horticulture..... DEO ah hian letter ka pe a, hei hi kan Chief Minister remtihna saw lampang, Lunglei lampang hmasawna kan siam thenkhat a ni a, kan chhiar chhuak ang e, i phalnain. 'Phone-a kan inbiak tawhna ang khan. DPR of Integrated Sustainable Horticulture Development at Khawreng ram, Zobawk Bawk Mual, Theiriat leh Pamtul ramngaw Thuam North Lunglei District tan ₹ 10,00,548.84 ka rawn thawn anga DPR ka dah tel vek a, heng DPR te hi Dr. Gorak Singh, Horticulture Commissioner Mission Director, Department of Agriculture & Co-operation Ministry of Agriculture, Govt. of India, .....Bhawan, New Delhi-ah i lo thawn theih chuan ka lawm hle ang. February, 2010 kar tawp lam hian hemi bawhzui hian N. Delhi-ah ka kal dawn nghe nghe a" kan ti ve a kan Chief Minister remtihna in. Kan inzawt kan inzawt a kan lehkha leh kan DPR kha a bo ta a ni, kan in phone ngun khawp mai a, tunah phei chuan bawhzui pawh ka tum tawh chuang lova. Ka sawi duh zawk chu hei kuminah pawh hian list of Union Ministries & Budget Estimate for North Eastern State for 2011-2012 ah hian Ministry of Agriculture, Agriculture & Co-operation Demand No. 1 a ni a, hemiah ringawt pawh hian vaibelchhe zariat leh pasarih point pariat a awm a. Tin, Ministry of Agriculture Research & Education-ah hian vaibelchhe zathum leh pariat a awm a, Ministry of Agriculture Animal Husbandry, Dairy & Fisheries-ah hian vaibelchhe za sawmnga point sawmpali a awm a. Hei hi North Eastern-a Central Ministry-in min ruahman sak a ni a, ka han sawichhuahna chhan chu example ni ta sela, kan officer-te hian hemi kawngah hian plan budget piah lamah hian nasa zawka kan umzui loh chuan kan plan budget ringawt hian hmasawna lian tham tak tak min thlen sak thei lovin ka hria a, chu chu kan Planning Minister zahawmtakin hemi kawngah hian nasa zawkin hma min laksak sela. Department hrang hrang officer-te pawh min pull up sak sela ka duh a, kan ram hmasawn nan a pawimawhin ka hria a ka'n tarlang duh a.

Tin, a pahnihnaah chuan hei kan Chief Minister zahawmtak leh kan Finance Minister zahawmtak hnenah hian vawiinah hian lawmthu ka sawi nawn a ni. Election campaign lai kum 2008 ah kan Chief Minister zahawmtak, party president ni bawh Lungleiah a lokal a, Lunglei mipui hnenah chuan hmasawna hlamchhiah leh hmasawnnain a thlawhkhum niin an inngai thin a mipui te (DEPUTY SPEAKER : Khawngaihni lo nghak lawk the aw, khi dar 4:00 P.M. a ri a kan hun a tawp tawh a rawtna ka'n siam teh ang, kan member-ten engnge in ngaihdan. A sawi tur zawng zawng hian sawi zo phawt sela tuna chawl rih mai lovin. Tichuan kan Minister-te Demand an rawn wind-up hmain kan chawl lawk anga, kan luh leh hunah wind-up turin kan Minister-te ko zawk ila a tha kan ti em? Anih chuan i kaltlang rih phawt mai ang aw, minute 3 ila nei).

Awle, ka lawm e Pu Deputy Speaker, tichuan election campaign laiin Lunglei mipuite hlamchhiah leh hmasawnnain a thlawh khum nia a hriat thu leh a dikna chin a awm thute, chumi avanga sorkar hmasain Lunglei High Power Committee a din, amaherawhchu chu pawh chu tlema hlamchhiaha a awm thute a rawn tarlang a. Tichuan, kan sorkar leh chuan hei hi kan tiphuisui anga, kan tichak bawh anga, hnathawk theiin kan siam ang a ti a, a sawi ang ngeiin Pathian leh mipuite zarah Congress party-in kum 2008 kum tawp lamah sorkarna a lo chang ta a, chumi hnu reilote thlahnih emaw lek a liam hnuah chuan Lunglei High Power Committee chu budget hran neiin an siam ta a. Tin, finance head-te min han siam sak a, hnathawk turin Officer-te min han dah belh sak a. Tin, hei a hmingin kan Chief Minister zahawmtak amah pui tura Vice Chairman phei chu Chief Minister Office-ah office-te pawh min pe hial a ni. Tin, bul tan nan vaibelchhe 2 min pe a, tichuan, a hnu kumah 2008-2009-ah cheng vaibelchhe 6 min pe a, R.D.-ah khan nuai 25 min pek belh leh a. Tun kumah phei chuan kan hriat angin vaibelchhe 70 min pe ta a. Heng zawng zawng avang hian vawiinah hian kan rorelna sang berah hian Lunglei lam aiawhin kan Chief Minister zahawmtak leh kan Finance Minister zahawmtak hnenah hian lawmthu ka sawi nawn leh a ni.

Pu Deputy Speaker, hmanni chu kan bial chhungah pa upa deuh hlek lam tawh pakhat hian, “Engatinge Mahim, in thusawi apiang hian Chief Minister hi in tih fo le, a tul emmaw ni le?”, a ti a. Sum leh pai leh nihna min rawn pek hi chu Chief Minister anihna piah lamah kan sawi lovang a, heti zawng hian lo ngaihtuah la ka ti a. Kum 2008 December-ah sorkarna kan siam a, kum hnih leh a chanve lek emaw chhungin kan Chief Minister zahawmtak hian Lunglei hi vawi ruk min rawn tlawh tawh a ni. Tichuan kan Chief Minister hmasa zawk kha kum sawm Chief Minister anih lai khan Lungleiah vawi hnih a lo kal a. Hei ringawt avang pawh hian kan pu ber hi chu chhuang lo thei kan ni lo a ni, sawi lo thei kan ni lo a ni, ka ti a. Chu putar zahawm tak chuan sawi lova a Lim siam a ngai anih chu a ti a.

Pu Deputy Speaker, a tawp nana ka han sawi duh chu hei kihhnawh tih hi politics-ah chuan tawngkam tual leng angreng tak mai a ni a. Amaherawhchu, sawi fo te hi a nuam tawh loin ka ring a. Nimahsela, hei a lo la awm leh zel a, hei kan district-a kihhnawh pakhat chauh hi ka'n sawi leh mai mai teh ang. Hei hi kan hmaa awm a ni a, ka bial chhungah Pu Deputy Speaker, Kendra Vidhalaya School a awm a, Ramtharah sawn. Hei hi kum 2003 July thlaa din kha a ni a. Tunah hian class I atanga class X thleng an awm a, zirtirtu, thawktu 13 leh contract basis-in 4, tin, IV Grade – 4

leh zirlai 110 an awm a ni. Pu Deputy Speaker, ka han tarlan duh chu kum 2003 July thlaa din dawn khan Ministry guidelines leh sorkarin dan a siam bawhpelhin sorkarin ram a thlawnin a pe tur a ni tih kha ₹ 2194598/- in ram an lo lei a, ram zau vak lo te tak te. Tichuan, an ram leina pawisa kha a kal a kal ta a, Delhi-ah tunah chuan objection a lo awm ta a ni. Tichuan Ministry of Human Resource Development chuan he school atan hian fund pakhatmah release tawh lo turin a lo ti ta a. Chumi mai bakah chuan a school building leh a school property-te tirala lilama he school hi khar tur a ni, State sorkarin a pek loh chuan tiin thu a rawn chhuah ta hial a ni. A pawl thin khawp mai a, nuai 21 kha kihhnawk kha a lo awm reng mai a, khatiang kha thil tam tak a awm a Pu Deputy Speaker. Chuvangin, Lunglei district-te a bika kan hotuten min han thuam thatna pawh hi kawng tam takah chuan hmasawmna ai mahin kihhnawk thenfai nana kan la hmante pawh hi a ngai a ni tih hi kan hriat tlan a thain ka ring a. Hengte pawh hi kan Finance Minister zahawmtakin min chhanchhuah loh pheh chuan kan district-a Central School tha tak kan chhuan em em kha kan chan dawn ringawt a ni a. Chungte pawh chu Zoram mipui hriatah, nakin lawkah harsatnate awm se tuten emaw kan sorkar laia kan din, Congress an sorkar-a an dah chhuak leh a ti te khan an sawi takin vawiinah hian Zoram mipui hriatah ka tarlang duh a ni e, Pu Deputy Speaker, ka lawm e.

**\*Speech not corrected**

**Pu LALROBIAKA** : Pu Deputy Speaker, ka lawm e. Vawiinah demand a tam khawp mai a, sawi sen pawh a ni lovang a, amaherawhchu, mi sawi lem loh atang hian kan tan duh ve tlat a.

Demand No. 15 – GAD atang khan ka'n sawi duh a. A bikin ka sawiduh chu hmun hrang hranga Mizoram House GAD in a enkawlte hi ka sawi duh a. A bik takin hmun hrang hranga kan neih hoah hian Mizo kan nih anga kan Inpui anihna angin kan thawktute hi an tha hlawn hle a. Chung avang chuan mizo nihte pawh a nuam a. Tin, damlo han nih pheh chuan damlohna kan tawh pawhin inpui tak tak angin kan neih a ni. An tha hlawn hle a. A bik takin ka sawiduh chu nikum lamah khan Subject Committee – I, kan hotuten Chairman-a min han puh ve-na angin kan han kal ve a. Chu chu Mumbai bikah khuan kan House khu a te in a hrehawm khawp mai a. Tin, L.O. te pawh Office nena inzawm, choka nena inzawm vek deuh mai khu a ni mai a, a hrehawm khawp mai a. Kan sorkar hmasak khan hma an lo la tawh a, hmunte pawh an lo lei fel tawh a Navi, Mumbai-ah khuan. Tichuan MNF kum 10 an sorkar chhung khan he kan hmun hi ngaihtuah miah lovin an lo ti thi tih a ni. Tichuan kan han sorkar leh veleh, kan Chief Minister thianpa S.C.Jamira, Maharashtra Governor alo ni hlauh a. Chu chuan a thi tak ngial dawn e tiin chhanchhuahna tur thu a rawn rawlhruk a, Dan chiah lo pawh niin a lang a. Tiang chuan sum tam tak a vaibelchhe tel sengin kan hmun khu kan tlan let leh a ni. Chu chu he House-ah hian ka sawi duh hrim hrim a. He House hi hmun nuam tak a ni a, a bulah Kerala, Meghalaya, Assam hote khuan House an nei a, an nei tha khawp mai a. Tin, a mamawhna khu a sang khawp mai a. Mizo family tam tak mai bakah student tam tak an awm a. Chungte chuan Krismas nikhuaah leh chhiat tawh thu hlaah pawh an pan a, an inlen pui thin a ni. Chutiang chu anih avangin tunah hian pawisa tlemte sanction tawh niin ka hria a, ka hriatsual loh chuan. Hei hi chak zawka hmalak theih dan a awm lom ni ka ti a. Hei hi India awm chhungin leh India-a kan awm chhung hi chuan khulai khu kan Commercial Capital anih reng dawn avangin a pawimawhna hi a danglam thei dawn

chuang lova. Chuvang chuan tha deuha kan tih theih hi a pawimawh a ni tih ka sawiduh a.

Chutiang bawkin Bangalore-ah hmun kan nei a, Bangarapa Chief Minister a nih lai khan kan Chief Minister nen an lo inkawm ngeih a, hmun laili tha tak a pe a, chupawh chu MNF hunlai khan engmah ngaihtuah lovin an kalpui a chu pheih chu kan hlauh hlen ta a, a pawih hle a ni. Tin, Kolkattate, Shillong-ah te leh hmun hrang hranga kan house neihna hmun hi sum paia thum that a ngaih bakah engemawni te pawh hi kan pek a tha awm mang e aw ka ti a. A chhan chu entirnan, House hrang hrangah kan lo boral a, chungah chuan fund a awm silova, Mizo Welfare-te leh House-a LO te an hautak hle thin a, chuvang chuan sorkar ang zawnga kan thum that hi chu a tul hlein ka hria a ni.

Demand No. 31-naah hian han kai leh ila. Kan thalaite tui zawka an thawh theihna turin kan sorkarin ruahmanna fel tak a nei a, power tiller, tractor, mini power tiller 650 lai mai an sem chhuak a hengah hian kan thalaite pawh phurna nasa tak a pe a ni tih kan hria a, hei aia tam hi sem chhuah theih nisela chungah chuan nasa zawka hna kan thawh theih nan.

Demand No. 32-naah hian vaibelchhe 34 nuai 45 leh sing ruk sangli kan nei a, anni hi an fakawm hle a ni. Mizoram tan mi mit hmuhah min pho chhuak a, hlu ka ti a ni. An demand atang hian nasa takin hna an thawk thei ang tih ka ring a ni.

Demand No. 45-naah hian sawi tur a tam khawp mai a, Multi Modal Transport-ah hian nasa takin kan rilru leh ngaihtuahna kan lo ready a tulin ka hria a, he kawng a lo chhuah hi chuan Assam te, Tripura tein min rawn tawm tur a nih avangin rilru zau taka kan lo hmuah a ngaiin ka hria a ni. Aman pawh vaibelchhe 613.8 a ni a, 2018 a zawh tura beisei a ni a. Tin, a bik taka lawmthu ka sawi duh chu Multi Modal pawh turah khan ka bialte an tel ve a Pu Deputy Speaker, bial atangin Tuahzawlah pheihin Multi Modal Transport kawng tlangdungah, tichuan he Multi Modal kawng pawh tur hian kan hotuten ruahmanna an han neite hi a fin thlak ka ti a, keini bial pawhin nasa takin kan chhawr dawn a ni tih hi ka'n sawi duh a, lawmthu ka'n sawi bawka a ni.

Tin, a bik takin PWD-ah hian PMGSY-ah te Dampa bial ang pawh hian hnaah hian kan lang lo khawp a ni tih kha ka'n sawi duh a. Amaherawhchu tun hunah hian ngaihtuahna thar neiin nasa takin min rawn ngaihtuah ve ta a ni tih hi kan hria a, a bial ang pawhin tunah hian lawmthu ka'n sawi a. Tin, NABARD sum atangin West Phaileng to Marpara 80 Km lai mai buaipui nan ₹ 4895 lakh lai mai NABARD pawisa atanga thawh turin tunah hian a kal mek a, an thawk tluk tluk tawh a hei hi lawmawm ka'n ti a. Nasa takin helai chungchangah hian Y.M.A a ni emaw a khawtlang angte pawhin dilna te leh vui leh vainate pawh thlen a ni thin a, amaherawhchu MNF hunlai kum sawmah khan sorkar tuman an au eih zo lo a ni. Vawiiin hian min chhan chhuaktu Congress sorkar hi a ni tih hi ka'n sawi ve duh a ni. Amaherawhchu chutia kan sawi mek lai chuan ka bial chuanchungah PMGSY atanga thawh mek kan nei a chungte chu tunah hian harsatna nek nekte kan han tawka a, nininpiahte khan YMA te inpun khawmin Darlung, Sabual te leh

Bawngthah ten kawngte an sam fai a, a khuar laite an hnawh khat a. Tin, he contract works hi Pu Freddy-a Dinthar veng te leh Pu Ramchhana Ramhlun veng te thawh a ni a. Hei hi chak zawka hma lo la tur leh department-te pawh a hmalam a hma min lo lak sak turin ka'n ngen duh che u a, chutiang ang bawkin a changtu Minister, kan Chief Minister pawh min pui tur leh a tulna anga hma min lak sak turin ka'n ngen duh bawk a ni. Sawi tur tam tak a awm a, amaherawhchu kan sawi seng lo ang a.

Demand No. 39-na Power-ah khan han lut chho leh ila, a bik takin ka'n sawi duh chu RGGVY hi ka'n sawi duh a, an hnathawh hi tunah pawh hian zo tawh anga an rawn in-show hi sorkara kan hotute hian check ngun a ngai dawn riauin ka hria a. Tumkhat an hnathawh dan dinhmun hi Sub-committee-in Engineer-in-chief hovin sawi lawk lem lovin in en teh ang kan ti a, kan kal a, kan zuk en dawn tih an hriat avang khan Chawlhni pawhin an lo thawk a, a double-in hlawh an inpe a ni. Tichuan Lightning Arrestor fit ni a an in sawite pawh chu kan han enchiang a, an fit miah lova, tin, a ban nise a ro hma hmam a wire-te pawh kha an fit a ni. Khatiang angte kha a ni a, vawiinah hian sum khati zo zai lo kal si, a pawimawh teh lul nen kan ro ni thei tur hi kan tichhe mai ang tih hi a hlauhawmin ka hria a ni. Chu chu a thawktute leh a enkawltuten chiang zawk takin enpui sela a thain ka ring a.

Tin, a bik takin ka bial Parvatui khu contractor-in 2009 krismasah kan tieng hman ang an ti a, vawiin thleng hian tihen chu sawi loh a buaithlak hle a ni. He contractor-te hian sub-contractor-te hlawh an pe tha duh lova an bansan zel mai a, anmahnin an thawk thei bawk si lova. Hei hi chiang zawka en atan a tha khawpin ka hria. Sawi tur a tam khawp mai, kan sawi seng lovang a, a tawp nan, hei, thil tam tak kan hmu a. Congress a lo sorkar hnuah Power-a tam taka hmalakna kan hmu a, hmalakna zawng zawng hi sorkar hmalakna a ni mai ti ila kan sawi sual awm love. Chumi piahah chuan Pu Deputy Speaker, ZIDCO bik hi kan hotuten min rawn duhsak a, chumi hman chuan vawiinah hian Thermal Plant, 350 mw ZIDCO hian siam chhuak turin vawiinah MoU signed a ni tih kha ka'n sawi ve duh hrim hrim a, tiang chuan hma kan la mek a ni tih he House-ah hian ka'n sawi ve duh a ni e. Demand hi pass ngei atan ka rawn support e, ka lawm e.

**DEPUTY SPEAKER** : Pu T.T. Zothansanga.

**Pu T.T. ZOTHANSANGA** : Pu Deputy Speaker, ka lawm e. Hei ka bial atangin SMS ka dawng a, "Ava pui ve, i cho ve em?" a rawn ti a, a, ka cho chiah lo, ani chu, inthlan leha tla mai tawh tur a ni a, hei tun inthlanah pawh thalai deuhin kan va khing a, a tlan chhia a, tlan chhiat leh zel a tum aniang, a bial nilovah silpauline-te pawh a sem tan e, tiin ka han hrih a. Tin, amah hrim hrim hian Bangladesh te pawh a ngam ang a, ka han tih sak kha.

Vawiinah hian kan Demand, Finance chungchang kha Pu Deputy Speaker, han sawi hmasak ka duh a. Tunlai kan titinaah hian Finance chungchangah tuna sorkar kan neih lai hi han failed let der anga tawngkam a awm deuh fo mai a. Pu Deputy Speaker, i phalnain Aizawl Post, June 14-a a

rawn sawinaah kha chuan sum enkawlah Congress a hlawhchham, an indaih thei lo te an rawn ti a. Tin, a rawn sawi zelnaah chuan Pu Deputy Speaker “K-Deposit-a dah teuh hi sorkar chak lo lutuk entirna a ni, MNF Sorkar khan tihbo tha a ti a, kan sorkar tawp khan nil-ah dahin kan kalsan a, Financial Management a tha a ni” an rawn ti a.

Helaiah hian han sawi ka duh chu Pu Deputy Speaker, i remtihna MNF Party kha kum 10 zet an sorkar a, an sorkar tawp dawn lamah khan hmanhmawh deuhin hemi an thil tihthat bu hi an chhuah a ni. Chuta an thil tihthat bu an chhuahnaah chuan helaiah hian K-Deposit-a an dah kha a rawn dah thla thluah thluah mai a ni. Hei hi kan chanchinbu hrang hrangah te pawh kan hmu a, hei hetiangah hian a rawn ti thluah thluah a, ka rawn keng vek a, K-Deposit-a an dah nasat zia kha chu kan hmu a ni. Amaherawhchu anni hi an thil sawi hi prove zel anih loh chuan a diklo tarlan an hrat si a tiin zawhnaah ka’n zawt leh a. Tichuan unstarred question-a ka’n zawhnaah hian a rawn tarlang leh ta a. Unstarred question No. 48-naah hei, ka zawhnaah chuan 2004 – 2009 chhung khan kum tin year wise-in pawisa dah a awm em? tih ka zawt a. Tah chuan 2004-2005-ah khan crore 406.20 a ni a. Chuta anmahniin an rawn tih vena an bua an tihnaah chuan crore 126 angin an tarlang a ni. Tichuan 2005-2006-ah chuan crore 403.77 anih lai khan 108-ah heta anmahni-a an tihthat sakna buah hi chuan an dah a ni. Tin, 2006-2007-ah crore 275.76 anih laiin crore 15 chiaah an rawn tarlang a. Tiang chuan 2007-2008 -ah crore 312.32 a awm a, 2008-2009 ah crore 349.97 kha hemi Unstarred Question ka zawhna atang hian a lo lang ta a ni a. Chu chu anmahniin an insawinaah chuan chanchinbuah Pu Deputy Speaker, “keini chuan kan dah nil a ni” a rawn ti a. An dah nil hi a nil miah lo. 2008 a inthlan dawnah hmanhmawh deuhvin lehkhabu an siam a, khami an siamnaah khan khami kum kha an dah hman lova, nil tiin an dah ringawt a. Khalai kha a rawn chang chawi a, chanchinbu hmaah dawt an sawi a ni. Khalaita kha ka’n sawi chian hmasak duh chu a ni a.

Tin, Pu Deputy Speaker, hemi sorkar leibat hrim hrimah hian MNF 1998-a a rawn sorkar khan vaibelchhe 962 sorkarin leibat kan nei a, chu chu kum 1972 atanga 1998 chhunga tlingkhawm kum 27 chhunga tlingkhawm kha a ni. Tichuan a hnu kum 7 ah khan anni chuan vaibelchhe 1848 in an han pun belh leh ta a, tichuan vaibelchhe 2810 ah a chho leh dawrh mai a. Chu chu ka Starred Question No. 64 ah hian a rawn lang leh a ni, kha kha ka’n sawi duh a. A chhan chu helaiah, kawtkaiah tuten emaw an tih dikloh niawm tak hian thil tha engkim mai tichhuak ang mai hian an sawi an sawi a, khilamah khawchhakah te, chhimlamah te chuan an lo awi leh hman zel si a. Chuvangin sawifiahna mumal kan neih ve hi a tulin ka hria a, kan sawi a ni a. Hei ka’n sawi fiah a, sawifiah lehzel ka’n chak viau naa, kan opposition member senior ten an ngaithla peih lo aniang an chhuak daih mai, paw ka ti hle mai.

Tin, 1998 a an lal tirh khan Chaltlangah, Touridge Lodge-ah khan Chief Minister-in kan Officer rualte a ko khawm vek a, “kan Minister-te hriat loh hian cheng khat pawh in lo hmang tur a ni lo”, an ti a. Tichuan, kan Officer-te khan “E khai a nih tak chu” an ti a, Minister-in power zawng zawng a nei a, Officer-te an va dawr a, mipui riltam-in “E, keinin engmah kan ti thei lo Minister-ah kal rawh u” an ti zel a, Chief Secretary pawh khan a ti a ni. Khatiang zela kal tur khan Instruction kha an inpe a ni a. Khatihlaia kan hla duh ber pakhat chu “Hun a danglam

rorelna ni ropui” tih kha a ni. Tichuan leiba kha arawn pung ta a, leiba khatianga arawn pun chhoh takah khan anni chuan engtingne an tih ‘Central sorkar hian State duh lo chung chung hetah hian puk rawh u, tiin a nawr te pawh min nawr lui thin a ni’ an ti a ni. Chu chu vawiinah hian ka keu vek hman lovang, a bu hi ka ngah khawp mai. Tah hian arawn inziak vek , ka thil sawi hi, hetah tam deuh ka la nei bawk, amaherawhchu, hun a tawi a.

Chu chu an han sawidanah chuan keini ang special category tan chuan sum hi a dil a zuk dil chi pawh a ni lo, State leibat pawh a ni lo, Central-in lei a ba mah zawk a ni anrawn ti a. Pu Deputy Speaker, i remtihhain helai chauh hi tlemte han chhiar ka duh a, helaia arawn sawi dan chuan Mizoram Sorkarin pawisa tlakchhamna/daihlohna a nei anih chuan “taking note of this” hemi en chung hian Central Assistance Special Category pek a ni ang a ti, Central ba bu-ah a awm a ni, enge ka thin ve loh, chu chiah chu a tula ka kalna tur chu a ni, arawn ti a. Hei a zuk sawi ve naah chuan zuk sawi ve ka inhuam e, lehlamah a signed-tu ka ni a, lehlamah a signed-tu an ni ve a, ka kalna awm tak pawh a ni, a sawi awm tak pawh ka ni e, a ti a. Arawn sawi zelnaah chuan keini chuan ba bu kan ti a, keini chuan kan dil dawn lova, kan thing mai dawn a ni, an ti a ni. Chuvangin, tuna mite hian engatinge an thin ngam loh tiin arawn sawi kha a ni a.

Hei, a tam khawp mai a, an Sorkar tirh khan LPS-in interview an neih pui a, December ni 8 ah khan, “Congress Party khan chaw bel ruak min hnutchhiah” te a ti a. Tin, “Mizoram sum leh pai hian hliampui a lo tuar nasa tawh em a, major operation a ngai hial a ni” te a ti a. Khatiang khan thu awi awm leh thu ngaihnaawm, Mizoram-ah hian a aia ngaihthlak nuam hi a awm leh tawh lo ang e tih tur kha a sawi chiam mai a ni. Khang kha kan hun tawng a ni a.

Tin, tunah hian Mizoram Sorkarin sum harsatna dik chiah chuan kan tawh tho a, hei hi chu kan zep lo. Hetah kan Starred Question No. 50 na-ah bawk khan karawn zawt a, khata karawn zawhna-ah khan Pu Deputy Speaker, i remtihhain hei hi nimina kan semah khan 6<sup>th</sup> Pay kan neih avanga Sorkarin sum kan sen belh tur hi vaibelchhe 181 nuai 23 sangkhat zanga sawmli pahnih a ni a. Tin, pension-ten an lak belh tur chu vaibelchhe 45 nuai 68 singli sangsarih zaruk sawmruk pariat kha a ni dawrh mai a. Chuvang chuan, hetiang em em mai kan han tihbelh takah chuan sum harsatna hi chu tawh lo thei kan nilo a ni.

Chutih lai karah School 337 kan han upgrade a, chutah chuan vaibelchhe 16 chuang kha kan han chawibelh leh bawk si a. Chuvang chuan, hetiang dinhmuna ding chung hi chuan anmahni pawh khan tise an dam miah lo ang. An peace bonus ai pawh khan a tam a ni. Kha kha additional-a kan sen bat tur ringawt pawh hi arawn lang a ni a, kha kha mipuiten min lo hriatsak se ka duh khawp mai.

Hun a tlem angreng si a, Power-ah ka’n chuk leh lawk ang e. Pu Deputy Speaker, Starred Question No. 52-ah khan Sorkar hmasain term 2 chhunga Power a semchhuah kha engzatnge ni ti khan ka’n zawt a. Amaherawhchu, 32.47 ang khan anrawn ti a, ka zawhna kha min chhan thelh tlat mai a. Sorkar hmasa tawh zawng zawngin an siam tawh ang khan minrawn chhang a, Sorkar hmasa term 2 chhung kum 10 chhunga an siam chhuahte kha nakinah minrawn sawifiah sak theih chuan ka lawm ngawt ang.

Tin, ka Starred Question NO. 167-naah khan kawlpheha 6% kha a riral thin em ni tih kha ka zawt a. Chutah chuan a dik em tih kha ka zawt a, diklo tiin zawhna chhanna ka hmu a ni. Pu Deputy Speaker, i remtihnain Vanglaini July ni 1 a a rawn tihna hi Mizoram kawlpheha 6% vel a riral thin tih kha a rawn chhuak a, a tax-ah erawh chuan 60% a ni a rawn ti a ni. Helaiah hian Advisory Committee JERC for Manipur and Mizoram hnuaiyah khami tena an meeting-na hnuaiya an tih kha a ni a, June 29 khan I & PR Conference Hall-ah an Meeting a, chutah chuan transmission and distribution-ah hian 47% vel hi a riral thin a. Tin, commercial loss-ah hian engemawzat nen, tichuan, 60% vel hi a riral thin a ni tih chanchinbuin a rawn chhuah a ni. Chuvangin, hmannah kan Member zahawmtak Pu Nirupam Chakma in a rawn sawi hei Unstarred Question 10-naah khan a rawn sawi a, kawlpheha chungchangah khan 2008-2009 a kan zuk neihna te a rawn tarlang diat diat a, 2009-2010, 2010-2011 kan leina sum hi a tam tulh tulh a, a revenue hi a tlem tulh tulh lai hi keipawn ka hrethiam theilo a ni. Helaiah hian thil engemaw a awmin ka ring tlat mai a. Kan hotute khan lo chhui chiang se thain ka ring a, kan sen a tam tial tial a, kan tihchhuah, kan revenue a tlem tulh tulh lai si kha chu endik deuh chu a ngai a ni. "Something is rotten in the State of Denmark" tih ang deuh hlek khan engemaw chu a awm a ni lo maw kha kha tlemin kan hotute khan min lo en se a tha awm e.

A revenue lama kan chak loh hian a buaithlak thin, tunah pawh a dik chiah chuan sawi ila, Champhai angah te chuan kan current a chhia ti ila, va report ila, a kal dik lo anih chuan i vannei anih chu te an ti mai mai, khatiang tur a ni lo, metre check ang chi te pawh tlema uluk lehzuah a ngaiin ka hria a. Tin, thil tam tak hi a awm baw a, kan fimkhur lehzuah deuh chu a ngaiin ka hria.

Pu Deputy Speaker, vawikhat mah ka la dil belhlo che a, chubakah kan District a kan Minister hote hi vawikhatmah an tawng ngai silova, Pu Chate-a ang deuh hlek khan an sawi ai kan dil belh deuh a ni. Agriculture chungchangah hian NLUP kan han ti a, hei hi 2011-2012 ah hian NLUP ah nuai 21900 kan han sem dawn a ni a, hei hi a ropui ka ti hle a, lehlam atang hian an rawn sawisel an rawn sawisel a, a sawisel tuten an sawisel laia an dinhmun hi kan sawi ve lawk teh ang. Mizoram Intodelh Project-ah khan crore 51.8 an tinzawn a, tichuan development-ah 77.5 % development atan an ti a. Administration-ah 22.5 % an ti a, tichuan chhungkaw tin kha sing 50,000/- pek an tum a ni. Tichuan anni pawh khan, hetianga vawikhata pek huk loh kha an lo duh ve tho mai, a vawikhat naah 15% 7500 i pe ang an ti a, vawihnihnaah 30% vawithumnaah 30% , vawili naah 25% tichuan a vaiin 50,000/- an dawng tur a ni an ti a. Christmas dawnah bazaar-na tlem an pe a, a bakah khan a kum lehah ₹ 3000 an pe a, an reh ta vang vang mai a ni. Chuvang chuan NLUP hi chu sawichhe tur chu an ni chiahlo, "E khai kan theihloh anti anih hi, an tihsual palh a awm anih chuan i chang tawp mai ang" ti tur an ni. Tin, Pu Deputy Speaker, Agriculture-a kan hmasawna hi ropui ka ti khawp mai a, hei tunah hian Tractor 55 an sem tawh a, Power Tiller 513, Mini Power Tiller kha 46 an sem tawh baw a. Tin, tunah hian sem leh tura ruahman mek hi Tractor 200 leh Mini Power Tiller hi 50 a ni leh a, hetianga Agriculture-a kan hotuten thingtlang mi an ngaihsakna hi zoram khawvel hi Zoram hian a la dai ngailo hrim hrim. Chuvangin a ropui ka ti a, kha kha ka sawi duh a ni a.

Tin, tlem han sawi tel leh hram ka biala ka luh hmian. Kan hotute nen kan sawiho thei tho nachungin hei Fisheries-ah District Office min rawn pe a, kan



lawm khawp a, hei Fisheries-ah engemaw thil tam tak kan han hria a, kan han chhui kan han chhui a, Champai lamah khian a prone area kan ni ve a, kan hotu kal hmasa te kan demna ni chuang miah lovin kan hun kalta khan khawthlang lamah hian a lo invalh zau nasa a, “khawchhak lam pawh tlemin min han hawi ve teh u” kan ti a ni. Khawchhak sangha khi a thang duh vaklo va, a tui erawhchu a tui khawp mai, Aizawl ami Kg a 120/- an lei ngam alh alh lai hian khawchhak thar khi chu 250/- in an lei zat zat ngam a ni. Chuvangin khawchhak lam kha rawn hawi ve hram ula, khawchhak tharchhuah tui zia pawh kha lo hre ve hram teh u ka'n ti a ni.

Tin, Pu Deputy Speaker, Winery bawh hi kan ngaipawimawh khawchhakah chuan. Quintal 9000 kan tharah 2000 lek kan her theih pawhin kan hlawk a ni. Chuvangin, khilai khi kan hotuten mut mawh hnarmawhah min rawn neihpui ve hram teh u, tiin ka ngaihtuahnaah a awm a, chu chu min lo hrethiam hram turin ka'n duh a. Chutih ruala ka sawi duh chu nikum khan Mizoramah harsatna nasa tak kan tawh a, natural calamities-te kan han ti a. Horticulture Department atanga nikum chhunga pakhatmah sem han awm ta lo kha enfiah deuh chu a tha awm mang e ka ti a, ka ha hawlh zawng deuh hlek a ni a, ka'n sawi a ni. Horticulture chungchangah phei hi chuan Pu Deputy Speaker, han sawi tur hi ka'n ngah khawp mai a, han sawi sen pawh a ni bik chuang lova. Kan term hmasa khan kan hotupa ber khan a tui nasa a, “Hei vang hian lak pawh ka rawn la chat a ni” te kha a ti a. Hei, a thusawi phei chu helaiah hian a rawn awm a.

Mark Antony-an Caesar-a ruang chungah thu a sawi a. Khawvel thusawi tha ber a ni an tih kha hei hian a khumin ka hria. A thusawi hi a copy in duh chuan kan lo la siam ang e. A ngaihnawm lutuk a, ngaihnawm tak a ni. Minute khat vel a ni ang. ‘Horticulture ka lak chatna pawh a ni a’ han tih te, ‘Blue gold of Mizoram’ a'n tih te, ‘Mizoram chu rangkachak dumpawl a ni’, helaia a rawn sawinaah phei chuan, “Sapthei pumthum cheng khat, pum hnih cheng 1-ah hralh thei ta ila sorkar hnathawh hi tam takin an bansan nghal ang a, a hlawk dawn lutuk a ni. Rei lo teah farm-ah Gypsy tharin in tleng lut ang a. Agriculture link-road laih kan uar dawn si a. Chuvangin, thlam chhawng nalh tak tak, in in aia tha thain in sa theuh ang a, in cheng tam zawng ang.” Tah phei hi chuan hma a hruai a ni, Aii pukah. A ngaihnawm khawp mai a hei hi chu. In duh chuan a copy pawh ka lo la siam ang che u.

Vawiinah hian kan hotute Demand hi a vaiin kan sawi thei lova. Keini erawh hi chu kan vannei a, kan hotute engtik lai pawha inhmu reng kan nih avang hian bial chhung ka ngaihpawimawh tam tak kha ka sawi ta lova. Ka'n sawi leh duh pakhat chauh chu Champai leh Khawbung inkar vaibelchhe 160 zet maia siamthat nan ruahmanna a lo awm ta kha a lawmawm ka ti a. Tunah khilai kawng tha tak mai kan han nei tur khi lawmawm ka ti a. Hetianga Congress-in kan han chei dawn takah chuan a bialtupa pawh a tlanche ru sa deuh hlek a, kha kha ka'n sawi tel hram a nih chu. Ka lawm e.

**DEPUTY SPEAKER** : I khinthlakte chu keini tan an huphurhawm tehluul nen lo khingthla awm tak pawh i ni e, ti rawh. Khai le, Pu Selthuama.

**Pu R. SELTHUAMA** : Pu Deputy Speaker, ka lawm e. Khatiang em em chuan ka sawi rei ve lovang. A hmasa berin Demand No. 45-na PWD. PWD lamin an hmalakna tur an ziak hi ka'n chhiar a, a lawmawm hle a. Hemi ka'n chhiar atang hi chuan Pastor Chhawna inlarna kha a dik dawnin ka hre nghal a. A inlarnaah khan, "Mizoram chu dung leh vang, chhim leh hmar zawngin kawng a khat chuk a. Tin, chhak leh thlang zawng pawhin chi tha khelhna ang maiin a inpawh chuk e" tih kha a sawi a ni. Chu chu tuna kan hotuten an tum hmang atang hian a lang sa nghal mai a. Mahse, hetiang ang hi chu kan term te hi a rei tawh lo si a, kum hnih leh a chanve emaw chauh kan nei tawh si a, kan ti hman dawn em ni ang aw tih ka ngaihtuah a. Chutihlai chuan, Lallianpuia khan, kan MLA zahawmtak Pu Lalrinmawia te khua hi a ni a. Chu chuan, "Pastor Chhawna inlarna hi a hrilfhiaha min pe a" tiin a sawi a. Ani hrilfhiaha dan chuan tuna Congress hi term 4 a zawnin in lal dawn a ti a ni. Kum 20 kan lal dawn chuan kan pute hian heng zawng zawng hi an ti zo vek hman dawnin ka hria. Chuvang chuan, kan thawh tur hi chu a buru dawn mange aw! He Sorkar hian kum 20 term a hman zawh chuan Pastor Chhawna inlarna hi a va lo dik em kan ti chauh dawn niin ka hria. Chu laiah chuan ka zuk sawi duh chu World Bank Aided road tih Aizawl atanga Thenzawl through-a Lunglei kawng han siamte hi a ropui a, kan Congress Sorkar hmasak khan a bul an lo tan a, chutah MNF in an chhunzawm a keini hunah zawh fel a ni ta a.

Tin, a bik taka ka sawi duh chu Sairang atanga Mamit kaltlanga Tripura kal pawhna tur kawng hi km 130 vel a ni a, crore 624 vel senga kum thum vel leka zawh tur, hei hi double lane-a siam tur a ni a, heta an han sawi danah hi chuan chutianga kan siam zawh theih chuan kawng chhuk chho leh a kawu zualte tan a ni ang a, chumi kan tih zawh theih chuan Aizawl atanga Mamit pawh hi darkar 1½ velah a thlen theih ang tih a ni. 1980 kumah khan Mamitah ka awm a, October thlaah ka chhuk thla a, 1981, 82, 83 thleng khan Tut atang khuan kawng a chhe khawp a, fur lai chuan darkar 3 kan kal thin a ni, Mamit thleng turin. Chutianga khawpa kawng chhia kha tunah he kawng hi an peih a, Aizawl atanga darkar 1½ a kan thlen theih dawn chuan khang hunlaite han ngaihtuah chuan thlawhtheihnain kan kal hi a ni ringawt mai dawn a, a lawmawmin ka hria.

Tin, chubakah chuan Pu Piana te hian, 'ka bial lam, ka bial lam' an ti ve fo mai a. Chuvang chuan a bial lam pawh khitah Manipur tlawhna tur Darlawn lam kawngte khi double lane bawkin an han sial ang a, khilam kal kawu lova a hnai lam Muthi kawng an rawn zawng anih phei chuan Pu Piana hi chu Aizawlah hian a riak duh meuhin ka ring lo. Zan tin hian a haw chho tawh mai dawn a ni. Chutianga khawpa ruahmanna tha an han siamte hi han en hian a lawmawm ka ti a. Amaherawhchu, chutih chhung chuan Aizawl khawpuiah pawh hian chei ve ngai deuh lai hi kan awm a ni tih ka sawi duh a. Ka bial Mission Vengthlangah sawn kawng an lai tha tawh a. Tunah sawn kawng laih bulah sawn SAI hovin hostel an siam bawk a, km 1 leh tlem a nia. Chu chu metal road atan hian a itawm khawp mai a, Mission Vengthlang kan hotute pawhin kan Chief Minister zahawmtak hi an va hmu a, ani pawhin, 'hei hi ka lo tiam tawh a, lo tihsak rawh u', tiin a ziak tawh nghe nghe a. Chu chu hmanni lawkah pawh khan kan Parliamentary Secretary zahawm tak Pu Patea hian a hmunah min rawn ensak tawh bawk a. Chungte chu tun kumtharah hian min rawn tihsak ngei turah ka ngai a, chuvang chuan lawmthu hi ka'n hrilh

lawk duh a ni. Keimahni a veng chhung bak maiah khan SAI hostel naupangten an chhawr dawn a, chu chu a pawimawh em em a ni, thalai tan a pawimawh lehzuol a. Chutiang deuh bawk chuan keini bial Lawipuah khuan km ½ ai chuan a thui deuh ang meter 700 vel a niang, kawngpui atanga Primary School, Lawipu tak tak khaw chhung luh theihna khu metal road atan a itawm khawp mai, a proposal-te kan siam bawk a, chungte chu min han tihsak thei nghal bawk sela.

Tin, chumi rual chuan keini veng Nursery atanga Bungkawn High School panna saw meter 600 bawr vel chauh a ni a, saw saw la metal loh a ni a, Khatla South atangin metal road-ah lokal a Nursery Veng-ah, Khatla South nena kan inrinaah step a awm thla a, a step lehlam chin chiah kha an metal a, lehlam atang khan a tawp hmak mai a ni, Nursery chinah khan. Chulai te chu a tam lo bawk a, min han tihsak sela chuan keini bial lam chu kan phur khawpin ka ring a, kawng tha hetiang ang kan han neih bakah a bial chhung lam mamawh kha ka han sawi tel ve duh a ni.

Tin, chumi rual chuan Maubawk atanga Bungkawn Vengthar panna saw kawng lun deuh tak a ni tawh a. Amaherawh chu kawng saw a zim em em a, tlem tlem laih zau theih lai a awm a. Saw saw proposal pawh kan theh lut tawh a. Chungte chu min han tihsak thei ta sela, pawisa tam vak pawh a ngaiin ka ring lo a, churang chuan sawng ang te saw min tihsak theih chuan bial dangin hmasawna crore 600/700 vel senga an neih turte pawh hi kan awt bik lovang, kan lawmpui lehzuol ang tih hi ka'n sawi tel duh bawk a ni. Tichuan ka'n kal zung loh chuan hun a tlem si a.

Power han sawi leh ta ila. Power-ah hian ka'n chhut mai mai a kan hotuten an han ruahman mek, tuna survey and investigation an zawh tawh te, tin, project identified-a an propose for investigation an tih ang zawng zawng heng ang hi kan enchhuak a. Heng ang zawng zawng hi zo ta sela chuan an siam zawh huna kum 20 kan lal dawn chuan khami chhung khan kan siam zo vek hman turah ka'n ngai a. Chutianga an siam zo vek a nih dawn chuan za a 12 ringawt pawh kha a thlawna kan nei dawn a nih chuan mega watt 318 hi a thlawnin kan nei thei dawn a ni. Chuti anih chuan kan chan tur pangngaite nena hralhin han hralh ta ila chuan keini Mizoram hi chu eng a kan intodelh mai bak niloin sumdawna revenue tha deuh mai kan nei dawn a ni reng mai a. Hei i veilama thute hian Mombati leh congress hi inhmech riauin min hria a, heng hi kan han zawh hunah chuan chhun leh congress sorkar hi an hmechbel tawh ang, ni eng nen. A chhan chu congress sorkarah chuan thim a awm tawh lo ang a, a eng reng tawh dawn a ni. Hemi atanga kan hotupa hmalakna a ropui zia hi hmannah member zahawmtak Pu Lalrinawma'n House-ah Resolution a rawn pulut a, hei hi a zahawm a, fak tlak a ni a, chawimawi tlak a ni. Heng ang zawng zawng hi, tuna ruahmanna ang zawng zawng hi a puitlin hunah ngat chuan Mizoram hi India ramah phei chuan a intodelh berte zing ami kan ni thei dawn a ni. Chung avang chuan lawmthu hi sawi ngei ngei tur a ni. A hun a rei lova, kum 2 leh a chanve chhung lek pawhin hetiang hian hma an la chak a ni a, churang chuan term 2 a han ral meuh chuan kan thawk tam em em ang tih ka ring a. Pu Deputy Speaker, minute 5 ami ka la neih? (DEPUTY SPEAKER : Ni lo minute 2). Chuti chu Pu T.T.

Zothansanga sawi ang deuh khan sawi ve a va ngai mai awm ve. Mahse chutiang em chuan ka sawi lo ang e.

Awle, ka sawi teuh lo mai ang a, hun ren nan. Agriculture-ah ka'n lut lawk ang a. Agriculture-ah khan nichinah khan i veilama thute khan buh thar tam kumah an puan pawhin engmah kan ang chuang lo ang e, tih vel khan an han sawi hlawm a, mahse kha kha.....(Interruption).....

**Pu LALDUHOMA** : Pu Deputy Speaker, "I veilam a mite" hi an ti reng mai a, i veilam chuan tuna member zahawmtak pawh hi a huam tel ve tho a, Dawrpui pheite pawh saw a huam tel vek a, min pheik beih leh vak mai thin a, tih bik an nei anih chuan sawi chiang ngam mai rawh se.

**Pu R. SELTHUAMA** : Mahse i veilama thu zawng zawngin ti chuan ka sawi lo chu a ni a, chuang chuan a sawitu kha chu an awm a ni. Chuang chuan alo inngaihbelu kha chu a ni mai tiin sawi ila a dik mai awm e. Khangte kha kei chuan kan hlawhtlin ngei ngei ka ring a, engvangin nge kan hlawhtlin ang kan tih chuan, nichina an sawi tawh ang khan Power tiller te, Tractor te, subsidy-in engemaw zat pek chhuah an ni a, zanga bawr vel zet pek chhuah an ni a. Khang hmanga lei leh kha hman anih phawt chuan engvangin nge maw kan thar tam loh vang le! Tunhma mihringin kut ringawt te, Bawng te a an leh thin, khawlin tractor-te a an leh tawh chuan eng vangin nge a thar tam loh vang? Chuangin kan Minister zahawmtakin buh thar tam kum a puang kha kan thar tam ngei ngei ang tih kha kan beisei tlat a ni.

Tin, chu lovah chuan NLUP chungchangah nichin khan an sawi a, a tha an ti a, MNF unaute pawhin, chuang chuan Congress sorkar hmasain NLUP an tih kha entawnin MIP an ti a. Congress-in cheng singthum an pek theih chuan keini chuan singnga kan pe ang an ti a ni. Ruahmanna pawh tha deuhin an siam a, mahse a tak takin an tui ve lova, chuang chuan installment li a pek tur an tih pawh installment khatah an pe a, singnga pek turah sang thum te, sang li te an pe a, abak kha chu an chawhlan vang vang mai a ni. Anmahni tih ang khan emaw kan tih ve dawn an ti a, a ni si lova. Kan tihlawhtling dawn tih an han hriat hian sawisel ringawt an tum a, chuang chuan, 'nuai khatin kan pe ang an ti si a, singhnih chauh ten an pe si a', te an ti a. A ni reng ang chu nuai khat hi vawikhatah kan pe ang kan ti lova, instalment-in kan pe ang kan ti tlat a. First Instalment-ah singhnih kan pe a, an nin sangngate sangthumte an pek lain keinin singhnih kan pe a. Hei a bik takin agriculture hian pawisa pawh an nei tam a, beneficiaries sangruk leh pali an nei a. Chumi atan chuan kumkhatna leh kumhnihna pawisa tur hi an nei sa vek a ni. Chuang chuan first instalment leh second instalment an pe thei a, tunah hian verification-te an ti ang a, an tihthat phei chuan 3<sup>rd</sup> and 4<sup>th</sup> instalment an pe thei nghal a ni. Chuang chuan NLUP pawh hi a hlawhtling dawn, a bik takin a enkawltu Agriculture department-a thawktute an fel a, harsatna pawh an nei lo. Tin, chutiang bawk chuan department danga enkawltu, a bik takin Soil te, Forest ho te, Fishery hote an ti tha, chuang chuan kan hlawhtling ang tih hi ka beisei tlat a ni. Ka lawm e, Pu Deputy Speaker.

**DEPUTY SPEAKER** : Le, tunge han sawi leh tur le, Pu Lalrinmawia Ralte.

**Pu LALRINMAWIA RALTE** : Pu Deputy Speaker, ka lawm e. Demand No 31 Agriculture, 32 Horticulture, Demand no 33, Soil and Water Coservation, Demand No 35, Fisheries leh Demand No. 47 Minor Irrigation Department-te chungchangah hian ka han sawi duh chu, heng department enkawltute kan Minister zahawmtakte hianin Mizoramah hian heng department-a hlawhtlinna tak tak kan neih dawn chuan, neih kan tum anih chuan, Mamit bial lamte, Kolosib bial lamte, tin, a bik takin Hachhek bialah te luh nat a ngai a ni tih hi an hre chiang em em mai a, an rawn lut na tan a, a zar kan zo mek a, kan la zo zel dawnin kan hria a, lawmthu ka sawi duh a. Mamawh tamtak kan nei a, an hria a, chung chu min rawn tihsak zela, tunah pawh Mamitah Pu Deputy Speaker, nangma bial chhung ngeiah kan district headquarters-ah session zawh reiloteah Horticulture sub-division thar hawn a ni dawn tihte kan hria a, 5<sup>th</sup> August-ah, lawmthu ka sawi duh a ni.

Demand No. 45-na Public Works chungchangah lawmthu deuh hlek ka'n sawi duh a. A chhe lai chu tunah pawh a awm a, amaherawhchu kan hria a, kan hotuten kan sorkar tirh phat atangin kan bialah PMGSY kawng pui pawimawh tak, thui tawk tak min laih sak a, zawh a ni tep tawh a. Tin, Mizoram tlangdung thlang ber kan ni a. Assam Karimganj district-a Medili khua leh Tuilutkawn inkar 90 km chuang lai khu Intermediate lane turin PWD lama kan hotuten theihtawp an chhuah a, NEC ah te zuk bawhzuiin DPR pawh phuisui tak thehluh a ni tawh a. Sanction thuai theih anih kan beisei a, kan lawm hle a ni.

Demand No. 39 Power chungchangah hian tlem han sawi thui deuh hlek ka duh a, hei kan inhnial fiam a, kan inhnial tak takte pawhin ka hre thin a. Mizote hian thil ngaih ngheh tlat hi kan ching khawp mai. A ni tak em tih finfiah lam erawh chu kan ching lemlo a ni. Entirnan mai mai, Aizawl aiin Silchar hi khaw lian zawk nia ngai tlat hi a tam zawk kan la niin ka hria. 2001 census kan en chuan Silchar-ah mihring 140000 vel an awm laiin Aizawl ah nuai 2 sing 2 leh tih an awm a, min zat lohna ringawt pawh sing 8 a ni a. Tunah pawh provisional figure pawh internet-ah te han en ulangin a chiang khawp mai.

Tunah pawh an thang hle an ti chungin Aizawl hi a tiat lo nasa dawn Silchar hian; Census 2011 figure hi lo chhuak se. Mahse Mizoram mipui ai maha tam awmna khua niin kan hre laklawh tlat mai a ni. Chutiang deuh hlek chuan kan hriat ngheh tlat hi a awm thin avangin phet a har viau a, ni emaw kan ti tak tak fo thin a ni. Chutiang avang chuan inchhuanna tlak lem lo a inchhuante leh han tan viaute pawh hi kan ching a ni. Kan khuaah ka sum a lian ber tia hlim ve em em rikngawt maite pawh hi a awm thei a ni. Mahse, "I vawk kan rawn lei dawn; sum engzat nge han sum chhin teh", tih chuan a chhuan tlak lem loh a ni sum lian ber nih rikngawt kha.

Power lama Mizote thangharh tirtu nia inhriatte pawh hi power lama Mizote tana nasa taka hna thawk a, Hydel Project-te tipuitlingtu nih chuan si loh chuan awmzia a awm lova, a tithangharhtu tak tak nih loh phei chuan awmzia a awmlo lehzualin ka ringa. Inchuh vak chi a ni em aw? Ka chhut ve danah chuan power lama Mizote tithangharhtu pawh ka ti chuang lova, a tak taka hmala hmasa bertu chu hmannah khan Pu Deputy Speaker, kan sawilang tawh a. 1952 Mizo District Council hmasa ber khan, kum khata upa pawh a tlin hma in 1952, December thlaah Union Home Minister, Dr Kailas Nath Katju alo kal a, Aizawlah. Chumi hnenah chuan memorandum an lo thehluh a, chu an memorandum-ah chuan, "Aizawlah hian tui kan hnianghnar ta lo (khatih lai khan Aizawl khawpuiah mihring

sangruk leh tih chauh an awm) tui hi kan mamawh khawp mai, cheng nuai 6 chuan a daih kan ring a, chu ai maha kan mamawh chu Hydro Power Plant hi a ni. Tuizem siamna tur ang zat hi chuan a daih tho ang”, an ti a ni. Cheng nuai ruk khan Hydel Project siam theih an in ring a, an lo dil a ni. Chutih laia District Council hmasa ber hruaitute kha sorkara mi pawimawh tak takte kha kan chhut duh chuan a hnu kum 20 vel lo kalah chuan Congress Party hruaitu pawimawh ber berte kha an ni. Entirnan : Pu Ch. Saprawnga te.

Chuvangin, Congress Party leh Power hian inkungkaihna nghet deuh mai kan lo nei niin ka hria a. Hmanniah ZNP Group Leader zahawmtak Pu Lalduhoma'n a sawi ang khan, “Nau chu a paitu ngeiin hrin tur a ni”, a tih ang deuh khan Power lam thil pawh hi midang hian han buaipui tehchiam thin mahse, a paitu congress nge nge hian a hrin a ngai leh thin a ni tih hi a chiangin ka hria a. MNF Party Election Manifesto-te, Policy and Programme 2<sup>nd</sup> Edition 1991 tih atangin 1989 election, 1993 election manifesto part 5 no. 6 1998 MNF, MPC joint election manifesto part IX phek ngana, tin, 2003 MNF manifesto pary IX phek 3-naah te khan Power lama intodelh mai ni lovin, “hralh chhuah tham neih tumin kan bei ang”, tih vek a ni.

Mahse, thil tha an duh lo pawh a ni lova, theitawp an chhuah lo pawh a ni lo ka'n ti ang e. Amaherawhchu, member zahawmtak Pu Duha sawi ang khan a paitu an ni lova, an hring thei lo a niang ka ti ta a ni. Chuvangin, hei kan House Leader zahawmtak hi ngaihnaawm taka han sawi hi chuti lutukin a thiam lo nge, pa lo a ti nge ka hre lo a. Mahse, lawmawm ka tih em em chu thil dik deuh deuh hi a sawi thin hi a ni. Khatih lai khan Central sorkarin Hydel Project lian hi an ti vak lo a ni a ti thin a. Tin, Bairabi Hydel Project pawh kha survey investigation thla riat leka an zo kha a rei lo lutuk a ni a ti a, Pu Deputy Speaker, hei hi... Mizoram Today hlui ka lo la kawh that a ni a, hetah hian Volume V issue I a ni a, “Mizoram : the turning point”; Bairabi Hydro Electric Project chungchang tih te, khatih laia kan Chief Minister zahawmtak thusawi te, a rawn hawngtu Shri A.B.A. Ghani Khan Chowdhury thusawi zawng zawngte a lang vek a. Khata a hawng kan tih kha mipui hian tuikhuahna tur peih fel tawh hawngah kan ngai tlat mai a ni, investigation an ti dawn a, khuah tlak a ni dawn em? tih survey operation kha a rawn hawng a ni. A pui angreng khawp mai a. Tunah chuan tuma'n an hawng duh tawh lova, tin, hmanna a kan ngaihthlak tak ang khan Union Minister-in, Power Minister-in a rawn hawng hrim hrim kha chu an thil tih theih dan kha chu mak ve angreng deuh chu a ni.

Tunah hi chuan kan hriat mang loh hian Megawatt 500 chuang pe turte pawh kha investigation hi kan mithiamte leh khulam mithiamte'n an lo ti a. Ti hian, DPR an peih ta te kan lo ti a, kan hre lo a ni. Hetih lai pawh hian, January ni 7, 1982-ah khan Union Minister for Energy khan a rawn hawng a, investigation bul an tan ta a ni. Heta hemi Sorkar Official Organ, Mizoram Today-a a lan danah hian chiang em em mai chu, Pu Deputy Speaker, i phalnain, ‘The investigation stage is expected to be completed within a year, the minimum possible time’, tih a ni. Kumkhat chhunga zawh theih beisei a ni a. Hei hi a hun rei lo thei ang ber a ni. Mahse thla 8 ah an zo a, a phuailuai ta viau a. Chuvangin tihthat a ngai a, tih kan House leader, kan Chief Minister zahawmtakin a sawi thin hi hei hian a finfiah chiangin ka hria. Tin, Union Power Minister, A.B.A Ghani Khan Choudhury-in a thusawiah hian Chief Minister hnena ngenna a siam nual bakah a thusawi zatve hma

lamah daih hian, thil sawi pakhat a neih chu, Pu Deputy Speaker, a fiah leh zualna atan chhiar ta ila; ngeiawmah tuman lo ngai lo se ka duh a. A hrethiam vek ngaithlatute an nih ka rin avangin i phalnain ka'n chhiar ang chu, "I have another request to make to you, Mr. Chief Minister, the Prime Minister is of the opinion that we should not only go for a big Hydro Project but also for Mini Hydro Projects in a big way. Why not go for 1 megawatt, 2 megawatt, 3 megawatt Hydro Projects in the various parts of your state?", a ti kalh a ni. A lian buaipui lo hian a te hi tam tak buaipui zawk tur alawm mawle. Hei hi Prime Minister duh dan chu a ni. Megawatt 1 te, megawatt 2 te, megawatt 3 te hi in state hmun hrang hrangah engatinge in buaipui zawk loh? a ti a nih hi. Hei hian khatih laia India Sorkar rilru a tichiang a ni. China-ah te pawh kan hria a, tunah khawvel Hydrel Project lian ber ber Brazila Itaipu an tihte leh China-a Three Gorges Damte a lian em em a, kan sawi thin a. Mahse khitiang khi an chin dan a ni reng lo. Hmun hrang hrangah Hydrel Project te reuh te te, ti hian environment a tihchhiat dan a nep a, entirnan India ramah pawh clearance pek chhung a rei lova, transmission leh distribution loss a tlem a, zawh hun chhung a rei lova tiin China pawhin nasa taka an tih hun lai a awm a. India pawhin nasa taka kan tih lai hun a awm a, chu chu kan sawi thin hi a ni a. A lian tih nachang hre lo lam ni lovin Central-in a duh dan policy mila heng hi tih a ni.

Tin, Pu Deputy Speaker, ka'n sawibelh duh chu, Power kan chawh luh hi P&E department hotute hnenah hian a duh chuan zawt se an hre thei vek, a kum tel hian a tam chho zel a ni. Amaherawhchu engatinge kan indaih loh kan tih chuan mipui lamin power kan mamawhna hi a kum telin a sang ve zel. Chubakah India ram pumah hian (power lama kan hotuten min hrilh danah chuan) India ramah hian power semchhuahna kalkawngah hian tiin sawi mai ang, transmission leh distribution-ah hian za zela 22 vel hi chu a bo thlau a ni an tih laiin Mizoramah hi chuan, nichinah member zahawmtakin a rawn sawi danah phei kha chuan za a 47, Statistical Handbook, 2010 a kan hmuh dan chuan za a 41, nikum kum kaltaah khan; Transmission leh Distribution-a kan hloh zat hi India ram chawhrual let ai mah hian a sang hi a zahthlak hle a ni. P&E Department-a thawktute hi an hah hlein ka hria. Keini pawh thingtlang mite kan ni a, hei current pawh kan nei leh ta lo, an ti a, hma han la teh tih tur kan hre lova. Power lama kan hotute hi kan han be ve leh ringawt thin a. Zan reiah te pawh chu chu a ni. Tin, thawktute ngei ngei pawh mipuite mangang vangin a zan a zanin an equipment-te nen an tlan chhuah hi a tam em em a ni. Theihtawp hi an chhuahvein ka hria a ni. Nichina kan sawi tak ang khan engatinge a revenue collection hi a tlakhniam tihte pawh kha thlir dan dangin kan thlir pawh a thain ka hria. Power renchem chungchangah hian nasa taka inzirtirna hi a tul a ni tih hi a Chiang a ni. Nasa taka kan inzirtir hi a tul a ni Pu Deputy Speaker. Light hman miah loh light on chingte, light chhuna tihen chingte hi ram leh hnam hmangaitute a ni lo tih hi chhungtin ten an hriat pawh thain ka hria a. Mimal tinin Power renchem dan kan inzir hian kan ram tan a tha a ni tih hi kan hriat a tha a.

Power pawhruk hi a tam niin ka hria a, thuthangah chuan a thawktu hnenah ₹ 500/- pein chutiang ang chuan thil tamtak hi a awm niin hriat a ni a, chu chu kan solve lo anih chuan an mahni leh an mahni hi an in enchian hle a tul a ni awm mange aw tih hi ka ngaihtuahnaah a awm a ni. Street light-te pawh hi khawthim hmian a eng vek ni awmte pawhin ka hria a. Heng ang te te pawh hi control-na hmun pakhat atangin a control vek theih a, chu chu ngaihtuah Chiang ila, a en hunte pawh hi kan hriatthiam a tul a ni. Chuvangin India ram ngei pawh Power-ah kan indaih lova, megawatt 25000 laiin kan indaihlo an ti, kum 15 kalta chhung khan Megawatt 56000/-

lai kan siambelh chungin tunah pawh megawatt 25000 in kan indaih lo, 12<sup>th</sup> Plan chungin Megawatt nuai khat siam a ngai an ti a. Chuvangin renchem zawnga kan kal loh chuan kan harsa viau ang tih hi rin mai tur a ni. Chuvang chuan Mombati-te insawi hmuh a khatia inpuh kual kha chu tulin ka hre lo. Pu Deputy Speaker, ka lawm e.

**Pu LALDUHOMA** : Pu Deputy Speaker, a sawi hmasa berah kan tang emaw, sawi hnuhnung ber kan ni emaw, a pawimawh zawk chu enge kan sawi tih hi niin ka hria a. Zawl bik nei lovin ka'n sawi ve ang a. Congress pawh zawl ve lo, BJP pawh zawl ve ngai lovin ka sawi dawn a ni.

NLUP hi ka'n sawi anga, ka study nasa ve em em mai a, Central-a sequence of events-te an lo ngaih pawimawh dan te, min duhsak dan te ka hmuh hian ka lawm thin a, a scheme hi a tha ka ti a, sum kan hmuhna tur ruahman hi a tha ka ti bawk a, chuvang chuan he House hian NLUP hi ka tuipuiin ka sawimawi thin a ni tih hi min hriatpuiin ka ring a. Tha taka kan enkawl chuan kum 5 bakah pawh la chhonzawm zel theih turah ka beisei bawk thin a ni.

Amaherawhchu, 2009-2010-ah khan NLUP ah vaibelchhe 100 kan han nei ta a, cheng khatmah mipuite hnenah lut loin a kal ral ta a, kan la inpeih lo deuh anih hi tiin kan ngawi a ni. Nikum budget alo thleng leh a, vaibelchhe 234 chuang kan han hmu leh ta a, kan plan size a tilian chuang ta lo reng reng mai a ni, hei hi ka beisei ang a ni lo. 2009-2010 ah khan kan Plan punna hi 25% a ni, 2010-2011 ah khan 20% ah kan punna hi a tlahniam ta a, kuminah hian 13.33 % ah kan tlahniam leh ta salh a ni. NLUP kan tih hnu hian kan Plan punna hi a tlahniam ta zel a ni. Plan-ah hian lut sela, NLUP sum hian kan plan size a tilian anga, a tha ang tih hi ka lo sawi ve thin a, amaherawchu kan plan size punna a tlem phah a, department tam takin nikum budget an pha lo a ni. Engvang nge kan tih chuan, inthlan laia sawi angin special package-a min pek loh vang a ni. Special package kan ti emaw, a hming chu engpawh kan vuah a ni thei e, a hmingah ka buai lo. Amaherawhchu, he NLUP sum tur kum 5 chhunga cheng vaibelchhe sanghnih zariat sawmsarih leh pathum hi a hranpain Central-in minrawn pe turah kan ngai a ni. Nimahsela kumin 25<sup>th</sup> March khan a Nodal Minister ngeiin helai hmunah hian hei hi special package a nilo tih a pawma, a sawi a ni. Chuti a nih avang chuan he NLUP sum hi nikum-a vaibelchhe 234 khan kan budget a ei heka, kan budget atanga pek alo ni ta a, mahni budget atanga tiang scheme kan siam dawn a nih chuan tu sorkar pawhin an ti thei vek a ni, a danglamna a awm lo. Chuvangin, inthlan lain helai kan hotute leh Central atanga lo kalte khan Mizo mipui hi min bum deuh emaw ni aw, ka ti a ni. Hun lo kal zel turah engtin nge an tih dawn ka hrelo. Tuna a awmdan chinah hi chuan kan budget a ei heka, kan budget chung atangin pek a ni, hei hi thil chiang tak a ni. Nikuma kan budget vaibelchhe 234 kha han en chiang ila, Additional Central Assistance hliir a ni, ACA hliir a ni. ACA hi tunhma pawhin kan dawng thin, kan la dawng zel bawng ang, State dang pawhin an dawng. NLUP a kan hman hma khan thil tangkai dangah kan hmang thin a, tunah erawhchuan NLUP-ah a kal hlawm thuai ringawt mai a ni. Programme dang khan a tuar ta tlat a ni. 2009-2010-ah te pawh khan ACA hi vaibelchhe 266 chuang kan hmu a. Chuvangin khawi atangin nge he NLUP sum hi a lokal kan tih chuan Additional Central Assistance a ni ringawt mai a ni, kha kha a ei zo vek ringawt mai a ni.



Tin, CSS convergence atan hian vaibelchhe sang chuang kan nei dawn a. He kan flagship programme atana heti zat min phalsak hi a lawmawm ti thintu kha ka ni. Mahse kan converge em tunah hian, a nihna tak kan en dawn chuan nikum-a kan budget atang khan CSS chu a hming chuan a bet ve tawk tawk, Environment & Forest-ah leh Horticulture-ah tlemte a lo lang a, chu pawh chu hman ala ni chuang lo, a bang zawng chu ACA kha a ni tlat a ni. Engvang nge, engatinge Central Scheme (CSS) vaibelchhe sangkhat lai kumnga chhunga conversion a kan hman theih tur kha tunah hian kan la hman loh, engnge harsatna ruk kan tawh? Convergence atana CSS kan beisei hi hetiang a lokal lo zel anih dawn chuan he scheme hian a thleng thui miah lovang, chu chu huai takin ka sawi ngam a ni.

Tin, a sectoral allocation leh a nodal department ten an hman hi han en ta ila, tun thla ni 15 thlenga department 8 in an hman dan hi han en ta ila - Agriculture hian vaibelchhe 75 an dawn atangin vaibelchhe 48 hi tunah hian hman loh an la nei a ni, a nodal department ber an ni. Pu Deputy Speaker, financial year a liam daih tawh, nikum financial year chhunga hman zawh tura tih kha tunah hian vaibelchhe 48 an la hmang bang a. Tin, infrastructure atan nikum budget-ah nuai 185 an nei a, cheng khatmah an la hmang lo. Hetiang speed-a kan kal chuan khawi ram nge kan thlen ang? Horticulture kan en chuan vaibelchhe 52 an nei a, vaibelchhe 28 an la hmang lova, infrastructure-ah vaibelchhe 100 an nei a, an la hmang miah baw lo, kum a liam tawh. Sericulture-ah infrastructure-ah nuai 15 an pe a, an la hmang miah lo. Soil Conservation-ah vaibelchhe 14 development component atanga an hmuh atangin vaibelchhe 3 hman ban an la nei a, anni hian infrastructure component an hmang zova an fakawm hle a ni. Vety hian vaibelchhe 28 atangin vaibelchhe 15 an la hmang bang a, nuai 442 infrastructure component ami an la hmang miah lo.

An hman tawh zat leh an hman bang zat kha, hei a chhut theih mai a. Tukin zinga ka Unstarred Question kan Minister min chhanna kha han ring zawk ta ila, chutah chuan nikuma kan sum vaibelchhe 198 atang khan an sem tawh chu vaibelchhe 123 a ni a, sem bang vaibelchhe 95 ala awm tih kha ziakin min rawn pe ta a, infrastructure-a an la hman bangte nen chuan vaibelchhe 100 chuang hi nikum financial year chhunga NLUP sum hman lohin ala awm. Hei hi chu a dik ka ti thei lo a ni, a scheme a tha ka ti, mahse a implementation hetiang hrim hrim anih hi chuan a beidawnthlak dawnin ka hre tlat a ni. Pu Deputy Speaker, kan kuthnathawktuten nghakhlel takin an thlir a, fur khat pawh hi an tan a hlu em em a ni, fur thum a liam tawh.

Tin, nikuma kan budget an rawn sanction kha October ni 12 a an rawn sanctioned kha a ni a. An Sanction lehkha kha i remtihain kan chhiar ang e, "Fund should be released to be implementing agency without delay failing which the amount shall be recovered from the State Government (mind you) with interest". Hetiang hni hne a kum hlui sum pawh kan hmang lo a, kan la vawng tawl mai mai leh K-Deposit tih vela kan la dah kual vel mai mai anih chuan Sanction Order-a zia anih ang hian, "Min rawn pelet leh rawh u, a pung nen", rawn ti ta selangin, kan mipuite hi kan chhuh let leh dawn em ni? Chuti khawp chuan tunah hian kan dinhmun hi a thaloin ka hria a.

Tin, a matching share-ah hian R.D. Department-ah IWDP, IWMP & NREGS atan hian NLUP sum atang hian vaibelchhe 10 chuang matching share-ah an pe ringawt bawk. Tin, Revenue Department-ah Cadastral survey tih nan nuai 32 an pe ringawt bawk. Hengte hi hmasawna ruangam siamna atana NLUP sum a ni. Engatinge matching share atan cheng vaibelchhe 11 chuang an pek rikngawt? Hengte hi a dik thei dawn em ni? Tin, a management component-te pawh hi vaibelchhe 15 ngawt an dah a. Motor lei nan, Petrol lei nan, Camera lei nan, furniture lei nan leh meeting a thingpui in vel nan leh damdawi man tih vel, mipui sum thingpui in nan kan hmang hnem lutuk, a uiawm ka ti. Chuvang chuanin, hetiang hi a kal dan anih chuan kan tum ram kan thleng lo ang tih hi ka hlau em em a. Kan Sorkar hi 'Tang teh u' ka ti duh a ni. Hlawhtling se ka duh ngawih ngawih. Tunah hian hun tlem a la awm a, tang turin theihtawp chhuah turin ka chah duh a. One Day Chief Minister ang deuh hleka chet hi a hun tawh a ni. Chutilo chuan kan speed hi a muang dawn lutuk.

Awle, P & E-ah ka'n kal ang e. Tuirial Hydrel Project hi kan sawi zing a, a tirah khan neitu dik tak 48 an awm tih a ni a. Kha mi 48 te kha tute nge an nih? Compensation an la tawh em? Nge an la la lo? An la la lo anih chuan an la dawn em tih lai hi, hriat chian ka duh hle mai.

Tin, hei Court Case pahnih a awm a, pakhatah chuan mi 38 in court-ah kan Sorkar a khing a tunhma khan, chu chu High Court-ah a ni a. Additional District and Session Judge-ah hian mi 14 in an khing leh bawk a. Chuta Court judgement-ah chuan hmana an chan tura compensate an hmuh tura an tih Award No. 6 of 2003 kha, khamiah khan a interest nen solatium an pe tur a ni tih hi court order a ni tlat mai a ni. Chuvangin, tuna kan han revise leh naah hian heng court case 2 te leh a hmasa 48 te dinhmun tur kha engnge a nih dawn tih hi hriatchian tha ka ti a. Min hrilh chian theih chuan ka lawm ang a. Tin, hei bakah hian a pawngapuia tumah kan pe tawh dawn lo tih ngawt hi a dik ber a ngem? Hmasang atanga ram neitu dik tak an awm anih chuan, chumite tana kawng hawn chu thil tha ala nih tho ka ring a, a neitu dik takte rilru na-a dah chu a that ka ring lo a ni. Tin, a revised estimate hi engzat chiah nge ni ta a, an siamchhuah hunah hian a cost of production per unit hi engzat nge ni dawn tih kha hriat tel mai mai theih anih chuan kan duh bawk a.

Tin, Planning & Programme Implementation, Finance Department tih vel hi ka'n hrawmkawp ang a. Heng Department-te hi executive Body ni chiah lovin Monitoring te, Evaluation te, Appraisal te leh Supervision thawk tur an ni tih kan hria a. Kan ramah hian NGO te, sorkar department te, mimal ten NEC atangin sumte an dawng a, eng eng emaw an ti tih kan hria a. Kumin June ni 1 ah khan Planning Department hian khang dil ho zing ami priority list 55 an siam a, NEC-ah an theh thla a. Amaherawhchu, tute thupekin emaw umzui a kohkir leh an ni a. Tichuan July ni 14-ah khan thawnthlak leh a ni a, tah hian 56 alo ni ta a, scheme hrang hrang hi. A hma ami 15 drop in, a thar 16 dah belh alo ni ta a. Hemiah hian ka'n sawiduh chu, NEC a heng priority list 56 kan sorkar aiawha zuk thehthlatu hi, Principal Secretary, Planning & Programme Implementation Department a ni a. Kan Principal Secretary chu Pu Lalmalsawma niin ka hria a, heta hming inziak hi midang hming a ni tlat mai a. Principal Secretary pahnih kan lo nei nge ni a, hei hi impersonation a ni em? Engatinge mahni designation ni lo te hmanga NEC-ah te hetiang thil hi kan thehthlak? A Principal Secretary dik tak tan te hian a va nuam awm love tih te ka ngaihtuah a.

Tin, private-te hi tumah kan telh ta lo niin a lang a, thehthlak lehah hian. A chhan kan hriat danah chuan NEC-ah khuan helaia private hoin an tih chuan engemaw neuh neuh a awm a tiin. NEC lama a khawihntute rinhllehna a kai lek lek a ni. Khatiang chung a heng scheme-te kan thehthlak hian kan hlawhtling a ngem tihte pawh hi ngaihtuah a ngaiin ka hria. Chuvangin hei hi a tha vak lovin ka hria.

Agriculture te, Horticulture te, Minor Irrigation, Soil te hi kan la kawp leh mai ang a. Hengah hian mipuite thil kan chin tir a ni, a pawimawh ber chu Market a ni. Apple, Alaichi, Tung, Aieng, Sawhthing, Pangbal, Sapthei, Jathropa, Kiwi, Aloe Vera, Stevia kan in chin tir a. Kan in chin tir hnem tawh kan ramah hian. A thar tam apiangin an titawih tam rik ngawt chuan awmzia a neilo a, chutiang chu a tawp a hun tawh a. Chuvangin heng department zawng zawngah hian thil kan ti leh dawn anih chuan Contract farming anga tih theihte kan nei em? Chu chuan priority a chang em? Kan hralh dawn ngei em tih hi kan chian a ngai a. Ngatinge Rangvamual vel zu kan tihrem theih loh kan tih chuan a market a that vang a ni. Engatinge K.S. hi a rem theih loh? Market a that vang a ni. Tihrem kan duh ngawih ngawih pawh hi a market a that chuan kan tirem thei lo. Heng kuthnathawktute thil chinte hi a market tha se ching suh pawh ti ila, a rugin an ching tho tho ang, a pawimawh chu market a ni tih hi kan hriat a hun tawh hle a ni.

Model nursery 7 lai kan nei tawh a hriat a ni a, khawiah nge an awm a, a hlawhtlin dawn hmel em tih te min hrih thei se ka duh a ni.

Tin down sizing policy kan ti a, sorkar hnathawk kan tam lutuk per population kan ti a, a dik ang, hei hi Department tin ten an budget an siam laia post creation an tih te, vacancy fill-up an tum zawng zawng Planning leh Finance a kaltlang vek a, awm lo an tih chu an lo dang turah ka ngai a ni. Awm an ti a, an approved vek tawh hnuah post ruak leh a hnawhkhahna tur sum kan nei an tih pawhin an lo phalsak lo leh thin a, hemi stage-ah hi chuan indan hun niin ka hre tawh lo a ni.

Tin, Asset statement hi budget document ruala tih thin nise tih a ni a, hmuh tur a la awm lo fo mai.

A tawp nan pakhat chiah, Kaptai tuikhuah hi East Pakistan anih laia 1956-a an siam, 1962-a an zawh a ni a, chhungkua 18000 vel leh mihring nuaikhat vel awmna a tibuai a, Chakma lal in pawh a chim a ni. Ka zawhna ni 10.1.2000 chhannaah khan compensate dilna hi Supreme Court-in a dismiss tawh tiin sorkarin min chhang a. Chuti chung si chuan mi 338 ten compensate an hmuhna tur hian Ministry of Home Affairs-ah khan Revenue Department hian an dawn zat turte nen an zu thehlut a, vaibelchhe 9 chuang lai mai. Heng hi a kal reng si a, hei hi tihfiah law law a tha hle mai, a beisei tu tan pawh beisei awm a nih loh chuan beisei loh law law a tha a ni. Tin, India leh Pakistan kan inlaichina a that vak loh lai a nih avangin agreement mumal pawh kan nei lo niin a lang a ni. Kan ram tui hmangin an khuap a, ram tam tak a tichhia a ni. Tunah power production atang tal khuan eng share emaw tal hi kan claim ve theih dan a awm chuan ngaihtuah a tha hlein ka hria a ni. Ka lawm e.

**\*Speech not corrected**

**Dr. R. LALTHANGLIANA** : Pu Deputy Speaker, ka lawm e. A hmasa berin kan Finance Minister hi duhsakna ka'n hlan ve hrim hrim ang e, a thar te a ni bawk a, sum pawh tangkai taka enkawl chho turin duhsakna ka hlan a ni. Nikum ang khan sum pawh hi ti lapse ve lo sela ka duh a ni. Civil Aviation-ah hian Lengpuia kan Instrumental Landing System tihfel vek tawh anga lang, vawiina kan tihfel theih loh hi a rang thei ang bera peih nise tih ka'n sawi duh a. Tin, chhim lam tana thil sawi loh theih loh chu saw lampanga kan thlawhna tum tir tur ang chi hi tun tumah hian sawi rik a hlawh lo ta khawp mai a, Resolution-a phur taka kan pass tehreng nen hrehawm ka'n ti deuh hlek a, chu chu ka'n sawi duh a. Tin, chumi piah lamah chuan kan Election Manifesto-te pawh kha a awm awm mange te ka ti a phek bul lampangah khan, kumtin Lunglei lampangah Cabinet Meeting vawikhat tal neih tur a ni tih te pawh kha a awm a, kan la nei remchang lo a ni mai thei.

Legislative Assembly-ah hian Pu Deputy Speaker, kan thawktute chungah hian lawmthu han sawi hrim hrim hi a thain ka hria a, kan session-ah hian a rei ber tum tum hi a ni awm mange te ka ti a, ni 20 zet kan thu ta a, an hah hle mai a thawktute, a te ber atanga a lian ber thlengin, chuang chuan tum tum hi chu lawmman atan lawmthu sawina hi duh sak deuh ila a thain ka hria a, a tlem berah cheng sangthum diat diat hi chu pai vek hi a van tha em, tih in lo tum sa anih phei chuan ka pawm hmiah a, a tlem berah hei hi pek ve hi a thain ka hria a. Chumi rual chuan thlavang han hauh ve deuh ka duh a, hemi statistical hand book an rawn siamah hian helaiah hian Commissioner, Head of Department ti te eng eng emaw list kha awm a, ka'n lainat deuh hlek a, keini Legislative Assembly kan rorelna Secretariat ropui bera ka lo ngaih hi, ka'n en thin a, Director tih te kha a tlar thla dul a, a tawp berah hian Director, Anti-Corruption Bureau kha a awm a No. 60-naah, No. 59-naah hian Director, SCERT hi a awm a, a No. 58-naah hian Secretary, Mizoram Legislation Assembly Secretariat tih a awm ve tlat mai a, Secretary ni si kha engatinge Director ho karah hian a awm ve tih kha ka sawi duh deuhva, hei hi a hunah chuan ngaihpawimawh dan hi awm se a thain ka hria a. Kan rorelna khawl bera min enkawltute kan dahna hi a felloin ka hria a, ka'n sawi duh lawk a ni.

Tin, chumi piah lamah chuan Pu Deputy Speaker, kan MLA te hi thawh tur neilo ang deuhin thenkhat hian an ngai thin a, tun term lek phei chu Assembly-a thil dang dang Committee-ah kan hah tlang hle ni ten ka hria a, hengte pawh hi mipuiten min hriatpui ve hrim hrim se tih hi ka duh a ni.

Demand tawp ber mai, kan hotupa, kan House Leader leh kan Chief Minister ni bawk, kan Finance Minister Demand-te kan han sawi a ni a, a mak ka tih chu tun tum kan term hi dinglam amite han sorkar phat atang khan helama tling hi kan tlem tehreng nen hian a leh pekah hian sorkar leh tur hian min ngaih luat vang hian nge ni min bei let char char mai a, a mimal tak chuan min rawn ti lo naa, amaherawhchu, hotu hmasa helaia thu ve lo kha... hmanni chu khawharinah heti tak maia han ti che u hi chu an ti a, sorkar leh tur hian Pu Duhoma te hi chu an bei vak lo ka'n ti mai ang e, sorkar ngai lo an nih vang nge ni ang a, anni hi chu an neutral thiam riau mai a, balance hi an thiam a. Keini hi chu min ti tluar tluar mai a, a ngaihthlak dan pawh hi kan thiam tan tawh khawp a, engpawh nisela Democracy ropuina

tak a ni a. Demand-ah hi chuan MLA kum engemaw zat kan lo nih ve tawhna laiah kan han sawi ber chu mahni bial tana tha tur kha, bial mipuiten min ngaithla a ni a. Chutih lai chuan sorkar hmasate thil hi kan thusawi zawng zawng hmun thuma thena hmun hnihah kan khung tlang a, hei hian kan hman tam phah tlang ve bawk a ni, Pu Deputy Speaker, kha kha ka'n sawi lawk duh a ni.

Engpawhnise, DP&AR lam hi ka'n sawi lawk duh chu, Higher & Technical Department-ah hian Mizoram State sorkar enkawl Lecturer tam tak kan nei a. 2009 1<sup>st</sup> January atanga February tawp kumin thleng khan an hlawh thar ang engemaw la lak loh an nei a ni, tam fe, thla khata an han chhut khan vaibelchhe khat nuai za bawr vel a ni a, avaiia han chhut chuan vaibelchhe 22 emaw 23 emaw bawr vel turah an ngai a. Hei hi kan Finance Minister khan min lo chhinchhiah sak sela tih ka'n sawi duh a. Tin, an ACR, tunhmaa kan tih thin ang kha tunah chuan UGC Guideline angte a kal alo ni a, ram pumah ATI ti a hman alo ni ta a. Hei hi DP & AR-ah hian a tang rei lutuk deuhva, an promotion leh engemaw kha a break thui viau mai a. Tin, an pension hun tur hi UGC anga kan kalpui chuan kum 65 tur a ni a, hei hi tihfel a nilo bawkin ka hria a. Tin, ka'n sawi leh duh chu Principal ngialnghet an la neilo tih hmanni khan kan ngaithla tawh a, a dik khawp mai, R.R. fel tak, mumal tak an mamawh a, vawiinah hei hi chak taka kan tih a pawimawh.

Tin, thil te nawi deuh kan sawi duh chu Joint Entrance Examination kan han tih thin IIT atana exam Mizoramah buatsaih a ni ve ngai lova, tin, Common Admission Test (CAT) kan tih ang chi te, hei hian harsatna tam tak kan zirlaiah a siam a, chuvang chuan Mizoram chhungah exam centre awm ve thei se tih kha ka'n sawi puat duh a ni.

Tin, DP & AR concern a ni ve pawhin ka hria a, tun term nilo, MNF sorkar hma a, i ding lam amite an sorkar lai khan, Pu Deputy Speaker, District panga kha an hawng a, lawmawm pawh kan ti khawp mai, amaherawhchu, eng kha an ti hman si lova, a thu ringawt kha a ni a. Sorkar hmasa khan theihtawp an chhuah a, chutah chuan infrastructure district tina ken tam tak, office dah hman a ni a, lawmawm ka ti a.

Tin, Civil Sub-Division kan tih ang chite hmun 13 ah in han puang kha kan han tichho zel a. Vairengte atanga tanin hetah Tuipang thlengin hmun 13 kha engmah kihhnawk a awm ve lova ni, a awm a ni tih kha kan sawi ve lem lova, kan ti hmiah hmiah mai a, zopa takin, khang kha ka sawi ve duh hrim hrim a ni.

Tin, Finance-ah hian ka'n sawi duh chu Pu Deputy Speaker, Aizawl North Treasury thar 2000 ah hawn a ni a, a thar han ti ila, a thar tawh awm love. Tin, sorkar hnathawk tana special car loan kan buatsaihte kha simple interest 5.5% ang khan sorkar hmasa khan a ruahman a, khangte kha a kal tuang ta zel em, tih min wind-up sak sela ka duh a.

Tin, Accounts & Treasuries ho hi an khawngaihthlak awm khawp mai, an office-ah tum hnih ka kal tawh a, hnathawh ngaihna a awm lo reng reng, Chanmari, Ramhlun road-ah sawn, awm ngaihna a awmlo, 200 bawr vel han

inkhung nan chuan, tihngaihna a awmlo reng reng a. In pakhat phei chu a rent-in an la a. Chuvang chuan, engemaw kan ngaihtuah a ngaiin ka hria a, Sorkar hmasain kan ngaihtuah hmanlo anih pawhin Sorkar thar hian helam kan Capital Complex lamah emaw tal hi chuan hmun kan pek ngei ngei hi a that ka ring. Sum lampang Department an ni si a, sawlai khamkara an awm saw rem lovin ka hria a, ka'n sawi duh a.

Tin, Directorate-te pawh hi 3-ah chuan kan then hi a ngai hrim hrim tawh lawm ni tih zawhna kha ka zawt a, kha kha wawiinah hian ka tarlang leh duh. Audit tur thil tamtak a awm, thil tihtur tamtak a awm, Examiner-te pawh post kan han siam a, kum dangah chuan Director rank a ni mai a. Tiang khan thenfel thuai thuai ila kan hna hi chakzawka a kal ka beisei khawp mai a, chu chu wawiinah hian ka sawi leh duh a ni.

Tin, 6<sup>th</sup> Pay kan implement chungchangah hian tlema a te nawi deuh hlek kan Sorkar hanthawk ho hian hlim lohna lai deuh hi an la nei niin ka hria a, kan Police Constable-te leh Bel thum chin ang hnuai lampangte, IV Grade hmun hrang hranga thawktute. Tin, Group 'D' Employee Association-te pawhin an thu thlen ang chi, hemi 5<sup>th</sup> Pay corresponding a 6<sup>th</sup> Pay grade pay a siamsak nise tih theihtawp chhuaha an han nawr ang chite hi a harsa em em emaw ni le, ₹ 1650 a Grade Pay hniam ber chi han fix sak ngawt hi chu a dik bik em maw nile. Hei hi an chanvo tur hi Sorkarin kan siamsak hi thain ka hria a, chu chu ka sawi leh duh a ni.

Tin, ka sawi leh duh chu Pu Deputy Speaker, kumin kan budget hniam chungchang hi a pawh angreng viau a, lawmthu han sawi dawn pawh hian lawm viauna tur hi a awmlo khawp mai a. Tun lawka kan ngaihtlak ang khan, tuna mite hi an Sorkar hlim khan Deputy Chairman, Planning Commission-ah House Leader-in Chief Minister anihna anga lehkha a siamah khan a hmasa berah phei chuan – The Congress has return to power with a report victory and securing for the first time in the brief political history of the State at 2/3 majority a ti a. Helaiah hian NLUP chungchangah dilna a zuk siam a, helaiah pawh hian special package anga pe tura dil a ni a. Amaherawhchu, kan hlawhchham ta a, a pawh ka ti khawp mai a. Tuna kan ngaihtlak tak ang khan vaibelchhe 1700 atanga pawisa bawm pakhat atanga vaibelchhe 234 han sawh chhuah kha chuan Department 20 hianin nasa takin wawiinah hian an tuar a ni tih hi ka sawi duh a. NLUP avanga tuar hi an ang tlat a ni. Chuvang chuan, he harsatna hi a lian viau a ni.

Tin, CSS te nena convergence ti mai ila, finkhawma tih mai tih hi thil harsa tak a ni. R.D Minister ka nih lai khan kan tum a, MIP chungchangah, pawisa kha kan nei thei vak bik lova, ka'n inzep lo lawk ang e, har tak a ni, MIP atana hman tur, IWDP pawisa tihte, khatiang Central Sponsored Scheme han tih kha a har em em mai a ni. Phal tehreng pawh nisela, National Level-a guideline awm a ni si a, a har em em mai a ni. Chuvang chuan, heng hi chu a chauhtubarawh lutuk deuhin ka hria a, engpawhnise titur anga ngaihtuahna in lo nei tih kan hria hi kan huphurhpui ve hle che u a ni tih kha ka sawi ve duh hrim hrim a ni. Tunah hian heng NLUP avanga harsatna an department-in an thawh theihloh tur hi kan ngaihtuah pawh hi a tul khawp mai a, department 30/20 ina nikum an budget an phak lohna ringawt hi kan belhkhawm a Pu Deputy Speaker, nuai hliir nuai 3471.43 a tling a ni. Chuvang chuan ania, MLA Local Fund te pawh kha tihpun chu kan chak khawp mai

a, helampang pawh hian kan duh vek ka ring, mahse a ngaihna awmin kan hre lova, ka sawi ngam tawh lova ni.

Chuan ka'n sawi leh duh chu PWD hi ka'n chhan zawk teh ang, hnathawh ngaihna a awmlo a ni an tan hian, helaia kan sawi ang khan 13<sup>th</sup> Finance Commission ruahmanna kuminah India hmarchhak State-ah hian a hmu tlember pasarihna kan ni a, keini aia hmutlem hi Sikkim an awm a, hmutlem ti mai ila, an allocate danah hian, kan hmu tamlo khawp mai, a chhuanawm lova, a tam loh tehlul nen 50% State share non-PMGSY Road atana tihte 10% State share PMGSY Road a tihte vaibelchhe 13.52 a ni a, a bak 19.04 Central share a vaia 32.56 crore hi chu a rang thei ang ber hian ngaihtuhsak a tulin ka hria. Kan kawng hi Pu Deputy Speaker, a chhe lutuk, kal ngaihna a awm tawhlo reng reng, kan Aizawl khawpui pawh a ni, Aizawl khawpui lo pawh District Headquarter zawng zawng leh khawlian deuh kawng hi vawiinah hian tha bar a awmlo. Chuvang chuan thingtlang kawng inkalpawhna chu kan sawi ngam lo hrim hrim a, kan khawpui ringawt pawh hi vawiinah hian kan buai tawh anih hi. Chuvang chuan hei hi Department pahnihte ka dik zawk a ni tih inchuh lampang kha a ngailo. Amaherawh chu kan mamawh zawnah hian vawiinah hian hei hi kan tihfel ran a pawimawhin ka hria a, ka sawi nawn leh duh a ni.

Chuan NLUP chungchangah hian hei Lunglei lam atanga thil kan sawi duh lawk chu , Red Oil Palm chingtute hian a chi man hi min thing a, a thawhna tur tangka min laksakin kan hre si a, kan mangang khawp mai an ti a, hei hi enfel a that ka ring a. Tin, a thlawhna tur khawl min rawn pe tam lutuk a 150 an ti nge ni min rawn thawn a, 20 bak kan mamawh bawk silova, a thlawna tih a ni silova, subsidy-a lei a ngai bawk si a an ti, an mangang khawp mai. Tin, NLUP tangka ni turah kan ngai a, hei tukin lam khan kan member zahawmtak Pu Ramhluna khan a rawn sawi a, helaia Administrative approval and Expenditure sanction a rawn tarlan, Agriculture Department nuai 14313516 for purchase of seventeen number of Bolero hengte hi a va tam em em ve mawle ka ti deuh a. Tin, hei sanction lo kal leh pakhtah hian nuai 21346296 for purchase and maintenance of 36 Mahindra thar a rawn ti leh a @ 529279 a ti a. A vaia NLUP atana Motor 53 em em han leite hi chu kan pawisa hmandan em em lutuk hi chu a fello deuh lo maw le. A vai hian pawisa hi nuai 36259812 a ni a. Tunlaih chuan thil privatized a ni tawh a, heng Motor han hire a han hman mai tur a tam tehreng nen, driver-te leh thildang a lo tul leh zelin ka hria a, Sorkarin Motor hetiang a leilo hian tihdan kawng hi a awm lo'm maw ni le? Mipui pawisa ti ringawt maia kan hman hi tiin ka'n sawi leh duh a ni.

Power and Electricity-ah hian tawi tea ka'n sawi duh chu Pu Deputy Speaker, kan Member zahawmtak takte khan an rawn sawi a, tunge ni a sawitu ber ka hre lova, a paitu tak hi chuan a hrin hi a ngai a ni a ti a. A paitu tak hi hriat a har viau a. Engpawh ni sela, Kau-Tlabung te, Tuipang lui tih te, Serlui 'B' tih te, Maicham Hydel Project te pawh kha a paitu chu an awm a. Mahse, an hring tha lo a ni. A hnua sorkar khan a chawrche angreng si a, ti khan, chaw tha kan han pe a, kan han tinung hram hram kha a ni bawk a nia. Chuvang chuan, Power chungchangah hi chuan inchhuang bik tur kan awm emaw ni le aw ka'n ti a, ka'n sawi leh duh a ni.

Sawi tur tam tak chu a awm, amaherawhchu, a tawp bera ka'n sawi duh chu PWD-ah hian kan Mechanical Circle khi engtinng maw ni sorkar hian kalpui zel kan tum le? tih hi ka zawt duh a ni. Rilrua awm ang kan sawi hman lova, ti

ringawt lo deuh khian kalpui dan khi a awm em? A thawktute pawh khian hrehawm an ti lutuk ve deuhin ka hria a. Mumal taka kan kalpui khi thain ka hria a. Tin, chhim lampanga kan kawng pawimawh tak mai ka'n sawi zawk duh chu a bialtu hian thildang a sawi a, a sawi hman lo a nih ka ring a. Kan Darzokai Lei saw engemaw ruahmanna DPR te pawh kha DoNER Ministry-ah khan suspension bridge atan khan kan ruahmanin ka hria a, hmuh a awm ta reng reng lova. Chumi hnuah RCC bridge angin Concept Paper-te pawh kha Ministry of Transport-ah thehluh a ni a, kan hlawhchham ta emaw ni? Defence lamah tih leh tur tih te kha a kal kawi si a. Hei, term chawhnu lampangah vawiina sorkarna chelhtute pawh in awm mek tawh bawk si a, a hna a rip si a. Hetiang hi chuan sawlaiah sawn kan inlawn kai tak tak dawn lovin ka hria a. Chuvang chuan, Hnahthial bial ang pawhin vawiinah hian, leh sawtah Saiha thlengte pawhin kan kalkawng inkalpawhna tha tak mai a ni a. Kawng pangngai tha tak kan neih mek laia sawlaia lui kannu tur kan nei thei lo saw a pawiin ka hria a. Chu chu ka'n tarlang duh a ni.

Engpawh ni sela, vawiinah hian kan sawi seng vek lovang a. Heng kan pawisa hman tur kan hotu pawimawh tak takte kan Chief Minister leh kan Finance Minister-te Demand hi engpawh ni sela, Mizo mipuiten thlahlel taka kan lo thlir ni mah sela a beitham a, awmze nei taka han hman tur chu a awm dawn lo a ni tih hre mah ila tangkai taka a nih ang anga kan hman erawh chu kan duhsak che u a ni tih ka'n sawi duh a ni. Ka lawm e.

**\*Speech not corrected**

**DEPUTY SPEAKER** : Awle, a sawi turin kan sawi tawh em? E, Pu Chawngtinthanga a la awm a ni maw.

**Pu CHAWNGTINTHANGA** : Pu Deputy Speaker, ka lawm e. Niminah khan nilengin ka insum tawh a, vawiin pawh ka han insum ngar ngar a. Amaherawhchu, ka din ve loh chuan kha a chih hlen mai dawnin ka ring deuhva, ka'n ding ve hram ang a. Member zahawmtak Pu Thangtea khan 'I veilama mite kha' min tia, 'Min chu luai luai mai a' a tia, a vui deuh em a. Kei chuan ka chu dawn hauh lova, tuna kan sorkarah hian lawmthu ka sawi mai dawn zawk a nia. Agriculture Demand No. 31 te, Horticulture 32 te leh helaia Demand dang Minor Irrigation te hi ka'n thamkhawm mai ang a. A chhan chu twin departments an ni a, ei leh bar kawnga min chhawmdawltu leh kan intodelhna atana department pawimawh em em te an nih avangin. Agriculture Department ah hian budget- ah khan ₹ 180,44,54,000 dah a ni a, hei hi 2010-11 budget estimate ai khan a sang zawk a. Tin, Horticulture-ah pawh khan chutiang bawkin ₹ 34,45,64,000, 2010-11 budget ai khan a sang zawk a. Chutiingin Minor Irrigation-ah pawh hian a sang zawk a ni tih kha ka han sawi duh a.

Tin, nimin lamah khan kan Minister zahawmtakin a sawi tawh ang khan kum 1 mamawh 25% in buh kan lo thar zo lo a ni tih kan hria a. Khangte kha kan Sorkar chak tak leh kan Minister-te hian chiang taka hriain uluk deuh maia ngaihtuahin kan tharchhuah titam tur leh intodelhna atan chuan labour force hi kan insiam a ngai a ni tih an hria a. Amaherawhchu, chawp leh chilhin mihringin tihpun mai theih loh, hnathawktu tur hi intihpun mai



theih loh anih avangin rem hre takin mechanization-in labour force hi min tipung a. Tichuan, Power Tractor-te leh Tiller-te leh a tul ang ang subsidized-in kan mipuite hnenah hian an pechhuak chur chur a, a ropui hlein ka hria a, hetah hian lawmthu ka sawi duh a. Tun apang mai pawh hian kan thlai thar tur chu nasa takin beiseina hengte avang hian a sang nghal a ni tih kan hria. Tin, chu mai bakah tun atanga reilote kum hnih khatah pheih chuan kan thlai thar hi a sang chho thei viau awmin kan hria a. Tin, Agriculture hian tih tur hmachhawp fel tak an nei a, production of rice hi 10% a increase turin hmachhawp an nei a, tin, WRC a kan products reng reng hi 1.7 metric tonne per hector kha 2.5 metric tonne per hector-ah tihpun tumin hma lak an tum a, an hmachhawp a. Tin, Jhum Cultivation-ah hian .92 metric tonne per hector kha 1.2 metric tonne per hector a ni. Khatiang khan hmachhawp fel tak an nei a ni tih kha ka han sawi duh a.

Tin, Horticulture Department hi kan ram intodelhna atana thil pawimawh tak niin ka hria a, thui tak sawi lovin keima bial lampangah han lut chho mai ilang. Khilayah khian MI hian Horticulture leh Agriculture hi min pui nasa em em a, Phullen ah khian ..... Project min neih sak a, tin, Thanglailungah khian Chhirdem Project min neih sak a Tuivawl Project te pawh tin, a chhak lamah khian Phuaibuang ramah project min rawn neih sak nghe nghe a, kan lawm em em a, khingte avang khian kan thlai thar pawh nasa takin a pung chho niin kan hria a. Khaw mal khaih chuan Aizawl District-ah hian Phullen khua khi buh thar, (WRC a buh thar tam lamah) chuan a thar tam berte zing ami niin kan in hre nghe nghe a. Amaherawh chu hetah hian thil pakhat ka'n sawi duh chu, khitiang taka potential tha ve bawk si khi min enkawltu tur Officer kan nei lo tlat mai a, Agriculture-ah te hian Officer min rawn dah ula, tin, Horticulture-ah te pawh hian hmun leh hmuna min vil turin Officer min rawn dah chhoh sak ulangin kan duh em em a ni tih ka han sawi duh a.

Tin, Fisheries Department, Demand No. 35-na hi a pawimawh em em mai a. Kan Sorkar hmalakna nasa tak avangin tunah hian sangha kan tharte pawh alo pung chho ve zel tawh a, a lawmawm em em a. Nichin lawka Champhai bialtu zahawmtakin a sawi ang khan Champhai lam pheih khi chu han tuam chho ila sangha tui em em mai duhthusamin Zoram hi kan tuam thei dawnin alang a, a lawmawm hlein ka hria a. Kei pawh wawi khat ka han zin tawh a, an Champhai sangha khi a tui bik hle a ni tih pawh ka han chhim ve tawh nghe nghe a ni. Amaherawhchu Fisheries Department chungchangah hian thil pakhat sawi ka duh a, fish seed (sangha chi) sem chungchangah hian Department lam hian hei aia uluk deuh hleka an en chhoh a ngai hlein ka hria. Hmun thenkhatah chuan duh thala sem laiin, thenkhatah hian a dawng mang lo te pawh an awm emaw ni? Hmanniah khan ka bial chung Khawlekah khian sangha dil tha deuh mai nei Darkamlova a awm a. Chu chuan, "Sangha chi semtute kha an lo kal a Suangpuilawnah chuan duh thalin an pe a, Lamherh an thleng a, Lamherh atangin an tlan kir leh daih mai a, kei chuan hei ka dil zau pui maiah hian sangha chi khawi tur nei loin ti hian ka ho der mai a ni", a ti a. Hetiangte hi a dik tak tak a nih chuan nakin hnuah Department hian sangha chi sem chungchangah hian monitoring fel tha deuha in lo enkawl a pawimawh awm mange aw tih kha tawi tein ka han sawi leh duh a ni a.

Tin, Power Department chungchangah hian kan inhnial a, fak tlak kan ni e keinin kan tih lain fak tlak in ni bik love ti te pawhin khatiang khan kan han inhnial laih laih thin a. Amaherawhchu, Power Department-ah hian tuna Sorkar dinglai kan Chief Minister zahawmtakin Pu Lal Thanhawla kaihhruai Sorkar hi fak tlak tak chu ni hian a lang a. Power-a hma kan lakna tam tak sawi a ni tawh a. Hemi bakah hian thil tam tak, hmalakna tam tak sawi loh a awmin ka hria a. Tuivai Hydel Project, Tuivawl te, Turini te, Bairabi te, Kolodyne te, Tuipui, Tuichang, Ngengpui, Sekulh, Lungreng, Mat te leh Tlawng leh Tut te leh Chhimtuipui te kan sawi zur zut tawh a, chung piah lamah chuan hmalakna tam tak Power Department hian kan nei a. Construction.....Serluiah kan beih lai a awm a, tin chubakah 132 KV Melriat Sub-Station-te kan ti chho a, hetiangin tam tak a awm a, kan sawi seng lovang a. Hengte avanga Power Department hi fak tlak niin ka hria a. Tin, RGVVY-ah khan new electrification hi zawh tawh zat village 59 tihfel tawh an ni a, intensive electrification-ah hian village 253 pek tawh an ni a, tin, BPL free connection phei chu 10508 lai pek tawh an ni nghe nghe a ni tih kha ka han sawi duh a. Amaherawhchu RGVVY-ah khan an sawi tawh angin hna hi a chak lo hle a, thingtlang hian hei aia chak zawka kal hi kan beisei em em a ni tih kha kan sawi leh duh a.

Tin, a dawt leha chuan, Demand 45-na Public Works Department-ah hian kan PWD hi an thawk bawrh bawrh hle mai, an hah bawk a, tunah hian hna tam tak chhawp an nei a, Multi Modal Transport tih angreng te, National Highway paruk lai enkawl turte an neih bakah nasa takin hna an thawk a, an chungah hian lawmthu ka han sawi nghe nghe a. Tin, ka bialah khian sorkar hmasa laiah khan, Phuaibuang leh Phullen inkara Tuivai Lei an dawhkai theih loh kha, kum sawm zet an buaipui a, engmah an tih loh kha tun sorkarah hian chak tak maiin hma an la a, PWD officer-te pawh an hah bawrh bawrh hlein ka hria a, an lakah pawh a chang chuan ka inthlahrung thin. Chawlhkar tin deuthaw hian ka zawt a, an hnenah hian lawmthu ka sawi a, tunah khian contractor hna thawk thei lo kha an ban a, contractor tha hna thawk theiin an chhunzawm a. Tun thleng pawh khian fur chhiaah pawh an la riah chilh a, thal leh ah hi chuan hna tha takin an thawk chho ang a, Tuivai Lei khi kan nei thei mai dawn tawh ni a kan hriat avangin kan lawm em em a, PWD hnathawktute leh a Ministry-ah hian lawmthu kan sawi nghe nghe a ni.

Amaherawhchu, heti chung hian thil pakhat sawi ngei ngei atana duh ka nei a, World Bank kawng khan Luangpawng khi chhun turin investigation leh survey tih a ni tawh a, amaherawhchu kha project kha abandon leh niin ka hria a. Tunah hian PMGSY-ah hian tih lohin ala awm reng, tih hmasak theih nise kan duh em em mai a. Tin, Zawngin leh Suangpuilawn inkar khi rambuai hma daih tawha PWD in an lo laih tlang tawh kha maintain mumal loin tunah khian a awm reng a. Non lapsable central atang hian min tih sak rawh u tiin vawi duai lo ka ngen tawh a. Vawiin thleng hian thun ala ni loin ka hria a, khi khi min chhinchhiah sak turin ka ngen duh a. Tin a dawt leha chuan Khanpui to Tualbung inkar khi a pawimawh khawp mai 2009- 2010-ah khan non lapsable central pool atang khan crore hnih kha min dahsak niin kan hria a, Central pawhin an approve tawh a, a hmin reng tawh nia kan hriat lai khan bawhzui pawh awm ta chuang lovin vawiin thlengin ala chhuak lova, kan nghahhlelh tehreng nen. PWD officer-te hnen atanga ka hriat dan chuan "A tlem tham deuh si a, truckable road a zo dawn lova, chuvangin hei ai lian zawk project hi siam leh nise kan ti a ni, chuvangin kan bawhzui lo a ni an ti a. Amaherawhchu, a tlem zawk pawh pawhchhuah ni chuang si lova atam zawk project

pawh vawiin thlenga siam ni chuang si lo hi a mangan thlak deuh dawnin ka hria a, chuangin Chalfilh Constituency mipuite pawh khian kan tahawh tak meuh meuh che u a, helai project hi chu min chhinchhiah sak ula ka duh em em a tih kha ka rawn sawi a ni e. Chung sawi pah chuan kan budgets, Minister pahnihte demand hi a vaiin ka han thlawp vek a ni tih ka sawi a ni.

**DEPUTY SPEAKER** : Le, kan sawi zo thawkhatin ka hria, nichina kan lo rel lawk tawh ang khan kan chawl lawk anga, dar ruk leh a chanveah kan lut leh dawn nia.

### **6:30 P.M.**

**DEPUTY SPEAKER** : Awle, member 21 laiin an sawia, vawiin chu kan demand a tam deuh bawk a, kan inthlahdul deuh hlek bawk a. Kan in chhuah zalen deuh a, hun pawh tlemin a kal ta deuh hlek a ni. Tunah chuan kan Minister-te han wine up a, an demand-te pass rawn dil turin kan sawm anga. A hmasain kan Minister zahawm tak, Pu H. Liansailova han wine up a, a demand-te pass rawn dil nghal turin i lo sawm ang.

**Pu H. LIANSAILOVA, MINISTER** : Pu Deputy Speaker, ka lawm e. Vawiin kan demand sawihonaah hian kan member zahawmtakte mi 21 zetin kan demand-te min han sawipui a, min han ngaihtuah sak a. Tin, kan department bik a hrang tetein sawi sen a nilova, a engemaw tal kha chu an rawn khawihin min rawn sawipui vek a, a lawmawm hlein ka hria a, kan sawihona boruak leh an thahnemngaihna pawh a lawmawm hlein ka hria a. Tin, thil chiang zawka hriat duhna avanga han inzawhna te pawh eng eng emaw kha a awm a, tin, rawtna te pawh sawifiah vek sen a ni lovang a. Tin, tamtak kha chu zawhna leh chhannaah lokal tawh leh la kal turte pawh a awm thei a. Kan hriat tawh sa helai hi han tihchian leh deuhte kha ni deuh maiin ka hria a. A then kha chu, chuang chuan a zavai kha chuan kan member zahawmtak ten in rawn sawi zawng zawng kha ka react seng lovang a.

Tin, a pawimawh zual leh han sawi awm deuh nia ka hriatte a tlangpuiin han sawi ve leh chu ka'n tum anga. A hmasa berah chuan Finance Department chungchang Demand No.9-naah hian han sawi hmasak ka'n duh chu, kan State sum leh paia kan pachhiat zia kan hre tlang theuh a, in hrilh nawn pawh a ngai lova. Tin, kan financial management pawh fimkhur leh thiam a ngai hle a ni tih kan hre tlang theuh a. Chuvang chuan hei kan sorkar ve leh kan Chief Minister hian midang han pek pawh duh mahsela amahin bul a tan hi kan duh tlan avangin tlawm a ngai a, ani hian la lo mahse awl thei tak tak a ni chuang lova, chuti chung chuan a bulah mawhphurhna la a, kha kan budget document hrang hrang sawm leh pahnih, sawm pathum uluk taka in lo zir chuan kan financial management hi hma a sawn chho viau a ni tih a hmuh theih a, revenue surplus kan nei chho zel a, tin, fiscal deficit pawh kan Fiscal Correction Path (FCP) chhungah inkhungin kan la kal thei zel a. Tin, kan GSDP leh kan liability khaikhinin hmasawna duhawm, thanna duhawm kan hmu chho zel a, kan GSDP tuna kan project ang chuan kan tha chho viau zel a, kan growth rate-ah pawh 9.6 lai kha a lo ni a. Chuvang chuan kan Chief Minister-in hetianga Finance a bul min tan sak a, mawhphurhna

an lak hnuah keini angte pawh lo chuangkai ve tain amah kaihhraina hnuaiah kalpui nawk nawk theih ve pawh beiseia, neiin tihian mawhphurhna chu ka'n la ve chawt a ni a. Pawnlamah eng eng emaw ngaihdan leh sawite pawh chu a awm mai thei a, mahse a taka kan budget document-a min hrilh leh a sawi kha, a zir duh leh thudik hre duh tan chuan, en mai theih a ni bawk a, sawi thui lo ilangin, tan kan lak erawh chu a ngai hle mai a. Amaherawhchu kei tehlu, a tlinglo berin he mawhphurhna ka'n la tur hi chu huphurhawm ka ti khawp a ni.

Hei, kan budget kuminah hian vaibelchhe sangli a chuang ta zak mai a, a ropui ta hle mai. Kan budget san dan han ngaihtuah hian India ram Independence anih hun laia budget-a kan neih kha engzatnge ka hre ta mai lova, kan hlat tawh lo viau mai awm mange kan State Budget pawh hian tih tur a ni hial ta mai. Tin, chutih rual erawh kha chuan keimahnin kan thawh chhuah ve ti mai ilangin, State Own Tax Revenue (SOTR) leh State Own Non-Tax Revenue (SONTR) ah erawh chuan kan la hniam hle mai a, 10% pawh kan la thawh pha lo erawh chu, tan kan lak a ngai hle mai a. Tin, ramchhungah keimahni sorkar hnathawk leh office inenkawlnaah te, tin, thingtlang lama office engnge maw han hawn duh thuahte pawh keimahnina kan thawhchhuah hi hrereng a, kan tih theih chin tawkte pawh hi kan ngaihtuah thiam a pawimawh hlein ka ring a.

Tin, chutih rual chuan kan Revenue Expenditure leh kan Capital Expenditure hi kan ngaihtuah a ngai bawk a. Vaibelchhe sangli leh tih chuang zetah khan Capital Expenditure atan kan han nei thei hram hram hi vaibelchhe 493 vel emaw a ni chauh mai a. Chuvang chuan kan pawisa neih zawng zawng zaa 10 pawh tling lo hi assets siamna atan, ram hmasawna ruh rel siamna atan, keimahni tuna kan inenkawl dana kan kal hi chuan kan nei ngawr ngawr chauh a ni a. Chu pawh chu heng hi hmuh/thawhchhuah theih chuan tih a la ni nghe nghe a ni. Chuvang chuan vawiinah hian kan member zahawmtakte, experience nei tak takte leh kei aia thiam zawkten kan Finance dinhmun atang hian keimahni Budget atang ringawt hian eng anga hmasawn thei nge kan nih chu in ngaihtuah thiam maiin ka ring a. Kan thu lo ngaitla tute, kan ram mipuite leh kan senior officer zawng zawngte pawhin hei hi rilruah pawh kan vawn reng a ngai, eng ang dinhmunah nge kan din tih hi kan hriat a ngai khawpin ka hria a. Tin, chutih avang chuan kan mipuite duhsakna avanga an pangchanna laiah pawh han dawm, kan sorkar hnathawkte pawh an mamawh leh an phu awm ngei ngei pawh han duat thei leh duhsak thei kan nih fo lohna dinhmunah kan ding tihte pawh kan hriat tlan a ngai hlein ka hria a, chu chu ka'n sawi hmasa duh a.

Tin, chutih rual chuan lawmthu ka'n sawi duhna chu kan sorkar hnathawk ho, a bikin sorkar hnathawk zawng zawngte Federation-in an inphuarkhawm a. Hlawh chungchangah nikum hmasa lam atangin kan indawr a. Khatiang kan dinhmun kha keini aia hre zawk an nih avangin an phu ngawih ngawih leh an right anga an claim theih deuh pawh ni sela a awm tawk a awm alawm ti thei zelin vawiin hi kan thleng a ni ber a. Kan Chief Minister an hmuh pawhin kan duhsakna rilru leh kan sum dinhmun an hrethiamin ka hria a. Tin, kan Chief Minister pawhin an thahnemngaihna leh an inpeknate pawh ngaihsanawm a ti a. Chutiang chuan tun tumah pawh DA pung pawh nikum July thlaa pung kha kuminah hian kan inpe thei angem tih kan ngaihtuah laiin kan Chief Minister hnenah kan kal a, a dose khat alo hun leh ti tih mai lehngal a, kan Chief Minister hian kan harsat dan a hria a, engpawh nisela, kan tih tur ni tho thova lang a ni a. Pe chawt mai ila, dawhthei taka

min nghakin tun hun hi min lo thlen pui ta a, churang chuan kan dinhmun hrereng chungin kan theih ang tawkah an hmuh tur ang an hmuh ve theih hram hramna tur kan Chief Minister-in rilru zau tak nen min ngaihtuhsak a, sorkar laka that an chhuah zia te pawh hriain DA hi nikum July-a release tur ang kha kan sumin pha lo viau mahsela kan nih nih kan nihpui chho anga, pek ni se a ti a.

Tun August thla tantira July thla hlawh an lakah hi chuan lo pe phawt mai teh u, tiin min hrilh avangin Finance lamin order pawh an tichhuak tawhin ka ring a. Churang chuan kan sorkar hnathawk hruaitu intelkhawmte leh a member zawng zawng chungah pawh lawmthu sawi sorkar aiawh pawhin tulin ka hria a, ka'n sawi a ni. Tin, tuna Pay chungchanga harsatna la nei deuh han chinfel ngai nia langte pawh kan Chief Minister-in committee min din sak a, an thu chho zel a; amaherawhchu nimina ka sawi ang khan harsatna, hna tul kan official pawimawh zualte an nih nghe nghe avang leh budget-ah inhnawh deuh vek an nih avangin thla 2 chung hian hna an thawk thei lova.

Churang chuan extension hi kan tih mai loh chuan kan hna hi a phuai deuh ang a, an ti a. A awm viauin kan Chief Minister pawhin mi a hriatpui avangin kan extend leh ta a. Niminah khan ka sawi diklo deuh hlekin ka hria a, engemaw hetia han inchhan zui nghal mai anih avang hian member zahawmtak min zawttu lakah leh kan member ho hmaah pawh ngaihdam ka dil a ni. August thla chhungin kan ti ngawt a, September thla chhungin tih tur alo ni zawk awm a. Kan official-ten 'extension kan tih kha September thla chhunga inpeih hman tur zawk a ni tih min hrilh chiang a. Naktukah remchangah ka thusawina hun turah chance ka lo la mai ange ka ti a. Chu chu ka'n sawifiah leh nita sela.

Tin, tunah hian hetiang hian harsa rih mah ila kan hmalam thlir erawh hi chu a thain ka hria a. Vawiina kan ngaihtlak tak ang khan Power lama kan potential neih thatna lai tak, power-ah 3000 megawatt emaw 2000-3000 megawatt emaw kan lui atanga kan tichhuah tak tak hunah chuan, kan ram chung ngei atangin Revenue tamtak alo chhuak dawn a ni. Chu chu tun atanga kum 5 kum 10 chungah hi chuan alo thleng hman thei turah beisei ila. Kan Chief Minister hmalakna a lawmawm kan han tih hi tuna chhit en mai hi a nilo deuh a, nakin lam kan thlir a, vision 2020 khatianga ngaihtuahna kan neih chuan 2020 vision kan neih ang kha alo thlen hunah chuan, vawiina revenue lamah kan harsa kan tih kan tih pawh hi khang kan Potential atanga revenue kan lakluh tur atang khan, tun ai hi chuan hahdam takin kan sum leh pai dinhmun la thlir hunah te pawh nakinah thangthar zawk heng hmuna la thu ten an la sawi ang tih hi kan hmu phain ka hria a. Churangchuan, kan Chief Minister hmalakna a lawmawm tih tuna kan sawi piah lamah pawh khan heng hi ala awm a, mipuiten hmabak kan nei a ni tih hi ka'n sawilang duh bawk a.

Tin, chubakah chuan Oil chungchang hi kan sawi nasa a, leihnuai lam hausakna kan chan leh chan loh tih te, engpawh nisela Meidumah te, hmun hran hrana an verh hi kum 10 alo nih hnu chuan royalty atangin tam tak kan la hmu dawn a, chuta tanga kan revenue hmuh ringawt chuan tuna kut hnathawktute kan duhsakna turte, pitar leh putar chawmtu nei tha lo pension chungchang te, tin, piangsual enkawltu neithalote han enkawlna chungchangah pawh tunah hi chuan keimahni sum atang pawhin kan meet thei alawm kan tih ve hun hi kum 10 kan han nghah hi chuan hun tha PATHIAN in min pe mai dawn niin a langa. Heng kan thlen hma hian harsatna kawng kan la zawh rih a, chumi kawng kan awm chung erawh chuan

tuarchhel leh taimakna nen, thiam taka kan sum hman a ngaiin ka hria a, malsawmna lo thleng tur hai chhuak thei leh dawng thei tura, sorkar roelna leh mipui pawhin kan rilru sukthlek thlenga ngaihtuahna kan hman dik a pawimawh hlein ka hria a, chu lam chu ka'n sawilang duh zawk a.

Tin, mau te pawh kan han sawia, a awmsa hisap chuan a survey report khawilaiah emaw ka chhiar ve, mi ziak chhawn ka chhiar veah chuan kan rama mau hi seng thei ta vek ila kumkhatah vaibelchhe sangthum leh zali leh sawmruk hi revenue a awm ziah thei dawn a ni tih ka chhiar a. Hetah Assembly-ah kan thut ve pawh khan vawihnih khat chu ka sawi ve a. Mahsela heng lachhuak tur hian tunah hi chuan a thu-a hisap mai a ni a, zu puchhuak dawn tak tak ila, a putchhuahna man kha kan mau zuk putchhuah man ai khan a to daih mai a ni. Chuvang chuan kawng thate kan neih a pawimawh a, chungte pawh chu hei kan nei chho zel, kawngpui dung kawngte pawh kalkawng atan leh transport atan kan buatsaih mup mup a, engtik niah emaw chuan kan ram roelna hi mipui leh mawhpurhna latu apiang ten Pathian duhzawnga kan kalpui zel chuan, chung niah chuan tuna a thua kan hisap hi a takin a lo thleng tawh anga, hausakna, Pathian malsawmna a takin kan ram hian kan dawng dawn a, chu hmathlir chu kan hmaah hian a inchhawp a ni tih hi vawiinah hian kan finance dinhmun harsa mahsela kan Chief Minister kaihhraina azarah tunah hian chu lam chu panin harsa mah ila kan kal hram hram a ni tih ka sawi duh a.

Tin, finance lamah hian nichinah khan kan member zahawmtakte pawh khan an sawichhuak a, kan Chief Controller of Account office tawt zia leh an hah zia in han sawi kha a lawmawm ka ti a, khatianga kan department-te harsatna leh an thawhrimna, taimaknate min lo hriatpuitu kan hotu pawimawhte in awm kha. Ani taka han thendarh dawnin an sawi ang khan kan sum leh pai en reng a ngai a, a neitu an ni ber zawk mah mah reng nghe nghe a. Tunah hian an hna work load ngaihtuah chuan officer hi group 'A' 'B' pay slip-a hlawh la ringawt pawh hi a sing tel teh meuh kan ni deuh tawh mai si a, khang pay slip han seng fel te, tin, GPF account han hawn fel sak vekte kan sorkar hnathawk zawng zawng accounts singnga chuang han enkawl te; pension hi kumtin hian a sang bi hian kan awm ve a ni a, chu chu nitin 10 dawn emaw kha buaipui thar ngai ve reng a ni bawk a. Khang enkawl tur khan hmana an awm ngai strength deuh khan kan la kalpui a ni a. Amaherawhchu kan Chief Minister-in a pawimawhna te hriain tunah hian Account Officer tlem azawng chu recruitment MPSC-in mi tihsak a, tin Assistant leh Account Assistant pawh engemawzat contract talin min ngaihtuah sak a, chuti chung chuan an la rit hle dawn a ni. Amaherawhchu hlim takin, rawngbawlna anga ngaia an thawhrim thin avangin vawiin tlaiah hian kan Officer-ho zawng zawng chungah lawmthu ka sawi a. Tin, mi chitin dawng sawng an nih avangin an laka vuivaite pawh an awm ve thin a ni. Amaherawhchu, an thawh that leh mi tam tak dawng sawng an nih hi kan hriatthiam an ngai hlein ka hria a, chu chu kan sawilang duh a. Tin, a hmun hma te an tawt dan hriat a ni a. Hengte chu kan Chief Minister-te pawh kan la ngen anga, remchang office zau zawk emaw neih dan hi an dinhmun pawhin a phu hle a ni.

Tin, Lottery hi engemaw chen han chawlh leh revenue kan hmuhna tha tura ngaih ve pakhat a ni a. Amaherawhchu, hei kan Chief Minister-in min chin fel sak a, chuvang chuan, engemaw rei lo deuhvah chuan operate theihin a awm ang. Helai

atang hian engemaw chen chu revenue kan hmuh theih kan beisei a. Engpawhnisela, (Dr. R. Lalthangliana : Pu Deputy Speaker, point pawimawh tak kan han sawi lai tak kha chu, staff lak belh leh tih lamah khan, India ram State dang hei kan thenawm lawkah pawh hian Director pathum ten an then deuh vek tawh mai. A hna kalhmang sem dan laiah sawn a staff lak belh chiam chiam tih lai ai mah khan sawlaih sawn mumal deuhva kan tih hi ka rawn sawi chhan deuh ber a nia, kha lai kha min chhan theih chuan ka lawm khawp ang) Nia, hei han awm ve thar te pawh ka ni a. Finance lama kan hotute nen kan lo la sawiho anga anmahni te nen pawh chuan kan lo sawi ho ang e.

Tin, Finance lamah chuan kha kha duh tawh mai ila, a tawpna atana ka sawi leh duh erawh chu pakhatnaah chuan tuna kan State Own Tax Revenue kan estimate leh State Own Non-Tax Revenue kha department zawng zawngte mawhphurhnaah a inngat ta a ni. Kha kha thuin kan thun a, a taka a lo thlen loh chuan khati zat kha pawisa kan neilo mai dawn a ni a. Chuvang chuan, kan budget pass-in awmzia a neih theihna tur chuan kan Minister zawng zawng te, a bikin kan Senior Officer zawng zawngte khang department changtute khan tan an rawn lak a, khum zaka an rawn chet kan beisei a, kan dinhmun hian a phut bawh a ni. Chutihruah erawh chuan AG in min audit-na report, CAG Report-ah khan Tax Collection-a cost of collection keinia hian a san bik zia chu kan hriat thain ka hria a ni. CAG in 2009-2010 report a pekah khan keini kha department thenkhatah chuan engemawzat rawn thawhchhuahpui mahsela All India level ai kha chuan cost of collection kha a let 600 te in kan sang a ni, kan cost of collection min chhut sak kha. Chuvang chuan kan tax lak emaw service lam atanga kan hmuh emaw engpawh mai hi kan hmuhna tur atana kan insensonaa collecting charge anga zuk charge theih kha, kha pawh kha kan tihhniam tel a ngai a ni. Chu chu kan hotute zaninah hian ka chah duh a, a tawpna atan chuan (interruption)

**Pu K. LIANTLINGA** : Pu Deputy Speaker, nichina kan sawilai, engtin nge khatilai administrative approval leh sanction vel kha awlsam deuh zawka tih theih dan a awm a ngem tih lai budget speech ami kha min hrilhfiyah thei em aw?

**Pu H. LIANSILOVA, MINISTER** : Kha kha kan Chief Minister-in a sawi tawh a, hmachhawp mi lo neihpui tawh a. Tin, kan senior officer, kan Secretary-te pawhin engemaw chen an lo thlir chho tawh a. Chuvang chuan tunhmaa dawhkan, an han sawidan kha chuan 100 atanga 120 tih te a ni. Khatiang kal kual lo tur khan ruahmanna siam ila tih kha a ni a. Chu chu engti takin nge tih keini ang pa mawl tan chuan a hriat mai theih lova. A kawng erawh chu zawn mek leh engemaw lo haikuak deuh tawh pawh awmin, khami thu kha ka rawn chhamchhuak ve a ni e.

**Pu LALDUHOMA** : Pu Deputy Speaker, khami piah lamah khan Central Financial Rules te, Treasury Rules leh Account Code tih te hi tawm tawh lovin, a hranpaa neih chhoh ve te hi kan tum hnaivai thei a ngem le?

**Pu H. LIANSILOVA, MINISTER** : Ngaihtuahna a awm tawh nge ka hre lova, kan la nei thui lo a ni mai thei e.

Tin, hei chauh hi a ni lova, Service Rules dang keimahni State-in kan neih tur chi angah pawh hian Central Rules hi kan adopt vek a, hei hi a tha reng angem? tih te pawh kan sorkar hnathawkte leh a concern officer ten an lo la ngaihtuah zel ang chu. Ka'n sawi duh chu Finance-ah khan Economy Measure hi ka sawi duh a. hei hi India sorkar pawhin tun July ni 6 kha niin ka hria a, Office Memorandum an tichhuak a. Chutah chuan sorkar office-ahte, zin leh training chungchangah te, seminar-ahte, heng zawng zawngah pawh hian Economy Measure lak vek tur.

Tin, post thar din, siam leh hnalak chungchangah pawh an rawn tichhuak a, India sorkar hausa pawhin an tih chuan keini pheih chu inhrek viau tur kan ni a, engangin nge hemi kawngah hian tan kan lak ang tih chu sorkar thu ngaichang ila. Planning-ah khan 12<sup>th</sup> plan-ah kan zuang lut dawn a. Chuvang chuan kan plan kan buatsaih leh turah pawh kan mithiam zawkte puihna kan mamawh hle dawn a ni. Sorkar atangte pawn hna kal hmang siamrem a ngai dawn a ni. Kan plan chungchangah leh kan sorkar hmalaknaah hian monitoring tha a pawimawh khawp mai a. Chuvangin kan Monitoring hi thum chak a ngai hle a ni. Tin, Chhimituipui kha kei pawhin ka va tlawh tawh a, potential an nei tha hle a, sawi nawn pawh a ngai lo a ni. Tha taka thawh theih dan awm se chuan, 70% saw chu Buh thar atanga intodelh theiin ka hria a ni. DoNER lamah heng Projects DPR thehluk te chu awm mahse Union Agriculture pawh khan mithiamte kutthlak a va tha ve a tih avangin kan Chief Minister ho hian consultant firm plan siamna law law hi plan-ah dah nisela tiin kan plan-ah pawh kan dah a ni.

Tin, Statistic kha pawimawh tak mai, ri bengchheng pawh awm lova thawk ngat ngat mai a ni a, kan GSDP te pawh hi min chawhchhuah sak a, an kut hnu..... lo chhuak thin a ni a. Mizoram Economic Survey Report pawh kha anmahni kuthnu a ni ber a, an ni hi district tinah pawh kan la nei lova. Tin, kan statistic-te pawh hi rintlak deuh ni se tih pawh kha hma a sawn chho viauin a lang a. Kumina Statistic Hand Book tichhhuahah khan kan department hotute hming kan han dah dan kha a lo fuh lo hle mai taka, in ngaihdam pawh department aiawhin ka dil nghal e. Kan Officers-te pawhin khati takin Director-te pawhin an lo enchik tawk lo pawh a ni thei a. Kalphung a awm a, alo chhuah leh hunah chuan kha aia dik leh mawihnai kha beisei ila, kan lo chhinchhiah ang e.

Tin, Pu Joseph Lalhimpua, Member zahawmtakin Central Funding a rawn sawi kha kan Minister-te leh kan officer-te zawng zawng pawhin chhinchhiah a tha hle mai. Kan Chief Minister hian min fuih reng a, amah hian a zuk sawifel a, han umzui leh naah hian kan chak lova, chuvang chuan Food Processing-ah pawh kan hmuh tur vaibelchhe sawm ruk chuang zet kan hmuh tur kan hmu thei ta lova; kan chan dawn nge ka hre lo. Khatiang ang kha thil awm thei anih avangin tan kan lak sauh sauh a ngai a ni. Keimahni Annual Plan Fund pangngaiyah hi chuan tih tham a awm lova. Tin, Central Sponsor Scheme atana state share ngai ang tur ang chiah thla veng kan dah ve theih chin a chau a, tan kan lak a ngai hle a. Tin, NEC leh DoNER lama mimal thil tunhmaa lo kal zeuh zeuh thin, tunah hian kan han screen deuh takah hian hriatthiam loh palh thil a awm thei a, a awm thove. Amaherawhchu, heng atanga sum lo chhuak hrim hrim hi kan hotuten zuk zir chian hian kan state-in a sum hmuh tur quota-ah khan an lo telh ve zel thin si a, keiniin Plan Gap Funding



atana kan mamawh ngawih ngawihthe alo nih bawk avangin, 'private ai chuan sorkar leh department priority i pe ang u' tiin review leh a ni a, duhsak chu an duhsak awm hle a, lehlamah erawh chuan thil fello tak hi a awm thei dawn nite pawhin hriat ruau ruauna a awm, kan fimkhur ta hle a, fimkhur zel pawh a tha ang tih hi ka sawi duh a ni.

Tin, Horticulture chungchangah khan SFAC tih hi a kal hmang tlem han sawi ila, SFAC kha Consortuim emaw Society tih emaw ang hi a ni a. Central-ah an han din phawt a, society a ni a. Ministry-in an hnenah khan pawisa an pe phawt a, kha society khan state counterpart lo din rawh u, an tih kha State-ah din ve leh a ni a. Chutah chuan pawisa kha an rawn pe leh a, Government account-ah lut lovin, society account-ah a lo lut a. Chuvangin, State Plan Programme-ah chuan kan state programme anga lang lovin a awm ta a, kan financial account-a lut vak lo bawk a, society pawisa anih ang khan a kal chhova. Amaherawhchu committee fel tak siam a ni a, kum 2005 – 2006 a tan a ni maithei. Khata tanga pawisa an dawn tak kha, a tirah phei chuan kan Chief Minister zahawmtak kha a State society-ah khan president a ni nghe nghe a ni.

Tin, a Department Director kha Managing Director angin a function a ni. Tichuan State Level Committee-in scheme a zu theh thlak an lo approved kha, khutah Central-a consortium, an parent body-ah an thehlut a, an lo umzui sak a. An sanction chuan khatiang khan a rawn kal chhova State Finance channel pangngai hmang lovin a kal a, a policy ka hre tam lutuk lova. A hmalakna erawh chu kan State leh Farmers-te tana tha tur a ni a. Chitea kan Horti Central Farm angah te Anthurium scheme-ah te pawh an hmang tangkai viau a ni. A fund kha bank-ah account an hawng a, chutia State Level Committee thu leh kaihhruaia operate thin chu a ni.

Tuna Pu Tlinga han tih Bank Account no. nen min rawn pek ve si, a inmil lo a tih pawh kha, tuna min rawn hrilh leh dan hi chuan core banking anih avangin a sanction kha a rawn thleng chho leh a. Tunah hian 20 crore emaw chu alo lut leh ta a ni e. Chuvang chuan, khami zawhna chhanna buatsaih hnuah....

**Pu K. LIANTLINGA** : Pu Deputy Speaker, July ni 14 a Bank Statement hi lak a ni a. June ni 30 khan interest pawh an pelut tawh a. Cheng vaibelchhe sawmhnih leh tih awm si kha Bank Statement-a min pekah hian ₹ 14,20,753/- chauh min pe a ni. He House hi wrong information min pe tihna a nia, Mizorama rorelna sang ber, member zawng zawng, kan Minister-te nen lam khan, House zahawmna te pawh a ti zahawm lovin ka hria a, Statement dik tak kha min pe thei em? tih lai kha ka sawi chhuah duh chu a ni.

**Pu H. LIANSILOVA, MINISTER** : Tunah hi chuan information ka neih theih tawh chu ti hi a ni mai a, Ni 30.6 balance kha nuai 14,20753/- a ni a. Ni 6.7.2011 ah core banking-in nuai 2000 a lo lut leh a, a zawhna kha ni 30.6 bank balance anih avangin nuai 2000 hi a lo la lut hman lova, chuvanga kan chhanna kha inmil ta lo mai a ni e.

**Pu K. LIANTLINGA** : Pu Deputy Speaker, information a hmuhdan kha July ni 14 ah bank statement hi print out a ni a. Chutah chuan clear balance kha ₹ 20,14,19,503/- (cheng vaibelchhe sawmhnih leh nuai sawmpali singkhat sangkua zanga pathum) a awm tawh a ni. Amaherawhchu, bank statement hi a thla pum pawh min pe lova, Pu Deputy Speaker, June 1-30-ah an print out a, mahsela, June ni 30 chauh interest luhna lai te chauh kha an rawn tilang a, Pu Deputy Speaker, ka sawisual anih loh chuan he bank statement hi tihdanglam a ni.

**Pu H. LIANSILOVA, MINISTER** : A dik tak min pe turah ka ngai a, tuna information kan lo pek tawh chin che u kha, helaia in dawnna kha chu ni 16 July pawh nisela, a information an collect lai hi ni 30.6 balance kha a lo nih si chuan tuna ni 6 thla 7 (6/7)-a core banking-a vaibelchhe 20 an rawn thun kha a la lut hmanlo tih kha chu a dik a ni a. Engpawhnise, min rawn tibengvar a, kan lo enzui zel dawn nia, a lawmawm e. Tin, a department bik pawh kha a sawi hleihtheih tawh bik vak lova, kan member zahawmtakte han zawh, han chhantheih tur awm deuh a, hei min tanpuitutena min han puilh ang hian ka'n chhang mai ang a. Pu Thangtea'n Car Loan a tih kha Special Car Loan hi privatization of Government vehicle avanga entitlement Sorkarin a sawi Officer-te ta, khatiang sorkar motor nei ta lo te tana siam a ni a, he special scheme hi time-package anih avang khan chhunzawm zel a ni ta rih lova ni. Officer 100 chuang hnenah pek an ni a, 2008 atang khan hei hi chhunzawm a ni ta lova ni. Tin, Lt. Col. Z.S.Zuala han sawi kha, Sainik School chungchang kha Finance Commission award hi a ngaihtuatu ber chu High Level Monitoring Committee an ni a, Chief Secretary Chairman-na hnuaiah. Kuminah hian B.E.-ah khan (2011-12ah) Planning Commission approved angin vaibelchhe 12 leh a chanve, crore 25 chanve kha 50% kha dah a ni a. Hei hi chak zawka hmalak anih theih nan High Level Committee-te pawh ngaihtuah tira, chak zawka kal tura tih tur an ni ang a. Tin, chak zawka hma an lak theih chuan B.E. stage-ah pawh mamawh ang hi chu la ngaihtuah zel tur a ni ang tih ka chhanna a ni a.

Tin Jethropha chungchang kha, Jethropha Oil Exploder hi Khawzawlah leh New Vervekah dah a ni a, Engineer ten an installed tawh a, Khawzawlah chuan phase-III power supply a awm tawh avangin trial run neih tawh a ni a. A oil pawh kerosene aiin a chhit a nuam zawk a ni awm e. Vervekah erawh hi chuan phase-III power kan la hmuh theihloh avangin trial run kan la ti theilo a ni. Tin, Pu Tlinga'n a nursery chungchang a han sawi kha Private Nusery Rule hi kan nei a, Central pawhin a nei a. Chumi enkawp leh hmang kawp chuan kan Department Officer-te hian an kalpui a. Tunah hian private sector-ah 16 niin ka hria, hmanna zahna ka chhannaah pawh khan kan nei a. Heng hi tuna kan Horticulture fruit, plantation a ni deuh ber, chung atan chuan rin an ni a. Tin, chu lovah chuan dil thar an awm nual a. Amaherawhchu, a criteria khatiang Nursery registration atana a Rule-in emaw a sawi ang an phak loh deuh avangin a diltu duhawm tak takte hi kan tihlawhtling thei ta lo a ni tih hi kan Department hotuten an lo buaipui dan min hriattir dan chu a ni a. Kha kha kan in react theih dan tawk ni rih mai selangin.

Tin, chu lovah chuan khatiang lam chi kha a ni a, han kal deuh hlek ila, Pu Duha'n NLUP chungchang a han sawi leh Pu Ramhluna'n pawisa dinhmun chungchang leh motor engemaw an han sawi te, Pu Tlinga'n a han sawite kha a kawp hian han sawifiah ve tum ngawt ilangin. Pakhatah chuan thahnem min ngaihpuina kha a lawmawm takzetin ka hria a. Tihlawhtlin loh hi min hlauhpuia em em a ni tih kha a

hriat khawp mai a. Amaherawhchu, keini pawh kan rin ai hian a hna hi hetia kan han sawi mar mai ai hian a lo har a. Chuvang chuan, a Baseline Survey pawh kha vawihnih vawithum kan tih nawn a tul vangte pawh a ni bawk a, kan zawh tum hun atana kan tih kha kan sawn kan sawn mai a. Chuvang chuan, kan hnathawh tur hi ti thuai thuai ang han tih a tlak mai tur a ni lo. Kan ram damchhung daih tur hna thawh kan tum bawk si a. Chuvang chuan, a harsa ta viau a, tun hi ka thleng a. Heti chung hian a hah ho hi chu an hah khawp mai a, kan appreciate lo a nih pawhin, an hah ve a ni mai ang a. Chutih rual erawh chuan kan hotu thenkhatte hi chuan NLUP Office lo zu tlawh zawk zawk leh thil hriatthiam lohte pawh lo zu zawtfiah thinte pawh in awm a, lawmawm an ti khawp a. Pawnlam atanga han ngaihtuaha engemaw fel lo tak awm niawm taka han ngaih theih mai thute hi a awm a ni thei e. Keimahni, kan hotute zingah pawh khatiang kha thil awm thei a ni a, inchian tlan hi a tha zelin ka hria a. Tin, langtlang taka tih hi kan sorkar, kan House Leader pawhin min kalpui a duhdan a nih avangin thingtlangah pawh heng Beneficiary list-te hi, hmanni khan ka sawi tawhin ka hria a, a nei turte chuan copy hi an nei vek ang a, vantlang property pawh a ni tur a ni, mitinin an hmuh theih tur, DC Office-ah pheih chuan an tar vek ang. Tin, website-ah pawh dah tur kan ti a, chuvang chuan to deuh hlek mahse kan mamawh hmasa a ni emaw ti a kan hotu thenkhatin an ti chung pawhin NLUP website-ah te pawh thunin, tiang hian a duh apiangin en a, tlawh theih tura siam a ni a.

Tin, kan pawisa hman dan tlangpui hi a zawng a za chuan ka sawi seng lovang a. Amaherawhchu, a pawisa ruahman dan tlangpui Apex Board-in a approved dan tlangpui hi han sawi ilangin - nikum pawisa vaibelchhe 234.82 atang khan Development Component kan tih beneficiary ho hna kal tur hi vaibelchhe 198.71 a ni a, chu chu a sum pum pui atanga 85% ang vel a nih chu. Tin, Infrastructure Component kan tih kha vaibelchhe 20.49 a ni a, chu chu a sum pumpui atanga 8.72% ang a ni a. Tin, Management Component kan tih kha a thawktu hlawhte, tin, capacity building kan tih training-na te, Office dinna te, tin, District leh Directorate-a kan Nodal Office kan puihna atante hman a ni a, chumi atan chuan vaibelchhe 15.62 dah a ni a, chu chu a pumpui atanga 6% ang vel a ni a. Tichuan, tuna motor lei kan tih zawng zawng kha tuna 6% chhunga khung hi a ni a, tin, pawisa kan hman tawh kha a chiah chiah hi chuan a sawi theih mai lova, nitin an sem tih reng anih avang hian. Tin, lehlamah chuan nikum Financial Year pawisa kha a ni si a tih kha, nikum Financial Year pawisa kha kuminah hman hi kan duh avangin a draw pawh kha kan draw mai reng a ni a. Khatia kan draw loh chuan NLUP hmasaah kan hlawhchhamna chhan pawh kha sum an mamawh hun taka pek anih loh chuan tih kha hlawhchhamna anih avangin, khami um zui pha thei tura kan inruahmanna a ni. Tin, pawisa khatia kan draw a kan kawl teuh khan department chest-ahte a awm chuan a him tawh thin lova, chuvang chuan, K-deposit hi thenkhatin dan lo an ti na a, kan Sorkar sum deposit head-ah hian K aia sei hi a awm a, a dah theih chu a ni ngei, tin, kan lo dah kumkhua a, kan State Sorkar kal tawhah pawh hian kan dah vek a, dah lo anga in sawi kan awm pawhin hriatsual palh a nih ka ring a. Kha vawihinah khan kan hotute khan an sawi Chiang viau mai a, chuvang chuan K-Deposit-ah hian kan la dah zel a, an sem tur mamawh an dil a, Finance-ah NLUP Board kal tlangin Department-in an han dil a, pekchhuah thin a ni a, an sem hun tur taka an sem theih nan, chutianga dah chu kan ni a. Tunah hian K-deposit-ah NLUP pawisa hi vaibelchhe 57 nuai 81 a awm a. Tin balance-in-hand an la sem zawh chiah

si loh Department hrang hrang kuta awm hi vaibelchhe 12 Department 9 kutah a awm a, a zat a inang lo theuhva chutiang chu tuna dinhmun a ni a. Kha kha nichina kan han sawi (Interruption)

**Pu LALDUHOMA** : Pu Deputy Speaker, department 9 tih kha line department kha 8 a ni si a, eng nge 9 a nih na kha...?

**Pu H. LIANSILOVA, MINISTER** : A NLUP office nen a kan sawi pawlh vang kha a ni a, aw 8 ni e line department kha.

Tin, vehicle chungchang han sawi pawh kha zawhna awm pawh a ni a. Kan NLUP Apex Board-ah pawh motor lei hi a tulna lam han sawi kha chuan tul tih deuh mai a ni a. Kan Chief Minister phei chuan mipui, mirethei zawkte tana pawisa kan hman tur motor leina atan an hmang ti a miin an sawiin engtin nge kan chhan ang a ti a. Chuvang chuan engemaw chen kha Apex Board-ah pawh la ngaituah that leh turin dah that a ni. Amaherawhchu ti hian kan han kalpui ta a, Directorate-ah motor an lo nei mang miah lo mai a, intawm tur kha kan privatize zo vek a. Chuvang chuan Horticulture Department-a Nodal Officer kha kan pek loh chuan District a tlawh thei lo leh ta a. Tin, District-ah khan DC pawhin khatianga motor han thawh chhuah tur kha a lo nei lova, Line department-te pawhin mamawhna khan min nawr tawlh tawlh a, lo hire phawt mai teh u kan ti a, hire system-in kan ti a. Amaherawhchu kum 1 dawn kan han kal khan, e mahni ta kan neih mai hi kan hlawk zawk ang, administration pawh a har lutuk tiin hei NLUP Board Pu R.Selthuama te, a mimal hming pawhin han sawi ta ila, kan Board Chairman ten ngun taka an chhut a, rawn ngaituahin an rawn kal pui a, NLUP Apex Board-ah pawh a tul ngang chuan kan lei ang a, hna thawhtir chu kan duh bawk si a tiin, hemi 17 kan lei takah hian, kha kha District implementing officer-te leh NLUP Board tana kan han tih bakah khan tunah hian Pu Ramhluna zawhna ang khan 53 hi lei turin sanction pawh kha a awm reng a ni. Chu chu district pariatah line department theuh chuan 64 kan mamawh zawk a, amaherawhchu kan hotuten 53-in in manage theih hram tum teh se an ti a, tichuan chu pawisa pawh chu sorkarin a sanctioned a. Amaherawhchu Motor kha lei mai tur alo awm leh ta lo a ni, kan duh hun hun leh kan duh ang zata lei tur kha a awm lova, tunah hian kan Chief Minister-in a hmelhriate han bia a, khulaia company-te han buaipui chuan kan hmu mai mahna kan duh ang kha tih chauh ala ni a. Tin, thil man hi a sang chho hret hret a, pawisa la bang deuh ang a awm pawh kha insure thain hriat a ni a. Tin, motor han tih chuan District-a han luhna a oil-te, a khata han thun turte alo ngai a, contingency expenditure nen chuvang chuan chuang deuh hlek anga han hisap kha alo awm ta a ni e. Chu chu ka hrilhfiah thiam dan ni sela.

**Pu C. RAMHLUNA** : Pu Deputy Speaker, ni 29,2011-a in sanction hi a inmil lo tlatin ka hria a, chu chu a ni ka buaina. Tah khan motor 36 sanction kha in pe a, tah chuan nuai 213 leh 46296 a ni a, chuan a rate in quote kha pakhat zelah khan nuai 529279 a ni a, kha mi rate anih kha chuan nuai 1905444 a ni tlat. Tichuan in sanction nen hi chuan nuai 22,92,252 khan defference a awm a, he mi vehicle rate hi

an ziaik dik lo nge ni a a mr hi a dik lo aw tih ka ngaihtuah a, khalai kha enchian leh ngai viauin ka hria.

**Pu H. LIANSILOVA, MINISTER** : Pu Deputy Speaker, he lai atang chuan a chhiarkawp han chawh dik pui mai kha ka tan chuan a har khawp mai a, chuvang chuan kan office lamah account mi te an awm baw k a.

**Pu LAL THANHAWLA, CHIEF MINISTER** : Pu Deputy Speaker, thil awmthei pakhat chu Insurance pawisa tam tak a awm a, registration a awm baw k a. Tin, eng eng emaw expenditure tam tak hi a awm baw k a ni. Chungte pawh chu a tel thei a, engpawh nise, an mamawh ang an leina tur atana pek a ni a, a chuang bang a awm chuan a nihna tur dik takah an dah let leh mai a ni.

**Pu LALDUHOMA** : Pu Deputy Speaker, tuna ka'n zawh duh leh chu K-Deposit-a awm zat leh cash balance awm zat min han hrilh kha a component pumpui atanga a sawi nge, beneficiary component atanga a sawi tih lai kha ka hre hrang duh deuh a.

**Pu H. LIANSILOVA, MINISTER** : A...ni e, chuti chet chet chuan ka hrethei mai lova, amaherawhchu, infrastructure component-te pawh kha a tel theihna chin a awm anga, tin, department thawk tura lo in lachhuak tawh, pek chhuah tawhte pawh kan nei a. Chuvang chuan tunah chuan a dik chiah a, han sawi theih chu ka nei tawh lo na a, amaherawhchu, nichina ka sawi tawh ang khan a infrastructure pawisa pawh ni se Committee hi thuah hnih thuah thum kan nei a, chungina uluk taka an rawn enpui leh a mihring thlan turte, a hnathawh tur thleng enfiaha tih anih vangin a sum engemaw lo chuang deuh a awm anih pawhin chuang ta leh riral mai mai lova, dik taka awm thei zel tur kha a ni a, tunah hi chuan tuna a tlangpui a kan sawi bak hi chu ti hi chuan ka chhang fel tak tak pawhin ka ring lova, kha kha tawh thei mai sela a tawh thei mai ang a.

Tuna kan sawi kha beneficiary component atanga chhut a ni an tia nih chu. Tin, thil dang kha chu a tlangpuiin kan react thawkhatin ka hria a, Agriculture lam tlem ka sawi duh a, sawi tur tam tak a awm a, amaherawhchu, kan hotuten min hrechiang awm deuha kan ngaih min hriatpui lo deuh a awmin ka hria a. Pakhatnaah chuan kan hriat tlan theuh chu kan Finance statement sawi ang deuh kha a ni. Kan thawhchhuah ve hi kan thla hnih tla pawh a ni lo. Nichina, finance-ah revenue-a kan thawhchhuah ve tur kan tih pawh kha kan sorkar hnathawh thla hnih vel hlawh tur vel chauh a ni. Chutiang vel baw k chuan Mizoramah hian Agriculture thawhna rama eizawanna ram siah hian kan thla hnih ei emaw awrh chauh kan thawk chhuak a ni. Chuvang chuan kan hotuten uluk takin kan mithiamte pawh rawnin University lam amite nen ngaihtuahin buh thar tam hi uar a ngai a ni, chuvang chuan 'Buh Thar Tam Uar' hi a kum i puang ang u, kan ti a. Kan puan tak avangin kuminah hian thar ur tur a ni lo. Synod pawhin Intodelh kum a puang a, Intodelh kum atanga intodelh tur a ni lo, kha kha inzirtir zel tur a ni. Kan ramah hian he thu hi kan zirtir lohna a rei tawh lutuk a. Chuvangin buh thar tha duh aram pawh kan awm tawh lova. Buhfai ₹ 22 a kan lei hetah hian ₹ 9 in kan hralh leh mai baw k si

a, mi an a duh ta lo viau mai a ni. Chuvang chuan i let leh ang u, he inzirtirna hi i kalpui ang u, tin, kan ramah hian tih tak taka ram kan hmangaiha kan thawk a nih chuan inchawm theihna hi a awm a ni. Buai hma zawng zawngin Mizo pa chu mahni intodelh, midang zen zen duh lo, khatiang rilru kha a ni. Kha rilru baw kha pu leh turin, tin, kan ram economy siamna tur mamawhna ngaihtuah hian, huai takin i pen ang u, kan ti a. Thenkhatin min nuihzat viau a, thenkhat chuan Pu Hawla hi buh thar tam kum te a puan ngawt, Pathian em ni? lo ti taw k te an awm a. Mahse, kan thil tum hi hrilhfiah chuan, 'e, a lo ni tak maw', an ti. Kan hotute pawhin in hrethiam chuan ka ring a. Amaherawhchu, kan thutna boruak avangte pawh hi a ni thei a. Kan ramah hian a nihna takah chuan thildang malsawmna leh revenue hai chhuah tur kan tih kan sawi kan sawi pawh hi kan ram atang ngeia chhuak a nih loh chuan, nichina ka sawi ang, power-te pawh kan rama chhuak a nih lohva, khawilai lungalhthei emaw, eng fuel fuel hmang emaw a nun kan tum chuan kan hlawhchham mai a nih hi, tute kuta tluk luhna emaw a ni. Chutiang chuan kan ram buhfai ngei hian nung ve ang aw, Mizopa chu han tih tharna a ni a, a pakhatnaah chuan.

Pahnihna, buh thar tam nih a hlawk tak loh avang leh kan inthlahdah avang hian zelthel kan tam a ni, dik tak chuan. NRG ring mai mai pa hi kan tam tawh. Chuvang chuan heng pawh hi kaih harh ngaiin kan hria a. Tin, tunah hian kan officer-te an phur em em a. Kan technology kan hman ve chuan chance a awm e, an ti a. Intodelh chu a la hla lutuk, mahse thar tam dan erawh chu an hria. Chuvang chuan SRI kan tih te kha kum 2 chhung kan han ti a, Propaganda ang deuhte pawhin kan han ti a, uar lutuk te pawh min ti mai thei. Mahse a result hi kan thlir leh vek a. Tunah hi chuan hectare 3000-ah hma lain kan cover a ni, RKVY hnuaiah. Chuvang chuan kuminah hian 10% chuan kan pung ngei tur a ni, kan ti a ni. Director te leh kan joint Director ten bial an insem a, kan DAO ten chanvo heti zat hi ka thawk ang, an ti a, ti khan an la thlap a. Tin, a endiknaah pawh, monitor kan tihah pawh, NLUP-ah pawh hian a ni a, an thla lak zel tur, thawh hma leh thawh tak hnu thla lak zel tur, kan ti a. Hmanniah a theih chin chin kan han review a, a tha dawn khawpin kan hria a, chuvangchuan, NLUP ah hian hei Pu Selthuama ho pawhin kan sawi tawh a, a implementing officer ho zawng zawng district ami chuan digital camera nei vek sela, an va endik kha a thawh hmain thla an la anga, a thawh leh hnu ami nen hei ka thawk a tih khan thla an la leh anga, chutiang chuan i ti chat teh ang u, tiin tan lak kan tum nghe nghe a ni, sawt pawh a sawt dawnin kan hria a.

**Pu LALDUHOMA** : Pu Deputy Speaker, SRI hi thingtlang kan lo neih dan pangaiah emaw, tlang rama lei letah hian emaw, tuia chawm ni kher loah hian a hlawhtling ve thei em? in try tawh em?

**Pu H. LIANSILOVA, MINISTER** : SRI tui chim lohnaah te enchhin a ni a. Hmun hnih khatah an en chhina, a tha chu an ti a, amaherawhchu Champhaia an tih pawh keimah pawn ka han en a, amaherawhchu la tlangzarh lutuk mai hi thil hi kan tisual ang tih hi a hlauhawm a. Tin, a hnim duh em avang hian tunah pawh leilet pangaiah pawh hian kan department hian hlo kahna hman deuh hlek a ngai a ni an ti a, chuvang chuan, kan la fimkhur deuh rih a, tin chu loah chuan area expansion-in tan kan la baw k a. Tin, leithain tan kan la baw k a. Session hmasaah khan kan member zahawmtakte a bikin Pu Lalduhoma ten, leitha, fertilizers lakchhuah a pawimawh thu in sawi kha kan umzui vata, hei hi kan report-na pawh ni pah mai

selangin, tunah hian MAHFED stockist-ah kan dah a, anni nen kan thawk ho a, an ni hi stockiest-ah kan hmangin quintal 4000 vel hi chu an nei reng a. Tin, a mamawhin an lei tur pawhin kan nei a. Tin, Pu Hmingdailova Khiangte, kan member zahawmtakin an urea a thur ti a, a complaint kha kan lo hre tawh daih a. Kan Director-te pawhin an lo han enzui a, mahse a thur an tih kha Dan ang tak chuan, a thur an tih bag kha an rawn la anga, khithah laboratory-ah an lo endik tur a ni a, an rawn la leh tawh silo a, a thur lai kha a awm leh tawh lo nge ni a, Lungdai khuaah nge ni a complaint tute kha. Pakhatah kan loneitute khan chuan thil te tak te hi an sawi buai chiam nge ni aw ka ti a, kan Director pawh hei ka zawt leh tawha, kan session dawn avangin engemaw sawichhuah a awm takin ka ti a, alo lang leh ta reng reng lo mai a, kan han umzui leh dawnin tute nge kan hre leh tawh silova. Engpawhnise, thil awm thei anih pawhin hei hi chu fertilizer hi enkawlina Dan kan nei a, Director hi authority a ni a, kan DAO zawg zawng hi inspectorate authority kan pe vek a. Tin, tunhmaa Burma lama kalchho thin pawh kha hei kan man deuh zeuh zeuh reng a, tunah hi chuan mi pawn kan thu an awih viau chuan kan hria a, chutiang chu kan dinhmun a ni.

Tin, thingtlangah pawh thar tam tir kan duh avangin leitha kha RKVY hnuai atangin a theih chin chin an va dah sak a, tunah hian thingtlang khaw tam takah an hmang a ni. Hei Pu Piana bial Kepran hi an fing riau va, kum engemaw zat an lo hmang tawh a. Anni chuan an zawngchhang a, an chul pawh an rit zel mai a, zawngchhang thlak an ti hle mai a. Kuminah hian kan buh thar kha leilet atangin qtl. Metric tonne 20000 vel kan nei a, tin, thingtlang atangin metric tonne 26000 vel kan thar chauh va, kuminah hian thingtlang lo neih hi vawiin chawhnu lama kan ngaihthlak tak ang khan NLUP hi a hlawhtling tawh khawp mai a, thingtlang lo neih lamah chuan 36% in kan hlawhtling tawh a ni, chutiang chuan thingtlang lovah a tla thla ta a. Khami tlak hniamna kha a tharchhuah lama kan compensate theih nan he kan buh thar tam initiative hian tan i la ang u, tiin kan Director-ten hma an la a, chutiang chuan hma kan la chho a ni a, khi darkar khat ka hmang ti tih der tawh mai a.

Chulo chu pakhat kan sawi leh ange, Oil Palm ka sawi duh a. Oil Palm kha vawiinah Pu Tlinga niin ka hria a, an mithiam deuh ten hei hi fimkhur a ngai ang an ti e i tih kha a tha hlein ka hria a, khatianga fimkhurna thu kha. Amaherawhchu, hei hi helaiah keimahni puala a tha e ti a ching mai kan ni lova, Oil Palm lama Scientist-ten ngun takin an rawn en a. Mizoram hi a sik leh sa, ruahtui tla te an han zirchianin, chin theihna tur ram a ni an ti a. North East-ah hian keini hi a ching awmchhun kan la ni a, India ram hmundangah pawh ching an la tam lova. Tin, anmahni hisap ang chuan a chin theihna ram tuna kan tih lai mekah hian India atanga an thlirnaah chuan mi pakhatin litre 15 zel mamawh angin hisap ilangin India rama kan potential area kan tikhah chuan Oil Palm hian kan intodelh thei dawn a ni an ti a, Malaysia te an hausakna, an economy than nachhan chu Oil Palm vang a ni, Indonesia te, chuvang chuan keini ram hetia kan lo chang hlauh hi a vanneih thlak hle a. Tin, kan tihdan pawh hi kan Member zahawm tak Pu Duha'n a duh ang hian kan kal phawt a ni, hei hi kan inchhinna a ni a. Contract Farming-in kan ti a, a rate committee-in a tuk sa thlap a, chu chuan a thar hmasa apiang kha an lo lei sak zel mai a ni. Chu chu farm gate rate-in. Tunah hian hectare 7000 chuang kan cover tawh a, kuminah 3000 kan cover leh dawn a. Central pawn min phurpui hle a, kan chinna

hmun te, Scientist te pawhin an rawn tlawh a, vawihnih vawithum. Tun kuma kan Unioun Agriculture Minister lo zin pawh khan khatiang mithiam ho leh Secretary ho a rawn hruaite kha kan sem darh a, an kal darh sang sang a, a hmunah min thawh sak a ni. An phur a, an phur leh lutuk a, lehlamah chuan kan tvisual ang tih hlauhawm khawp kha a ni a. In mamawh zat zatte an han ti deuh thuak thuak a. Mahse, chu em chu a ni lova. Tunah hian min phurpui em avangin hma pawh kan sawn dawn hlein ka hria a. A Factory hi Godrej hi chuan tunah chuan ram kan tihfel pui tawh a. Tunah hian a khawl hman tur kha tuna tan chuan darkar khatah kg 2500 her thei tih phawt a ni a, kan upgrade zel ang. Bukvanneiah khuan an dah dawn a. A ram hi tui fur a tlak zawh veleh an rawn chei a nga, a khawl kan lo order sa a. Chuvangin, Central pawhin Factory atan hian nuai 250 subsidized-na tur an lo dah sa a.

Tin, Lunglei District leh Serchhip District-a kan thawhpui P.P. Mode-a kan thawhpui, contract farming kan neih pui M/S Ruchi Soya leh M/S Foodfat pawh chutianga hma la turin Central lamin min lo nawr sak a. Tin, provision an tan hian min dah sak sa a ni Factory dahna tur. Chutiang chuan hma min laksak a, chuvangin kan ramah hian a hlawhtling turah kan ngai a. Chuvang chuan kan rilruah chuan Serthlum tamna ramah hian tikhat vek law law ila a tha ang kan ti a. Tin, irrigation a tul a ni tih chu a ni na a, mahse, tuna kan experience-ah khuan engtia rei nge a daih ang ka hre lova. A rah pakhat pawh khu an beisei aiin a lo tha a kg 15-25 te, pakhat an rawn lak phei chu kg 37 khami a bunch khat kha. Kung khatah khan khatiang 12 te kha a awm tur a ni a. Rah hun bik pawh a nei lova, kumtluana rah tur a ni a. Chuvang chuan, kan ram economy siam that nan hian a tha ang tiin thil thar chu a ni na a, kan tui pui ta a. Tin, contract farming kan sign puite Suitcase khaia consultancy la mai mai lo deuh te an nih avangin kan ngaih a tha a ni. Tin, min phur pui hle a, a zau zawk pawh an duh a. Tin, anmahniin captive plantation pawh an duh a, mahse company lianin hetianga kan loneitute ram chetnaa in chet ve hi rem kan ti rih lo, kan ti a. Chuvang chuan tunah hian kan loneituten oil palm chingin an phun a, a rah lei turin Company-te hi an in buatsaih a ni.

Le, tikhan a tlangpui sawitur hi a pung tawlh tawlh a, sawi tawh tawh mai ila a that ka ring a. Tin, chulo chu thil thar kan neih tur, kan beisei hi kan sawi leh ang a. Agriculture Science College hi a University kha kan sorkar hlim khan kan Chief Minister-in kan Union Minister hnenah khan a sawi a. Min ngaihven sak angreng fu a, mahsela Meghalaya-ah khuan an rilru a tlulut tlat a, Site Search Committee te kha. A chhan chu ICAR Regional Central hmunah khuan hemi Master Degree ang deuh hi an lo tih tawh avang khuan, khumi chawilen khu an lo duh a ni a, hmanna ka zuk kal khan ka zuk hmuchhuak deuhin ka hria a. Tah khuan an inbun ta deuh , chutichung chuan kan Agriculture Union Minister lokal kha kan Chief Minister-in a lo sawipui leh a, hei chu kan mamawh tak tak a ni a. Kan ram hemi Northeast Agriculture Technology chherchhuak tur University emaw College emaw kan neih hi tih mak mawh a ni, min pe har tawh lutuk zawk a ni kan ti a. Ka pe ang che u tiin vantlangah a puang anih kha. Tih tur kan nei a, ram free-in min lo pe ve ang chu an ti a. Chu pawh chu hei kan Secretary-ten an zawng sauh sauh a, hmun engemaw zatah an hmu a. Amaherawhchu, khuta Search committee tur han din tur bawkte kha kan zuk report phawt a, ram chutiang chu kan nei tiin. Eng hunah nge min hawnsak ang tih chu kan hrelo nain, kan Union Agriculture Minister ngei pawhin kan Chief Minister a tiam a, tin Press-ah pawh a sawi bawh a. Keinin kan han sawi kha chu Agriculture Science College a ni a. Horticulture Commissioner kha Minister niin alo tel a, Horticulture College ni zawk rawh se an ti deuh a, kan duhthawh deuh a,



College of Agriculture Science ni se, a core subject chu Horticulture ni sela. Tin, Food Processing-te awm sela, hemi jhum land kan tih hill terrace cultivation ang chite zirna tur khatiang atana technology tha te kha chhar chhuak thei tur kan duhdan a ni a. Hei hi chu a boruak kan la sawi deuh rih a ni. Din turin kan pen a ni tih kha House-ah ka'n sawi duh a, hlawhtlin pawh kan inbeisei a ni. Sawi hmaih pawh ka la nei mai thei a, mahse ka'n duh tawh phawt ang e. Tichuan Pu Deputy Speaker, he House zahawmtak hian Demand No. 9-na Finance – ₹ 363,42,32,000; Demand No. 13-na Personnel & Administrative Reforms – ₹ 2,07,90,000; Deman No. 14-na Planning – ₹ 80,43,41,000; Demand No. 31-na Agriculture – ₹ 180,44,54,000; Demand No. 32-na Horticulture – ₹ 34,45,64,000; a vaiin ₹ 660,83,81,000 min pass sak turin ka rawn dil a ni e. Ka lawm e.

**DEPUTY SPEAKER** : Minister-in passed a rawn dil a kan buk dawn anga, a Demand a vaiin ₹ 660,83,81,00 Rem ti chuan 'Rem ti' ti rawh u le (Members : Rem ti) Rem ti lo kan awm em? awm lo maw, chuti anih chuan Pu H. Liansailova, Minister zahawmtak Demand No. 9-na Finance – ₹ 363,42,32,000 ; Demand No. 13-na Personnel & Administrative Reforms – ₹ 2,07,90,000; Deman No. 14-na Planning – ₹ 80,43,41,000; Demand No. 31-na Agriculture – ₹ 180,44,54,000 ; Demand No. 32-na Horticulture – ₹ 34,45,64,000; a vaiin ₹ 660,83,81,000 te hi House-in lungrual takin a pass ta a ni.

**Pu H. LIANSILOVA, MINISTER** : Pu Deputy Speaker, ka lawm e.

**DEPUTY SPEAKER** : Awle, tunah chuan kan House Leader ni bawh kan Chief Minister zahawmtak a Demand- te rawn wind-up a pass rawn dil ve nghal turin ilo sawm leh ang.

**Pu LAL THANHAWLA, CHIEF MINISTER** : Pu Deputy Speaker, tawi te-in wind-up ka tum a ni, a chhan chu hei kan hotute hian an nupuite atangin sms an dawng thliah thliah a ni tih ka hria a, “ril a tam tawh, a at thlak lutuk, a rei tawh, lo haw tawh rawh”, tih kha message an hmuin ka hria, churang chuan tawi te tih ka'n tum anga. Amaherawhchu, a pawimawh zual kan hotuten an sawi chhuah han sawi ve nel nual lo thei lova ka hriat ka note ringawt hi 22 a ni a, chumi bak chu pali panga a la awm a ni. Churangin a tawi thaw khat bawh ang chu maw. Tin, tamtak chu kan Finance Minister-in a rawn sawifiah tawh a, sawi nawn ngai lovah dah ila. A hmasaa ka sawi duh chu kan member-te thahnemngaihna hi a lawmawm ka ti a, a chhan chu an chik viau a ni, an document-te kha an chhiar peih hle a ni tih kha a hriat a, an taimakna leh an seriousness-naah khan lawmthu ka sawi a. A chhan chu kan zavaia sorkar a ni a, keini hi tunah hian a driver seat-ah kan thu hawh mai a ni a, kan la inthlak kual zel dawn a, kan zavaia ta a ni tih kan hriat tlanna atangin a neitu rilru pu-a kan sawi hi, kan tih awm tak anih avangin kan zavaia chungah lawmthu ka sawi hmasa duh a ni.

Pu Deputy Speaker, kan Member zahawmtak thenkhatten he work programme, performance ang chi te an phut hi tihmakmawha ngaih tur a ni a, amaherawhchu kan lo titha tawk lo pek thin a. Hei hi tute pawhin awlai taka sorkar kalphung leh thil tihphung hriat theihna a ni a, tunhnuah chuan tih hram tum hi thil tha tak niin ka ring.

Sainik School kha kan Finance Minister zahawmtak khan a rawn sawifiah tawnain tlema kan tan harna chhan hi thil pakhat a awm a, a awm dan chu a sawifiah tawh a. Tin, Finance Commission leh DoNER atanga kan hmuh kawp kha Finance Commission ta kha a tlem si a, DoNER min pek tum kha a sang zawk si a, kha kha kan awt deuh va, man kawp dante kan zawng a, a tawp a tawpah chuan min pawm sak a, khami hman kawp dan tur kan han ngaihtuah khan kan DPR leh design kha thlak leh a ngai ta a, kan thlak a, khami approve chhung kha a rei leh ta deuh hlek a, chu chuan khua a titlai a. Tunah hian peih titih tawh a ni a, la hmabak chauh chu CAWD an ti a, chuta Engineer te, S.E aia rank hniam lovin a hmun a rawn tlawh a, Chhingchhipah hna han thawh tan dawn a an mamawh tur, an kan pah leh khatiang velah khan power kalte a tha em tihte rawn en phawt a ngai a. Chu chu ni 10 chhungin kan rawn thawn ang, an ti a, a endiktu a lo kal ang a, anin chung chu a tha e, a tih chuan hna hi tan theih tur a ni a, contractor-te pawh anmahni central lam atangin an rawn dah sa a ni.

Tin, Member zahawmtak Pu Duhoma'n plan priority list Kawnpui atangin ka ko kir a tih kha a dik a, kan koh kirna chhan hi thil rinhlelhawm tam tak a awm a. Tin, private ta tam lutuk hian Sorkar project hi a nek chep a, harsatna kan tawk thin a. Tin, chubakah kan duhloh zawng tak, corruption, kut tlinglova sum lakna a awm a ni. Entirnan – NEC a thil ti thei deuh chin Officer-te khu kan State Sorkar hriat lohvin an lo kal deuh reng mai a, hetah an rawn cham a, State Guest House-ah te, Tourist Lodge-ah te an thleng lo thei lova, hriat chhuah loh theih a ni lova. Khang khan an rawn tih ber chu khang sorkar project kha chu an ti ngam chiah lova, private agency leh society khang ho ta te nen khan an rawn negotiate a, kan sanction ang a, engzatnge ka chan tur percent zawng kha an lo uar ve a, Sorkar hmasa ang khan. A percent zawngin an rawn dil ve thin a, chu chu kan duhlo a. Chuvangin, Chief Secretary hnenah pawh hei hi NEC Secretary hnenah lo zuk ziak vek langin, an lo kal chuan an tour programme kan hmu tur a ni a, enge an rawn tih kan hre tur a ni a, hetiang a corruption leh kut tlinglova sum lakna helaiia an rawn encourage hi tha ka ti lo ve ka ti a, ziak tawh turah ka ngaih laiin, niminpiah vel lawkah khan amah Secretary leh thil ti thei tak Lungdim, Kuki unau ni ngei tur a ni a, chumite chu an rawn zin a, kan State sorkarin kan hre miahlo a ni. Chuvangin, khatiang zawng khan a ni ngei pawhin a rawn khawn ni turah ka ngai a. Tin, ka rin takna chhan chu mi pakhat ka hmelhriat zawng takin ama private project kha thun hram turin leh anni nena an lo in negotiate tawh thu kha kan Senior Officer-te nawr ngar ngar a ni, chuvangin kan rinhlelna kha kan prove-in ka hria a, chuvangin NEC Secretary pawh hi thuneitu sang zawk Prime Minister hnenah leh DoNER Minister hnenah thlen vat a ngai niin ka hria, chu chu Sorkarin kan tih turah ka ngai a ni, kha kha kan kohkirna chhan a ni a. Private-te hi kan encourage lo a ni lo, amaherawhchu, helaiiah corruption zung an rawn kaihtir tumna hi tha kan ti lova, chuvangin review leh turin kan ko kir a ni. Mahse, Sorkar nena collaboration nei engemaw join project ang chite anih chuan chu chu kan welcome a, kan telh tho a ni.

Tin, hei kawng chhe lutuk hi kan hre vek a, inhrilh pawh a ngai lova, tuna kan Sorkar hnua chhe thar thut a ni lova, a lo chhe rei deuh hlek tawh a, chuvangin kum 10 chhunga tihthat theihloh kha kum hnih leh a chanve chhunga han tihthat thut theih a nilo tih a hriat a, mahse chuti chungin kan Sorkarah beiseina leh rinna an neih san em avangin tiang hian an sawi luai luai maite pawh hi lehlamah chuan a lawmawm hlein ka hria a, lawm loh theih pawh a ni lova. Tin, tunah chuan kan sawi tawh a, hmannah pawh a chhan ber pakhat hi chu sorkar hmasa hunah khan Border Roads atangin National Highway hi an lo dil a, hei hi kan kawngpui deuh ber a ni a. Tin, khatih laia an DG khan Northeast hi chhuahsan a duh a, Mizoram hi a kilkhawr bik avangin chhuahsan hmasak alo duh kher kher bawk a, tichuan decision an lo siam hman a ni. Hmanni khan ka sawi tawhin ka hria a, an Chief Engineer pathum an lo kal a, theihpatawpin min pui teh an ti a, A.K. Anthony, Defence Minister te ka zuk phone a. Mahsela, 'A tlai hret a ni, decision kan lo siam fel tawh e' an ti a. Hei hi keini hunah kha chuan an zawh tawh sa min pek an tum pawh hian sum harsatna avangte, mihring indaih lohna vangte leh khawl kan neih that loh avang tein kan tang hram hram thin a. Hetia an lo dil hi enge a chhan ka hre miah lova. Amaherawhchu, National Highway 54 Silchar atanga Tuipang thleng maintain-naah hi chuan pawisa tam turah an ring ni turah ka ngai a. Khata tang khan chanvo engemaw an nei ve dawn turah an inngai te pawh a ni ang a. Engpawh nise, khami a transition period, a inpek chhawn chhung kha a rei a, khatihlai khan kan lo lut ve chiah a keini kha. BRTF-in an ensan tawh a, keini kutah sum la awm bawk si lo, khatilai kar kha a rei ta a ni. Tunah hi chuan a rawn awm tawh a, Tender-te kovin a thawktute pawh an han ruat a. Mahse, an thawh chak loh zia kha Member zawng zawngte khan in sawi a, a manganthlak khawp mai a. Engpawh nise, innawr chak tur a ni mai a, kan nawr chak ang a. Nakinah RGGVY te pawh ka rawn sawi ang a, hengte pawh hi manganthlak tak a ni. Engpawh nise, theihpatawp chhuah turin tunah hian hma lak mek a ni.

Tin, Mechanical Division kha an rawn sawi a, nichinah khan, Member zahawmtak Pu Thangtea niin ka hria a. Mechanical Circle hi pakhat a awm a, a hnuaiah hian Division pahnih a awm a. Tunah hian private contractor-te thawmhna, an khawl ilo vel hi hman tum nasat a nih avangin Mechanical Circle leh Division-ten thawh tur an nei mang tawh lova. Chuvangin, engtia kalpui zel tur nge ni ang tiin sorkarin a ngaihtuah lai a ni a, chutiang chu Mechanical Division-ah harsatna an tawhna chhan a ni. Tin, Serkhan, Bagha road hi a lo chhe rei tawh khawp mai a, kan hun hmasa lamah khan kan enkawl a, black topped-te kan han ti nel nual a, tihzawm kha a awm ta lova. Tunah hian tender- te kovin a pumpui hian a tul ang siana hmalak mek a ni a, kan tifel thei thuai turah ka beisei.

Tin, RTI chungchang kha kan han sawi zawk a, hmannah khan RTI hi hman tangkai kan duh a, ramah leh he Sorkarah hian langtlang thei Sorkar kan duh a, dikna a awm theihna turin he Sorkar hian tan la se kan duh a, chutiang atan chuan min venpuitu tha tak a ni a RTI hi. Amaherawhchu, Sorkar hnathawk, a chanchin lo petuten diklo takin thil an ti ve thei bawk a ni. Chungte avang chuan hun thenkhatah chuan khatiang defaulting Officer-te kha an hrem thin a, sumte an chawi tir thin a, tin, departmental action la turte pawhin Sorkarah an hriattir thin a ni, chutiangte pawh chu a tul ve mai thei. Tin, RTI hi hman tangkai kan duh avangin hautak lo turin tunah hian department-te kan hrilh mek a, a lehkha engzat pawh seng sela RTI Act hmangtuten an chawi ngai lo turin awlai zawkin

mi rethei zawk pawhin, mi harsa zawk pawhin, thingtlang mi pawhin a tul anga awlai taka a hman theihna tur atan remchanna siamsak a ni.

Tin, thalaite tan khawvel thar kan siam ang kan tihna kawngah hian a zirna lampang bik, a bik takin kan la neih ve ngai loh institute tam tak, mi rama inthawn ngai ang ho hi neih kan tum mek a. Hei, NIT te pawh an tilar hle a, a lawmawm khawp mai a, mi zawng zawngin kan nei thuai dawn tih an hriat phah a, thil lawmawm tak a ni. Kan nei ta ngei a, an tan ta ngei a, chutiang chuan tunah hian Mass Communication-te pawh August thla atangin tan turin kan in buatsaih a, kan tan theih kan inbeisei a. Chutiang zelin institute of management te pawh a ni. Tin, Medical College-te pawh neih ngei kan tum a, hma nasa takin kan la mek a, tin a rawn entu thenkhat chuan Falkawnte pawh saw an rawn en tawh a tha tawk an ti a, chutiang chuan. Tin, kan neih ngeite pawh min duhsak ve bawk a, Central lam atang pawhin. Mi rama a acres 25/50 an phut te kha kan ramah chuan 20 pawh min phalsak a. Tin, chumi acres pawh chu hmun khatah kan nei thei lo a nih chuan within 10 Km radius chhungah a nih chuan campus hnih ang a nih pawn min phal sak a ni. Chutiang chuan tunah hian DPR te nen kan bawhzui mek a, hmin mai turin kan beisei mek a ni.

Tin, hmanni khan Hnam Runah Ex-MP Pu Zawma'n Kolodyne Multi Modal Project hi a tih niin a sawi a, a tha ka ti a, a lawmawm a tiang tih nachang a hria hi. Amaherawhchu, zirtirtu a nih lai a kan lo tan tawh kha a ni a Pu Deputy Speaker, MP pawh ala ni lo va, mahse khatih lai khan alo bei tawh a nih chuan a lawmawm tho thova, kum 1997-ah khan chutih laia kan Chief Secretary, Pu Lalfakzuala leh kan Engineer Pu Ramhluna Khiangte te, India palaite zingah Rangoon-a an kal dawnin tel vein, hemi project hi an rawn hawn a ni, chuta tanga intan chu a ni a. Amaherawhchu kum sawm kan han awm loh san chhung khan a reh mai kan hlauva kan nawr zui reng a, abik takin Mani Shankar Ayer, DoNER Minister a rawn nih khan kan han hrih veleh khan Look East Policy te nen a inhmelhriat avang khan a rawn tuipei a, Jairam Ramesh-a hi a rawn tui hle bawk a, Mizoramah te pawh an rawn zin phah a, chuta tang chuan chak takin hmalak mek a ni. Kawng sial dante leh sum kan neih dan engkim kan sawi tawh avangin ka sawi nawn tawh lo ang a, chutiang chuan hma lak a ni a, hei hi alo puitlin hunah chuan North East pumpui tan hian kan ram hi gate way of trade and commerce anih kan beisei a, awlai tein kan kal thei anga, tichuan khitah kan an puite nena insumdawnna kawng tha zawk kan neih thuai theih kan bei sei a.

South East Asia rama Diplomat-te lo zinah kan sawm a, lo zin an tum a, nikum November thlaah khan ram hrang hrang pariat Ambassador leh High Commissioner-te an rawn intiam rual a, amaherawhchu khaw chhiat avangin Imphal atanga an kir leh a ngai a, tunah hian rawn intuk khawm leh turin kan ngen leh mek a, an phur khawp mai a, a hma thei ang bera rawn zin kan tum ang an ti a. Chung kan han sawmna chhan chu an ni nen hian inbia ilangin eng eng emaw investment kan neih bakah Marketing lamah pawh min tanpui thei ang tih kan beiseina atanga kan sawm a ni.

Tin, lei hnuai hausakna hi hmanni khan kan sawilang tawh a. Heng hi kan hun hmasaah khan ONGC kan sawm a, Permit of India phalnain Bilkhawthlir daiah a kuma kum an han awm a, beiseina sang tak an nei a. Tichuan Thingdawl daiah

an lo chho leh a, beiseina an nei a, an hmu dawn Chiang a ni tih an inhria a, tichuan Aizawl West-ah lokal leh tur an ni a. An lo kal dawnah heavy equipment tam takte an khawl rit tak takte an rawn ken theihna turin Kawnpui to Sairang road-te pawh khu BRTF ten tilian a, an leite tichak turin kan hrilh a, chutiang chuan an inpuahchah a.

Tin, ONGC pawhin Aizawl West, Hunthar vengthlangah te pawh khuan ramte pawh an rawn acquire tawh a ni. Mahse kan tla ta a, kan tlak rual khan an reh ta a. Aizawl West dawtah chuan Bukpui tlangdunga pheih leh in a tul anga kal tur an ni a. Mahsela an reh ta vang vang a. Amaherawhchu Pathianin leihnuai hausakna tamtak a dah ang tih hi kan ringa. Chuvangin kan sorkar loh lai pawhin kan nawr ngar ngar a, hei pawh hi khatia kan lo tih tawh kha chu MP bawh chuan ama rawn tih-ah a rawn sawi a, a lawmawm khawp mai. Engpawh nisela, zirtirtu ala nih lai atanga kan hotuten an lo tihchhoh tawh a ni a. Tin, kan hun hmasaah khan Geological programming board kan siam a. Chutah chuan member chi hrang hrang central sorkar atangtein lo telin chungte nen chuan lo ngaihtuah ho tawh a ni thin a. Chumi bul rawn tan tur chuan ONGC te kha an lo chhuak a ni. Tunah hian an Global tender-te an koh hnuah Foreign company 2 leh Indian company 3 in nasa takin an prospect mek a, tunah hian beiseina sang tak an nei tih kha kan hre vek tawh a, chumi atan chuan sorkar kha a lo inpuahchah a ngaih avangin, Mining engineer-te leh khatiang a tul ang kha lo inzir lawk turin kan ti a, Geology class-te pawh school-ah kan introduce tan a ni. Tin, a hniam lam thleng pawhin Mizote, ram leilung fate'n kan thawh theihna turin skill development chungchangah te pawh hmalakna department hotute leh kan Minister-ten an nei mek a ni.

Tin, corruption hian kan ram a tibuai khawp a, khawtlang a tibuai a, wawiih hian chungkaw nun, khawtlang nun, kohhran nun thlengin zofate hi kan buai tawh niin a lang a, hei hi kan zavaiin a chhe lai siam thatu kan nihna turin a ram leilung fate'n mawh kan nei vek a ni. Wawiih hian kan hnam hi sum ngaina hnamah kan tlulut ang tih a hlauhawm khawp mai a, sum ngainat hi thil hlauhawm tak a ni. Kut tlinglo a sum lak pawisak lohna te a ni a, tin, itna te, itsiknate, duhamnate, min thlen thei a ni. Chutiang kotlangah chuan kan dak mek nite pawhin a lang thei a, heng zawng zawng hi a vai hian a vengtu turte kan ni. Sum ngainatna hi Bible-in “sual tinreng bul a ni” a ti. Chuvangin, hemi atanga kan fihlim hi kohhran mi kan nihna angin, ringtu zaa za kan intihna angin kan tih ngei ngei tur a ni tih hi kan hriat a pawimawh a, tin, duhamnaah chu chuan min hruai lut ang tih a hlauhawm khawp mai.

Hmanniah pawh kan sawi tawh a, in sa reng reng hi tunah hian thubuai nei tam tak an awm a ni. ADA te kha an huatna em em chu dik taka thil tih an tum a. Chuvangin ADA ngai thei lo kha tam tak an awm a ni, keimahni party chhungah ngei pawh. Amaherawhchu, tha taka duham lova thenawm khawvengte tana hnawksak ni lo turin min duh vang a ni. In sa reng reng hian vantlang nek ranin in kan han sa a, malsawmna kan han dawn belh a, chutah motor te, TMB, Bulldozer te thlengin. Chu chu vantlang kawngah ngat kan han dah leh a. A dahna tur mahni compound-ah siam phal kan awm tawh lo, hei hi duhamna a ni ang chu ka ti mai a. Chungte avang chuan ringtu, kohhran mi ni si hi, thenawm khawveng leh vantlang tana hnawksak leh nekcheptu nih hi kan pawisa lo hle a ni. Aizawl kan chepna chhan pawh hi mahni compound chhunga mahni motor kulh that tum lo hi an tam hle a ni tih hi chu kalkawngah hian han kal ila a hmuh theih a. Hei hi engvang nge ni ang tih kan ngaihtuah chuan duhamna a ni angem a tih theih a ni. Duhamna hi Bible-in ‘milem

biakna' a ni, a ti a. Chuvangin chawlhni kristian ho hi chung lam atang khian milem bia ang lekin minrawn hmu ang tih a hlauhawm khawp mai. Chuvangin insiamthat a ngai, heng hi kan zavaia mawh a ni tih hi kan hriat a pawimawhin ka hria. Chuvangin Corruption hi tunah hian min venpuitu an tam khawp mai a, a lawmawm a, phuba lakte hi kan tum miah lova, Pu Deputy Speaker. Phuba reng reng la suh u, keima lak tur a ni, Pathian nungin a ti a ni. Chuvangin keini lo tum chi a ni lo hrim hrim a.

Amaherawhchu, dikna a lal dawn chuan dik lo hailan a tul a. Chuvangin NGO te, hei PRISM kan tih te, SOSA kan tih te an active hle mai a, kan lawm khawp a. Chung chuan PIL te an thehluat a, emaw sorkarah hekna te, thil diklorawn hrilhate anrawn siam a, chung chu action lak a nih loh chuan corruption ngaina kan nih dawn avangin khatiang khan action lak a ni a, heng hi phuba lak a nilo a ni tih Zoram mipuite ka hriattir duh a. Dikna duhtuten dikna hai chhuak turin min duh a, keini pawn chu chu kan ngainat zawng tak a ni. Tin, kut tlinglo-a sum lak hawtuten kut tlinglo a sum la nia an hriatte anrawn hriattira, chung chu sorkarin alo chhui mai thin a ni a, chuvangin tianga min venpuitute hi kan lawm takzet a. Tin, heng bakah hian sorkarin kan mi rin zawngte siam ve tul kan ti a, chuvangin Ethics Committee, kan hotuten an din a ni. Hna tha taka thawk thei turin kan hotuten ruahmanna engkim an siamsak tawh a, an thawk tan a, helai member zahawmtakte hi neitu rilru pu a, heng Ethics Committee-te pawh hi a tulna ang apianga finchhuah a, helai House-ah engemaw corruption kan sawite hriattir ve a, an kalphung turte leh an tih dan turte pawh finchhuah thei kan awm chuan Ethics Committee-a kan hotute, kohhran hotute leh tlawmngai pawl hruaitute lawmzawng tak a ni ang tih ka ring a, chutiang tur chu a ni tih rilru pua....

**Pu LALDUHOMA** : Pu Deputy Speaker, khawngaihin, Ethics Committee meeting hnunung berah khan kan tel ve vawi khatna a ni a, Terms of Reference kha dukhawp lohna deuh ka nei a, rawtna ka siam nual a, kan House Leader pawh khan khami meeting-ah khan, 'Hemi rawtna ang hian siam that leh nise a tha ang a,' kha min tih puiin ka hria a, a ngai kha an la ring ta nge an ennam ve dawn?

**Pu LAL THANHAWLA, CHIEF MINISTER** : A tul ang chu kan belh zel mai anga, kan ren lo reng reng a, effective taka hna an thawh kan duh a corruption hi a hluar khawp a, inhlawhfate zingah pawh a awm a, sorkar hnathawk chang loah pawh a awm thei a, politician zingah pawh a awm thei a, sumdawng ho hnenah pawh a awm thei a, chung zawng zawng chu siamtha tur kan ni. Chuvangin, terms of reference-a belh tul ang apiang chu lawm takin Chief Minister ka nihna angin ka pawm zel anga, belh pawh kan belh zel ang. Corruption hi he hnam lakah hian fihlim se kan duh a, he sorkar lakah hian fihlim se kan duh a, chutiang chu umzui thei turin keimahni pawh hi Pathian khawngaihna kan fihlim bawk a ni.

VIP light, flag khai tih vel hi chu a tenau deuh a, amaherawhchu ngaimawhtute tan chuan ngaimawh awm tak a ni a, a entitle lo ten an lo dah a, an lo ti anih chuan chu chu sorkarin a ven tur a ni a. Tin, tu tu te emaw driver pawh pute awm lova lo tih ve mai mai chingte an awm

thin a tunhma kha chuan, tunhnu chuan ka hre lova, chungte chu ngaihven an tul khawp ang ka ring, hei chu sorkar mawh a ni a.

Tin, hei zu zuar te, drug zuar, proxyvon hetiang smuggler ho hi an zalen hle mai a ni, chuvangin YMA te nena an drugs man kan hal ni pawh khan an mangan thu an sawi a, CADS te hi thahnem an ngai em em a, chaw mumal ei lovin zan khaw tairek thlengin khaw vawtah pawh khaw lumah pawh, khawtlang nun siamtha tura duty thinte an ni a, lawmawm kan ti a, an hnathawh pawh a ropui, kan Excise-te leh Narcotics-te leh Police-ten uluk taka an beih chung pawhin a harsa a ni a. Anni hian an han pui a, an thawk tha hle a ni, hei hi lawmawm kan ti a. Amaherawhchu, chiang taka an mante pawh hi kan dan a that avangin tang hlei thei lote, a tuka hmuh leh maite an ni a, chu chuan an lai a tina a ni. Chuvangin, Mizo dante pawh hi a tul chuan kan hmang mai dawn lawm ni? Hei Sangha tur hrai chingte hi an la awm reng a, Serluite pawh an lo hrai a. Tiang chuan manchhuah an nih chuan Mizoin dan tha tak kan nei a, tiau charah khan inpeizawn mai tur a ni dawn lawm ni tihte hi ka ngaihtuah rum rum a ni. Chu chu lo er tawk tam tak an awm a, amaherawhchu, thahnemngaihna CADS ho te, YMA te leh midang tlawmngai pawl te an thahnemngaihna kan hriatpui a. Tin, an thahnemngaihna kha hetia holam taka an chhuak leh mai thin hian a tizuai ang tihte pawh kan hlau hle a ni. Chuvangin, heng hian an thil tihdik loh man hi an pek theihna turin dan an chung lekkawh dan hi ngaihtuah a tul a. Mithiam pakhatin kan Cabinet Meeting-naa a sawinaah kan man dan hi a diklo va, chu chu tihdik a ngai a ni a tih avangin kan Training Institute-ah Police te, Excise te, YMA hruaitute leh tlawmngai pawl a duh apiang ten training nei turin kan buatsaih a. Nihnih training an nei a, chutah chuan Magistrate-te leh midang dangte pawhin thil tih dan tur an sawipui a, an inzirtir a, an hlawk phah hlein ka ring a. Chutiang chuan beihpui thlak a ngaih avanga hetiang thahnemngaihna thu sawi kan ni a. Chumi kan thahnemngaihna chu kan Administrative Training Institute-ah kan mithiamte nen sawiho in a kalhmang tharte kan ngaihtuah ho a, a lawmawm hle a ni.

Tin, Raj Bhavan sak that kha sawi a awm a. Heritage building a ni a, humhalh a tul a, Intact hote nen pawh an sawi a. Mahsela kan Governor khi a rilru alo tha khawp a, alo ngaipawimawh a. Chuvangin heritage anihna lai kha tibuai lovin sak hnan dan an ngaihtuah a. Architect designer nupa tha deuh mai alo chah chhuak a. Chumite chuan block 3, block 4 in design an siam a, chumi ang chuan tunah sak tur a ni a. Tuna a main building, Heritage building kan han tih tak khi tibuai lovin, a thenlai emaw zuahin sak hnan a ni dawn a ni. Chutiang chuan thiam takin an ruahman a. Chuvangin Raj Bhavan khi kumpinu hunlai atang tawh a Superintendent lo chenna, kan Independent hnu a D.C. Bungalow, kan U.T. hnua Raj Niwas, kan State hnua Raj Bhavan lo ni chho mai mai kha a ni a. Sak that a hun tawh a, chutiang chuan awmze nei takin sak hnan a ni dawn a ni.

Tin, kan manifesto-ah khan driver-te an hlauh te leh an hamthatna tur ngaihtuahpui an ni ang kan ti a. Tunah hian Bank Loan duh chu Motor leina tur atan kan sawipui a, engzat nge an hmuh chiah chu ka hre lova. Tin, NLUP hnuaiah hian Auto Rickshaw an pe bawk a ni. Chu chu engzatin nge lo dawng tawh tunah chuan ka hre mai tawh lova, chuang chuan kan tiam tawh chu tihhlawhtlin tumin kalpui mek kan tum a ni. Tin, private driver-te hi an hlauh a tlem khawp mai

a, anni tel lo chuan kan che thei dawn lova kan ei tur min phurh saktute an ni a, chuvangin, service security-te an neih ve a tul a, India dan pawhin a phal sak a, chuvangin zawi zawiin kan ngaihtuahpui mek a ni. Private driver-te pawh zankhat thil thuah ban mai mai theihte an ni hlawm a, chuvangin an awmdan tur pawh ngaihtuahpui nisela kan ti a, tunah hian kan mithiam ten an ngaihtuah mek a ni. Tin, In hmun nei lo hi a phu te chu ruahman pui an ni zel a ni. Tin, sorkar driver-te pawh hi an service a that phawt chuan kaisang thei turte pawhin ngaihtuah an tul tih hi kan hotute pawn an hria a, chutiang chuan ngaihtuahna kan hmang mek a, matric passed te pawh an awm ve a, khatiang ang kha an phu ang ngeiin kaisanna opportunity an nei tur a ni a, tin, an kaisang mai lo anih pawhin an pay leh grade chungchangah te ngaihtuah sak a tul a ni tih kan hria a, chutiang ang zawng chuan kan hotuten ngaihtuahna an hmang mek a ni.

Tin, Assam Rifles-te hi insawn tura tih an nihna hi Rajiv Gandhi-a hunlai atangin a ni tawh a, mahse a procedure hi a rei a, sipaite hi sawnchhuah an har khawp mai a khawlaiah pawh, chuvangin anni pawh hi a har a ni. Tunah erawh hi chuan chhuak tura an inngaih tawh avangin leh alternative site hi kan hun hmasaah khan hmun thum kan kawhmmuh a, Paikhaiah te, Zokhawsang te leh Bualpui te. Zokhawsang an thlang ta a, land acquisition-ah pawh sum engemaw zat kan seng a, tichuan Pu Denga ho an rawn sorkar a, a kal chho zel a, chutiang ang chuan a kal chho zel a tun hi kan lo thlang ta a ni. Tunah hian nasa takin kan nawr reng a, tun ni 29-ah hian kan Home Minister nen a hmun saw kan va tlawh dawn a. Chutiang anga kan va tih deuhva a thawktute pawh kan va nawrpui deuhva an insawn hma hi kan duh a. Sawlaiah sawn engte kan pek theih a, kawngte pawh kan siam thatpui a, tui tlan theih te pawh kan pek theih chuan October atang hian insawn theih an beisei a ni, batch by batch-in an insawn dawn a, family-te an hmasa ang, an thu min hrilh dan chuan, tichuan an hotute nen kan Home Minister-te nen tun ni 29 hian a hmun saw kan va tlawh dawn a ni.

Tin, Assam Rifles han sawi takah chuan kan hun hmasaah khan an D.G te nen inremna nei vekin, Bazaar Bungkawn, police atang sawn kan zauh phei hret hret anga, a thenah metre khat, hnih, thum, tiang chuan hetah Dakin pui thlang hian kawngpui hi zauh turin ruahmanna kan nei tawh a, tichuan, tuna Millenium an tih tak saw, sawtiang mihausa in atan keini chuan kan ruahman lova, Pu Deputy Speaker, Pu Kyndiah, Governor khan foundation stone pawh a phum tawh a. Chutih laia kan mithiam engineer ten an ruahman danah chuan tuna a inngahna leihnuai saw kan laih khwar kuk kha, kan MNF unau ten an han hnawhkhat a, a chang leh an paih leh thul a, sawlai hmun saw basement under – parking atan ruahman a ni a, kan engineer-te leh kan architect-te khan motor a za tel dah thei tura ruahman a ni. Tin, a ground level saw mahni thlai thar zuar duh tute tan, thianghlim taka, tuna AH & Vety Minister-in sa zawrhna thianghlim a siam ang hian tunlai taka siam tum a ni a. Tin, a chung first floor an tihah Mizotawnga chhawng khatnaah shopping arcade leh state library a awm anga. Tin, shopping arcade chu tuna Bazaar Bungkawn kawng leh kawng inkara zim te dawr luhna nei mang lo saw, 12-na nge 15-na thlang sawn, chutah chuan sawn chhoh an ni anga, biak fel vek tawh an ni. Tin, Pu Shillonga in tih loh sawti laia in awm ho saw Sobji Bazaar-ah leh chumi hmunah chuan sawn tur an ni a, tiang chuan ruahmanna kha engkim



siam a ni a. Tin, a chhawng chung lehh Auditorium changkang tak mi 2500 accommodate thei tur, Shopping Market leh Restaurant changkangte ruahman a ni a. Contractor pawh kan thlang tawh a, a thawk a, vaibelchhe engemawzat a seng tawh a ni. Mahse kan han tlak takah khan Sorkar lo awm leh khan enghelh berah an nei ta a, tichuan a contractor pawh chu an ban thuai a, a sum lo hman tawh pawh chu an pe hran lem lova, tiang chuan an rawn ti ta buan buan a. Tunah sawn mihausa in an din ta saw pawh kan ti khawp a, sawlai saw mihausa in atan chuan kan ui khawp mai a, khatia kan hotute lo ruahman ang kha chuan kal sela chuan vawiinah hian Shopping Market te, Auditorium changkang takte, Exhibition Hall te, State Library-te awm vek tur a ni a, Shopping Market pawimawh takte nen, Parking te nen, mahse a awm thei ta lo hi pawh kan ti a. Tichuan, khatia kan awm tawh loh takah khan khami kawng zauhna tur, tin, in a tihchhiat chuan kan State Sorkarin kan siamtha ang tih a ni a, an insawn pheihma pawh khan. Chung zawng zawng chu kan Engineer te, Revenue Department leh Assam Rifles Officer-ten an inspect hman vek a ni. Mahse kan awm tak lohah khan a thamral ta a, tunah kan han tharthawh leh mek a, mahse kan insawn dawn tho tho si a, kan insawn zawh hi a tha zawk lawm ni an ti a. Engpawhnise, kan tharthawh leh a, chutiang chuan kawng zawh dan turte ngaihtuah a ni a, chumi rawtna chu kaltlang hman se chuan tuna Police Point-te saw laiah awmin tiang chuan sawlai saw square, Temple Square kan siam ang hian square thataka siam tum kan ni a, mahse kan awmlah san tak avangin a chiri zo ta a ni, a uiawm khawp mai.

Pu Speaker, RGGVY tih kha kan ngaimawh hlawm a, keini deuh hian kan ngaimawh khawp mai a, kan duh hma a Contractor hi lo thlan fel an ni a, kan han nawr deuh viau pawh hian harsatna an neih thu hi min hrilh thin a, sawichhawn nuamlo tak a ni. Chutiang chu a ni a, vawi thum, vawi li kei pawhin ka ko tawh a, engatinge in muan ka ti a, an tih tur angte tihpui dante kan han ngaihtuah teh thin pawhin a harsa khawp mai a, chuvangin a tihngaihna tak pawh hi a awm hranpa lova. Amaherawhchu han innawr han innawr takah chuan tunah hian eng eng emaw chu an ruahman chho ve mek zel a, amaherawhchu an chaklo a ni. Village Committee din turte leh khatiang zawng zawng kha kan han tihpui pawhin an chak chuang lova, an harsatna thar alo awm zel a, chungte pawh chu kan han tihpui ngial pawhin rin aian a harsa khawp mai. An hnathawh a muang a, mahse chuti chungin tunah hian sanction 137-ah khan 59 chu kan tieng tawh e an ti a, dik maw dilo maw ka hre lova. Tin intensive electrification hnuaiyah 570 khaw tihen turah 253 te an ti a, heng hi a dik leh dik loh ka hre lova, an mahnin a record min pek dan a ni a, tin, a contractor-te hi kan luh hmaa lo thawktute, tuna la thawk mek zelte hi Measures T & T Project Limited Gauhati leh Measures Satnam Global Infa Projects Limited, New Delhi te an ni. An hnena pawisa pek tawh zat chu cheng nuai 18578.82 a ni a. Contractor-te hnenah hian Mobilisation Advance leh bungraw man chauh pek an ni a. Erection bill, a ban phunna erawh hi chu pek an ni rih lo a ni.

Tin, a endiktu hi chhawng hnih chhawng thum a awm a, a buaithlak angreng khawp mai a. Contractor-te hnathawh hi endik turin pakhatna chu P & E Department aiawhin Third Party Inspecting Agency atan an thlan chu M/s Telecommunication Consultancy India Ltd., New Delhi an ni a. Tin, pahnihna chu Rural Electrification Council (REC) aiawhin M/s Nation Power Training Institute, Faridabad, Haryana te an ni a. Khatiang a inendik chhawn zut kha an ni a. A pathumnaah chuan Ministry of Power aiawhte an ni. Chutiang chu a nih avangin anni chungchang hi a buaithlak khawp mai a. Member-ten an ngaimawh leh an duhthawh

ang khan keini deuh pawh hian kan duhthawh a. Tun aia chaka innawr dan hi a vang khawp mai, chhuanlam tha tak takte hi an nei zel a, chutiang chu an awmdan hi a ni. Tichuan, tunah hian hemi a existing RGGVY enhancement atan hian 200 crore kan dil belh a, leh 54 crore a sector hnih atan. Chu chu tunah hian kan beisei viau a. Hei hi a lo chhuak a nih pawhin anni hi pek tlakah kan ngai tawh lo a ni. Chutiang chu Power lamah tunah hian kan dinhmun a ni a.

Power han sawi takah chuan engemaw sawi neuh neuh a tam a, inhnialna deuhthaw te kha a siam avangin hei hi Member zawng zawng hriat atan ka sawi ve duh hrim hrim a ni. Tuivai 210 mega watt pechhuak thei tur hi tunah hian PPP Mode-in kalpui mek a ni a, a chanchin kan sawi tawh a, PPP Mode-a kal tur a ni a, hemi atan hian promoter-te neih a ni. Firm Company 2 an rawn tel a, he conference-a tel lote pawh rawn chhang tura in sawi beisei engemaw zat an la awm a ni. He project hi North East India-ah chuan PPP Mode-a hmalakna hmasa ber a ni a, chuvangin, India Sorkar pawhin a puitlin ngei theih nan a inhawng zau hle a ni, chutiang chu a awm dan a ni.

Tin, khami bakah khan hmalakna Pu Rinawma'n a rawn sawi kha Member dang a hre lote pawhin hriat atan a thain ka hria a, Tuivai bakah khan Tuivawl mega watt 42 pechhuak thei tur hi SPML Energy Limited te nen MoU signed turin tunah hian peih tawh a ni a, an aiawhte lo kal veleh a sign mai theih a ni. Chutiang bawkin Tuirini mega watt. 34 pechhuak thei tur pawh hi chutiang bawk chu a ni, MoU engkim an peih tawh a, an pawm tawh a, chutianga dah chu a ni. Bairabi Dam Project hi, hmui dawthei hi Bible-in a huat zawng tak a ni a, chuvangin, hmui dawthei hi kan ramah hian tlem se a tha a, hei hi Congress Sorkar apiangin nasa takin a umzui avangin tunah hian thawh theihin a lo awm ta a ni tih hi Pu Deputy Speaker, nangmah kaltlangin Mizo mipuite ka hriattir duh a. Congress-in bawhzui lo ilangin hei hi vawiinah hian thawh theih a ni lovang tih hi Mizo mipuite ka hriattir duh. A tir lamah khan kan sawi tawh a thla 8 chhungin survey investigation engkim zawh a ni, kha kha thil theih loh leh thil thiang lo a ni. Tlawng luite chu a lo berah kum 3 survey investigation tih a ngai. Kum tin ruah tui a lo danglamin eng angin nge water volume a danglam, chu chuan eng angin nge a sawi danglam, eng angin nge a khawih, khatiag zawng zawng kha a lo berah kum 3 or 4 a ngaih avangin thla 8 a DPR zawh kha chu inkhualtelem ang lek a ni, tih hi Mizo mipuiten hria ila ka duh a. Tichuan a tul ang zelin kan bawhzui a, hmannah ka sawi tawh a. Brahmaputra Board Survey Investigation kan tih tir leh a, chu chu hria inti ten an nuhzat a, mahse chutih lai Sorkar, Ex-Minister chu tunah kan zingah a awm a, kan awm tak loh hnu khan Brahmaputra Board chuan P.C leh MNF sorkar intawmah DPR an thehluat a, chumi kal zelah chuan tunah hian a thawh theih tawh a, mega watt 80 pechhuak thei tur a ni. MW120 lai tur kha tihlem a tul a, hmannah a tulna chhan chu ka sawi tawh a, ka sawi tawh lo ang a. Tichuan tunah hian M/s Shekharia Group te an thawh duh thu an rawn hrilh a, ani hi pek an ni a. Tichuan anni ho nen hian MoA sign turin engkim ruahman tawh a ni. An peih veleh keini lamah chuan MoA sign turin kan inpeih reng a ni.

Tin, Kolodyne Phase II MW 420 pechhuak thei tur chu an thawk mek tih kan hre vek a, chu chu sawi nawn ngai lo sela. Tin, Tuipui mega watt 38 pechhuak thei turte, Tuichang mega watt 102 pechhuak thei turte hi tunah

hian investigation leh survey tih mek a ni Pu Deputy Speaker. Tin, Project identified tawh leh investigation tih mek Ngengpui Megawatt 25, Sekulh Megawatt 15, Lungreng megawatt 815, hei hi NEEPCO te nen MoU kan sign tawh a, survey and investigation leh detail project report siam tur an ni. Chutiang bawkin Mat megawatt 76 pechhuak thei tur pawh chutiang bawkw chu a ni, NEEPCO nen kan sign tawh a ni. Tin, Tlawng hi a hnar lamah megawatt 54 pechhuak thei turin tunah hian survey and investigation ti tura peih tawh a ni a, tin, Tut megawatt 26 pechhuak thei tur hi chutiang bawkw chuan peih a ni. Tin, Chhimtuipui, a hnarlamah megawatt 635 pechhuak thei tur MoA NEEPCO te nen survey and investigation leh DPR siam turin in remna siam tawh a ni.

Tin, kum 2011leh 2012 chhunga peih tur a buatsaih heng kan thenawm ami Subansery Hydro Electric Power Project atang hian megawatt 29.80 chang tur kan ni a, tin, Kameng Hydro Electric Power Project atangin Arunachal Pradesh Megawatt 8.90 chang tur kan ni a, Bongaigoan Thermal Station, Assam atangin megawatt 31 kan share tur a ni a, Palatana Gas Station, Tripura atangin megawatt 22 chang tur kan ni a, mahse kan indaih loh em avangin Ministry of Power-ah megawatt 40 tal min pe turin kan dil a, a result kan la hre rih lova ni. Chutiang chuan kum 2011-2012 chhunga heng power plant-te zawh beisei atang hian power kan chavo ruahman a ni a. Tin, pakhatatah kha chuan kan dil belh nghe nghe a ni. Chutiang chu power lam a ni a, heng hi alo puitlin phei chuan Mombati zuar tuten harsatna an tawkw ang tih hlauhawm tak a ni. Kha kha a tlangpui a ni a.

Tin, tukinah khan member zahawmtak Pu Duhoma khan 60 megawatt pechhuak thei tur Tuirial hi enge ni tuna a project cost thar tih kha min zawtin ka hria a, vaibelchhe 913.63 a ni a. Tin, zawh hunah hian per unit cost chu ₹ 3.75 beisei leh hisap a ni. Tin, Tuivai kha vaibelchhe 1750 a zawh theih tura buatsaih a ni a, 210 megawatt kha nakinah per unit cost chu ₹ 3.85 ni thei tura beisei a ni, chu chu a tlangpui a ni a. Tin, Serlui 'B' hi a lar hle a, tunah hian sum kan sen belh nasa tawh a, a zavaia tun March 20, 2011 thlenga kan sen kha vaibelchhe 190 a ni tawh a ni. Tichuan hei hi Engineer-in-Chief-in a hmuna min hrilh dan chuan REC atanga loan lak chhut tel lovin per unit cost hi ₹ 4.75 vel a ni ang e a ti a. Loan lak kha chhut tel tur a ni nghe nghe a, chuti anih chuan a per unit cost hi a sang viau ang tih pawh a hlauhawm khawp mai, chu chu power lamah chuan a tlangpui a ni a. Tin, khang bakah khan hei windmapping te, non-conventional sources energy, tunlaih chuan renewable energy te an ti tawh a. Hemi atang khan hmanni Eleventh Plan-a kan chan ve hman loh leh kan thawh ve hman loh kan hunte a harsat avangin Jawaharlal Nehru Solar Mission hnuaih hian engmah kan chang ve hman lova, kan dawng ve hman lova, chuvangin hei hi Twelfth Plan-ah min tihzawm sak an tiam a, North-Eastern State-a abik taka harsa zualte, tin, chutah chuan zangkhai zawk a nih theihna dan tur min hrilh a, an detail-na tam tak a awm a, tunah chuan sawi rih lo mai ila.

Engpawhnisela, hei hi min chhawk zangkhai tura beisei a ni a. Tin, kha bakah khan windmapping hi tunah hian tih mek a ni a, tin, solar energy angte pawh hi ruahman engemaw zat a awm a, mahse a tlai tawh em mai a, in ning tawh bawkw si a, khang kha chu ka sawi detail tawh lo mai a nge.

**Pu LALDUHOMA** : Pu Deputy Speaker, khawngaihin, khami Tuirial compensate chungchangah khan, atir ram neitu original ti mai ila 48 te dinhmun leh Court-a kalte dinhmun leh a neitu dik taka la inngai, la bang awm theite tan khan kawng a awm em tih te kha min han react sak lawk teh se.

**Pu LAL THANHAWLA, CHIEF MINISTER** : A pawimawh khawp mai, Pu Deputy Speaker. A tirah khan chhungkaw 48 dik tak kha an awm a ni. Dik lo ho kha an lal ta zawk tlat mai a, hun hmasaah khan. A pawl khawp mai a. Dik lo lalna ram hi chu a buai thin a. Chuvangin a dik kha lal se chu a buai lo mai tur a ni a, pawl tak a ni. Engpawhnisela, heng ho hi a hmu tlem tlemah an tang an ti lehngal a, hei hi chu en dik a ni ang a. Engpawhnisela, Tuirial hi a kal lehzel theihna tur atan risk kan la nasa a ni. Compensation pawh holam taka pek ang chi hi chu kan pe dawn lo reng reng te kan ti a, khatiang khan kan tiam a, chuvangin pek pawh kan tum lova. Engpawh nise, CBI in khatia Compensation dik lo taka lak kha an chhui a. Tunah hian engnge ni a tawpna ka hre mai lova, CBI kuta awm tawh a nih avangin. Tunah te hi chuan chutin khatin kan ti ang tih hi a harsa a. Amaherawhchu, khami genuine bik, kan hun lai pawha 48 kan tih te kha chu a tul ang angin Sorkar hian la ngaihtuah tur an nih ka ring a. Tin, an lo hmuh tlemna chhante pawh kha eng nge ni, a lem khan engatinge a luahlan? tih te pawh hi kan la chhui chiang zel turah ka ngai.

Fisheries te, thil dang tam tak sawi tur a awm a, khangte kha chu nakinah kan thawh rahah a la lang mai dawn a, sawi lo mai ilangin, ril te a titam palh ang e.

Mizoram House kha, ni e, kan sawi nual hlawm a. Mizoram House hi hei kan Chief Secretary-in Mizoram House hi an tawt thei lutuk a, an mangang khawp mai a, kan L.O te hi, tichuan kan Chief Secretary mangang lutuk hian House dangte hi ava zawt ringawt mai thin a, House dang tam takte Nagaland tih lohah chuan designated officer-te leh a thleng tur dik takte lo hi chu an thleng ve lo e, tih hi an lo hrilh dan a ni a, mahse keini hi chu khatiang khan kan ti lo thei lo a, chungte avang chuan Guwahati Mizoram House-ah khan Ambulance motor-te kan pe a, bus-te kan pe a, damlo ho tan. Tin, Doctor-te kan dah a, Doctor awmluh hnu khan senior nurse-te kan dah a, chutiang bawh chuan Kolkatta-ah tunah khuan engtin nge an hman chiah ka hrelo a, Ballygunge khu sikul naupangte leh sumdawng te nau deuh te damlo mangangte thlen nan kan ti a, milian chu thleng lo se kan ti a, amaherawhchu an thlen luh avangin kan hun hmasa khan Fridge te leh A.C zawng zawngte kha ka thiah tir vek a, khang ang thleng se kan tihte kha an thleng thei ta a, Bus kan pe a, senior nurse han hruai vel tur kan dah a, tichuan kan ti thin a ni. Chuvangin midangte nena compare theih hi kan ni chhiahlo a ni tih kha ka sawi duh a ni a. Chuan tunah pawh hian an tawt thei khawp mai a, an harsa a, Delhi-ah khuan Tergi Puri, a hmun hluiah khuan an sa meka, kan luh hma khan sak tan tur an ni a, mahsela, a contractor-te kha ka ko a, 'Kan inthlang anga kan sorkar dawn, Vasani Vihar ami anga chhia saw in sak ka duhlo reng reng, chuvangin kan ti tha vek ang,' ka ti a, an thawk lo ve mai a, tichuan kan han sorkar ta a, Architech pangngai tha lo deuh an lo hmang alo ni a, chuan Mizo Welfare Association te, MZP te pawhin chhe deuh kan nei leh ang tih kha an hlauh avangin chutia kan han ti chu an lawm viau a, a lan dante kha presentable deuhthe khan Delhi-a In ni ve awm renga han siamte kha kan tum a, mahsela MDMC chumi khami clearance a ngai an ti a, kum hnih kum thum a ngaih dawn avangin a pawnlam lan dan chu theihpatawpa an phal

chin kha siamthain a chhung lampangte hi tha rawh se kan ti ta zawk a, tun atanga thla thum velah hi chuan hawn theih beisei a ni. Chumi anih hnuah chuan Vashan Vihar saw Delhi Welfare leh MZP ten an hman theih turin office angreng deuhin kan siam sak ang kan ti a, tin kut ni vangthlaa Mizote han awmkhawm theihna turin a Hall-te khu tilianin tunah pawh inkhawm nan te an hman avangin an mamawhna zar kan phalsak mek a ni, chutiang chuan hman tangkai kan tum a ni.

Tichuan House han sawi takah chuan tunah hian Bombay kha member zahawmtak Pu Robiaka khan a rawn sawichhuakin ka hria a Mizoram House, Mumbai khu. A dang kha chu kan neih let leh dante a sawi tawh a, sawi tawh lo ilangin. Tunah hian builders-te nen MoU an signed tawhin ka ring a, a builder-te nena kan chan kha a inzat deuhthawa siam kha kan chang tam zawk tur a ni kan ti a, an remti zel ta thova. A list kha kum 90 nise a ti a, mahsela kum 65 ah kan tihthlak sak ta niin ka hria a, chutah chuan tunah hian an sa tan dawn a ni. Tuna House awm khu miliante leh Minister-te thlen nana kan tih a ni lova. Damlote zangkhaina turin, awlaina turin kan pan deuh ber, TATA Cancer Institute bul hnai kan zawng a, kan hun hmasaah khan, chutia kan dah chu a ni. Tin, miliante leh VIP te thlen nan kan ti lova, chuvangin, motor pawh kan dah sak lo a ni. A chhan chu khatiang zinte kha chu Sorkar-in a enkawl piahlaham damlo leh khatiang an nih loh kha chuan sorkar mawhah kan ngai lo. Anmahni inenkawl thei tur an nih avangin khatiang khan kan dah a ni. Tuna mi-ah erawh chuan VIP room te, a tul anga chhياتni thatnia han thutkhawmna turte engkim kha ruahman a ni a, Emporium thlengin, parking thlengin. Chutiang chuan tun atanga rei loteah sak tanna hun kum khat nge kum khat leh a chanve nge ka hre chiang leh ta lova, vela zo thei tura ruahman a ni a, a hnuhnung chutiang chu a ni a Pu Deputy Speaker.

Tin, Mizo tamnaah kan sum seng lova, khatiang kha kan neih theih zel chuan Mizo tan leh Mizo zirlaite tan a tha dawn a. Tichuan Maharashtra Chief Minister hnenah lehkha ka thawn a, ka lo ngaihtuah ang a ti a. Jaialalitha hnenah lehkha ka thawn a, Chennai-ah pawh, Mizo zirlaite pawh an tam a, chhungkua awmte pawh an tam a. Chuvangin, keinin kan dil bawk a, ani pawhin ka lo en ang e a ti a. Chuvangchuan, Mizo kan tamnaah chuan VIP te leh miliante tan nilovin a mamawhtute tan zawk khan ngaihtuahna kan siam a ni.

Tin, Bangalore-ah kan hun hmasaah khan an hmun tha lai berah an Chief Minister ho khan min pe a. A design, a in tur kha inkhawmna in pawha hman theih turin leh chhياتni thatniah, kutni vangthlaah, tiang khan design vek a ni a. Contractor kan thlang a, sum kan dah a, foundation stone pawh ka lay a. Tichuan Bangalore a mizo zawng zawng kha ruai kan thehsak bawk a ni. Amaherawhchu, kan tla ta a, a awm ta lova. Mahse kan mamawh si avangin kan sorkar hlim a Bangalore-a ka zuk kal khan Bangalore mizo ten nasa takin min lo ngen a. Tichuan chhياتni thatniah pawh hei tunah chuan thutna tur pawh kan nei lova, tiin min lo hrilh a. In kan hire a tunah hian thlatin cheng 80,000 emaw lai niin ka ring. VIP tan kan ti chiah lo na in a mamawh chu thlen theih a ni ang chu. Tiang chuan kan enkawl a, L.O. pakhat kan dah a. Mahse chu chu kan khawp dawn loh avangin Yeduruppa ka va hmu a, site ka dil a, a tha lai berah min pe ang che u ka ti a. Tin, vanneihthlak takin Suresh Kumar, Urban Development Minister alo awm ve bawk a. “E, kan pe ang, kan

ngaihtuhsak ang che u”, min ti a. Tunah hian Airport atanga Km 15, 20 vel lek a hlaah, a hmun hming ka hre ta mai lova. Chutah chuan a lian deuh hlek zawk leh a te deuh hlek zawk kha duhthlan tur min kawhmmuh a. A file siam ila, approved tih mai tur kha Special Secretary hnenah a awm reng a ni. Kolkata a kan L.O. te kan tir a, zuk ngaihven turin. Mahse Yeduruppa hi a corrupt avangin a bang dawn a. ‘Ka bang dawn lo’ a ti pung pung na in BJP hotute hian bang turin an ti a. Hetianga corrupt kan kawl reng chuan Congress ho hi kan bei na thei lovang corruption chungchangah an tih avangin bang turin an ti a. A sign hmanloh ka hlauh avangin nichinah ka Special Secretary hi lo zuk phone teh, a zan a zan pawhin lo put-up thei se ka zuk ti a. Engnge a an dawn ka hre lova, kan hloh leh palh ang tih ka hlau a. Chutiang chuan Mizote an awm tamnaah chuan kan zirlaite leh a hmang tangkai turte tan kan hotuten an siam a ni.

**Pu LALDUHOMA** : Sorkar hmasain Navi Mumbai-a Mizoram House neih tir an tum dan kha chu sawi tlak loh khawp a ni. A hmunah pawh kan en a, khawpui dang dangah khami system anga kan sum seng miah lova House neih thluah dan kha a awm a, lease period rei dan a zir te khan room kha kan chang tam thei ta a ni. Thil lo tih tawh atang khan alang reng mai a, official level-ah pawh kan tisual palh thei a, uluk taka zawn a nih loh chuan House kan nei ti si a Hall pakhat mah nei miah lo khan kan awm leh ang tih a hlauhawm a ni. Fimkhur taka tih ni tawh se tih kha kan sawi duh a ni e.

**Pu LAL THANHAWLA, CHIEF MINISTER** : A lawmawm e, tun tum amiah hian kan senior Minister-te nen kan sawi hova, amah pawh kan ko tel a, kan innawr a, a tha kan tih tlanah khan kan tlu ta a, chu chu Chief Secretary khan MoU signed-pui tur leh lo ruahmanpui turin kan ti a ni. Kan inrawlh turah pawh kan ngai lo nain a remchan em avangin Chief Minister Office-ah kan ko ve a, chutah chuan a nin tiang hian kan tawlh ang e an tihah kha chuan kan tha thawkhat hle a, Chief Secretary pawh lo bawhzui turin kan ti a ni. Airport kawng Kolkatta-ah khuan hun hmasa atang khan ram a awm a, a position kan la vat a, a bul maiah khuan TATA Institute kha an hawng tawh a ni. Chuvangin, tunkar lo awm turah hi chuan an sa tan thei tawh turah ka ngai a, kum 2 hmian an zo thei turah ka beisei a. Khumi khu kan zawh chuan a kawt setah TATA Institute kha a awm a, Bombay harsa taka kal ngai tawh lo turin, khulalah khuan a mamawhtute hi kan inhmakhua thei tawh turah kan ngai a ni.

Rel station kan neih turte kan hre tawh a, tin, a dang.... A tlai tawh em mai, kan tlan kual zung zung a nge. Hun hmasaah khan Member zahawmtak Pu Duhoma khan Burma nena kan inramrina turin Prime Minister leh Home Minister hnenah lehkha ka thawn a tih kha helai House-ah pawh a puang a, mahse keini khan kan opposed ta a, ZNP hotupa phei kha chuan nasa takin a opposed nghal a ni tih kan hre nghal a. A copy kha a duh a, Home-ah kan han dap a, kan hmu zo lova, Chief Minister Office-ah kan dap a, kan hmuzo lova, chuvangin, khatia House-a a tlak tak avang khan record awmlo turin an lo pawtchhe ta aniang tih hi ka ring deuh va, chuvangin, kan hmuzo tawh lo a ni, pawhchhiatin a awm tawh a niang.

Tin, Principal Secretary 2 kha zawh awm tak a ni a, Principal Secretary Planning kan nei sa a, IAS Officer, State Planning Board-a kan Secretary hi State Planning Board-ah ringawt hi chuan anni ang thiamna nei thawh tham a awm loh avangin Planning ho a tul leh bawk si a, hei hi lo thawhpui teh se tih mai a ni a. Chuvangin, Principal Secretary kan designate ve a, tikhan Principal Secretary, Planning 2 (PU LALDUHOMA : Ex-officio a inti si lova, kha kha a lawm, Principal Secretary tiin a thawn tlat a ni). Nia, Member Secretary, State Planning Board and Ex-Officio Principal Secretary, Planning tih a ni.

Tin, ILS chungchang thu Dr. R. Lalthangliana, Member zahawmtakin a rawn sawi chhuak a, kha kha Parliamentary Committee an lo zin khan AAI Chairman kha an ko tel a, ani khan khilai kan chaw einaah khan kan approve ang tih kha min tiam a ni. Tichuan, an haw thla ta a, khami karah khan North East Shuttle thlawhna te kha a accident a, a ban pakhat kha a lo su chhia a. Chuvang chuan siamthat leh kha a ngai ta a, tunah hian calibration engkim an rawn ti ve tawh a, Delhi-ah thuneituten an approve turin tunah hian nghah mek a ni, kan neih theih thuai tawh kan beisei. ILS hi a pawimawh a, chuvangin ngawrh takin kan hotuten an umzui a ni.

Tin, Member zahawmtak Pu Duhoma khan Medicinal Plant a sawi pah khan hei hi a pawimawh khawp mai a, nakinah chuan kan la tangkaipui tur anih rualin Naubante hi a lo chereu nasa tawh a, Zokhuaah hian khawchhak lampanga unaute leh Cachar phai vaihote khuan an lo la nasa mai a. Heng hi khap turin kan ti a, State Sorkar atangin kan khappui a ngai dawnin ka ring a ni. Chuti anih loh chuan heng hi nakinah chuan kan ram thil hlu turte an la ni a, hlutsak nachang kan hriat hi a pawimawh a ni.

Tin, District panga an hawng a, engmah a ruangam an ti lova, chuvangin keinin kan buaipui a, tih hi a ri fo mai a, District pangnga kan hawn kha Pu Ch.Chhunga hun lai atangin District Reorganization Committee, Chief Minister zahawmtak Pu Chhunga khan a din a, chutah chuan member pakhatah min dah ve a ni. Kuhvakhawr theha intheh mai mai chi a ni lova, kal pah a District Headquarters hi inpek mai mai chi a nilo tih hi kan hotute khan an hre chiang khawp mai a. Chuvangin reitak ngaihtuah a ni a, Chairman-te pawh kha vawihnih vawithum an inthlak a. Tin, kan han Sorkar leh khan Chief Secretary kan Chairman tir a, hun hmasaah khan chumi ho pawh chuan reitak kan ngaihtuah a, tiang khan District Headquarters kha tlanche chungin kuhvakhawr thehin kan theh ve lova, D.C. te pawh kan dah hman vek a, hawn pangngai takin kan hawng hman vek a, amaherawhchu a tul zawng zawng department zawng zawng kha chu kan dah hman lo a ni. Chuvangin tuna khaw awm zawng zawng District headquarters-a puan ang hi chu a ni lemlo tih hi chu kan hriat a ngai. Helai Champhai kawngah pawh hian Kawlkulh khi chu lo pe tel law law se chu ramri siamte pawh a awl deuh tur a ni a, an pe lo ting bawk si a, Selingte khi lo pe tel se a awlai tur a nia. Chuvangin ram rorelnate leh District Headquarters-te leh hetiang re-organisation-te hi inkhualtelemna a ni lova, tih takzeta neitu rilru pua ngaihtuah chi a ni a. Vote zawn nana hman mai mai chi pawh a ni lo tih hi Pu Deputy Speaker, helai hian sawi rik thain ka hria.

Kan Sorkar hnathawkte hi duat kan duh a, nichinah kan Finance Minister zahawmtakin a sawi tawh a, han induat turin sum leh paite a lo mamawh avangin kan duh angin kan ti thei lova, pawl kan ti a. Amaherawhchu, an welfare hi

kan ngaihtuah nasa a ni. Kan ram development backbone-te an nih avang hian an welfare hi kan ngaihtuahsak a, tha taka an thawh theihna tur atana, phur taka an thawh theihna tur atana ngaihtuahpuitu turte kan ni tih hi kan inhria a ni. Amaherawhchu, sum harsatna avang te, thil hrang hrang avangin duh angin kan ti thei lova, pawl kanti khawp mai a. Hei hi anni pawhin min hrethiam a, hei Federation hotute nen kan inkawm a, neitu rilru an pu hle a, kan sum harsatnate pawh hi an hrethiam hle a. A hnuai lampang deuh lo hrethiam lo an awm pawhin harsa takin an inhrilh hram hramin an inbengdai hram hram ve te hi kan lawm takzet a. Hengte avang pawh hian theihpatawpa an phu ang tawk aia thaa enkawl pawh hi kan duh a ni. Amaherawhchu, sum harsatna, anmahni pawhin min hriatthiampui ang hian keimahni pawhin kan duh angin kan enkawl thei lo hi pawl kan tikhawp mai. Amaherawhchu, inhrethiam takin kan la kal chho zel te hi kan lawm takzet a ni.

Tin, New Capital Complex tih hi sawlai Millenium mina kan lo tum hmasak tawhte a tichhe vek ang khan a pawl khawp mai a. Sawlai saw Pu Robula, Chief Engineer a nih hunlai atangin Assam Rifles min pek a ni a. Ani a'n awm loh hnu khan Pu Ramhluna Khiangte, Chief Engineer niin sawlai saw Master Plan an siam a, tha takin an ruahman a, New Secretariat Complex kan ti a ni, capital tham a nih loh avangin. Tichuan, New Capital Complex tih avang hian tunah hian mimalte leh Kohhran hrang hrangten hmun neih ve an rawn tum a, thlanmualte pawh a lo awm hman tawh a ni. Hei hi pawl kan ti a. Chuvangin, New Secretariat Complex ti ilangin civil population-in beisei ngam loh tura siam hi atir atanga kan hotute siam anih avangin New Secretariat Complex kan ti a ni. New Capital Complex kan tih chuan School te an rawn dil zel a khatiang khan a Secretariat ber kha nekchepin a awm dawn a, chuang chuan, chutiang chu a tawh lohna turin khatiang khan New Secretariat Complex tiin kan hotuten an thlak a, hei hi mipui pawhin min hriatpui se kan duh a ni.

Tin, Judiciary hi a pawimawh a, Chief Justice-te nen pawh kan sawihova training-te pawh an mamawh a, tin, Judicial Academy an ti nge ni ka hre thiam lova engemaw ni Academy-te pawh min sawi hmuh a, tichuan, High Court-te pawh hi a hranpaa neih kan duh a kan tum mek a. Tuna building awm mek Raj Bhavan bul saw hei hi nei mai rawh u kan ti a. Tin, a thlang lama in saw Subordinate Courts tan kan ti a, sawlai DC Complex-a awm saw, sawn pheina turin mahse Chief Justice 2 in an en tawh a, tha an ti thei ngang lova, tuna Raj Bhavan tura kan sak saw Mosolman biak in ni mang silo engtingge kan hman ang an ti a, an au lauh luah nan pawh a that hmel viau va, mahse an pawm thei lo a ni. Chuvangin kan PWD te design tha turin an ti a, an design tha tawh mek a, vanneihthlak takin nizan khan kan haw hnuin Law Minister tharin min rawn phone a, Judiciary-te in la nei tha lo tih ka hria a, High Court-te pawh in la nei lo tih ka hria a, a tul ang angin DPR rawn siam ulangin Judges Bungalow turte nen lam a tul angin ka lo buaipui ang che u a rawn ti a, a lawmawm hle a. Chuvangin kan PED in tuna design an rawn siam pawh hi kan Chief Justice hian a approve tawh a, amah pawh hi lo zin a tum a, hna tan theihna turin chutiang chuan hmalak a ni. Independent Judiciary neih hi kan duh a, khu lam atanga min rawn kep hian helaiah hian Justice a awm thei loin kan hria a. Tin, chu bakah harsatna tam tak kan la tawh theih avangin tiang zawnga kal lo tur khan kan hotuten keimahniin kan neih theih ngeina turin neih ngei hi kan duh a, chutiang zawng chuan kan hotute hmalakna hi a la kal tluang zel a ni tih hi ka'n sawi



duh a. Hei kan hotute hriat tur hi a tam khawp mai a mahse ka titawp dawn tawh a.

Tukinah khan member zahawmtak Pu Thlenga khan M/S BR Engineer, Kolkata te khan 700 crores man an hmu a ti a, kan hotute kan bih chian tir a crore 7,700 nen chuan inthlau tak a ni. Chhiar kawp ka thiam loh avangin matric hi ka fail ka fail tawh a, kei aiin a thiam lo emaw ni chu aw ka ti a ni. Tin, MNF hunah khan PRM Power Project tihte khan vaibelchhe 5 nuai 99 sing 1 leh 425 an hmu a, hei nen hian a inthlau tehchiam lo a nih hi. Chutiang chu a ni a, chuvangin thil maksak tehchiam chu alo ni lo e tih kha House hi ka hrih duh a ni. 3% pawh a tling lo a inthlauhna kha. Kha kha a nia Pu Deputy Speaker, 3% lakte kha a pawh khawp mai, kan hnain a chhiat pahaha, tuna kan miten zir ve zel an tum a, kan inkhap tang tang a ni Pu Deputy Speaker, 50% profit will come to me tih kha. Engpawh nise Pu Deputy Speaker, vawiina kan discussion hi lawmawm ka ti khawp mai a, kan Finance Minister zahawmtakin tha takin a rawn windup tawh a, tunah pawh hian han sawi tur tam tak a awm a, Minor Irrigation chungchangah te pawh hian Post hi 41 lai fill up tur kan nei a, chuan member zahawmtak Pu Zothangliana pawh kha lo lungngai lo sela sawlaia a thar pawh kha staff kan pe thuai ang. In mamawh chu in dil hma pawhin inpa vana miin a hre vek a ni tih ang deuh khan mamawhte hi hriat a ni a, mahsela a hunin a daih lo a ni tih kha kan hriattir duh a ni. Awle, Pu Deputy Speaker, kha kha ni rih mai sela.

Vawiinah hian keini ho zawng zawng hi a chhe lai siamthatu tur Pathian ruatte, kan kohhran mite chhanna kan ni. Chuvangin he ramah hian rinawmna kan mamawh a, kan ram leh hnam hian enge kan mamawh ber tih hi kan thlir kan thlir hian kan mamawh ber chu Lal Isua Krista hi a ni. A dawtah chuan Moral Reformation a ni, chhungkaw nun, kohhran nun, khawtlang nun siamtha tur hian moral reformation hi kan mamawh hle a ni. Chuvangin dikna a lal kan duh a, rorelna dik, rorelna fel, rorelna tha awm se kan duh a, chutiang atan chuan theihtawp kan chhuah tlang a, keini congress MLA 32 chauh hi chutianga thawk tur kan ni lova, helai House-a member zahawm tak takte hi a neitu tak tak kan nih avangin chutianga he ramah hian rorelna dik, rorelna tha, rorelna fel a awm theihna tur atana thawktu turte kan ni. Tin, vawiinah keini ho hi inthlan hmaa kan ram kohhrante leh mipuite thahnemngai taka an tawngtaia an dil, rorelna dik, rorelna fel, rorelna tha anih theihna tur atana thlante kha kan ni tih hi kan inhriat a ngai a. Chuvangin a hunah chuan inhnial leh khatiang kha a awm tur a ni.

Amaherawhchu rorelna tha, rorelna dik a awm theihna tur atana in tanpui tawn tur kan ni a. Vawiinah hian sorkar chhungah thil diklo, thil thalo eirukna, hlemhletna, kut tlingloa sum lakna te a awm anih chuan inhriattir vat nisela, chu chu tidik turin kan za hian kan fihlim tawk a ni tih hi ka sawi duh a. Chuvangin vawiinah hian chutiang zawnga he ram hi kan kal a tul a, kan zinga ringlo mite, pawnlam atanga min rawn thlir tute pawh hian ram chu Pathian hnam thlan an inti bawk a, an lo nih tak tak hi mawle. Lal Isua Krista chenchilh ram an lo nih hi mawle, an tih theih tura kan thawh hi a pawimawh. Chumi atan chuan inpui tawn tur kan ni.

Tin, a chhe lai kan siamthat dawn chuan a chhe lai hriat loh te kan nei thei a, inhrih zung zung a tha, a siamtha thei turin, a tidik turin kan ngam tawk a, an fihlim tawk a ni tih hi Zoram mipuite ka hriattir duh a. Chungte avang tak pawh chuan

min venpuitu turte hi kan duh a, tidiktu kan zavaiin kan nih a tul, kawng tinrengin. Chuvangin ram neitute, ram leilung fate hi kan pawimawh a, theihtawp kan chhuah tlan a pawimawh. Vawiinah hian nuai 10 leh sing kua emaw kan ni a, chhiarpui hnuhnung berah, chuta nuaihnhit zet chu ram leilung fate ni lo hi an ni chiang khawp mai, chung ho chuan kan thatna tur hian an thawk dawn lova, keini ram leilung fate hi kan ni tih hi kan awmna hmun theuhah kan hriat a tul a. Kut hnathawk kan nih pawhin, inhlawhfa kan nih pawhin, sawrkar hnathawk kan nih pawhin, politician kan nih pawhin, sumdawng kan nih pawhin, kharchhawng kan nih pawhin, a siam thatu tur chu keini hi kan ni tih kan inhriat a pawimawh. Chuvangin, kohhran mite leh zoram mipuite pawhin sawrkar dik, sawrkar tha, sawrkar fel a awm theihna tur atana bang lova min tawngtaipui a ngai tih hi kan hriat zual sauh sauh ka duh a ni.

Chuvangin, Pu Deputy Speaker, heng kan sum hmanna tur pawh hi a tam lam a ni lo a, hman dik leh dik loh lampang hi a ni a, chuvangin hman dik a nih theihna tur atan member 40 te hi a vengtu tur kan ni tih pawh kan inhriat a tul a ni. Zai taka kan hman a tul a ni. Tichuan, ka Demand No. 1 Legislative Assembly, ₹ 11,61,35,000; Demand No. 2-na Governor ₹ 10,60,000; Demand No. 3-na Council of Ministers ₹ 2,02,50,000; Demand No. 5-na Vigilance ₹ 4,12,55,000; Demand No. 11-na Secretariat Administration ₹ 49,87,42,000; Demand No. 15-na General Administration Department ₹ 64,33,75,000; Demand No. 33-na, Soil & Water Conservation ₹ 40,30,69,000; Demand No. 35-na, Fisheries ₹ 20,01,66,000; Demand No. 39-na Power & Electricity ₹ 249,92,41,000; Demand No.45-na PWD ₹ 299,79,64,000 leh Demand No. 47-na, Minor Irrigation ₹ 82,01,73,000. A vaiin ₹ 824,14,30,000 hi he House zahawm tak hian min pass pui turin ka rawn ngen a ni, ka lawm e.

**DEPUTY SPEAKER** : Kan Chief Minister-in a Demand-te a rawn wind up a, ka rin aiin a ti reilo tak tak a, ka lo inseh ruh angreng tehlul nen. Engpawhnisela, a Demand-te pass a rawn dila, kan buk dawn anga. A Demand No. 1 Legislative Assembly, ₹ 11,61,35,000; Demand No. 2-na Governor ₹ 10,60,000; Demand No. 3-na Council of Ministers ₹ 2,02,50,000; Demand No. 5-na Vigilance ₹ 4,12,55,000; Demand No. 11-na Secretariat Administration ₹ 49,87,42,000; Demand No. 15-na General Administration Department ₹ 64,33,75,000; Demand No. 33-na, Soil & Water Conservation ₹ 40,30,69,000; Demand No. 35-na, Fisheries ₹ 20,01,66,000; Demand No. 39-na Power & Electricity ₹ 249,92,41,000; Demand No.45-na PWD ₹ 299,79,64,000 leh Demand No. 47-na, Minor Irrigation ₹ 82,01,73,000. A vaiin ₹ 824,14,30,000 te hi pass remti apiangin 'Rem ti' ti ru le. Remti lo kan awm em? Kan awm lo maw? Chuti chu Pu Lal Thanhawla, Chief Minister zahawmtak Demand No. 1 Legislative Assembly, ₹ 11,61,35,000; Demand No. 2-na Governor ₹ 10,60,000; Demand No. 3-na Council of Ministers ₹ 2,02,50,000; Demand No. 5-na Vigilance ₹ 4,12,55,000; Demand No. 11-na Secretariat Administration ₹ 49,87,42,000; Demand No. 15-na General Administration Department ₹ 64,33,75,000; Demand No. 33-na, Soil & Water Conservation ₹ 40,30,69,000; Demand No. 35-na, Fisheries ₹ 20,01,66,000; Demand No. 39-na Power & Electricity ₹ 249,92,41,000; Demand No.45-na PWD ₹ 299,79,64,000 leh Demand No. 47-na, Minor Irrigation ₹ 82,01,73,000. A vaiin ₹ 824,14,30,000 te hi lungrual takin he House hian a pass ta a ni.

**Pu LAL THANHAWLA, CHIEF MINISTER** : Pu Deputy Speaker, Member zahawm takte leh i hnenah lawmthu ka sawi e.

**DEPUTY SPEAKER** : Tunah hian bill pakhat lak tur kan la nei a. Kan Minister zahawmtak Pu H. Liansailova, “The Mizoram Appropriation (No.3) Bill, 2011” hi House-ah introduce phalna rawn dil rawh se.

**Pu H. LIANSILOVA, MINISTER** : Pu Deputy Speaker, i phalna leh he House zahawmtak remtihna hian “The Mizoram Appropriation (No.3) Bill, 2011” hi introduce ka rawn dil e.

**DEPUTY SPEAKER** : Le, introduce a rawn dil a. Rem kan ti em? Rem kan ti maw. Awle, rem kan tih chuan a copy kha han sem ula. Minister-in introduce a rawn dil a, kan phalsak tawh a, ngaihtuah turin rawn move sela pass pawh rawn dil nghal mai sela.

**Pu H. LANSILOVA, MINISTER** : He bill ka rawn putluh hi tam tak sawi tur a awm lova, demands kan sawiho a pumpui `43,67,34,29,000/- kan passed ang taka hmanna turin appropriation hi kan pass a ngai a, chuang chuan he bill hi chutiang anga min pass sak a, kan pawisa han pass ang ang kha hman theih nghal anih theihna turin a lo tul ta a ni a, He House hian min pass sak mai turin ka han dil nghal a ni e.

**DEPUTY SPEAKER** : Awle, kha a rawn move-a, pass a la ni lova kan hre theuh a, hemi bill hi a sawiho theih loh a ni lova, amaherawchu Demand lamah khan kan pass ho tawh a, hemi hi chu in hriat angin a chabi kha a ni deuh ber a. Kan ti laklawh ta sa sa kan han sawiho leh te te dawn em ni. Bill neituin pass a rawn dil a, tunah kan buk dawn ang a “The Mizoram Appropriation No. 3 Bill, 2011” hi pass rem ti apiangin ‘rem ti’ ti ru le, remtilo kan awm em? Kan awm lo maw, Awle, “The Mizoram Appropriation No. 3 Bill, 2011” chu he House hian lungrual takin a pass ta a ni.

Awle, tikhan wawiina kan business chu kan zo ta a, dar 9:10 P.M. pawh a lo pel ta a, kan bang dawn tawh ang a, naktuk ni 28.7.2011(ningani) dar 10:30 A.M.-ah kan thu khawm leh dawn nia, in zavaiin mangtha ule.

Sitting is adjourned at 9:15 P.M.